



書叢本基學國

集全生先溪望方

(二)

撰 苞 方

行發館書印務商

望溪先生文集卷九

紀事

左忠毅公逸事

先君子嘗言。鄉先輩左忠毅公。視學京畿。一日。風雪嚴寒。從數騎出。微行入古寺。廡下一生伏案臥。文方成草。公閱畢。卽解貂覆生。爲掩戶。叩之。寺僧則史公可法也。及試。吏呼名至史公。公瞿然注視。呈卷卽面署第一。召入使拜夫人。曰。吾諸兒碌碌。他日繼吾志事。惟此生耳。及左公下獄。史朝夕獄門外。逆闔防伺甚嚴。雖家僕不得近。久之。聞左公被炮烙。旦夕且死。持五十金。涕泣謀於禁卒。卒感焉。一日。使史更敝衣草屨。背筐。手長鑊。爲除不潔者。引入。微指左公處。則席地倚牆而坐。面額焦爛不可辨。左膝以下。筋骨盡脫矣。史前跪。抱公膝而嗚咽。公辨其聲。而目不可開。乃奮臂以指撥眚。目光如炬。怒曰。庸奴。此何地也。而汝來前。國家之事。糜爛至此。老夫已矣。汝復輕身而昧大義。天下事誰可支柱者。不速去。無俟姦人構陷。吾今卽撲殺汝。因摸地上刑械。作投擊勢。史噤不敢發聲。趨而出。後常流涕述其事。以語人曰。吾師肺肝。皆鐵石所鑄造也。崇禎末。流賊張獻忠。出沒蘄黃潛桐間。史公以鳳廬道奉檄守禦。每有警。輒數月不就寢。使將士更休。而自坐幄幕外。擇健卒十人。令二人蹲踞而背倚之。漏鼓移。則番代。每寒夜。起立振衣。

裳。甲上冰霜迸落。鏗然有聲。或勸以少休。公曰。吾上恐負朝廷。下恐愧吾師也。史公治兵。往來桐城。必躬造左公第。候太公太母起居。拜夫人於堂上。余宗老塗山。左公甥也。與先君子善。謂獄中語。乃親得之於史公云。

高陽孫文正逸事

杜先生峕。嘗言歸安茅止生。習於高陽孫少師道公。天啓二年。以大學士經略薊遼。置酒別親賓。會者百有客。中坐前席而言曰。公之出。始吾爲國慶。而今重有憂。封疆社稷。寄公一身。公能堪。備物自奉。人莫之非。如不能。雖毀身家。責難追。況儉穀乎。吾見客食皆鑿。而公獨飯粗。飾小名以鎮物。非所以負天下之重也。公揖而謝曰。先生誨我甚當。然非敢以爲名也。好衣甘食。吾爲秀才時。固不厭。自成進士。釋褐而歸。念此身已不爲己有。而朝廷多故。邊關日駭。恐一旦肩事任。非忍饑勞。不能以身率衆。自是不敢適口體。強自勸厲。以至於今。十有九年矣。嗚呼。公之氣折逆奄。明周萬事。合智謀忠勇之士。以盡其材。用危困瘡痍之卒。以致其武。唐宋名賢中。猶有倫比。至於誠能動物。所糾所斥。退無怨言。叛將遠人。咸喻其志。而革心無貳。則自漢諸葛武侯而後。規模氣象。惟公有焉。是乃克己省身。憂民體國之實心。自然而愼乎天下者。非躬豪傑之才。而概乎有聞於聖人之道。孰能與於此。然惟二三執政。與中樞邊境。事同一體之人。實不能容易。曰。信及豚魚。媚嫉之臣。乃不若豚魚之可格。可不懼哉。

石齋黃公逸事

黃岡杜蒼略先生客金陵。習明季諸前輩遺事。嘗言崇禎某年。余中丞集生與譚友夏結社金陵。適石齋黃公來遊。與訂交。意頗洽。黃公造次必於禮法。諸公心嚮之。而苦其拘也。思試之。妓顧氏。國色也。聰慧通書史。撫節安歌。見者莫不心醉。一日大雨雪。觴黃公於余氏園。使顧佐酒。公意色無忤。諸公更勸酬。劇飲大醉。送公臥特室。榻上枕衾茵各一。使顧盡弛褻衣。隨鍵戶。諸公伺焉。公驚起。索衣不得。因引衾自覆。薦而命顧以茵臥。茵厚且狹。不可轉。乃使就寢。顧遂暱近公。公徐曰。無用爾。側身內向。息數十轉。卽酣寢。漏下四鼓。覺轉面向外。顧佯寐無覺。而以體傍公。俄頃公酣寢如初。詰旦。顧出具言其狀。且曰。公等爲名士。賦詩飲酒。是樂而已矣。爲聖爲佛。成忠成孝。終歸黃公。及明亡。公繫於金陵。在獄日誦尙書周易。數月貌加豐。正命之前夕。有老僕持鍼線向公而泣曰。是我侍主之終事也。公曰。吾正而斃。是爲考終。汝何哀。故人持酒肉與訣。飲啖如平時。酣寢達旦。起盥漱更衣。謂僕某曰。曩某以卷索書。吾旣許之。言不可曠也。和墨伸紙。作小楷。次行書。幅甚長。乃以大字竟之。加印章。始出就刑。其卷藏金陵某家。顧氏自接公時自懟。無何歸某官。李自成破京師。謂其夫能死。我先就縊。夫不能用。語在搢紳閒。一時以爲美談焉。

明禹州兵備道李公城守死事狀

崇禎十四年冬十有二月。流賊寇禹州。兵備道李公乘雲。到官始二十四日。按籍閱軍伍半虛。守禦具一

無藉。知州事某請迎降。公怒斥之曰。此吾死所也。召士民。激以大義。共登陴。賊死傷甚衆。城破。公率衆巷戰。猶手刃十數人。力屈被執。方是時。河南守令多望風降伏。獨禹州士民殊死戰。賊入。下令屠城。公奮呼。謂賊曰。城守吾事也。吾令衆守城。不敢不守。猶汝令衆攻城。不敢不攻。民何罪。獨吾一身。當任汝殘殺耳。賊意解。收屠城令。因欲屈公。公憤罵不屈。乃立公爲質。而聚射之。徵死猶寸磔焉。公初至禹時。徵王支屬。在禹者凡十七家。公議徵土人訓練。而資餉於宗藩。知州事某持之。宗藩莫應。及城破。十七家無一脫者。知州事某叩首乞哀於賊。公忽奮起。以足蹴其面。曰。汝負國勦民。尙思向狗彘求活邪。賊既去。士民收骸骨。棺斂建祠。私諡忠烈。春秋時祀。與公同難者。駐防千總張某。吏目周某。州人候選州同知余全生。遙授訓導趙日躋。太學生侯九韶。庠生周鳴岐。李儀化。田種玉。陳懋能。皆配享。公磔於州城外西南隅大路旁。槐樹下。其樹至今存。故老過之。猶或爲歎歔流涕云。公既歿八十年。夏峯孫徵君曾孫用禎。爲州學正。徵於禹人。而屬余爲之狀。

記李默齋實行

余將受室。先兄命之曰。人之大倫五。以吾所聞見。惟婦死其夫。及守貞終世者爲多。子之能孝者差少焉。臣之能忠者差少焉。友之能信者差少焉。而實盡乎弟道者。則未見其人。其所以然。特由私其妻子及貨財耳。余行四方。竊以兄所言。陰求之士友間。其疏節不違者。蓋無幾人。蔚州李□□余同年友也。嘗道其

兄默齋及嫂氏之賢。其事父母。夫婦帥先而盡瘁焉。□□有急。傾貲產以佐之。化於其妻無難色。嘗遭家禍。獨身當之。流離毒痛。幾死而不忍累羣弟。難既解。益勤家事。督課子弟。□□令高密。以運餉出塞。爲攝縣事者所誤。默齋之卒也。□□尙畱滯山東。家人懼其憂勞中。不能復勝。哀慟大功。衰將脫。尙不敢以告。用此觀之。默齋之仁恩。所以愼乎門內者可知矣。先兄所願見而不可得者。越數十年而垂有其人。乃傳所聞。以式吾子姓焉。

書萬烈婦某氏事

烈婦某氏。江東巨室婢也。妻僕萬某。早寡。守貞二十年。年四十餘。會其主以事當與妻謫戍。妻泣而謂烈婦曰。汝無子女。單獨一身。能充解脫我。俾幼稚有依。吾子孫當世祀汝。且汝少長吾家。主父年七十矣。猶汝父也。汝何嫌。烈婦曰。雖然。非禮也。固請。旣而曰。吾之生贅也。亦無不可。但自當官充解後。陸行必異車。水行必異舟。逆旅必異室。抵戍之日。吾有以自處矣。旣行。至中途。其主忽戲曰。汝爲吾妻。官作之合矣。而不同寢處可乎。烈婦曰。吾以主爲父。父何所不得老婦人。而忍出此言。察其主意不悛。越日夜中。自經死。聞者莫不流涕。皆曰。烈婦之志足悲矣。而其初之義。則未審焉。其諸苟文若之儔。與方子曰。操之心。途之人皆知之。文若爲之謀主。以固其操。柄文若死而操之惡已成矣。是猶共剽而終以不取分爲義也。若烈婦之主。身在縲紲。垂死之年。而忍爲大惡。則豈烈婦所及料哉。烈婦之行也。早以死自處矣。不得已乃中

道而潔其身。蓋自信其泥而不滓者也。豈可使與文若同名而不辨哉。

西鄰愍烈女

愍烈女失姓氏。余西鄰某家婢也。主父行賈。妻某氏。與豎通。烈女數切諫。謀并汚之。以死拒。連衣裳。中固縫紵。某氏有母同居。一夕陽怒。以綿裹昵物。置烈女口。因築入喉閒。以杙抉其陰而死。被短布單衣。襲蔽葛。蒲蔽首及膝。投東鄰宅後方塘中。賄隸胥報縣。有寒女自沈。莫知其誰何。三日命掩埋。既而迹頗著。鄰里皆知之。而無以詰也。烈女之死也。尸不可舉。或助之。易衣負以出。久之。求索不應。怒而爭。乘醉詣郡言狀。衆皆曰。此天也。及對案。某氏言婢出惡言。詈其母。怒而鞭之。夜自經。時烈女尸已焚棄絕蹤。而律文主。父主母以罪杖。僕婢至死。無抵法。遂釋不推。時鄰某適歸自遠方。過姻家。聞故。掉臂而去。某氏聞之。遂因其貲。挾豎遷居。又踰年。合爲夫婦。昔先王知民性之不可枉也。故獄之疑者。訊之羣臣。訊之羣吏。訊之萬民。而又議事以制。不徵於書。其典獄者。又能悉其聰明。致其忠愛以盡之。所以下無遁情。而罰必中也。自三季以後。民抗敝以巧法。吏昏瞶以決事。貞良者枉死於無告。淫慝者安利而無殃。求其所以然者。而不得也。此佛之徒。所以因民之惑。而爲之說與。

呂九儀妻夏氏

婦人居常而早寡者。無死道也。夫不以良死。則義可死。而堂有舅姑。室有子。或己之父母篤老。而無兄弟。

則其死也。雖當於義。而傷於恩。蕪湖呂九儀死於仇。其妻夏氏將死之。姑止之。踰年。仇抵死如法。夏氏遂修舊業。持門戶。於今二十年。姑既歿。二子受室而成家矣。其始之欲就死也。義終則不愆於義。亦不傷於恩。故夏氏之生也。賢其死也。

逆旅小子

戊戌秋九月。余歸自塞上。宿石槽。逆旅小子。形苦羸。敝布單衣。不襪不履。而主人撻擊之甚猛。泣甚悲。叩之東西。家曰。是其兄之孤也。有田一區。畜產什器粗具。恐孺子長而與之分。故不恤其寒饑而苦役之。夜則閉之戶外。嚴風起。弗活矣。余至京師。再書告京兆尹。宜檄縣捕詰。俾鄉鄰保任而後釋之。逾歲四月。復過此。里人曰。孺子果以是冬死。而某亦暴死。其妻子田宅畜物。皆爲他人有矣。叩以吏曾呵詰乎。則未也。昔先生以道明民。猶恐頑者不喻。故以鄉八刑糾萬民。其不孝不弟不睦不嫻不任不恤者。則刑隨之。而五家相保有罪。奇袤則相及。所以閉其塗。使民無由動於邪惡也。管子之法。則自鄉師以至什伍之長。轉相督察。而罪皆及於所司。蓋周公所慮者。民俗之偷而已。至管子而又患吏情之遁焉。此可以觀世變矣。

望溪先生文集卷十

墓誌銘

李剛主墓誌銘

李堪字剛主。直隸蠡縣人。其父孝愨先生。與博野顏習齋爲執友。剛主自束髮卽從之遊。習齋之學。其本在忍嗜欲。苦筋力。以勤家而養親。而以其餘習六藝。講世務。以備天下國家之用。以是爲孔子之學。而自別於程朱。其徒皆篤信之。余嘗謂剛主。程朱之學。未嘗不有事於此。但凡此乃道之法迹耳。使不由敬靜以探其根源。則於性命之理。知之不真。而發於身心。施於天下國家者。不能曲得其次序。剛主色變爲默然者久之。吾友王源崑繩。恢奇人也。所慕惟漢諸葛武侯。明王文成。而目程朱爲迂闊。見剛主而大說。因與其師事習齋。時年將六十矣。余詰之曰。衆謂我目空並世人。非也。果有人敢自侈大乎。剛主嘗爲其友治劇邑。期年政教大行。用此名動公卿間。諸王延經師主闔外者。爭欲致之。堅不就。康熙庚午。嘗舉乙科。晚歲授通州學正。浹月。以母老告歸。長官不能奪也。崑繩慨不快意。旣葬二親。遂漫遊。將求名山大壑。而隱身焉。雖妻子不知其所之。余與剛主每蹙然長懷。而無從迹之。數年。忽至余家。曰。吾求天下士四十年。得子與剛主。而子篤信程朱之學。恨終不能化子。爲是以來。畱兼旬。盡發程朱之所以失。習齋之所以得。

者。余未嘗與之爭。將行。憮然曰。子終守迷。吾從此逝矣。使百世以下聰明傑魁之士。沈溺於無用之學而不返。是卽程朱之罪也。余作而言曰。子之言盡矣。吾可以言乎。子毋視程朱爲氣息奄奄。人觀朱子上孝宗書。雖晚明楊左之直節。無以過也。其備荒浙東。安撫荊湖。西漢趙張之吏治。無以過也。而世不以此稱者。以道德崇閎。稱此轉渺乎其小耳。吾姑以淺事喻子。非其義也。雖三公之貴。避之若浼。子之所能信於程朱也。今中朝如某某。子夙所賤惡。倘一旦揚子於朝。以學士或御史中丞徵子。將亡命山海。而義不反顧乎。抑猶躊躇不能自決也。吾願子歸視妻孥。流行坎止。歸潔其身而已矣。崑繩自是終其身口未嘗非程朱。其後。余出刑部獄。剛主來唁。以語崑繩者語之。剛主立起自責。取不滿程朱語載經說中已鐫版者。削之過半。因舉習齋存治存學二編。未愜余心者告之。隨更定曰。吾師始教。卽以改過爲大子之言然。吾敢畱之爲口實哉。習齋無子。剛主中歲遷博野。爲葺祠堂。以收召學者。博野去京師三百里。剛主自來唁。後復三至余家。一問吾母之疾。再弔喪。終則自計衰疲。恐不能更出。而就別余。驅柴車。長子習仁御。往返芻秣。皆載車中。知余時窶且艱也。嗚呼。卽是而剛主之勤於身。式於家。施於人。而措注於事物者。居可知矣。剛主言語溫然。終日危坐。肅敬而安和。近之者不覺自斂。抑以崑繩之氣。既老而爲剛主屈。以剛主之篤信師學。以余一言而翻然改。其志之不欺。與勇於從善。皆可以爲學者法。故備詳之。而餘行則不具焉。剛主卒於雍正某年某月。年七十有口。父諱某君。母馬氏。生母馬氏。明錦衣衛指導斌女。明亡家落。歸孝

慤生剛主兄弟妻某氏子三人長習仁早天次習禮次習中皆邑庠生以某年某月某日葬於某鄉某原銘曰

習齋矢言檢身不力口非程朱難免鬼責信斯言也趨本無歧各從所務安用詆嫖君承師學固守樊垣老而大覺異流同源不師成心乃見大原改過爲大前聞是尊琢瑕葆瑜有耀師門九原相見宜無閒言

杜蒼略先生墓誌銘

先生姓杜氏諱峇字蒼略號些山湖廣黃岡人明季爲諸生與兄濬避亂居金陵卽世所稱茶村先生也二先生行身略同而趣各異茶村先生峻廉隅孤特自遂遇名貴人必以氣折之於衆人未嘗接語言用此叢忌嫉然名在天下詩每出遠近爭傳誦之先生則退然一同於衆人所著詩歌古文雖子弟弗示也方壯喪妻遂不復娶所居室漏且穿木榻敝帷數十年未嘗易室中終歲不掃除有子教授里巷閒窶艱每日中不得食男女啼號客至無水漿意色閒無幾微不自適者閒過戚友坐有盛衣冠者卽默默去之行於途嘗避人不中道與人語雖兒童斷輿惟恐有傷也初余大父與先生善先君子嗣從遊苞與兄百川亦獲侍焉先生中歲道仆遂跛而好遊非雨雪常獨行徘徊墟莽閒先君子暨苞兄弟暇則追隨尋花蒔玩景光藉草而坐相視而嘻沖然若有以自得而忘身世之有係牽也辛未壬申閒苞兄弟客遊燕齊先生悄然不怡每語先君子曰吾思二子亦爲君惜之先生生於明萬曆丁巳四月初九日卒於康熙癸

西七月十九日。年七十有七。後茶村先生凡七年而得年同。所著些山集藏於家。其子揆以某年月日卜葬某鄉某原。來徵辭銘曰。

蔽其光。中不息也。虛而委蛇。與時適也。古之人與此其的也。

劉古塘墓誌銘

雍正四年五月望後二日。兄子道希書至。告古塘之喪。昔余成童。從先兄求友閭巷間。得古塘。其後之近邑。歸故鄉。客京師。學同而志相近者。復得數人。而惟古塘為本交。古塘少以雄豪自處。短衣厲飾。惟恐見者知為儒生。而先兄獨義之。余少好氣。數以氣蓋余。心不能平。久之。乃見謂直諒。古塘早喪母。家貧。母家給田數十畝。少長。覓食自活。以田歸庶弟。既為諸生。得時譽。學使者大府常以重幣延。歲時歸家。解裝遇親。交隨手盡。俄而乏絕。飢不得餐。晏如也。年羹堯巡撫四川。固請與偕。議加賦。力爭而止。遂以他故行。曰。其心神外我矣。能守吾言。以期月邪。及督川陝。復固請以往。再三見。浹日而歸。古塘貌精悍。有與同姓名者。大患鄉里。督學邵嗣堯聞之而未察也。按試呼名。忽注視。馮怒榜笞數十。衆皆譁。羣聚而詬之。嗣堯愧恨。發疾死。古塘始無慍色。既無寬容。嘗語余曰。士之大閑二。其一。義利也。其一。利害也。君子懷刑。設子溝禍殃。而我退避以爲明哲。可乎。及余以南山集被逮。冒危險以急余。如所言。辛卯鄉試爲舉首。以隨部檄掣。余妻子北上。失會試期。後遂絕意進取。年六十有九。終於家。始余出刑部獄。傳客諸公閒。諸公計數余。

兄弟早歲諸同好。數之奇。彼此如一轍。時存者惟彝歎古塘。因譜其行。及歿而未見余文者。作四君子傳。無何。彝歎亦歿。至於今無一存者矣。而余乃獨留其衰疾之軀。其尙足控揣邪。然吾聞古之爲交者。其有失言過行。則相引以爲羞。今諸君子各以身名完。未爲不垂。獨後死者滋懼耳。古塘子幼。道希與翁君止園紀其喪。余恐不宿。乃豫爲誌銘。以待事焉。古塘姓劉氏。名捷。懷甯人。流寓江甯。祖若宰。明崇禎辛未殿試第一。父璜。桐城縣庠生。母張氏。兄輝。祖康熙庚午鄉試第一。並有聞。亦余早歲同好之一也。妻王氏。早卒。繼室姚氏。子四人。長敏。次敦。次敬。次敬女一。未字。並姚氏出。其卒以四月廿三日。某年月日。葬於某鄉某原。銘曰。

左未生墓誌銘

君姓左氏。諱待。字未生。桐城人。明贈太子少保忠毅公之季孫也。少好老莊。其學以遺物自遂爲宗。其文章要渺闊放。不知其所從來。性畏俗。非戚屬。雖問疾弔喪不出。出則登城循雉堞而行。不欲見衢肆中人。惟宋潛虛。劉北固。慕而與之友。乙亥丙子閒。潛虛北固客京師。未生繼至。與余一見如故交。與之語。觸物比類。日新而無窮。與之居。久而不厭。然竟不能窺其際也。未生雖與世齟齬。而重氣類。善鑒別人物。常稱邑中胡嘉及兄子廉。其後二君子學行。果異於衆人。余之在難也。未生適自燕。附漕船南下。至淮陰。遇

盜折其二齒。衣裝盡失。入郡城。始知余已被逮。北上搏膺而呼。歸至家。時自懟曰。吾不一視方子。天下士其謂我何。己亥四月。至京師。因偕余赴塞上。秋七月南還。道京師。而宜輿儲六雅止之一時少俊。爭慕與之遊。遂畱踰歲。今年四月。余將出塞。趣之歸。未生曰。子憂吾老乎。吾策蹇行數十里。腰脊不異少時。今已向暑。秋風起。吾當歸築室白雲。浮渡閒。手種松千株。竹萬竿。又明年歲在析木。吾年七十。當復來視子。然後歸而待老焉。自余抵塞上。每旬月必通書。入秋無息耗。心謂未生已歸。而凶問忽至。嗚呼。自未生言之。死於家。與死於朋友之手等耳。獨余於人紀無不負疚。而陰自恨者。惟朋友則爲德於余者雖多。而余之愧於心者亦鮮焉。今未生乃爲余羈死。以遺恨於余心。則豈非余之命也邪。未生卒以八月二十六日。余以九月望後一日聞之。而其喪已附漕船南下矣。嗚呼。未生其謂余何哉。泣而銘以歸其孤。銘曰。生浮而死休。惟子信之尤。浮山之陽。是爲子之邱。歸與歸與。永與造物者遊。

王生墓誌銘

雍正元年冬十有二月。余病不能興。聞王生兆符。暨而蘇。輿疾往視。與之語。神氣若未動。越三日而死。嗚呼。是吾友崑繩之子也。王氏自明初以軍功爲宦族。至崑繩之父中齋公。而五服親屬無一人。中齋二子。長汲公。無子。崑繩以兆符後小宗。今兆符僅一子。以繼祖。則崑繩無主後矣。兆符從余遊。在丙子之春。余在京師。館於汪氏。崑繩館於王氏。使兆符來學。次汪氏馬廐旁。危坐默誦。閱若無人。方盛暑。日三至三返。

不納汪氏勺飲。其後崑繩棄家漫遊。兆符自天津遷金壇。復從余於白下。崑繩嘗語余曰。兆符視子猶父也。吾執友惟子及剛主。吾使事剛主。曰。符於方子之學。未之能竟也。弱冠爲諸生。南遷遂棄去。逾四十。以餬口至京師。或勸以應舉。庚子舉京兆。明年成進士。或餽之金。使速仕以養母。余曰。用此買田而耕。則母可養。學可殖。而先人之緒論可終竟矣。兆符蹙然。趣余爲書抵餽金者。及報諾而死。已彌月矣。方兆符之南遷也。以稚齒。獨身將母及女兄弟。陸行水涉三千里。及崑繩既歿。奔走四方。未嘗旬月甯居。而其母老病。暴怒不時。常恐妻女僕婢。久不能堪。而在視不盡其誠。故身在外。憂常在家。又慮年日長。學不殖。而屹屹於人事叢雜中。是以心力耗竭。形神瘵傷。一發而不可救藥也。余與崑繩交最先。既而得剛主。三人者所學不同。而志相得。其遊如家人。剛主之長子習仁。亦從余遊。辛丑秋。剛主使卜居於江南。而道死。自習仁之死。三人子姓中。質行無可望者矣。今又重以兆符。而文學義理。可與深言者亦鮮矣。余羸老。德既墮。學亦難補。所恃者後生。而天意若此。余所痛豈獨崑繩之無主後邪。兆符性孤特。不能容物。雖其父故交。既宦達。察其意色。少異於前。卽不肖再見。而行身端直。又以文學知名。故其疾也。聞者皆憂之。其死也。皆惜之。兆符渴葬先世兆域。而母及妻子在江南。葬事畢。士友南還者。爲紀其家。留京師者。分年而主墓祭。雖兆符意氣所感。召抑其祖若父節槩風聲。宿留於人心者。不可泯也。兆符年四十有五。所排纂周官及詩文若干卷。蔣君湘帆爲編錄而藏之。以俟其孤之長而授焉。銘曰。

無所施於世而行能已著於家。將道之探而學焉。已得其英華。並垂成而中毀。曷以泯吾儕之怨嗟。

巡撫福建都察院右副都御史黃公墓誌銘

右副都御史黃公。旣歿之逾年。其子廷桂。因李君枚。臣來請銘。余聞公名。在丁亥戊子間。時江浙大饑。天子並命發粟以賑。而吾鄉有司失方略。骸骴布路。黔民朋聚。正晝剽掠。於時則聞浙之祲尤大。而民不阻飢。惟黃公之功。其後訊之浙士大夫。多曰。公功豈獨在飢者。吾浙有二中丞。國初起瘡痍。致生聚者。曰范忠貞公。其後備荒政。遏亂萌者。則黃公是。吾民所尸祝也。蓋公之撫浙也。在戊子之冬。承大嵐山案後。浙東西郡縣皆蕩恐。而杭州二州連饑。民心搖搖。前中丞出。則羣噪憂惶引疾。時公以內閣學士賑湖歸。報至。中途就命撫浙。雖浙人亦不知公計所出也。公至。則懸禁不得抑米價。陰偵旁郡閉糴者。而重懲之。爲書告糴鄰省。散庫金於典肆。約逾歲。歸其本。勸富民分災。而禁貧民之羣聚要索者。會溫台二郡大穰。復奏開內洋。遠商總至。浙人皆曰。吾父母妻子得保聚矣。公始至湖。卽以便宜截留漕糧十萬石。時常平倉粟皆虛。巡撫將具劾羣吏。公曰。吏盡黜。何與飢者。彼官存粟猶易致耳。因設方略。俾多方補苴。卒賴以濟。浙民旣蘇。公方設政教。而移鎮八閩。時海賊鄭盡心。聚黨出沒。上命會勦。制府提督各以事諉。公刻日獨進。而懸賞格。得其魁者千金。抵廈門。厲氣巡軍。忽轅門鼓三賊。鄭盡心已爲其黨所密首。捕得之矣。時康熙五十二年正月十日也。方公之未至閩也。鄭盡心旣嘯聚海隅。而山賊陳五顯亦相應和。盡心旣獲。五

顯亦就撫。而公官罷。聞命卽送符篆。俾他人上之。而不有其功。先是湖杭二郡。緩征康熙四十七年漕糧。部議并於次年補運。公疏請分年帶徵。三請始得命。及次年。復奉部檄帶運。時二郡米價猶踴。又已過開兌期。督糧道請折價分授運弁。沿途採糴。部署已定。而公去浙。運弁乾沒糧額缺。遂挂吏議。公旣罷歸。上惜其才。復命督理子牙河。給原階。而公竟卒。其始知黔西州。嘗單騎入黎平。獠洞折其酋。使受約束。始入臺。有所陳。會上以他事震怒。宰執目公使下。而公直前必申所請。居臺中五年。所條奏。皆關大體。而謂御史司彈劾。不宜兼任保舉中人。捧綠頭牌傳旨。宜關內閣登籍。以便稽核。改逃旗人連坐法。尤人所難言者。公自內擢。所居皆清要。卒秉節鉞。兩鎮大藩。可謂遇且顯矣。其卒也。年六十有五。而浙閩之民。及海內士大夫知公者。莫不相聚太息。恨公之無年。而惜其才有未盡試焉。公諱秉中。字惟一。家世瀋陽人。祖諱憲隆。父諱道明。俱贈如公官。妻孫氏。誥封宜人。先公卒。子六人。廷鑑。候選知縣。廷鈺。戊子鄉試副榜。陝西平涼府靜甯州知州。廷鉞。早亡。廷桂。三等侍衛。廷鏐。廷銑。太學生。女二人。公卒於康熙五十七年正月十五日。以某月某日。葬於某鄉某原。孫宜人祔。銘曰。

公起蔭子。厲學聞顯。未壯出宰。厥猷已遠。入更二曹。陳義不苟。悚其長官。與相可否。遂踐中臺。屢正邦鈞。承使備禮。羸黎無呻。就加顯命。開鎮南服。爲父爲母。是鞠是育。衆心有依。孽萌弗孕。如器將傾。得公而定。公按閩疆。劇盜就梏。海波不驚。山無莽伏。蹇罷僨駕。萬口同咨。惟民之故。匪公之私。帝眷有終。民不能忘。

徵此銘文久而益光。

王大來墓誌銘

康熙五十二年四月。同年王蒼平至京師。詣余服齊。而貌若泉戚然。曰。吾季弟大來又死。吾今單獨惟一
身矣。昔吾兄弟三人。吾父命某學書。仲弟治家。而大來行賈。仲弟卒。內外事皆屬焉。凡可以適吾親者。無
不盡也。其家居。戚黨之窶艱者。皆賴焉。父執某無子。奉以終其身。其客京師。鄉人底滯而無歸者。無不資
也。而未嘗有私財。嘗盛服入肆。傭保誤以羹汁污之。慰以溫言。色無忤。大來雖未涉書史。聞古今人懿行。
必低徊久之。入其闔。牕壁戶牖。皆所書格言也。其名雖不彰。實無愧士君子。其爲我誌之。余於蒼平時。
見大來。其貌恂恂然。不知其實行若此。余聞古之有學。將以明道而美其身。三代盛時。家有塾。黨有庠。師
朝夕坐里門。所謂小學。人皆受焉。故其後雖去爲農工商賈。而終不忘學問之意。此人紀所以修。賢者所
以不擇地而出也。漢唐後。以記誦詞章爲學。所號爲學者。旣徇末而忘其本。而不學者。未嘗一遊其樊。質
雖美。無所藉以成。如大來之資材。使開以學。鄉道必力。惜乎其生之時。余徒以爲行賈之人。而失之也。蒼
平居斬齊之喪。容貌顏色。幾於禮之所謂稱其情。稱其服者。而自謂不及大來。又所稱質而不誇。當無溢
言。乃爲之銘。大來諱某。卒於康熙壬辰十一月。年三十有七。妻某氏。子某。以某年月日。葬於某鄉某原。銘
曰。

彼不令者。交相療以至老。此相依爲命。而顧不可保。君之歿也。其甯生無憾於兄考。

禮部侍郎蔡公墓誌銘

雍正十年冬十有一月。禮部侍郎蔡公。病不能興。皇子日使人問視。天子賜醫。士大夫羣聚。必詢公疾。增減云何。踰年正月朔。後八日薨。天子震悼。自賢公卿。以及離庠之士。重志節者。無知與不知。皆儻然若失。其所倚。余屢困於衰疾。嘗屬公必銘余。及公疾篤。執余手而愴然曰。子年先於吾。吾亦自謂終當銘子。而子今銘余。其喪之歸。子弟生徒。合辭以請。嗚呼。余安忍銘公。雖然。義不可讓也。始余與公相見於相國安溪李文貞公所。文貞引公之袂以屬余曰。是吾閩所謂蔡世遠聞之者也。遂定交。及癸巳春。余出刑部獄。而公以是冬服闋至京師。會新令翰林科道在假者並休致。而公之請假也。旋丁父艱。或謂宜自列於吏部。公曰。吾聞古者受爵而讓。未聞投牒以自申也。時文貞公承編御纂性理精義。薦公分校。踰歲書成。造余謀所處。余曰。天果不廢子之學。何患無周行坦步而出。以編書復官。去牒請一間耳。遂固請於相國以歸。先是儀封張清恪公撫閩。延公父主鰲峰書院。而招公入使院。共訂先儒遺書。至是。大府復以鰲峰屬公。公夙尙氣節。敦行孝弟。好語經濟。而一本於誠信。由是閩士慨然感興於正學。而知記誦辭章之爲末也。其家居設族規。置大小宗祭田。孤嫠老疾。月有餼。鄉人化焉。環所居三百餘家。二十年無博戲者。今皇帝嗣位。特召入都。命侍皇子講讀。授編修。五轉而至禮部侍郎。公侍皇子。凡進講四書五經。及宋五子之

書必近而引之身心。發言處事所宜設誠而致行者。觀諸史及歷代文士所述造。則於興亡治亂。君子小人消長。心迹異同。反覆陳列。三致意焉。當是時。兼保傅之任者。皆執政大臣。政事方殷。不得朝夕在側。惟公奉事十年。晨入夜歸。無風雨之閒。諸公背面多語。余曰。聞之。忠信正直。學足以達其言。誠足以致其志。或過於闊疎。而無近慮。洵書所謂惟其人者也。公議論慷慨。自爲諸生。卽以民物爲己任。及從清恪公遊。吏疵民病。言無不盡。政行衆服。而莫知其自公。辛丑夏。臺灣蠢動。公大會鄉人。聯伍團練。助官兵。擊勢平生好善樂施。出於天性。故人皆信嚮。旣貴。士有志行及文藝之優。必躬禮先焉。知其賢。則思隨地而開通之。汲汲如有所負。然余每以公事至。圓明園。必宿公池館。公薄暮歸。常挽余步空林。坐石磯。至昏暝。或達夜中。雖子弟莫知云何。而所誦度。皆民生之利病。吏治之得失。百物之息耗。士類之邪正。無一語及身家淺事者。嗚呼。以公之志在竭忠。天子知人善任。使得竟其志業。未知所就於古人何似。而扼以無年。嗚呼。惜哉。公性淡泊。所得祿賜。半索之。族姻知舊。妻子僅免寒飢。敝衣粗食。視簞人或甚焉。其居外寢。設一榻一帷。余至則以讓余。而臥後夾室。方夏。秋蚊虻嗜膚。竟夕不安。而惟恐余之不淹留信宿也。嗚呼。此公之志氣。所以懷乎海內之士。君子歟。雍正四年。公列爲九卿。以侍皇子。廷議多不與。八年秋。以族人事牽連。吏議降一級調補。及上特命復故職。而公疾已不可振矣。卒年五十有二。所著二希堂文集十五卷。鯨峰學約。朱子家禮輯要。合族家規各一卷。所編性理精要。歷代名臣言行錄。論定古文雅正。漢魏六朝四唐

詩各若干卷。惟學約、家禮、古文雅正及與高安朱相國共訂歷代名臣名儒循吏傳已刻行於世。蔡氏世居漳浦之梁山。故學者稱梁山先生。始祖元鼎以講學名鄉里。五世祖宗禹登明萬曆辛丑甲科。益著稱。行蹟見道南原委。曾祖諱一橙。萬曆丙午舉人。祖諱煜。郡庠生。父諱壁。以拔貢生爲羅源教諭。皆誥贈如公官。曾祖母某氏。祖母某氏。前母某氏。母吳氏。並贈夫人。妻劉氏。有賢聲。先公一年卒。喪歸踰嶺。士友弔祭數百里不絕。子六人。長長漢。己酉舉人。次長灃。郡庠生。次觀瀾。太學生。次長澗。太學生。次長浩。次長注。長注夙孝慧。先劉夫人半月而殤。方十齡。女三人。孫男二人。以雍正某年某月某日葬於某鄉某原。銘曰。其材天植。其學不迷。其志不欺。其數非奇。而不竟其所施。匪予之私。衆心所悽。

禮部尙書贈太子太傅楊公墓誌銘

雍正十有三年秋九月。皇帝宅憂。甫旬日。卽起楊公名時於滇南。士大夫知與不知。皆驚喜相告。乾隆元年二月。公至自滇。時年七十有七。以禮部尙書入教皇子。侍直南書房。兼國子監祭酒。而不領部事。上與諸王大臣議政之暇。時召公入見。公自薦士七人爲助教外。未見其所言議施爲。而天下士皆曰。楊公時獨對。忠言讜論。不知其幾矣。公體素強。而是秋七月上旬。遘末疾。浹月而薨。是日士友奔唁。暨國子生聚哭於庭階者。凡數百人。蓋公自童稚以至篤老。居鄉立朝。莅官撫衆。無一言一事不出於中心之誠。故其感於人者。如此其至也。康熙辛未。李文貞與主禮部試。見公文而異之。及入翰林。遂朝夕相從問學。其充

日講官。視學京畿。皆特擢。不由階資。始聖祖仁皇帝。悼學政廢弛。以九卿督學。自文貞始。而公繼之。校士一遵文貞成法。士雖擯棄無怨言。其主試陝西亦然。乙酉。偕衆督學出防南河。踰年。丁父艱。繼丁母艱。癸巳。聖壽六十。廷臣慶賀。上問翰林中有楊名時否。遂特召入京。侍直南書房。丁酉夏。出爲北直巡道。曰。吾欲試以民事也。國初沿明制。直隸不設三司。而以巡道主刑獄。兼驛傳。政充事劇。吏因緣爲姦蠹。公細大必親。無畱獄。無匿情。至今爲民所思。曰。百年中無與比也。己亥。遷貴州布政司。數月。就命巡撫雲南。會征西藏。大師駐省城。爲營館舍。數宴犒。而約束堅明。無敢叫囂。餉遞轉。民無咨。七年中。凡軍民疾苦。大者奏請。小者更易科條。事無遺便。恩信浹於蠻獠。公天性和易。雖馭僕隸。無厲色疾言。而是非可否。則守其所見。固植而不搖。自始入南書房。聖祖叩以易說中旁及象數者。公正對無所瞻顧。世宗憲皇帝卽位。手諭褒嘉。三年。擢兵部尚書。總督雲貴。四年。晉吏部尚書。仍管雲南巡撫事。公益自奮厲。思竭忠誠。於人之邪正。事之得失。風氣淳薄之相倚。盡言無隱。五年。以奏豁鹽課。敍入密諭。削尙書職。仍署巡撫事。六年。遣少司寇黃炳。與新撫朱綱。訊公以六事。獄辭成。罪在大辟。衆皆曰。禍無振矣。公於三朝。皆受特達之知。而有識者則謂先帝保公之始終。德尤大。事尤難。蓋聖祖知公。實由文貞推輓。而公旣得罪。務進取者爭欲實公之罪。以自爲忠。雖雅知公者。亦難遽爲公言。而聖心自定。特旨赦原。凡有司文致之罪。一切置而不問。俾得從容偃息。聚徒講學於滇南者。且七八年。非重公之素行。諒其無他。而能如是乎。嗣天子大孝親賢。

特頒明諭。然後知先帝本欲徵公。此萬邦黎獻。所以追思盛德於無窮。而歎爲至明之極也。公平生介節義事。美行嘉言。不可勝紀。而孝德尤著。年踰強仕。父母摩拊如嬰兒。其防南河。同出者多以爲難。而公獨以近奉二親爲喜。數年中。生養死藏。毫髮無憾。然後以身許國。夷險一節。而無所係牽。蓋若神者。實陰相焉。余始於督學宛平。高公使院見公試藝。闔郡無與儔。因有意於其人。而束於禁防。雖時往來江陰。而無因緣會合。辛未。再至京師。乃見公於文貞公所。余與文貞辨析經義。常自日昃至夜中。公端坐如植。言不及終。已無言。用此益信公之爲學。能內自檢攝。而未暇叩其所藏。及往年。余再入南書房。公繼至。始知公於文貞所講授。篤信力行。而凡古昔聖哲相傳性命道教之指要。異人異世。而更相表裏。互爲發明者。皆能採取而抉其所以然。嗚呼。公之用無不宜。忠誠耿著。而人無閒言。蓋有以也。夫公疾未作。方奏對。天子見其徵。旣疾。數使人問視。旣歿。大痛悼。發帑金使國有司治喪。散秩大臣領侍衛十人奠爵。特諭稱公學問醇正。人品端方。贈太子太傅。入賢良祠。賜諡文定。楊氏系出關西。明初以軍功世襲鳳陽勳衛。家懷遠。自諱元吉者。始遷江陰。逮公五世矣。祖諱起鰓。父諱履泰。並贈資政大夫。巡撫雲南。都察院右副都御史。祖妣任氏。前母陳氏。母許氏。並贈夫人。公字賓實。號凝齋。生於順治十七年十二月二十四日。卒於乾隆元年九月朔日。初聘趙氏。未娶卒。娶劉氏。誥封夫人。以弟之子應詢嗣。應詢暨公門生王君文震。夏君宗瀾。以銘幽之文請。余雖病衰。義無可辭。銘曰。

古有其德。事不待施。志之得行。書亦無爲。公承師說。篤信固執。探其本根。焉用枝葉。惟公惟平。政出民諾。惟誠惟信。頑姦無猜。我言無溢。來者之式。

廣東副都統陳公墓誌銘

公姓陳氏。諱昂。泉州人。世居高浦。國初遷濱海。居民徙灌口。父兄相繼沒。以母寡。艱生計。遂廢書。賈海上。屢瀕死。往來東西洋。盡識其風潮土俗。地形險易。康熙癸亥。上命浙閩總督姚啟聖。經略臺灣。遣靖海伯施琅。統諸軍進戰。求習於海道者。公入見。時制府以水戰宜。乘上風。公獨謂北風剽勁。非人力可挽。船不得成。鯨。不若南風解散。可按隊而進。施意合。遂參機密。將至澎湖。北風大厲。氛霧冥冥。晝面不相覿。三日。軍中恫疑。公進曰。此殺氣也。將軍毋以父兄之仇。欲效楚伍員。倒行而逆施乎。將軍曰。然則吾誓天。公手案以進。誓畢。風反日暉。遂克澎湖。歸疾病。瘡傷者於臺灣。其吏卒大憙。鄭氏遂歸命。兵不血刃。策勳授蘇州城守。一調再遷。而至碣石總兵官。擢廣東副都統。皆濱海地也。嘗奏請西洋治象數者。宜定員選。毋多置。其置者。勿使布其教於四方。自開海洋。登萊江淮閒。海舶至。菽粟布帛。卽騰踊。僉曰。內地年登而穀貴。職此之由。久之。語上聞。命盡閉海洋。公聞之。獨曰。南洋非此倫也。吾少歷諸番。皆習耕稼。無資於中國。或海壩毀饑。商船尙以諸番之米至。今概絕之。則土貨滯積。而濱海之民。半失作業。欲上言。會疾作。將終。命其子以遺疏進。衆皆疑焉。叩之閩人。則曰。斯言也。其信。公之子倫炯。介吾友楊君千木。請銘。余旣奇公之

迹。又其言宜考信於後。乃受其請而譜之。公歷官皆能其職。有遺施在人。卒年六十有八。父諱健。前母許氏。母王氏。自曾祖以下。皆受一品錫命。夫人林氏。子三人。長倫炯。次芳。次倫焜。以某年月日葬公於某鄉。某原。銘曰。

迫爲生海之涯。備諸艱危。榮遇亦由茲。志願無餘。安以反其居。

知甯國府調補部員黃君墓誌銘

君諱叔琪。字果齋。自其父芳洲公始入籍京兆。君兄弟五人。皆登甲乙科。三人出入中外爲顯仕。康熙乙酉。君舉於鄉。以中書倅雲南景東府土官。實掌郡事。始至。毗僚時駭。乃嚴武守。勤偵緝。閭里宴眠。又以其瑕廓學宮。建橋梁。報政。擢知江南甯國府事。雍正二年。余請假歸葬。以視執友之孤。道宣城。時君治郡已四年矣。入其境。民氣和樂。士勸於塾庠。有司胥吏。則戴其寬簡。而知不可犯。用此大府之賢者。皆誠信而禮貌之。其或臭味不同。亦無從得其過端。嘗以承追官民積負。後期被劾。世宗憲皇帝特原。俾畱任。莅茲土者。凡十有四年。中間兼攝徽郡及太平。旣久。民猶有述焉。癸丑。改調入京。以伯仲及季。同時而罷也。君在任探銅。爲商人所乾沒。未盡入。寄家累於張秋。乾隆丁巳仲夏。太夫人九十。偕妻入拜慶。妻遘病。卒於京師。其冬。君親赴吳門。趣入銅。體素羸。抱感傷。又辭老親至張秋。病不能興。逾歲二月朔。後八日卒。年六十有一。余與君兄弟皆久故。惟君踪跡較疎。其服在大僚者。所至皆有名績。而余得君於聞見尤詳。又念

君兄弟雖中踣。數年中復次第光亨。而君竟長逝矣。以銘請。余豈忍辭。君父諱華蕃。廩貢生。順天府大城縣教諭。以長子叔琳。誥贈資政大夫吏部左侍郎。母吳氏。誥封太夫人。妻李氏。誥封恭人。甚有婦道。其卒也。太夫人深痛之。子六人。長子元幃。丙午舉人。次德鑄。疇。皆郡庠生。次鶴齡。丁巳進士。次崧年。業儒。女三人。並適士族。乾隆五年某月某日。葬於先兆之次。李恭人附。其先世繫姓。余旣爲贈公外碑。故不復詳。銘曰。

兄考旣敷蓄。子孫能耨之。宦非不遂而年已耆。於衆爲無憾。而在君猶積而未施。吾是以爲之謚。

沈編修墓誌銘

常熟沈立夫。與余同給事武英殿書館。雍正四年秋。揖余曰。吾告歸行有日矣。吾母安吾鄉。古之人耕且養。三年而窮一經。四十而仕。吾齒與學皆未也。吾少好柳文。自先生別其瑕瑜。然後粗見古人之義法。及聞周官之說。而又知此其可後者也。故奉吾母以歸。將畢其餘力於斯。立夫歸自南方。來者爭傳其務學之勤。八年三月。有來告者曰。立夫死矣。余自童稚從先君子後。具見百年中魁壘士。其志趨尤上者。誦經書。講學。治古文而止耳。而察其隱私。猶或以震耀愚俗。而私使其身圖。故其所得。終未有若古人之可久者。其誠心欲有立於後。惟吾友崑繩之子兆符。而旣天死。又其後則立夫。豈區區之文學。亦天心所重。而靳其成邪。而古之人有言曰。人皆可以爲堯舜。豈求在我者。可稱其大小遠近。而必有得。而與竭心於文。

學者異道邪。立夫諱淑。雍正癸卯進士。翰林院編修。卒年二十有九。父某。太學生。母某氏。妻蔣氏。有子始三歲。未能訃。乃誌而銘之。以郵致於其家。立夫之祖育。以孝聞。其歸也。請誌其墓。余因舉立夫之志行。決其終有立。以爲孝德徵。而今乃銘立夫。嗚呼。悲矣。銘曰。始謂斯人。若爲天所矜。而善爲承。豈惟無成。速殞其生。何數之難測。而理亦未可憑。

李抑亭墓誌銘

雍正十年冬十月朔後九日。過吾友抑亭。遂赴海淀。次日歸。聞抑亭斃而瘞。日再往視。越六日而死。始余見君於其世。父文貞公所。終日溫溫。非有問不言。及供事蒙養齋。始習而慕焉。期月而後。無貴賤老少。背面皆曰。李君。君子人也。其後余移武英殿。領修書事。首舉君自助。殿中無貴賤老少。稱之如蒙養齋。君自入翰林。再充順天鄉試同考官。典試雲南。士論翕然。視學江西。高安朱相國。每曰。百年中無或並也。按察使李蘭。以咨革諸生。君常難之。劾君牽制有司之法。而彈章亦具列其廉明。余自獲交文貞。習於李氏族。嫻及泉漳閩士大夫。其私論鄉人各有嚮背。而信君無異辭。君被劾。當降補國子監丞。羣士日夜望君之至。旣受職。長官相慶。而洩事未彌月。用此六館之士。尤深痛焉。往者歲在戊申。君弟鍾旺。斃而瘞。卒於君寓。余旣哭而銘之。君在江西。喪其良子清江。又爲之銘。以塞君悲。而今復見君之死。古者親舊相與宴樂。而樂歌之辭。乃曰死喪無日。無幾相見。有以也。君在蒙養齋及殿中。與余共晨夕。各一二年。返自江西。無

兼旬不再三見者。辛亥春。余益病衰。凡公事必私引君自助。無旬日不再三見者。一日不見而君疾。一言不接而君死。故每欲銘君。則愴然不能舉其辭。喪歸有日矣。乃力疾而就之。君諱鍾儵。字世邠。福建泉州安溪縣人。康熙壬午舉於鄉。壬辰成進士。年五十有四。所著論語孟子講蒙十卷。詩經測義十卷。易解八卷。藏於家。尚書周官皆有說未就。父諱鼎徵。康熙庚申舉人。戶部主事。誥授奉直大夫。母莊氏。贈宜人。兄弟五人。四舉甲乙科。兄天寵。自入翰林十餘年。與君相依。皆不取室人自隨。痛兩弟羈死。乃引疾送君之喪。以歸。君娶黃氏。勅封孺人。子五人。四舉甲乙科。長清載。庚戌進士。兵部武選司額外主事。次清芳。癸卯舉人。揀選知縣。次清江。癸卯舉人。揀選知縣。次清愷。壬子副榜貢生。次清時。壬子舉人。世父撫爲己子女。一適士族。以某年月日葬於某鄉某原。銘曰。

蓄之也深而施者微。將踵武於儒先。而年命摧悼。余生之無成。猶有望者夫人。而今誰與歸。

中議大夫知廣州府事張君墓誌銘

君姓張氏。諱銷。字子容。山西蒲州人也。少異敏。博聞強記。而不諧於俗。州部皆號曰狂生。旣成進士。師友閒亦見謂不羈。及余與供事武英殿。始知君樸質人也。嘗舉其鄉百年中立名義者。而叩以所自處。君曰。子他日視吾所爲。今皇帝嗣位。大臣將以史才薦。訪於余。余曰。是足爲民依。不宜使泯沈於藝文。乃舍之。君始聞不能無愠。旣而知由余言。則大喜。因請外補。試湖廣應山縣。踰月。湖南北士人商旅至都下者。爭

傳其治教。如自矜所得。時鄭任鑰以布政使入覲。余詰之曰。有吏如應山而不特舉。有說乎。曰。是貌不颯。言拙。將以計典列薦。俾循階以升。朱相國聞之曰。此過言也。彼人遭遇與國之得賢。固有天焉。以人事君者。惡用爲計較哉。雍正四年冬。上特召。五年春。引見。命知廣州府。抵任。首自陳於大府曰。郡治劇。當坐署理民事。上官非傳呼不至。由是監司以上。皆患君骨鯁。而督撫方相構。陰樹附己者。君柴立其中。久之。制府以民望所歸。加體貌焉。父老皆私歎曰。我公自是側身無所矣。君在廣州。治加嚴毅。諸生有患鄉里。榜其罪。使曲踴於交衢。而不能私出怨言。忌者雖多。無可瑕疵。七年春。始以屬縣囚逸罷。功令囚獲則復。官士民爲君懸賞格以購之。踰歲。果得焉。君以書來告曰。吾官可復。但羞與羣子傾側勢要閒。枉道行私。以負聖天子。頗思與子稽誡文史。浩然有以自得也。時京師諸公。聞君脫吏議。多躍喜。將俟前事奏結。特舉焉。而君遭疾死矣。君之官不持妻子。旣罷。居廣州三年。士民日致薪米果蔬用物。不可抑止。及卒。無親屬在側。時大府皆已更易。羣吏憫傷。共棺斂。士民驚呼。羣聚而哭之。君家故窮空。其子聞喪。久不能奔。自大府羣吏及士民。咸出力以御君柩歸其鄉。而以贖之餘。屬守土吏。買田以給其妻子。君將赴廣州。走別余。余謂君治法宜條記。以式爲吏者。君曰。其能者豈恃故方。非其人。雖灼知不能用也。吾已棄此如遺跡矣。君治應山。僅踰兩年。廣州年餘。美政不可勝紀。其子以狀來。雜舉條目。而首尾不具。其精神之運。方略所施。俱不可得而見。家事亦然。故概弗採列。而獨著其志節之耿然者。君先世平陽府小南關人。元末遷。

蒲州世居東關爲儒家高祖諱杲明天啟中舉乙科官戶部郎中父諱含璵母王氏生四子君其仲也康熙甲午舉人乙未進士享年五十有六妻任氏子士淪以某年某月某日葬於某鄉某原銘曰
操行不迷懷文抱質而衆反以爲哈官守無虧主知民載而終爲人所摧惟直道之不亡志愈遠而彌光

白玫玉墓誌銘

康熙癸巳春余出刑部獄卽通書吾友清湖白君玫玉玫玉以書報曰必來視子庚子其弟玫玉以守選至京師曰吾兄歲爲裝而喪荒滯之今行有日矣踰歲絕音耗而凶問至余自童稚從先君子見楚越耆舊長遊四方海內知名士十識八九聰明博達願謹耿介者時時有之獨未見才識足以立事確然可信如古豪傑之士者及得玫玉始驚喜出望外辛卯冬余以南山集牽連被逮時制府嚙禮廉使焦映漢俱夙憎余欲因事以螫會玫玉客安徽布政使馬公逸姿所竟賴其力以免困辱玫玉文學重鄉里以拔貢生授高陵縣教諭稱疾不就而客遊諸公閒于中丞準其舊交也巡撫江蘇以重幣招至則與要言曰君以蔭起富貴至此豈君之能以乃祖清端公風節著朝野耳今爲大府而洩其遺民果能繼前人之廉公恢張教治以大庇民則某不敢辭若苟焉爲衆人所爲又安用余越數日假他事以行白氏五世不離居異財玫玉終世客遊齋裝皆盡之族姻朋友幼工書得魏晉人遺意中歲爲詩雄直過人或欲鈹諸版曰士乃以茲自名邪余在難同學二三君子時就縣獄中多歎歔流涕惟玫玉毅然無別離矜憫之色玫玉

諱斑。以順治丁酉生。享年六十有六。曾祖諱宗舜。明萬歷丁酉舉人。知山西蒲洲。祖諱慧元。崇禎甲戌進士。直隸任邱縣令。以忤宦官落職。會亂城危。士民拔援畱守。死之。贈河南按察司僉事。父諱補宸。順治己酉舉人。三原縣教諭。妻郝氏。無子。以伯兄之子子正嗣。女四人。皆適士族。以某年月日葬於某鄉某原。銘曰。

夫人之生也。而無以爲。吁嗟乎。古其有斯。

翰林院編修查君墓誌銘

君諱嗣璉。字夏重。後更名慎行。浙江海甯人也。余始入京師。查氏負才名者數人。而君尤獲重。語朋齒中以詩名者。皆若爲君屈。君少聞吾邑錢先生飲光深於詩。卽泝江繫舟權陽。造田閒。講問逾時。而歸。錢先生數爲余道之。及與交久長。見其於時賢中微若自於異。然猶以詩人目之。及余脫刑部籍。聖祖仁皇帝召入南書房。中貴人氣焰赫然者朝夕至。必命事專及於余。乃敢應唯敬對。外此不交一言。又夙畏風歛。常著緇布小冠。諸內侍多竊笑。或曰。往時查翰林慎行。性質頗類此。而冠飾亦同。嘻。異哉。余用是益有意於君之爲人。而君尋告歸。及篤老。以其弟嗣庭得罪。牽連被逮。同產弟姪並譴戍。而君獨見原。蓋先帝公聽。並觀君恬淡寡營。久信於士大夫。故在事者閔焉。而以情達也。君旣歿。其子克念。以狀請銘。數年矣。乾隆元年十有二月。余臥病直廬。或告曰。君之彌甥沈庶常廷芳。屬爲通言速君銘。且告克念之喪。是夜夢

與君問勞如平生。晨起命家人檢故狀。不得乃就所獨知於君者。以誌焉。覽者卽是以求之。其所狀事迹。雖不具可也。其詩已行於世者。凡四千六百餘篇。各以時地。次爲五十四集。君卒於雍正五年。年七十有八。父諱遺。字逸遠。爲浙西耆舊。母鍾氏。兄弟四人。皆成進士。妻陸氏。子三人。克建。丁丑進士。鳳翔知府。克承。國子生。俱先君卒。克念。甲辰舉人。以某年月日葬於某鄉某原。銘曰。所嚮所祈。詎止於斯。而終已無施。惟以弼於詩。

禮部侍郎魏公墓誌銘

公姓魏氏。諱方泰。字日乾。江西廣昌人也。康熙甲子舉於鄉。爲選首。庚辰成進士。選庶常。韓公墓廬掌院事。數爲余道公學行。時諸翰林以韓公故。多索交於余。閒與公相見。稠人中。未嘗以言語顏色相親。因是心重公。及乙未。西事興。領軍餉者四人。而公與焉。衆皆詫公文儒。沙場萬里。行宿鮮人煙。數攻剽言者。皆爲色懼。而公恬然。及出塞。結隊安營。號令明肅。撫循徒旅。人忘其勞。反役人畜鮮傷耗。什器無遺亡。自是以後。領運者六事集。而人皆便之。蓋公自散館後。卽召入南書房。旋命侍淳親王講誦。聖祖已審知公之爲人。故自翰林改官通政司。蓋信公可屬以事久矣。於是天下士始謂公之底蘊。不可窺尋。而歎聖祖之知人善任使也。公爲檢討。主山東鄉試。視學滇南。擢侍讀。改通政司參議。復主試閩中。教習壬辰科進士。士聞公誨諭。多勵學。自檢於躬行。其在滇南。與撫軍劉公蔭樞善。還中朝。大農趙公申喬。數稱其廉公。世

宗憲皇帝登極。擢太常卿。遷正詹事。乙巳夏。以本職攝內閣學士。尋遷禮部右侍郎。嘗正告廷臣曰。如朱軾。張廷玉。沈近思。魏方泰。朕保其終無二心。人皆意公將繼武於朱公。而公以年滿七十。力陳衰疾重聽。秩宗典禮。雖虔恭將事。終憂隕越。溫旨許之。嗚呼。公之不敢賴寵。先帝之篤信忠良。又能曲體其情。而不強以仕。皆可以感人心。砥維風教。使奕世聞而興起者也。公樞襟失母。終身哀慕。序譜牒。建宗祠。置祭田。恤族屬。孤貧延及朋友。鄉人式之。好讀書。造次不釋。往還絕漠。每至挈轡令舍。馬瘖僕吁。公部署既定。卽端坐吟誦。神氣洒然。同行者皆心服焉。公得告時。子定國爲直隸按察使。就養於保定。其沒也。會定國以同官罪。謫繫獄。尋謫黑龍江。窀穸猶未營。及今皇帝嗣位。特召還京。起署陝西西安按察使。而夫人李氏亦沒矣。請歸葬。然後之官。詔許之。乾隆三年冬。以狀來請銘。余與定國同年友也。謫而歸。始相見於旅舍。然以道義相許有素矣。乃爲譜其世家。魏氏蓋了翁後也。元初卜居南城之魏坊。繼遷於廣昌。支分爲三。長居甘竹。季居甯都。次居株橋。公其裔孫也。累世素豐。鼎革初。鄉里山賊數起。邑中善良。避賊保水斗山。守將利其有。將屠之。公之父明之。素與相識。馳見之。給令箭曰。保爾家無虞。泣曰。某居別山。非爲吾家來也。此砦中皆良善。不忍其荼毒耳。守將拒以強詞。色甚厲。乃括家財。持千金爲壽。曰。砦中父老所有盡此矣。必破砦。勿淫勿殺。又以五百金賂其左右。於是兵入。衆皆安堵。及公既貴。定國繼之。子姓繩繩。鄉人皆曰。此乃祖乃父積善之慶也。曾祖諱沆。國學生。鄉飲大賓。承嗣祖諱復禱。父諱善。誥贈通議大夫。祖妣孫。

氏妣何氏。生妣陳氏。俱贈淑人。本生祖諱復禮。妣李氏。以定國及妻封。妣贈如其官。階公卒於雍正六年四月。年七十有二。配李氏。卒於雍正十一年三月。年七十有九。誥封淑人。以乾隆二年贈夫人。庚午。公在京師。贈公卒於家。夫人備禮致哀。族姻皆爲感動。以乾隆元年四月二十六日。合葬於南城魏坊。子三人。長定國。康熙丙戌進士。次寶國。康熙甲午舉人。雲南永平縣知縣。次安國。早殤。女四人。皆適士族。孫七人。舉於鄉者三。銘曰。

美仕榮祿。遭遇適然。惟賢惟德。其兆必先。魏宗三支。甯都學顯。公務實行。身依文典。望比於鄉。勤施於國。衆信其誠。士馨其德。象賢有人。忠貞世宣。是父是子。帝有明言。明之澤近。華父光遠。於萬子孫。先型毋覲。

潘函三墓誌銘

君諱蘊洪。字函三。湖州人。康熙五十二年。與余俱供事蒙養齋。性孤特。自遂。意所欲爲。雖重得困。不悔也。所欲言。聽者色倦。語而不舍。用此衆指笑爲愚惑。吾母之喪。卜權厝近郊。與君行度地。會日暮。余留宿。而君堅欲歸。歸則陷積水中。終夜匍匐。臥疾累日。及相期再行。欣然無難色。君在湖籍。博士弟子第一。至京師。御試入修書館。復第一。以未入太學。例不得試。京兆上特命內閣。下其名禮部。送棘闈。羣士皆驚。君自負才望。謂科名可垂手得。及數試不克。而同館士強半舉甲乙科。忽忽減食飲。余謂君士果自負。當與百代人累短長。今直省鄉貢。閒三歲必千餘人。君乃以不得與於干人者。而發憤以死邪。其疾也。聞方藥輒

試。余憂之。曰。子非死疾也。而漫試百藥。子必死。君感焉。淚漬於眶。然竟不能止也。戊戌夏四月晦前三日。余赴熱河。走別君。相視而嘻。曰。吾疾已愈矣。越四日而死。君近歲益窘空。數典衣。道逢廢疾。窶人。即使持去。嘗遊江西。鄰舟覆。挈其夫婦子女。行千里。而致其家。授經齊魯間。積百金。將歸。會大祲。死者相望。惻然出傭力。瘞埋罄其裝。余意其尙有瘳。而竟止於此。既卒。踰年。館中士友。咸出其力。乃得以某月日歸君之喪。而屬余爲銘。以畀其孤。妻某氏。子某。以某年月日。葬於某鄉某原。銘曰。

一之不施。而信其積者誰。既歸骨於而宗。尙其無悌。

顧友訓墓誌銘

君姓顧氏。諱同根。字友訓。江都大橋人。書宣先生長子也。其居鄉閭。名在州部。居庠序。名在京師。諸公多欲資入太學。以母老諸弟幼。恆家居。雖教授不出百里。康熙六十年。選高等諸生入太學。學使者注意於君。君避不入試。始吾師以督學卒於楚。喪過金陵。余弔於舟次。始識君。其後歲時至君家。季方孩。君與讓訓。飲和朝夕。講誦怡怡如也。及余難後。聞飲和之喪。誌而銘之。又十餘年。余得假歸葬。再過君。君適以是日持仲之喪。至自泰興。相視飲泣。意緒促促。及君之卒。則家不能訃。踰二時。始得之傳聞。嗚呼。自吾師之卒也。海內士大夫。已嘆其積而不施。至君則強志博學。而未嘗一見其鋒穎。故聞者莫不痛惜。發於中情。不獨親知久故然也。君以雍正四年冬。赴弔姻家。夜中體不適。旦而歸。未至家而卒。年四十有五。妻王氏。

無子。以某年月日葬於某鄉某原。季以太夫人命來徵銘。銘曰。孤與罄。遑顧思。母之榮。恨無涯。惟數之奇。一至於斯。

陸以言墓誌銘

君諱詩。字以言。江甯人。家世農田。秀者學藝。君始以習宋字入蒙養齋書局。敬敏有聲。有旨得從羣士校錄。敍用。君既拔起。稍自振飭。與羣士抗禮。衆深心嫉之。及議敍。皆得美仕。君獨以後期。數月不與。發憤成疾。踰年竟死。君在書局。凡八九年。始爲衆所排。常憤湧。余開之曰。毋以爲也。若欲以聲勢與衆爭衡。何道以相勝。苟能修身強學。則自知不足。懣介矣。君大感動。務自刻苦。念家貧。父母老。不得養。或饋之品味。必轉遺他人。而不自食。學柳書。晝夜矻矻。點畫無毫髮不似。將死。泣而語其人曰。我無子。無用歸我喪。重父母感傷。以雍正元年某月日。權葬京東江甯義塚。又四年夏。其叔父琢之。至京師來告曰。吾兄子之婦。守節養舅姑。志歸其夫喪。吾不忍棄言。余旣悲君崎嶇以死。又感其妻與叔父之意。乃述所目見於君者。而爲之銘。君年三十有四。以監生考授州同知。父如珍。母劉氏。妻王氏。以某年月日葬於某鄉某原。銘曰。婦能貞。子職率。諸父良。歸爾骨。死有知。億無鬱。

光祿卿呂公墓誌銘

雍正五年冬。詔公卿舉賢才。光祿卿呂公具劄。不合儀式。天子夙知公謹慎。年篤老。許以原官歸休。余與

公子耀曾爲同年友。而公於余尤志相得。將行。朝夕過從。要言書問。必時通。俄而訃至。則至家之三日。晨興沐浴。飯罷而終。公年四十有一。始舉於鄉。又十有七年。成進士。由翰林改御史。轉給事中。遷鴻臚大理。至光祿寺卿。所歷必張其職。三主鄉試。再充會試同考官。士論翕然。其爲御史巡城。會南郊。奏以薙草徵役。胥吏因緣病民。又奏夏秋之交。洞庭瀧濤壯猛。湖南士赴鄉試。苦遭覆溺。宜分設棘闈。天子皆爲更舊制。公名位非甚盛。而以渾厚方直爲衆所推。其沒也。凡與交接者。皆曰薦紳中典刑。又失其一矣。自容城孫徵君講學淇源。湯司空耿詹事名節在天壤。由是中州士大夫多好言理學。而公兄弟則尙質行。以文學知名。公兄少司農坦菴公。與吾亡友崑繩治古文。而旁及於詩。公則以詩名。而兼治古文。余嘗以古文義法繩班史柳文。尙多瑕疵。世士駭詫。雖安溪李文貞不能無疑。惟公篤信焉。公至性過人。喪父母。壹稟禮經。自少至老。未嘗與司農久離。戊戌春。司農罷歸。次年五月。公忽搏膺而呼曰。不得與兄見矣。數日。計果至。司農之歸也。思公爲樂府一章。時命耀曾之子肅高相和而歌。歌竟而哭。厥後公展視。輒掩涕吞聲。耀曾乃竊而藏之。公貌端嚴。生平坐立無偏倚。讀書青要山。凡數十年。所居特室。臨牕設几。坐下二足跡深寸許。幾穿其磚。呂氏繫出宋丞相文穆公第六子居簡。其後自洪洞遷新安。至明季。大司馬忠節公始光顯。自是五世衣冠甚盛。家法爲士大夫宗。耀曾嘗臥病內寢。余入視。帷帳茵褥。爲寒士所不堪。肅高捧盤承飲而進。叩之。則已舉於鄉矣。雖呂氏家法。抑亦公之身教也。余許序公青要集。久而未就。公欲爲古

詩數章贈余曰。吾歸以詩來。則子之序。毋更遲之。又久矣。肅高告終。稱公在途諄諄。及此。耀曾至自西川。來乞銘。余於公既負諾責矣。今忍不銘。公諱謙恆。字澗樵。以雍正六年四月二十一日。卒於孝慈莊。年七十有六。考諱兆琳。福建道監察御史。以司農贈都察院僉都御史。妣王氏。孟津王文安公女。勅封孺人。誥贈恭人。妻王氏。太常寺少卿諱無咎女。文安公女孫。子三人。承曾。雍正甲辰舉人。揀選知縣。光曾。康熙戊子舉人。陳畱縣儒學教諭。耀曾。康熙丙戌科進士。四川按察使。孫五人。女孫九人。以某年月日葬於某鄉某原。其世系具忠節公傳誌。故不著銘曰。

望其貌而心可知。敦於行而文副之。祖德克儀。以爲世裔師。

安徽布政使李公墓誌銘

乾隆十年六月朔。余臥病北山。閉關而外鍵之。安徽布政使李公。屏驕從過余。謂門者曰。卽虛館。必啟鑰。麥戶而入。曰。吾固知先生避客之深也。吾自獲見於先生。始知所以爲人之道。備官中外。幾二十年。自省尙無負於君國。無慙於吏民。皆先生之教也。所懼民隱壅蔽。有過而不自知。今荷聖恩。位邦伯。而適在先生之鄉。故甫入城。未受印篆。而願聞緒論。望先生知無不言。越三日。而余遽危疾。不辨人事者浹月。及杪秋。少蘇。醫者曰。子無他。昨視方伯李公。心脈已枯。恐無可久之道。余瞿然急通問。復書曰。某陳臬於蘇。幾三載。卽笞杖必設身以求其情。積勞傷氣。又胃痛。醫人投藥物過猛。故一發不可支。如有瘳。卽敬以聞。未

十日。則其子以棺斂事來。誡且乞銘矣。公所生三子皆幼。其弟之子承嗣者。雖少長。從宦遊。而方從師務。帖括外事無聞焉。幕中皆新知。故狀所述。惟歷官及蒙恩遇。而政迹無敘列者。銘辭難舉。雖然。義不可卻也。公洛陽人。雍正五年進士。選庶吉士。不介而造余。形貌偉然。所爲詩及書法。皆拔俗。時余掌武英殿修書事。因奏請共編纂。見公小心畏義。好賢樂善。出於至誠。勸之曰。子公輔之器也。貴仕不足道。能如鄉先輩劉洛陽。更進之爲本朝湯睢州。乃無愧於爲人。公竦然。及散館。授檢討。九年。改山東道御史。十年。巡察直隸順廣大三府。十一年。監會試內簾。巡視西城。轉兵科給事中。稽察倉場。充武會試同考。十二年。奉使策封安南。賜正一品服。十三年。授刑科掌印給事中。轉四川建昌道按察司副使。公出在外。歲時必通書。余見其地士大夫商旅。必詢公操行。及所注措。故知公爲深。而欲籍之。則事實不能詳也。其巡三郡。官吏凜凜。雖大府亦嚴憚焉。在建昌。自打箭鑪至西藏。民獠威懷。治行甲兩川。金川諸土司相仇殺。公會諸將。巡視開諭。皆駢首革心。乾隆四年。大計卓異。五年。引見。天顏甚喜。賜蟒服。回任。俟後命。七年。調江蘇糧道。弊絕民熹。會淮揚水災。制軍德公。撫軍陳公。於要地多委公拯濟。其冬。遷江蘇按察使。明允無畱獄。富商大豪。姦私暴露。欲巧法彌縫。卽私計曰。惟法司大府三關。無道可通。柰何。其遷藩司。蘇人皆曰。吾民薄祐。雅太守遷閩嶺。李公復移調。誰其嗣之。不謂公之不數月而奄忽也。公處心平恕。終日溫溫。而不可強以非義。屬吏幕友。於簿書或舛誤。未嘗動聲色。惟默思所以正之。而官中蠹胥。時因事懲革。衆心感服。而不

知其所由然。痛少失怙。始舉於鄉。而太夫人卽世。愛弟學峻如一身。甫踰三十。連喪耦。卽以弟子煥爲己子。公始見余。執後進禮。余入翰林後。公故事。禮辭當卑遜。而公終以後進自處。及莅安徽通書。忽用師弟子之稱。余固辭。公曰。先生每以睢州勸我。睢州旣爲監司。始受業於夏峰。某獨不可繼武乎。余告以自明。萬歷末。徵君卽爲海內儒宗。而睢州乃鄉之後進也。今公爲邦伯。而余以薄劣爲部人。敢以徵君自處哉。而公終不易稱。卽此一節。非誠以古人爲準的。而能如是乎。惜乎。余之所望於公者。始少見其端倪。聖天子累日積久。以灼見其賢。而不獲竟其用也。然數年來。余夙所心許。如江西熊梅亭。濟甯黃訓昭。安溪李立侯。皆以壯年受知於聖主。始列九卿。而倏如影滅。則又不若封疆大吏。尙有實德之及民也。然則有心者。當爲國惜。爲民悲。而公則差可以無恨矣。公卒於乾隆十年十月望後五日。享年五十有五。祖諱士傑。父諱本質。乾隆元年。誥贈如公官。祖妣楊氏。尙氏。妣曹氏。俱贈恭人。公諱學裕。字餘三。元配劉氏。繼室尙氏。以馳封未受錫命。子四人。長煥。學峻。次子。乾隆甲子舉人。次照。側室張氏出。次燕。次焜。繼室呂氏出。前夫人並葬洛陽城東十里鋪某原。公以某年某月某日。卜兆於某岡。某原。銘曰。

曰仁曰恭。宜得其壽。德載於民。其聲遠聞。而施則不究。俛焉日有孜孜。道固宜然。其淹其速。則惟命之自天。

余與安溪李文貞公久故。其門下士相從問學者。十識八九。而獨未見莊君復齋。叩之。則初授山東維縣令。母就養。卒於塗。歸而廬墓三年。自是不忍一日離其父。父既沒。隱居教授。若將終焉。今上元年。楊文定公以大宗伯掌成均。薦授國子助教。始與余相見。西林鄂公。海甯陳公。問士於余。余首言君。次某某。非禮先焉。不可得而見也。海甯徧往拜。西林使君同官達意。至再三。君曰。吾往見。是慕勢也。相國何用見此等人。將命者以告。西林瞿然曰。吾非敢安坐而相招也。顧吾非公事。未嘗一出內城。恐時人以爲疑。吾平生惡市交。莊君以老諸生視我。則不妨顧我矣。君始入見。志相得。而自是未再至。君自助教遷吏部主事。每執稿與長官爭是非。或齟齬。侃侃言無懼色。君成進士。出少京兆余甸。御史謝濟世門。二君夙以抗違勢要著聲。由是凡良士皆望君行所志。而好權利者則陰憚之。六年夏。或薦君學行宜居言路。引見。上意甚相屬。越日。命赴湖廣。以同知題補。十月。授德安府同知。逾月。擢知江南徐州府。徐仍歲水災。君以七年四月至。相川澤。諮耆民。具方略。請廣開上游水道。以洩異漲。且告石林可危。未及注措。而石林決。沛縣城將潰。民竄逃。君立起。駕輕舸行。告父老。太守來與爾民同難。爾民何往。親率衆堵築。七日夜城完。在徐三年。兩遇大荒。勤賑事。飢不暇食。困不得眠。九年。遷按察司副使。分巡淮安徐州海州。道至金陵。過余北山。曰。吾再擢俱聖天子特恩。而徐屬水災。乃數十年所未有。心殫力竭。終不能救斯民之饑溺。及爲監司。而淮海承屢祲。凋敝多不異於徐。命也夫。吾聞古循吏。精誠能反風滅火。每對饑羸遺民。中心愧畏。夢寐中時

標辟呼嗟。今與先生一握爲笑。以海州歲歲苦病得脫耳。州有鹽河。蓄水通商運。故障塞海口。雖異漲。非偏告大府監司。不敢開洩。及文書畢下。而田苗沈沒者。已不可救矣。陳於制府。已定議。遇水漲。守土吏先開洩。而後報聞。故數年來。未有如今日之樂者。冬杪。得手書。言巡行視災核賑。十二月始回。徐舊疾復作。浹月。而其孤使人告喪。以遺命徵銘矣。云卒之朝。猶強起視事。嗚呼。以君之孝。而恨於母者。終其身。以君之仁。而民之顛連與君之牧民相終始。不可謂非命之窮矣。然抱痛於母。而孝乃無虧於父。急民之病。勤事以死。而無負於君。凡君之生。不忤於人。死不愧於天。實由於此。豈非易所謂益之用凶事者邪。君學行爲賢士大夫所重。後進多宗之。將冠。鄉先輩戴麥村鑑識。妻以族姑。泰安趙公撫閩。請主鰲峰書院。以持父喪辭。其家居來學者。歲以百計。在太學六堂之士。少有所嚮者。多願爲弟子。九年京察。上命大僚各舉一人自代。內閣學士李清植舉君。公論大服。其卒也。士民啼號。聞者罔不痛惜。所著秋水堂集。河防算法。書藏於家。君諱亨陽。世居漳州靖南縣之龜山。辛卯舉人。戊戌進士。卒以乾隆十一年正月十六日。年六十有一。父諱某。母某氏。妻戴氏。孝於舅姑。與君之友於弟亨德。並有聞。長子修。次撰。孫三人。以某年月日。葬於某鄉某原。銘曰。

自大理熊君絕世。歲始四新。余方冀其有爲。而忽焉隕墜者五人。而今復銘君。實德之遺。視災黎之涕洟。

教授胡君墓誌銘

君諱禹冀。字載川。太平府儒學教授。自余有知識。見朋齒中。背面皆稱胡先生。嘗至姑孰。憩君亭館。君適他出。往來嬉遊者。皆曰。胡公賢者也。雖兒童女婦亦然。夫天下之最難壓者。人情。而細人又甚焉。而君之所得於衆人者。如此異矣。余遊四方。未得時見君。曾以事接談。嬉無甚異人。厥後亡兄百川授經姑孰。踰年歸。曰。胡公賢者也。口未嘗言學。而叩以六經子史。輿蹟。衆人所難明者。能記辯之。因就習於君者。而考其行。乃知君自成童以後。黽勉於人道。六十餘年。未嘗有出入也。君以順治乙酉舉於鄉。至康熙乙酉。始自姑孰告歸。重見鄉後進之歌鹿鳴者。人爭羨之。以謂前輩登科後。甲子復一周者。獨嘉靖中石城許公。而君卽許公彌甥也。君之生也。未嘗有疾病憂患。終日熙熙。踰八十。食飲行步如平時。君生於明天啟丙寅。余每見與君同時人。其形貌辭氣。必篤於後生。遭遇多坦夷康樂。蓋方是時。明運雖衰。而太祖立國之規模。遠迹三代。其教化之通乎陰陽。而凝聚於萬物者厚矣。董子所謂陶冶而成之者是也。君先世蘇州人。洪武初。遷金陵。世多潛德。考諱某。妣某氏。兄弟六人。君伯也。壽八十有二。卒以大清康熙丁亥十二月。妻某氏。子某。以某年某月某日葬於某鄉某原。銘曰。

謂俗蓋陂。而遇君則甚平。謂天不可知。而賦君者獨貞。先民有躅。於君猶徵。

張樸村墓誌銘

君諱雲章。字漢瞻。號樸村。江南嘉定人也。曩者崑山徐司寇好文術。以得士爲名。自海內蒼舊。以及鄉里。

樸學。雍庠才俊。有不能致。則心恥之。而士亦以此附焉。余初至京師。所見司寇之客十八九。其務進取者。多矜文藻。馳逐聲氣。卽二三老宿。亦爭立崖岸。相鎮以名。惟君處其閒。斂然靜默。體恭而氣和。余心異之。而君亦睚就余。君始以校勘宋元經解。客司寇家。其後諸公貴人。考訂文史。必以相屬。而君嘗就陸稼書先生問學。獨陰以名義自砥。方稼書先生爲當路所排。君上書崑山相國。其後儀封張中丞。與江督噶禮互劾奏。讖久未決。君上書安溪相國。在君見謂義不可以苟止。而以言之。不與爲衆所哈。君在舉場數十年。所與比肩游好。次第登要津。司貢舉。每欲引手。君輒曲避。以是終無所遇。康熙五十二年。聖祖皇帝詔求巖穴之士。九卿公舉九人。下江蘇巡撫徵君。君既至。而首輔安溪公適告歸。事暫寢。華亭王司空承修尙書。奏君參校書既成。而君淹留逾時。衆以爲疑。余閒詰其所以。然。君曰。假予急功利。乃佞傑。到今邪。願竊自念。生逢明聖。平生所志。其上殿劄子。欲進見時。一自列之耳。既出京。會儀封公總督倉場。畱主潞河書院。又逾年。然後歸。今皇帝嗣位。詔舉孝廉方正。江蘇布政使鄂公。以君爲舉首。君老不能行。再書辭。大江以南。遂無列薦者。君內行飭修。遭母喪。既禫。子孫請少進肉。泊君固不肯。時年六十矣。將終。語不及私。慨然曰。吾生獨君臣義缺。命也夫。君父諱某。邑庠生。母李氏。妊君得夢祥。以順治戊子九月十四日生。卒以雍正丙午七月朔後三日。享年七十有九。有樸村集二十卷。行世。乙未以後。文集若干卷。南北史摘要。詠南北史詩。藏於家。妻李氏。與君同庚。姑歿。羣叔皆幼。撫育有恩。以康熙辛丑九月卒。葬今寶山縣橫港。

君以雍正丁未十二月朔後二日合葬。男四人。體方。太學生。直方。未冠。好學。工書。從君卒於京師。余親弔哭。靖方。業儒。揆方。康熙丁酉舉人。女一人。孫四人。銘曰。

斂其容。志則強。居雖蔽。聞旣彰。身壽耆。嗣衍昌。歸幽墟。宜樂康。

劉紫函墓誌銘

康熙丁酉冬十有一月。余自塞上返。聞山陽劉紫函歿。以正月望後九日。踰九月矣。丁卯戊辰閒。公卿中有以收召後進爲名者。於是諸生皆尙聲華。急于謁。其務質行。學修聞彰。而閉戶絕交遊者二人。一無錫。劉齊言。潔。一紫函也。太學嘗取高等生。教習官學生。二人並與焉。期滿試吏部。皆見絀。於時吏部主此者。負惡聲。而二人名重士友閒。余至京師。與言潔善。因以得紫函。歸過淮陰。館其家。時紫函之父行人。叔父吏部。皆歸休。長者肅客。紫函率羣季。更侍左右。冠者成童。總角。誦讀聲鏗然。僮僕執事。皆暇以恭。一室之內。薰然成和。無一事不得其理者。劉氏大功不異財。自行人吏部當官及退休。家事一任紫函。其親屬子姓。男婦內外宗近百人。數十年無閒言。余嘗私叩羣季。皆曰。此吾伯兄誠意所貫注也。紫函貌魁傑。精魄盛強。自喪季弟。未數月而頽如老翁。以余所見。居兄弟之喪。色稱情。貌稱服者。惟北平王源崑繩。而崑繩時客遊。起居飲食。多不得自遂。紫函家居。一如禮經。再朞後。辭氣戚容。尙有異於人人。乙未之冬。其弟長籍。復卒於長甯。余聞之。卽爲紫函憂。無何以書來。使其子代書。而手注其後。則臥疾已數月矣。蓋自是未

少閒也。憶辛未。余在京師。共學者數人。惟余最少。十餘年來。次第凋喪。至紫函歿。而兄事肩隨者幾盡矣。乃流涕爲銘。以歸其孤。其世繫享年葬地月日。俾自舉之。銘曰。自閉於時。衆所愕。安步周行。志卓蹕。我最其行。辭不忤。所得孰多。試省度。

陳依宣墓誌銘

昔吾友新安程若韓。流寓邗上。余往來淮南。必過焉。數稱陳君依宣。偕過余。與之交。泊如也。久之。命子夢文從余遊。及余遭難。吾友古塘。隨部檄將余妻子北徙。至邗。資用絕。君曲爲營畫。俾得達淮泗。自是歲時。必通書。致服用物。十餘年不倦。雍正二年。余得假歸葬。杪冬及春。兩過君。君老而弱足。久閉特室。不接賓客。聞余至。甚喜。命夢文引入促坐。語不能任其聲。而固止余淹留。竟日。余旣悲君衰疲。又喜君得自休息。從容養怡。可以永年也。及余返京師。踰年而得君之凶問。又數日。古塘之訃繼至。嗚呼。古塘沒而余少小同志趣之友。無一存者矣。君沒而中歲以質行相取者。亦幾盡矣。乃因唐編修范山通書以弔夢文。旣而夢文以狀來。曰。先子之行。有狀不能載者。吾舅范山先生當口之。蓋君之事其親。於古禮經所云。幾可以無愧。而自致於其兄。尤有爲俗情所難者。噫。觀君之所以交於余者。則若韓范山之所稱其信。君諱新楷。揚州江都人。世爲儒家。教授數十年。生徒半庠序。多登甲乙科。而君卒不第。享年七十有一。妻唐氏。子夢文。雍正元年。舉於鄉。女三人。皆歸士族。以某年月日。葬於某鄉某原。銘曰。

學以得其朋。行無恨於躬。爭時者叱其遇。而知德者見爲豐。我言無飾。以奠幽宮。

陳馭虛墓誌銘

君諱典。字馭虛。京師人。性豪宕。喜聲色。狗馬爲富貴容。而不樂仕宦。少好方。無所不通。而獨以治疫爲名。疫者聞君來視。卽自慶不死。京師每歲大疫。自春之暮。至於秋不已。康熙辛未。余遊京師。僕某遭疫。君命市冰。以大罌貯之。使縱飲。須臾盡。及夕。和藥下之。汗雨注。遂愈。余問之。君曰。是非醫者所知也。此地人畜駢闐。食腥羶。家無溷。屢汗。溼彌溝衢。而城河久堙。無廣川大壑。以流其惡。方春時。地氣憤盈上達。淫雨汎溢。炎陽蒸之。中人膈臆。困懣忿蓄。而爲厲疫。冰氣厲而下滲。非此不足以殺其惡。故古者藏冰。用於賓食喪祭。而老疾亦受之。民無厲疾。吾師其遺意也。余嘗造君。見諸勢家。敦迫之。使糜至。使者稽首階下。君伏几呻吟。固卻之。退而嘻曰。若生有害於人。死有益於人。吾何視爲。君與貴人交。必狎侮。出嫚語。相訾謗。諸公意不堪。然獨良其方。無可如何。余得交於君。因大理高公。公親疾。召君。不時至。獨余召之。夕聞。未嘗至以朝也。君家日饒益。每出從騎十餘。飲酒歌舞。旬月費千金。或勸君謀仕。君曰。吾日活數十百人。若以官廢醫。是吾日殺數十百人也。諸勢家積怨日久。謀曰。陳君樂縱逸。當以官爲維繫。可時呼而至也。因使太醫院檄取爲醫士。君遂稱疾篤。飲酒近女。數月竟死。君之杜門不出也。余將東歸。走別君。君曰。吾踰歲當死。不復見公矣。公知吾謹事公意乎。吾非醫者。惟公能傳之。垂爲我德。乙亥。余復至京師。君橢果肆。遺命

必得余文以葬。余應之而未暇以爲。又踰年。客淮南。始爲文以歸其孤。君生於順治某年某月某日。卒於康熙某年某月某日。妻某氏。子某。銘曰。

義從古。迹戾世。隱於方。尙其志。一憤以死。避權勢。胡君之心。與人異。

鄭友白墓誌銘

有客手一帙。不介而造余。入自賓階。揖而告之曰。凡抱其業而叩吾廬者。皆雷同炫燿。欲余爲諛佞之言。以助之者也。其果能取名致官者。蓋鮮。而奔走疲亡者。接跡焉。願君毋效也。客曰。先生之言良是。而吾非爲此來也。吾叔父獲教於先生。而以道自繩削。方得其階而願進也。而今死矣。其親隱焉。願得先生之文。以奠幽宮。某所持者。某與同學哀之之辭也。問其名居。則涇縣鄭生友白之族子天一也。初。友白亦不介而造余。告之如所以告天一者。曰。我非爲此來也。吾居深山。見先生之文。類有道者。以爲近其人。將有得焉。余聞其親老。責而歸之。踰歲復至。將見王君崑。繩於京師。曰。是吾親之志也。至京師數月。竟歸。歸踰年而卒。嗟乎。友白其果能有立與否。雖不可知。然其齒甚少。乃能以謀道爲先。而汲汲於師與友。可不謂之有志者與。自功利之學。漸於人心之幽隱。凡汲汲於利與名者。其父兄師友。皆以爲道之當然。舍此而學與道之是謀。鮮不以爲怪民。而料其無成者。而果爲不祥若此。無惑乎其去於此者決。而信於彼者堅也。吾觀東漢北宋士之有志行者。隨其才分之小大。莫不各有所就。以顯於時。而余耳目所及。志稍異於衆。

人。往往鬱不得伸。甚者不終其天年。而中道夭。豈造物乃與庸庸者同心。而不樂成人之美。與而汲汲於利。與名者。又往往所欲而必從。所求而必遂。豈各有所乘之氣。而不可強與。遂書之以慰其親。兼示崑繩。其有以發我也。友白名青蓮。卒於康熙某年某月某日。年二十有五。妻某氏。子某。葬於某鄉某原。銘曰。學中道而未殖。志殖地而長賈。君毋悔於過計。使昏庸而天札。豈復畱吾人之涕洟。

胡右鄰墓誌銘

胡生蛟齡。自成進士。問學於余。卽以其父右鄰誌銘爲請。生自翰林出爲縣令。其兄蜚。往來京師。及歲時。通書。必以爲言。按君之狀。蓋自檢飭。不苟於言動人也。而竟世爲諸生。教授宗族里黨間。無傑特之行。可紀述者。余平生非親懿。久故。未嘗爲銘幽之文。蓋銘者。諛誄之遺也。古者必貴而賢。始有誄。而諛則雖君父。不敢有私焉。若於素不相識之人。而與之銘。設實悖於所稱。是讐言也。於吾爲贅行矣。故常以爲戒。而於生徒朋好。不可以終卻者。則必多方以求其微。胡氏自元明以來。爲涇縣大族。入國朝。科名尤盛。而宜歛閒士友。語力學敦行者。必及右鄰。其窶艱而篤於友行族嫻。所述尤詳。余嘗歎人紀之衰。所尤薄者。莫如兄弟。其能無閒於妻子貨財。而終保恩義者。聞見中。蓋可指計。而蜚與蛟齡。殆庶幾焉。及聞君之篤於同氣。乃知其平生不務爲傑特。乃所以不疚於庸行。而二子之友恭。抑君之徵也。是於法宜銘。君諱一倫。祖諱尙衡。順治壬辰進士。工部虞衡司郎中。父諱懋績。縣學生。暨君皆以雍正元年。贈翰林院庶吉士。母

鄭氏妻鄭氏。並贈孺人。君卒於康熙乙未九月朔後六日。年六十有二。鄭孺人卒於康熙戊辰十月望後四日。時君年甫壯。獨居者凡三十年。子二人。女一人。適士族。孫男六人。以某年月日。合葬於東鄉上林沖之原。銘曰。

學顯於邦人。行儀其後昆。我奠茲銘。久而不湮。

望溪先生文集卷十一

墓誌銘

尹元孚墓誌銘

蠶吾李塉剛主嘗言北方少俊不官自混於俗者博野有尹元孚。余心識之。而無因緣會合。乾隆二年春。元孚自淮南入覲。再過吾廬。終未得面。以聖天子大孝。實行三年之喪。余時領武英殿修書事。請於二親王。就直廬持服。時未再期。余不出。元孚無公事。不得入也。五年春。自河南入爲副都御史。始得相見。方是時。元孚通籍已十餘年。顯功名於襄漢兩淮。開府河南。海內賢士大夫。計數大府中人物。指再三屈。則必及焉。而元孚深愧不能有所樹立。以負天子特達之知。蓋少孤貧。太夫人人口授論語。卽知孔子之言。不可違悖。旣長。篤信程朱之書。謂治法不本於三代。皆苟道。故自服官日。取漢唐以來代不數見之人。以自律。故自視若粥粥無能者。一旦入長御史。爲耳目之司。竊垂得自展布。而太夫人老疾。不能就養京師。未數月。卽以終養告歸。居五年。太夫人考終。服未闋。天子豫虛少司空職以待之。及赴闕。未踰旬。特命視學江南。十二年秋。涖金陵。八月望前六日。諸生旣入棘闈。質明。操几席杖屨。徒步造清涼山下潭亭。余尙未起。童奴白有客徑入。不知其爲大人也。及相見。北面再拜曰。曩在京師。母命依門牆。先生固執不宜使衆駭。

遽今里居無嫌。且身未及門。心爲弟子久矣。蒙授喪服。或問吾母之終。寢處食飲言語。得無大悖。成身之德。豈有既乎。時余治儀禮。因以相屬。欲共成一書。作而曰。生未暇及此也。往者巡撫河南。會凶饑。未遑教治。居臺四涉月。而聞母病。今使事畢。歸廁九卿。陪奉廷議。非忘身忘家。不足以答主知。若不能自樹立。徒附先生經學以垂名。抑微矣。必衰老或以不職罷歸。然後可卒先生之業。越日又獨身前來。從者一人。余畏邦人疑詔。乃掃墓繁昌。入九華山以避之。而私心竊羨吾君求賢若渴。又得一支柱名教之人也。未幾有旨。復掌江南學政。逾歲七月。按試至松江。遭瘡寒疾。卒於官。前是月。特晉少宰。人皆曰。上之信用益切矣。嗚呼。惜哉。元孚始以吏部郎中。出守襄陽。漢水暴上。壞護城石堤。修建萬山至長門近十里。分植巡功。民忘其勞。已調揚州。適荊州都統西征。取道漢江。飭造浮橋。吏民惶急。乃竭誠修禮。卒改令以船濟。凡利害切民。未有聞而不諮。知而不行者。所屬皆羣聚而禱祠焉。其治揚州亦然。就遷鹽運使。尋擢巡鹽御史。晉中丞。積弊一清。導商民以節儉。而身先之。及開府河南。開歸諸郡大水。上章自劾。列賑恤之宜。天子一切報可。約法十六條。兼用北宋富公弼救災事宜。而令離鄉求食者。有司隨在廩給。開以作業。俟改歲東作。資送還鄉。則古法所未備也。以是災民無一出河南境內者。元孚性淳白坦易。遇事必行其心之所安。少時授經祁州。語生徒假館於張氏。以奉母。凡七年。不忍一日離也。其居官。每夕必以所措施。詳告太夫人。意或未愜。則跪而請罪。不命之起。不敢起。官中祿賜出入。壹稟於母。非請命。妻子不得取尺布。

錫金。日用之外。多布之治。所爲揚州兩營。河南撫標。置舉本各二千金。曰凡卒伍必使衣食得自適。乃可以法繩。完城濬河。建橋梁。設津渡。修學校。立書院。創蜡祠。表前賢舊蹟。賜高年布帛。寒者衣之。疾者藥之。故民皆感興。政教信從。其在鄉。則族人皆授以田。使自耕以食。而執其契。立義倉義學。拯危濟困。不可勝紀。用此仁聲義聞。播流海內。顧公用方。久任督府。再舉以自代。高公東軒。以宗程朱志相得。總督畿輔。嘗以公事過博野。登堂拜母。孝德上聞。乾隆八年冬十有一月。天子特賜太夫人御製詩及楹聯。天下傳爲美談。最其生平。以與衆人絜度。則行旣成。名旣立。功業亦有所表見矣。而每爲余言。其胸中所蘊蓄。尙未見其端倪。此余所以心孤氣結。涉月踰時。而不能自克也。其入覲。初命巡撫廣東。陛見。陳母老不能遠行。故有河南之命。禦灾捍患。日不暇給。尙於其隙。布周官溝樹之法。編甲戶以詰盜。命州縣皆分四鄉立社學。簡有德行者爲社長。朔月月半。書其孝弟敬敏任恤者。與其放逸奇袤爲患於鄉里者。有司巡問觀察。因事而勸懲之。行之數月。罷民竦惕。禮俗丕變。而尋內召。始入臺。卽奏人主一言。天下屬耳目焉。今方甄別。年老不勝任之員。而知饒州府事張鍾。又以年老命改部司。旬日閒前後頓殊。恐羣下無所法守。上嘉納之。其在河南。嘗奏睢州湯文正公。宜從祀孔廟。視學三吳。首謁東林道南祠。舉舊典。答諸生再拜。凡試畢。士旅見皆然。頽小學以明程朱本意。聞隱士是鏡廬。慕三年親訪於舜山。薦舉以礪士行。旣遭疾。自知不起。草遺疏。言任賢納諫。始終一意。以立誠爲本。旬日中無一語及家事。卒之日。晨興盥漱。扶杖至東齋。

郡守入見。子嘉銓侍。尙爲辨人心道心。汗出霑衣。請解衣少偃息。不可。扶翊入寢。移時危坐而逝。時年五十有八。所述君鑑臣鑑。士鑑女鑑。增定洛學編。北學編。已鈔版。居憂讀禮。作從宜錄。侍養五年。讀三禮筆記。及與師友論學語。藏於家。嘉銓承父學。欲繼其志事。水漿不入於口者三日。朝夕米飲。不過一溢。淮商致五千金。曰。大人生不取一錢。今以此賻。堅拒之。曰。受一錢。何以對大人之靈。聞者莫不感動。以爲君子有子。元孚名會一。雍正癸卯進士。先世山西洪洞人。遷保定。至曾祖諱先知。始爲儒。祖諱澤。皆邑庠生。父諱公弼。早世。並贈河南巡撫。母李氏。庠生諱宗白女。旌節孝。累封太夫人。祖妣某氏。曾祖妣某氏。贈夫人。妻蘇氏。處士昂女。以貲贈。未受。巡撫時封。而前巡鹽用御史中丞所加級。封一品夫人。子二人。長嘉銓。雍正乙卯科舉人。次永銓。早殤。次啓銓。承蔭。女二人。以某年月日葬於某鄉某原。銘曰。以人視子。所受於天。實厚且全。而子自視。則終其身而缺然。子志方盛。道若可達。而不假以年。有子象賢。尙無恨於幽埏。

沈孝子墓誌銘

沈編修淑。請假歸。踰年。以書來。曰。先大父誌銘。先生前則諾矣。卜十月上旬兆。從敢請。又曰。淑逮事尙幼。事迹不敢妄述。所據旌孝錄。及鄉里之公言也。按孝子之行。尤著者。鼎革時。負母而行於野。遇盜奪其糶。母固不與。盜怒將殺之。泣而求代。並舍之。鄰失火。延母寢。母疾方劇。不可以變。孝子號痛呼天。風反火息。

母八十餘。疾危篤。醫者皆曰。法不可治。割股以進。弗瘳。夢神緋衣告曰。疾非五藥所治。醫凌某。在雙林。速致之。凌至。以針達之。脫然愈。余嘗怪書傳所記。以孝感鬼神而得異徵者。大抵皆獨行之士。而聖賢則無之。蓋聖賢之學。至於知命而不惑。雖事父母。亦盡其心與力之當然而止耳。獨行之士。悲憂感發。若焦若熬。常欲殉以身命。故精氣之積。而鬼神爲之通。理或然也。余生平非所識。不見於文。惟節與孝。則無分於聞見。然人之情務。崇其親。而不度於義。則事有傳會增加。而非其實者矣。故必得其所徵。始傳信焉。古之能以學行自振者。其先世必有潛德隱行。淑年少氣銳。乃能不篤於聲利。而以養母治經爲事。其志固與衆人異矣。淑之終有立也。吾於孝子之行信之。孝子之行。之非虛構也。吾卽於淑徵之。孝子諱育。年九十有四。卒於康熙四十九年。先世居浙之苕溪。十世祖秀明。初以平吳功。授侍駕親軍都指揮使。特進榮祿大夫。子永卿承嗣。五傳至校。嘉靖中。爲江南常熟縣福山營遊擊。卒於官。遂家焉。子繁。繁生坊。坊生文瀾。配周氏。子二人。孝子其長也。娶吳氏。子六人。錫裕。庠生。錫祚。康熙己酉舉人。錫祉。錫某。並太學生。錫祐。歲貢生。錫禧。早卒。女二人。俱適士族。淑錫某出也。以雍正五年葬於先兆慶安阡側。銘曰。歷艱危。終坦夷。母及身。皆耄期。名廣揚。後蕃昌。所受於天。茲乃得其正而常。

廣文陳君墓誌銘

君姓陳氏。諱鶴齡。字鳴九。直隸安州人。父諱澎。從容城孫徵君講學河漳。義俠著州部。君旣冠。亦好陽明

氏及其鄉鹿忠節公論學之書而踐行之。父歿。故舊巧奪其產。弗與爭。高陽李相國嘗延至京師。一日念母謝歸。設教於家塾。從者數十人。每秋冬。生徒夜誦。燈火相聯。聲滿里巷。母歿。以鄉舉次選。正定縣教諭。設條約。教諸生孝弟力田。治經史。暇則習射。屬府三十二城之士。多聞風而至。君精制舉業。其爲教雖以力行爲宗。而常因文術以誘進之。凡經君指畫。輒籍于庠序。升京兆禮部者相踵。故士爭湊焉。其在正定。嘗奉檄視蕭家營水災。在事者陰授意。以未成災報。不爲奪。太守命督隆平甯晉諸邑民捕蝗。歸報曰。民不畏蝗。捕蝗令屢下。官屢至。則苗盡矣。一時士民咸載其言。余聞古之學術道者。將以得身也。陽明氏爲世詬病久矣。然北方之學者。如忠節徵君。皆以陽明氏爲宗。其立身既各有本末。而一時從之遊者。多重質行。立名義。當官則守節不阿。如君又私淑焉。而有立者也。用此觀之。學者苟能以陽明氏之說治其身。雖程朱復起。必引而進之。以爲吾徒。若嚶嚶焉。按飾程朱之言。而不反諸身。程朱其與之乎。然則尙君之行者。蓋不必以其學爲疑也。忠節之後人。多與余往還。故余習知君之爲人。君歿踰年。次子惠華奉冢子惠榮命來請銘。固辭不獲。乃述而志焉。君康熙甲子舉人。官止順天府武學教授。以雍正四年六月卒於京邸。年六十有五。母某氏。世儒家。妻鹿氏。忠節公其曾大父也。子三。惠榮。康熙壬辰進士。黔西州知州。惠華。雍正甲辰一甲進士。翰林院修撰。季惠正。雍正甲辰舉人。女三。皆適士人。以某年月日葬於某鄉某原。銘曰。

聞之尊行無愧。教之行學亦顯。惟用不施。後昆之遺。

程贈君墓誌銘

君諱增。字維高。徽州府歙縣人也。程氏自晉梁爲歙名族。譜牒具存。衣冠甚盛。至明中葉。河南道御史材。以名節顯。而御史之子孫。爲清門。御史當武宗時。劾劉瑾不法。奏畱中。巡按浙江。卒於官。瑾誣以九庫贓。追論。合家徙海南。瑾敗。始歸鄉里。子二人。曰默。曰然。先後以禮經舉乙科。君爲默五世孫。君父自歙遷淮之漣邑。歸展墓。遭疾厲。君方與二弟從師受書。聞之。冒惡風渡江。舟幾覆。相去千五百里。六日夜而至。而父已歿。未逾月。母唐孺人疾作。遄歸。不及含斂。自是遂絕意進取。漣地窪下。母柩在堂。水驟漲。倉卒號呼。與僕一人。升柩于木案。旣而下之。非多人莫能勝。旣營兆域。合葬於休甯之蓀田山。乃移家山陽。使二弟學儒。而身懋遷家。遂饒。父族四。母族三。死而無歸者。畢葬焉。餘皆定其居。使有常業。設義田。義學。以養疏族。人而聚教之。鄉人叩門告請。未嘗有難色。或急難。以千金脫之。後更相背。造怨騰謗。窮而自解。則待之如初。由是名著江淮間。康熙□□年。淮黃汎溢。數百里內。民皆露處隄上。君出家財。修邗溝兩岸險工。十里。總督河道張公鵬。翻以聞。康熙四十四年。聖祖仁皇帝南巡。閱芒稻河。召見。御書旌勞二字以賜。先是于清端公。總制兩江時。微服潛行。察疑獄。求民隱。姦人因造言散布。以傾怨家。或因之失入。屬吏雖灼知而不敢言。君進見。直陳其弊。且指目擊一二事爲徵。公悚然曰。微子言。吾安知人心玩愒至此。君以布

衣得近天顏者三。長子鑿爲浙江糧道。攝布政使。每以公事道淮揚。覲省。夾道聚觀。人皆以是爲美談。詎知君之忼直不欺。言人所不能言。而不爲威惕如此。君嘗因吾友吳東巖見余于河干野寺。樸質如老諸生。厥後東巖總其門生所爲文。隱其名。俾余甲乙。所取二篇。皆君叔子崑作也。東巖乃詳述君之生平。而使崑從學於金陵。及余以南山集牽連赴詔獄。親故蕩恐。不敢通問。惟崑以計偕入獄視余。卽此可徵義方之教。而御史之風規。所漸摩者遠矣。君旣卒三十有一年。余告歸。崑始以君詩請序。格韻甚老。余夙有戒。不能爲生破也。又五年。卜宅始定。葬有期。來乞銘。嗚呼。君才足以立事。而不求仕。詩足以達情。而不以爲名。其用心爲不苟矣。是宜銘。君父諱朝聘。祖諱必忠。皆□□□□君卒於康熙四十九年十月某日。年□十有□以鑿誥封工部虞衡清吏司主事。以崑誥贈奉政大夫兵部郎中。元配唐氏。贈恭人。繼室童氏。封恭人。鑿。唐恭人出。次振箕。候選知州。次崑。次鍾。庠生。並童恭人出。孫三人。長揚宗。次春浩。次某。以乾隆十一年五月某日。葬君於歙縣之某鄉某原。二恭人祔。銘曰。

義正大府。乃夙昔之惇誠。聞正言而不怒。惟聽者之賢明。使君而謀仕。安能詭隨屈詔。以自毀其操行。

通議大夫江南布政使陳公墓誌銘

公姓陳氏。先世浙江秀水人。明永樂初。遷安州。五世祖始爲儒官。遂世其業。祖若父皆舉乙科。教授鄉邑。連州比郡。秀傑之士。多從遊。公成童補博士弟子。巍然出儕輩。甫弱冠。卽佐父爲諸弟師。學使者課試。壓

其曹者必公兄弟也。而公自視缺然。陰與博野尹元孚思古處。務檢身制事之學。壬辰登進士。年二十四。座師爲趙公松五。徐公蝶園。皆器公。榜下卽充武英殿纂修。時滄洲陳公。掌殿中修書事。常語余。後進有守有爲者。以公爲首。故公詣余。一見如舊識。初授湖北枝江令。鄰省大府。卽思得公守巖州劇郡。旣典郡。卽思得公爲監司。故論薦者如爭。其以黔西州服闋引見世宗憲皇帝。卽命赴貴陽。以牧守補用。其守大定。以江西巡撫薦。遂命補道府。皆前此所罕見也。公任官二十餘年。皆在西南。而勳績尤著於滇黔。其爲政。急民之病。如其私。而務以殖其衣食爲本。始令枝江。修百里洲隄。除解餉入川。雜派攝饒九道。剷去潯陽大孤兩關鋼弊。辨誣獄。出無辜者七人。未數月。經略張公。以貴州按察使保奏。方是時。羣苗交煽。軍旅四出。古州姑盧朱洪文諸叛案。以爲非公莫定也。公至。出入重輕。咸稱其情。衆心始安。逾年春。攝布政使。黔地多山。少穀土。兵餉半移調於鄰省。民尤貧瘠。公奏給工木。築壩堰。引山泉以治水田。導以含洩。涉揚之法。貴筑貴陽開州威甯餘慶施秉閒。不數年。報墾升科者三萬六千餘畝。課種桑。募蠶師教蠶。出署內所登繭。於大興寺。纒絲織作。使豔其利。開野蠶山場百餘所。比戶機杼聲相聞。又以其閒大修城郭。廟壇學舍。廣置栖流所。以收行旅之疾病者。益囚食。方冬寒。恤老疾。嫠孤之無衣者。親課諸生。開以立志爲己之學。立義學二十四於苗疆。蓋惟公志廣而才足以達之。故於艱難倥偬中。庶政並興。而曲得其次序也。其尤爲遠近所傳述者。公始至貴陽。委署威甯府。踰年。威甯改州。大定改府。會烏蒙土司謀叛。東川鎮

雄附之。威甯爲夷獮出入要綰地。仍命公馳赴威甯。督州牧完守。公至。城西陴頽。舉步可踰。乃聚民間米桶。實土石。層累丈餘。然後比次甃築。墉堞屹然。羣夷縱火牛街鎮。去城三十餘里。火光燭天。公言笑自如。日夜爲守戰計。賊不敢逼。會哈元生兵至。賊敗。時鄂少保總制滇黔。公其所舉任也。常以此自喜。知人之明。張經略引公自助。亦職此之由。而余與尹元孚平生重公。則在志行之不苟。方威甯危急。公慮賊兵趨大理。屬州牧陳嘉會分守大理。執其手曰。吾死於此。分也。但遺老母憂。費志窮泉矣。及公陳臬於黔。苗疆初定。方輿屯以蹙扼之。將吏多欲以刻急見其能。謂此異類。剿絕不足惜也。丁巳正月望。省城大火。公入見張經略曰。天意如此。當設誠修省。雖羣苗亦人類也。張公大爲感動。以申戒承事者。公之一於義理。而不雜以世情如此。昔滄州政績。惟著於郡縣。與攝江蘇方伯時。及踐大府。河決武陟。以死勤事。而功不成。海內惜之。公之才識。與滄州相近。而遭遇亦略同。自爲三司。天下皆望爲大府。近十年矣。大府多舉以自代。而竟終於此。然滄州攝監司日淺。又不若公之久於其任。而實德及人。良法垂於後世。然則在公亦可以無恨矣。公自黔調移安徽。未一年。會徐鳳水災。民流於金陵。地非公治也。而竭俸賜編棚。苦蓋布席。以栖災黎。重建陽明書院。以實學開羣士。其卒也。官吏士民。皆爲嗚咽。生平孝親。友弟。睦嫻。任恤。仁於故舊。僚友。不可備書。書其志事之卓卓者。公諱德榮。字廷彥。號密山。康熙辛卯科舉人。誥授通議大夫。生於康熙二十八年正月十六日。卒於乾隆十二年八月二十七日。年五十有九。曾祖諱所聞。歲貢生。祖諱澎。順

治庚子舉人。父諱鶴齡。康熙甲子舉人。以公及仲弟德華。累贈通奉大夫。曾祖妣潘氏。姜氏。張氏。祖妣王氏。吳氏。妣鹿氏。並贈夫人。娶辛氏。浙江分水縣令禹奕女。誥封淑人。子四人。長策。乾隆丙辰進士。江南宜興縣知縣。次筠。雍正乙卯舉人。候補內閣中書。次筌。乾隆甲子舉人。皆辛夫人出。次藩。側室黃氏出。女四人。孫四人。以某年月日葬於某鄉某原。銘曰。

古賢之生。各有志事。雖遇於時。難滿其器。與其遇隆。而施則匱。孰若中閔。用有未致。公如金玉。韞則有輝。爭先欲觀。衆心所希。蹇然當官。藹然近人。雨膏霑被。物象皆新。事至立剖。光融如煜。表裏洞然。蠹社剝伏。中經畏塗。進退維谷。國爾忘身。如行平陸。誰謂文儒。細於武守。持危濟變。左宜右有。信道不移。行身無倚。謬謂危言。以報知己。獲上以誠。師中有喜。異類同仁。德施無比。海隅蒼生。望公秉鉞。中朝良士。佇眎北闕。謂承天休。如枹與鼓。年未及耆。忽焉終古。愛己遺民。迹當見史。無爲公悲。公長不死。

葛君墓誌銘

江都顧友于。兩歲四通書於余。皆以葛氏誌銘爲言。丁酉七月。余在塞上。同里胡襲參。復自京師以友于之書。并葛氏子宏文之狀來。且曰。子之師書宣先生。蓋受宏文之贊。因與友于有連。而某亦嘗定交焉。其乞銘辭甚哀。且所狀皆近事實。可知矣。願子勿卻也。據狀。君諱士巽。字大生。揚之邵埭人。少學書。少長。慨然曰。吾見爲士者不遇。則羸其躬。以及其親。委而第。浮客遠宦。長離親側。非吾志也。因棄書行。買淮南吳

楚閒果大贏承親之志。姊妹諸甥無不資給也。兄早卒。撫其子猶子。兄之子又卒。愛其子有加於孫。君家既饒。因大治塋墓。經田疇。建廬舍。而求名師以課諸子。甚嚴。曰。吾廢學以養吾親。今吾無仰於若。若甘食美衣。而不幅以學。且生邪心。其所狀大略若此。實其言亦近於古者閭胥族師所書孝弟敬敏者矣。予平生非親懿故舊。未嘗一與之銘。蓋銘者。諡誄之遺也。古者非貴而有功德不爲誄。而諡則雖君父不敢有私焉。今於素所不識之人。而與之銘。設實背於所稱。是讐言也。於吾爲贅行矣。用此謝不爲銘。而生怨嫌者。蓋累累焉。今乃爲葛君勗爲之。蓋念胡顧二君子。誼不宜欺余。且以其素行爲質。而非徒重其請也。君卒於康熙乙未四月。享年七十元。配姚氏。繼配蔣氏。子三。長宏文。歲貢生。次宏友。國子生。次宏毅。郡學生。女子三。以某年某月葬於某鄉某原。姚氏附。銘曰。

維君之行。不求顯於俗。而自得其情。二賢爲徵。吾與之銘。

劉篤甫墓誌銘

君姓劉氏。諱德培。字篤甫。河南商邱人也。劉氏世有聞人。君之父諱伯愚。以學行顯。君既沒之明年。其子韋來省。其從父上元邑侯某。而介侯以乞銘於余。韋之言曰。吾父事親以孝。而與朋友以誠。其處身也儉。以勤。其嗜學也。老而不衰。少孤。所以事吾王母者。細大無違。先王父之遺文。得復出於患難兵火之後者。吾父好學求友之力也。自鄰州比郡。以及齊魯吳越。有道而文之士。無不交也。於書無不好。尤篤於詩騷。

鷄初鳴。起漱盥。端坐誦吟。至日夕不倦。數十年如一日也。故吾父之終也。里中士友皆驚悼。以爲典型之失焉。田君箕山者。中州之賢者也。其序君之詩曰。篤甫之詩。至性之所結也。自吾與篤甫交。而半生爲梁園之遊。夷險悲愉。無不共也。夫道之不明久矣。士非有瑰怪非常之行。則不爲世俗所稱道。而不知是皆緣所遇之變以生。自君子觀之。則循循於父母兄弟朋友之間。而久不失道者。其難倍於偶然而所發也。吾聞明之衰也。士大夫雖行過乎中。或不能盡出於中心之誠。然而無不知氣節之可貴者。當江右吳中。以文章角立爲社。而君之父亦起於北方以應之。雅爲艾南英楊廷樞諸公所推。其後明亡。艾楊諸公。致命以成其仁。而君之父亦捍鄉里之患以死。蓋其一時因教化而成習尚者如此。然則君之近文章而重氣類。其來有自也。君卒於康熙壬午十月二十日。以癸未十一月朔。葬於某鄉某原。娶侯氏。子三人。長章。拔貢生。次輻。太學生。次韓。邑庠生。女子三。皆適士人子。銘曰。

前爲良子後壽考。行比於鄉學信友。事則未施道可久。

龔君墓誌銘

君諱聲振。字以成。先世江西進賢人。遷金陵。余里居友。其世父孝水。至京師。與其父于路遊。君總角。余過孝水。見之門塾中。其後余行四方。孝水客大名。而于路官京師。不見君者十餘年矣。余遘患。吾母北上。載棹以從。爲關吏所扼。置天津。踰歲而吾母疾大劇。棹不可致。計其費。當三十千。南昌彭尹作曰。于路使粵。

西。其子在是。吾爲子語之。其半可任也。越日。君具以來事。遂集。旣而聞之。乃貸於金陵賈人也。余多年不見君。叩曰。猶務學乎。曰。未廢也。曰。曾試於有司乎。曰。爲是北來。其不遇柰何。曰。已舉於京兆矣。其貌慤而辭質。不異在門塾時。余閱世久。見齒與余若者。其設心及容貌辭氣。已不若長老之篤。而後於余者。則少異焉。又其後則又異焉。每以爲非世教之細憂。君稚齒。而聞父之友之急。無難辭。其將之也。無德色。少而得舉。無寬容。其性資有大過人者。而竟夭死。嗚呼。是豈獨龔氏之感邪。君卒於金陵。家人秘之。余與于路。屢見而不敢言。訃旣至。乃唁而爲誌以歸焉。君卒於康熙丁酉某月某日。年二十有三。以某月某日葬於某鄉某原。銘曰。

胡混叢衆萬而獨秉其英。芒乎芴乎。遽返乎幽冥。吾求之播物者。而不得其情。

余君墓誌銘

君諱兆鼎。字季重。世爲歙西巖鎮人。父及伯兄行賈。母遭厲疾。伸出求醫藥。君獨在側。疾中言動異常。人不敢近。或叩曰。爾懼乎。對曰。病者。吾母也。何懼。弱冠後。爲人賈宣城。每三歲一歸省。一日心動。遽馳歸。則母臥疾已三日矣。時伯客金陵。後二日。不期而至。叩之。其心動。就道之日同也。其後伯病於金陵。君馳視。求醫於揚州。跪泣於其庭。三日始官偕。然終不能療也。少廢書。讀大學未半。行賈後。益好書。日疏古人格。言善事。而躬行之。其在宣城。有畢某負百金。所居與君夾河。一日託賈事。迎至其家。將夕。命其女靚妝出。

拜曰。君旅居。願以女奉箕帚。償宿負。君奪戶而出。則河無舟。其人尾而至。喻以理。且要言所負終不收。乃感泣。具舟以渡。明末鄉里阻饑。君十歲。與羣兒樵蘇山中。籬閒有果。爭取啗。獨君不給視。有子華瑞。以文學知名。與予爲執友。康熙丁酉。來京師。館余家。述其事以乞銘。距君之卒十有三年矣。蓋微俗葬地難購。而華瑞貧。故久而不能舉也。君卒於康熙乙酉。享年七十有三。娶汪氏。繼娶方氏。子二。長華瑞。次關瑞。早卒。以某年月日葬於某鄉某原。銘曰。

尹太夫人李氏墓誌銘

太夫人姓李氏。博野儒生諱宗白季女也。少時聞父夜讀書。卽能暗誦。年十九。歸贈公。七年而嫠。子會一。經書皆太夫人口授。自贈公之沒。逮會一未遇。家窶艱。舅姑老。父母衰疾無子。養生送死。不惟心瘁力殫。資用半手所拮据。自會一出守襄陽。至開府河南。所以忠國利民。濟艱銷萌。拯凶饑。正禮俗。不惟朝夕訓誨。且多出於太夫人之規畫。會一之守襄陽也。三攝荊州。九赴鄂城。每遇水旱。太夫人必跪烈日甚雨中。家衆恐致疾。羅跪挽掖。終不起。常應時而得所求。雍正九年。荊州都統將兵西征。命造浮橋。吏民惶急。太夫人曰。凡人必曲致其情。而後可以理喻。會一從之。乃次第以舟渡。時又調綠旗兵馬。會集襄陽。供具夙辦。軍憲而民不擾。未幾移守揚州。襄陽樊城宜城並建賢母祠。不可抑止。乾隆四年。開歸諸郡大水。會一

懇陳民瘼。流民所至。命有司隨地廩給。而籍之。踰歲資送還鄉。無一流亡於他省者。民皆曰。豈獨大府之明。太夫人爲吾民廢寢與餐。大府安得不竭心與力乎。始會一入覲。已命攝廣東巡撫。以母老不能赴任。辭。遂改河南。及自河南內召。授副都御史。未數月。聞太夫人疾。乞終養。得俞旨。皆數十年中大臣所未有也。八年春。特賜太夫人御製五言律詩一章。堂額一。楹聯一。時爭傳謂前古邀此異數者亦罕云。會一雖洗手奉職。而自遷兩淮鹽運司。晉巡鹽御史。秩賜皆豐。太夫人節儉治家嚴。子婦非請命。銖金尺帛。不得專取。並蓄以待大用。其在官中救水火之災。給師旅。立營倉。置舉本以恤卒伍。建禮祠。修橋梁。津渡。施濟窮民。見治所德政碑。家居睦嫻任恤。分田贍族。立義倉。義學。以及道路倉卒拯救急難。具載會一所編年譜。余前已入聞見錄。賢母類中。而太夫人卒。會一復以狀介余族子觀承請銘。余苦辭之難更設也。旣而思之。古稱女士。謂女子而有士行也。不爲一身之謀。而有天下之慮。今之士實抱此志者幾人哉。而太夫人則志與事皆有焉。故更摭前錄所未及。而敘論之。俾吾儕有所愧恥而興起焉。太夫人雖通文史。而不爲詩辭。其在廣陵。憫民俗怙侈縱逸。由近鹽多商。作女訓。質言十二章。以勸懲之。每閱邸報。至聖制。惇大必三拜稽首以慶。羣下有讜論。訐謔。亦再拜稽首。偉哉淵乎。其宅心也。用此觀之。則所見於行事。抑又其淺焉者矣。始贈公沒。將卜於祖兆。族人隘之。太夫人泫然曰。宅東有田。孤嫠便祭掃。遂定窆。是爲東章新阡。越五十有一年。而太夫人耐焉。贈公諱公弼。卒於康熙三十二年六月朔日。年二十有七。乾隆二年。誥

贈資政大夫河南巡撫太夫人卒於乾隆九年七月朔後一日享年七十有八。誥封夫人。祔以十一月十一日。孫男三人。長嘉銓。雍正乙卯舉人。次永銓。殤。次啓銓。承蔭。女孫二人。銘曰。

古之貞婦。守節閨房。夫人義事。實播家邦。古之賢母。義方是帥。夫人德心。曲成民物。克已裕人。恩周六親。禳災弭患。誠動鬼神。九重褒嘉。萬衆稱美。福德之全。在古無比。天實光啓。以昭女儀。豈惟女儀。志士之師。

大司寇韓城張公繼室王夫人墓誌銘

夫人姓王氏。宛平人。大司寇韓城先生繼室。中允兼翰林院編修縉之母也。夫人之卒。苞以門生卽事喪。所得先生所述夫人之行。盡然增哀敬。先是夫人遭疾。類痺痿。及先生得末疾。夫人舍其疾而惟先生之疾是憂。遂浸加至不可療。苞居先生之門最久。而親族姻黨道夫人之賢如一口。蓋不獨家事治。其輔成先生之德義。有爲行述所未及者。夫人旣卒數月。而先生病不能興。苞每往視疾。未嘗不傷先生之衰困。而不獲夫人相左右也。及先生歸田。逾歲而疾漸平。視聽不衰。喜過余望。而又痛夫人不獲與先生偕老。而從容於林泉也。丙午秋。縉以書來徵銘。乃質言而係以辭。夫人卒於雍正元年正月。享年六十有二。長子縉。元配李夫人出。與縉同登癸巳甲科。女一。適士人孫四。長祇公。早殤。次民先。嗣縉。次立先。次因先。俱縉子。於某年月日。葬於某鄉某原。銘曰。

起家編展。惟福之綏。作嬪賢達。惟德之宜。生有令聞。女婦所儀。沒有遺施。君子所悌。年逾六甲。子姓茲茲。

兆云孔安庶無顧思。

工部尙書熊公繼室李淑人墓誌銘

淑人江西南昌人。明兵部侍郎元鼎之女。清故禮部尙書諱振裕之妹。工部尙書熊公諱一瀟之妻。翰林院編修本之母也。母朱氏。號遠山夫人。以詩名。淑人幼稟母教。好讀書。識大義。而不事吟詠。其繼室於熊。熊公已貳夏官矣。尋遷大司空。會淮黃閒議有興作。奉命往視。旣行數日。或因戚屬。以重貲叩門。曰。中途旣與公成言。囑家人驗受。淑人曰。此詐也。速持去。少延。當執送法司。蓋公素方嚴。中立不可脅持。故操事。構門戶者。欲假是以相傾也。其後公卒。以視河罷官。久之。聖祖仁皇帝。具見其表裏。復召用公。再長冬官。以疾告休。時人皆多公能勇退。而意之決半由淑人。余與本爲同年友。公歸。流寓金陵。特重余。余時過從。淑人使人進飲。必會余寒。進食必會余飢。余遭難在獄。踰年。本自天津再至京師。候於獄門外。曰。子毋憂。天子仁聖。子之罪及遠投而止耳。吾母已罄衣裘。使持而來。爲子道齋矣。用此觀之。凡本所稱淑人。以大義佐公。及幼事父母。治家教子。曲得其次序。皆無溢美可知矣。淑人之沒也。本適游秦中。而淑人畱京師。余嘗拜於北堂。旣彌留。入視於寢。迫公事。未得與殯斂。越十有一年。本自金陵以書來。速銘。曰。葬有日矣。嗚呼。余忍不銘。淑人卒於康熙壬寅年七月望後三日。享年六十有三。長子大彬。及女四人。皆前淑人魏氏出。淑人視之。不異於本。大彬子學熹。學烈。本子學鵬。皆登甲乙科。公及魏淑人先葬異壠。各有誌。淑人

以雍正某年某月某日。葬於某鄉某原。銘曰。

淑人之生。顯光尊遂。乃遇則榮。而躬實瘁。少罹閔凶。心摧考妣。歸妹愆期。年踰再紀。翼翼熊公。共恪表著。淑人櫛維。雞鳴戒曙。公在林泉。士友時式。淑人治具。夜分莫息。每視公疾。無昏與晨。巾帶不弛。涉月兼旬。既艾而瘳。且屯且邁。有子早達。方陟而顛。惟是仁賢。履艱益著。茲銘不磨。終古有譽。

謝母王孺人墓誌銘

康熙五十七年夏四月。余將行塞上。妹夫謝天寵聞其生母王孺人之喪。泣而言。必得誌銘乃歸。孺人之歸謝氏也。年十有八。其卒也。六十有一。而爲瘳者三十有六年。始新津縣令謝君仁趾。聘孺人爲側室。踰年而嫡死。遂攝內事。自孺人始歸。新津君已邁心疾。惑易無常。孺人與生三子一女。皆在憂懼中。自新津君沒。家益落。諸子皆窶艱。孺人有弟。客死於非命。積軫鬱。癰發於乳。醫者求索不稱意。投惡石以反之。遂成鋼疾。二十餘年不瘳。計孺人之在謝氏。自少而壯而老。未嘗有一日恬安。其恟愁自苦。不獨以爲瘳也。往歲孺人六十。天寵歸爲壽。舊所患良減。其家人之訃云。乃者孺人時自寬。食飲有加。其疾以卒。旬日聞事耳。嗚呼。此昔之仁人。所以不官一夕離親而宿於外也。天寵之依余於北也。以余北遷。女弟御吾母以行。乃用此不得親母之含斂。以余之恨於天寵。固不能已於言。況重以孺人之節乎。王氏江甯故家。其先世有官指揮使者。孺人卒於二月十日。以某月某日。祔於新津君之兆。在江甯縣某鄉某原。銘曰。

命之惻節以亨。載此貞名。尙何憫於其生。

少司農呂公繼室王夫人墓誌銘

呂氏自明大司馬忠節公家法。爲中州士大夫宗。而奕世多賢婦人。少司農坦菴公。未與余相見。卽因吾友崑繩通問以索交。及余與宗華同會試榜。光祿好余尤篤。由是兩支子弟。往來京師。鮮不過從。而意相鄉者。乾隆二年春。岳池令憲曾。以母王夫人狀。因宗華以求銘。夫人。司農繼室也。始歸。憲曾將冠。而宣曾生五齡。新喪其母。女子子五人。未逾旬。而司農之官甯鄉。夫人居守。撫慰勤恤。男女長幼咸安焉。其後憲曾再喪偶。遺子女數人。夫人鞠育。一如宣曾及諸女弟。而兩女早出室者。皆寡。外孫窮無依。爲紀衣食。月要旬致。延及支庶。夫人隨司農仕宦數十年。諸子皆通籍。而夫人所出守曾。尤早達。顯榮舄奕。乃世所謂難逢而可羨者。然其拮据勞瘁。視貧家婦有甚焉。守曾爲宣化太守。憲曾令岳池。每戒之曰。汝父常語家人。居官而求便於身。則不便於民者多矣。又曰。吾私親兄弟各食力。無憂寒飢。毋以我故餽遺。惟妹適陳氏者。及憲曾舅氏甚窶艱。勤周卹可也。買婢而還。其家不責以值者。凡三人。其一。大父爲諸生。立道之。父母不受。曰。還則孳矣。乃善養。視歲熟而歸之。嗚呼。信如憲曾所述。古之所謂婦順者。其備乎。詢於宗華曰。是吾先人家法。世母敬帥而行之者也。惟始至吾家。曲糴隱愍。有人情所尤難者。狀蓋未之能具焉。嗚呼。若是則銘其可辭。王氏。河南新安人。父養林。鄉里稱長者。母牛氏。夫人其仲女也。司農爲僉都御史。誥封。

恭人今上御極。覃恩自齒朝以上。均得以父職官所極品階請封。遂晉夫人。以乾隆元年正月疾卒。享年五十有五。長子憲曾。前夫人徐氏出。康熙戊子舉人。次宣曾。王氏出。康熙甲午舉人。次守曾。雍正癸卯舉人。甲辰進士。授四川驛鹽道按察司副使。以夫人疾革。未赴任。孫男八人。以某年月日葬於某鄉某原。銘曰。女教之明。嫡媵恩隆。同氣之愛。下型於所生。及俗之傾。繼室有涼德。而父子兄弟咸不得其情。有碩夫人。秉德之貞。盡室和甯。有孚以光亨。及而雲仍。家則是承。

光祿卿呂公宜人王氏墓誌銘

宜人姓王氏。孟津王文安公諱鐸之孫。太常寺少卿諱無咎之女。明大司馬忠節公之孫婦。監察御史贈僉都御史諱兆琳之子婦。光祿卿諱謙恆之妻。承曾光曾耀曾之母也。年十五歸於呂。幼稟母教。通詩禮。其爲婦。宗婦之長者皆羨焉。其爲母。宗婦之少者皆師焉。與光祿相愛敬。以成厥家。族姻鄉黨有述焉。余爲耀曾同年友。而光祿信余最篤。以文學禮義相正。嘗語余曰。吾生平無媵侍。或疑吾妻不能容。非也。家事治。子孫成行。吾自謂可無此耳。宜人與光祿生同年。卒後一歲。爲夫婦者六十有一年。逮事舅姑。並越二紀。子三人。伯仲舉乙科。耀曾歷官四川按察使。所至獲民譽。孫曾繩繩。耳目髮齒。至耄不衰。卒之日。言動如平時。以余所聞見。婦人之德與福兼。蔑與宜人匹者。宜人生於順治十年六月。卒於雍正七年十月。

余旣誌光祿矣。故子姓戚屬不具銘曰。

曰。豫曰豐。民生所善。布列六位。爰虞過半。有碩宜人。得天獨贏。美合令終。爲咸爲恆。族姓素貴。夫家世隆。所儀則賢。盡室融融。上學舅姑。下儀子婦。有孫有曾。康強壽考。在生疇榮。考終相次。儋此幽宮。永隴世嗣。

趙孺人翟氏墓誌銘

孺人姓翟氏。涇縣趙贈君濬之繼室。御史青藜之母也。少歸贈君。順於姑。宜其家人。家素封。執婦事如寒素。其後中落。處之泰然。前孺人左氏。子一女三。孺人子女各二。數十年無閒言。姑旣歿。迎姑之女兒於家。忠養久而不怠。贈君歿。盡蓄藏以付長子預。俾秉家政。預爲縣令。浙東青藜入翰林。迎養於京師。乾隆八年夏。孺人思歸。少子希文侍。五月朔日。於潞河登舟。是月晦前二日。遭微疾。卒於德州舟次。青藜悔痛。再以書請銘。述孺人勤家教子語甚詳。兼及贈君義事。余按銘者。誅之遺也。非於德於功於言有立。或有奇節義烈。無以舉其辭。據狀。孺人乃履順而持家。有法度者。贈君則富而好行其德。於法尙未可以銘。然及吾門者。有所祈嚮。而可信其操行之終不迷。青藜其一焉。古之人善善及其子孫。況父母乎。故援斯義而爲之銘。使青藜知成親之名。在自敬其身。而後此所宜自奮厲者。甚重且遠也。贈君貢生。候選訓導。預邑庠生。以薦舉知浙江餘姚嘉興二縣。青藜壬子中順天鄉試。丙辰舉進士第一。授翰林院編修。改江西道御史。著直聲。希文丙辰中本省鄉試。女五人。皆適士族。孫八人。翟氏邑舊族。孺人生於康熙二十三年。卒

年五十有九。以某年月日。祔於贈君之兆。在某鄉某原。銘曰。
爲婦爲母。可富可貧。以睦以嫻。內和外親。貴而思約。老而益勤。德言諄諄。孫曾永循。

王孺人墓誌銘

康熙五十八年冬。吾友朱君履安。嬰疾沈痼。動息不自由。余心憂之。而竊委其有良妻。余里居時。過履安。食飲盤匱。杯罍必潔修。而家無女奴。今履安疾雖困。孺人左右焉。必能自苦。以適履安。踰歲而履安以書來。曰。吾妻死矣。吾憫其生之勤也。欲丐子文。以列幽墟。且子在難。吾妻能與吾同憂。其垂死時。吾謂必得此於子矣。昔辛卯之冬。余以南山集牽連被逮。下江甯縣獄。同學二三君子。朝夕會履安所。履安或以事出。諸君子頻去來。孺人必先爲具。以時候問。無使渴飢。方是時。大府命吏迹與余往來者甚嚴。一日。縣令以他事入履安門巷。或告曰。履安亦相隨入獄矣。孺人驚悸成疾。久而不瘳。今其死。猶緣故疾動也。嗚呼。余以昏愚。不能自敬戒。以卽於罪戾。而累於朋友。一至此乎。非孺人旣死。而履安自言之。余不知也。履安徵銘之書。一歲六七至。旣而曰。速爲之。及吾之見也。余心隱焉。夜不能寐。晨起而志之。孺人姓王氏。江甯縣人。享年五十有五。子三人。女二人。以某年月日。葬於某鄉某原。銘曰。
長子老身苦辛。以有年。疾則莫養而死。獨先命乎。命乎。永賈志於窮泉。

許昌禎妻吳氏墓誌銘

康熙辛卯九月。歙縣許起昆。持其母行狀。因吾友吳君東巖來乞銘。東巖於其母爲族子。而狀卽東巖所作也。余旣許諾。踰月而被逮。又二年出獄。東巖適在京師。復以爲言。余曰。吾非敢負諾責也。恐爲僂人。其言不足以列幽墟。曰。子淺之乎。視許生也。因復以狀來。諦觀之。辭達而事信。余無以易焉。因撫其語而係以銘。狀曰。爲人婦而以衰經終其世者。惟吾族姑許節母。節母幼時。父客死。輿榾歸。衣衰泣血。哀動族黨。年十六。歸同邑許昌禎。入門。姑寢疾。已六月餘矣。厥明。卽解妝侍湯藥。動息扶將。姑將瞑。泣曰。吾生不與若久處。吾魂魄猶相依。居姑喪。與祖姑臥起。祥禫畢。踰歲生男。未彌月。夫驟病。強起在視。足弱常匍匐戶榻閒。夫不起。卽絕食飲。祖姑泣。納兒懷中。久之。乃乳兒。居無何。祖姑卒。依繼姑。繼姑又卒。其生而忠養死喪以禮。一視姑。節母疊遭閔凶。及繼姑死。益自傷。嘔血寢疾。數歲而卒。年四十有三。其歸許近三十年。爲嫠凡二十三年。而服苴菅及羣喪。不下二十年。艱貞苦恨。自節母而外。蓋未之見也。卒之後。家人啓篋笥。嫁時衣物如新。蓋終其身未御云。起昆爲邑諸生。以文藝稱於時。儕行身謹飭。東巖云。皆節母之教也。以某年月日。奉母柩合葬父墓某鄉某原。銘曰。

奕奕三世嫠仔肩。病姑呻吟兒孿孿。死之不得生憂纏。天以百罹操貞賢。蛻此短晷何恨焉。

高善登妻方氏墓誌銘

四川夔州府學增廣生。梁山高善登妻方氏。工部主事諱登嶧之女。己丑進士式濟之妹也。於余爲妹之

無移服而未遠者。工部居近吾家。式濟童稚。視余如嚴師。至其家。必從問經書古文。妹常在旁。高氏故華族。流寓金陵。甚貧。妹歸不逮舅姑。能忠養祖姑。兼奉尊嫜之養。自工部父子。以家禍謫戍黑龍江。族衆北徙。善登餬口四方。妹獨持門戶。忍飢寒課子。吾宗在金陵者。或窶艱。自顧不暇。或不相往來。惟歲時一返余家。視道希兄弟如近親。喜憂必告。時通有無。然逾時閱歲。必歸之。以爲信。不可曲止。其後年餘。絕無假貸。道希兄弟時候。問門者。每以他出辭。入視戶。果外鍵。雍正己酉秋。疾既亟。道希始聞奔視。臥蒯席。別無覆薦。惟少子在側。急購衾茵。進藥物。越二日而卒。老婢曰。年來以假貸不能歸。衣敝履穿。戒姪輩至。卽鍵戶堅辭曰。無爲使忡忡也。時長子允從。父歸西川。應鄉試。道希道永道章親含斂。以書來告。嗚呼。先王制禮。小功皆在他邦。加一等。其此故也。夫余與道希兄弟。悔痛不可追矣。然其性行之艱貞。不可使終泯也。故質言之。俾異日以奠於幽宮。妹諱敷。年五十有一子二人。允。乾隆元年恩科舉人。暉。縣庠生。銘曰。假而非女士。遭變砥節。志事當如何。吁。悽乎。隱愍而莫之恤。惟生者之嗟。

贈孺人鄒氏墓誌銘

孺人姓鄒氏。友人余東木之妻。學子熒之母也。世儒族。家宜黃之潭溪。幼通詩書。流覽傳記。東木垂髫。以試事過潭溪。孺人之父偉。其容貌請於親。字焉。及嫁。宮事無違。娣姒皆宜之。暇時喜吟詠。姑止之。遂不復爲。熒稚齒。經書皆孺人所授。東木爲諸生。歲授經鄰邑。孺人紡績。苦辛勤養。及成進士館選。入上書房。課

讀而孺人卒於家。始戾之從余遊也。能倍誦十三經。絕意進取。思力踐古人之學。既而以族人陵侮。就有司求試。舉於鄉。及母歿。痛生養未致。請余爲銘幽之文。余告之曰。非文之難。而義無以立之難。姑卑之毋高論。曩子能定心廣志而學有所成。則亦如曾氏。繫銘其母者。得據以爲辭矣。雷同敝次。婦事之常。覽者欲臥前焉。用此。孺人旣歿。且十年。戾以余卜宅改葬先祖暨亡兄弟。自京師跋涉來承事。必得余文然後歸。乃舉其崖略。并述前言。使戾忱然於往不可追。而來者猶可自奮厲也。孺人卒於雍正癸丑。十有一月。年四十有二。以乾隆元年覃恩。贈孺人祖闈。鄉貢士湖廣臨武縣令。父用揆。國學生。子二。戾。壬子舉人。光縣學生。女二。俱幼。以某年月日葬於某鄉某原。銘曰。

夫之榮命不延。名彰徹。在子賢。銘爲德輿。使國人稱。願是爲君子之母。戾與光與。

望溪先生文集卷十一

墓表

季瑞臣墓表

先生季姓諱熙字瑞臣上元人明季諸生教授里巷間卒年七十有五有子咸若與余爲兄弟交庚午春余弟椒塗疾革余體氣忽變常先君子命避居野寺咸若有弟早夭與余相憐也招至其家館余于門側小室而先生授經南堂家無僕婢備農家子未成童每質明先生起視童子掃除室庭階捧盥設醪粥賓爲賓焉主爲主焉傭者亦自得其爲僕焉頃閒學子至受業以次師爲師焉弟子爲弟子焉薄暮移坐階下延客語咸若授徒歸進果蔬酒漿漏鼓移乃罷父爲父焉子爲子焉咸若之妻常侍姑至余家左右扶將姑爲姑焉婦爲婦焉昔程子嘗歎天下君臣父子兄弟夫婦不盡其分者之多而余觀詩書所稱以及周官戴記所陳述每思古者教化備而禮俗型無貧富貴賤男女少長各得其分而性命之情安當其時毗庶之家法後世士大夫有不能守者矣因欲爲文著所見于先生父子間者以示鄉人而未就也越三十年至今庚子咸若來徵銘乃揭前事以表于墓先生于書無不究覽尤深于易數而未嘗與人言嘗以思子詩視先君子然後知所得於詩亦有過人者楊先生鹿園金陵奇士也於時人概不fast意獨與先

生爲寂寞交。先生寡語言。終日溫溫。獨時與楊先生扶杖矯首郊野。則劇飲縱談大樂。或樂未畢而繼之以哀。咸若云。先生卒于康熙壬申。妻某氏。卒于康熙壬辰。以某年月日。合葬安德鄉獨樹山之陽。桐城方某述。

萬季野墓表

季野姓萬氏。諱斯同。浙江四明人也。其本師曰念臺劉公。公既歿。有弟子曰黃宗義黎洲。浙人聞公之風而興起者。多師事之。而季野與兄充宗最知名。季野少異敏。自束髮未嘗爲時文。故其學博通。而尤熟于有明一代之事。年近六十。諸公以修明史。延致京師。士之遊學京師者。爭相從問古儀法。月再三會。錄所聞共講肄。惟余不與。而季野獨降齒德而與余交。每曰。子於古文信有得矣。然願子勿溺也。唐宋號爲文家者八人。其於道粗有明者。韓愈氏而止耳。其餘則資學者以愛玩而已。于世非果有益也。余輟古文之學。而求經義自此始。丙子秋。余將南歸。要余信宿其寓齋。曰。吾老矣。子東西促促。吾身後之事。豫以屬子。是吾之私也。抑猶有大者。史之難爲久矣。非事信而言文。其傳不顯。李翱曾鞏所譏。魏晉以後賢姦事迹。並暗昧而不明。由無遷固之文是也。而在今則事之信尤難。蓋俗之偷久矣。好惡因心。而毀譽隨之。一室之事。言者三人。而其傳各異矣。況數百年之久乎。故言語可曲附而成。事迹可鑿空而構。其傳而播之者。未必皆直道之行也。其聞而書之者。未必有裁別之識也。非論其世。知其人。而具見其表裏。則吾以爲信。

而人受其枉者多矣。吾少館于某氏。其家有列朝實錄。吾默識暗誦。未敢有一言一事之遺也。長遊四方。就故家長老求遺書。考問往事。旁及郡志邑乘雜家誌傳之文。靡不網羅參伍。而要以實錄爲指歸。蓋實錄者。直載其事與言。而無可增飾者也。因其世以考其事。覈其言。而平心以察之。則其人之本末。可八九得矣。然言之發。或有所由。事之端。或有所起。而其流。或有所激。則非他書不能具也。凡實錄之難詳者。吾以他書證之。他書之誣且濫者。吾以所得于實錄者裁之。雖不敢具謂可信。而是非之枉於人者。蓋鮮矣。昔人于宋史已病其繁蕪。而吾所述將倍焉。非不知簡之爲貴也。吾恐後之人務博而不知所裁。故先爲之極。使知吾所取者有可損。而所不取者。必非其事與言之真而不可益也。子誠欲以古文爲事。則願一意于斯。就吾所述。約以義法。而經緯其文。他日書成。記其後曰。此四明萬氏所草創也。則吾死不恨矣。因指四壁架上書曰。是吾四十年所收集也。踰歲。吾書成。當並歸于子矣。又曰。昔遷固才旣傑出。又承父學。故事信而言文。其後專家之書。才雖不逮。猶未至如官修者之雜亂也。譬如入人之室。始而周其堂。寢。屢。漏焉。繼而知其蓄產禮俗焉。久之。其男女少長。性質剛柔。輕重賢愚。無不習察。然後可制其家之事也。官修之史。倉卒而成於衆人。不暇擇其材之宜與事之習。是猶招市人而與謀室中之事耳。吾欲子之爲此。非徒自惜其心力。吾恐衆人分操割裂。使一代治亂賢姦之迹。暗昧而不明。子若不能。則他日爲吾更擇能者而授之。季野自志學。卽以明史自任。其至京師。蓋以羣書有不能自致者。必資有力者以成之。欲竟

其事然後歸。及余歸踰年。而季野竟客死。無子弟在側。其史藁及羣書。遂不知所歸。余連遭軻軻。於所屬史事之大者。既未獲從事。而傳誌之文。亦久而未就。戊戌夏六月。臥疾塞上。追思前言。始表而誌之。距其破蓋二十有一年矣。季野行清而氣和。與人交。久而益可愛敬。其歿也。家人未嘗計余。余每欲赴其家弔問。而未得也。故於平生行迹。莫由敍列。而獨著其所闡明于史法者。季野所撰本紀列傳。凡四百六十卷。惟諸志未就。其書具存。華亭王氏。淮陰劉永禎。錄之過半。而未全。後有作者。可取正焉。

梅徵君墓表

徵君姓梅氏。諱文鼎。字定九。江南宣城人也。康熙辛未。余再至京師。時諸公方以收召後學爲名。天下士負時譽者。皆聚於京師。而君與四明萬季野亦至。季野。浙之隱君子也。君亦不事科舉有年矣。余詫焉。皆曰。吾懼獨學無友。而蔑以成所業也。季野承念臺劉公之學。自少以明史自任。而兼辨古禮儀節士之欲以學古自鳴。及爲科舉之學者。皆輟焉。旬講月會。從者數十百人。而君所抱厯算之說。好者甚希。惟安溪李文貞。及其徒三數人。從問焉。君常閉戶殫思。與吾友崑繩北固遊。時偕來就余。而余亦數相過。乃知君博覽羣書。於天文地理。莫不究切。得之所以云之意。所爲記序書論。亦有異於人人。北固嘗與同舍館告余曰。吾每寐覺。漏鼓四五下。梅君猶篝燈夜誦。味爽則已興矣。吾乃今知吾之玩日而愒時也。其後李文貞以君厯算書進呈。聖祖仁皇帝南巡。召見於德州行在所。命坐賜食。三接皆彌日。御書積學參徵以賜。

於時公卿大夫羣士。皆延跂願交。而君亟告歸營祠廟。定宗禁。又數年。壬辰。詔開蒙養齋。修樂律。厯算書。下江南制府。徵其孫。穀成入侍。律呂正義成。驛致命校勘。辛丑夏。厯算書成。穀成請假歸省。逾月而君卒。時年八十有九。上聞。特命有地治者紀其喪。爲營窆。由是世士皆榮君之遇。而嘆季野獨任明史。而蔑由上聞。丙子之秋。余與季野別於京師。卽豫以誌銘屬余。及余北徙。而季野卒於浙東。過時乃聞其喪。爲文將以歸其子姓。叩之鄉人。莫有知者。而穀成與余供事蒙養齋。爲昵好。自徵君之歿。閱月踰時。相見必以銘幽之文爲言。而衰疲日以底滯。既不逮事。乃略敘以列外碑。梅氏自北宋家宛陵。徵君之先。與聖俞同祖別支。世有聞人。自徵君爲族長。梅氏無公庭獄訟。幾三十年。族屬數千人。無敢博戲者。或侮其父兄。辟宗祠。扑擊之甚痛。君歿。赴弔哭失聲。父士昌。隱居治易春秋。母胡氏。子以燕。癸酉舉人。君及妻陳氏。以穀成貴。誥贈如其官階。所著厯算叢書八十六種。勿菴文集若干卷。筆記若干卷。惟平三角舉要。弧三角舉要。環中黍尺。塹堵測量。筆算。厯學駢枝。交食蒙求。七種。厯學疑問三卷。李文貞鈔版行于世。

田間先生墓表

先生姓錢氏。諱澄之。字飲光。苞大父行也。苞未冠。先君子攜持應試於皖。反過樅陽。宿家僕草舍中。晨光始通。先生扶杖叩門而入。先君子驚問。曰。聞君二子皆吾輩人。欲一觀所祈嚮。恐交臂而失之耳。先君子呼余出拜。先生蒼拜。先君子跪而相支柱。爲不甯者久之。因從先生過陳山人觀頤。信宿其石巖。自是先

生遊吳越。必維舟江干。招余兄弟。晤語連夕。乃去。先生生明季世。弱冠時。有御史某。逆閹餘黨也。巡按至皖。盛威儀。謁孔子廟。觀者如堵。諸生方出迎。先生忽前。扳車而攬其帷。衆莫知所爲。御史大駭。命停車。而洩溺已濺其衣矣。先生徐正衣冠。植立。昌言以詆之。騶從數十百人。皆相視莫敢動。而御史方自蚤脫於逆案。懼其聲之著也。漫以爲病顛而舍之。先生由是名聞四方。當是時。幾社復社始興。比郡中主壇坫與相望者。宣城則沈眉生。池陽則吳次尾。吾邑則先生與吾宗塗山。及密之職之。而先生與陳臥子。夏彝仲。交最善。遂爲雲龍社。以聯吳淞。翼接武於東林。先生形貌偉然。以經濟自負。常思冒危難。以立功名。及歸自閩中。遂杜足田閒。治諸經。課耕以自給。年八十有二而終。所著田閒詩學。田閒易學。莊屈合話。及文集。行於世。先君子閒居。每好言諸前輩志節之盛。以示苞兄弟。然所及見。惟先生及黃岡二杜公耳。杜公流寓金陵。朝夕至吾家。自爲兒童。捧盤盂。以待漱滌。卽教以屏俗學。專治經書古文。與先生所勸。不約而同。爾時雖心慕焉。而未之能篤信也。及先兄翻然有志於斯。而諸公皆歿。每恨獨學無所取衷。而先兄復中道而棄余。每思父兄長老之言。未嘗不自疚夙心之負也。二杜公之歿也。苞皆有述焉。而先生之世嗣遠隔舊鄉。平生潛德隱行。無從而得之。而今不肖之軀。亦老死無日矣。乃姑志其大略。俾兄子道希。以告於先生之墓。力能鐫之。必終碣焉。乾隆二十年十月有二月望前五日。後學方苞表。

杜先生蒼略。每言自楊左羅。禍范陽三烈士。聲震海內。一時才士。爭思斷死。以立名義。因道錢先生爲衆所權挫。巡按其始事也。余以巡按終不作難。爲疑杜先生亦未知其詳。聞叩之白麓先生。云御史移文杏革督學。難之曰。必欲甘心焉。則入告具言其所以。乃止。因

默諸生無禮而巡安不敢自治。督學畏清議以忤同官。一代風教所積於斯可見。然鄉人游於鄉校以講
執政而子產爲師。管仲立噴室之議。則其氣象不可復見矣。白麓嘯之子也。諱中發。於余爲諱父之
無移服者。繼塗山以詩名吾鄉。孝
謹寬厚。其言信而有徵。故并紀之。

同知紹興府事吳公棠表

公諱勉。字素裘。先世閩之莆田人。明季避倭亂。移家京師。入國朝。以拔貢生知同州。又知光州。遷紹興郡
丞。官罷。流滯江南。僑寓棠邑。甯稼村。往來金陵。與吾宗故老塗山及黃岡二杜公遊。見先君子詩。許以吾
母繼室。及先君人。公客死。踰年矣。苞兄弟三人。馮氏姊。鮑氏妹。皆生於外家。苞幼多疾。吾母中夜爲摩
腹及足。時道古記及外祖父母舊事。以移其心。苞耳熟焉。公少窳艱。歲祿不食者二日矣。中貴人或以文
請。餽十金。不應。故人聞而義之。羣繼粟焉。由是知名。保定總兵賀某。以禮致幕下。嘗爲賀單騎入山寨。諭
寇出降。代治兵。凡麾下將吏。皆聽部勒。爲紹興司馬。邊海寇。攝蕭山令。平天台山賊。功不得御。而以忤勢
家罷官。崇禎末。公父以展墓。懸隔閩中。絕音耗。公在同州。聞閩邦歸順。卽具文大府。監司乞解官求父。數
月中。固請至再三。會訃至。乃止。其他庸行。不可殫記。外祖母林宜人。苞猶及焉。篤老浣濯縫紉。不自休。旬
日必燂湯沐。苞兄弟。苞疾。摩腹及足。與吾母遞代。宜人卒。苞四歲矣。葬以昧旦。墓距村一里而近。盡室皆
往。苞忽驚寤。裸跣而趨葬所。大驚。吾父吾母及會葬人。猶昨日事也。自先君子歸金陵。余奔走四方。惟弔
叔舅之喪。一至外家。其後叔舅之子。伯舅之孫。並移家金陵。各闕口四方。封樹無主。常思爲買墓田數畝。

屬耕者以守之。顧自念大父叔父母兄弟皆既葬而起。攢妻嫂暴露。近者數年。遠者數十年。何暇及外家之邱隴乎。今衰病日劇。感念往事。不容於心。乃略敘吾母所口道。以歸叔舅之子。以誠使碣焉。據行狀及德政碑。載公實行宦績甚具。而概弗採著。不敢傳疑。以溢美於所尊。禮也。伯舅聖穆。以奔喪卒於光。叔舅敬儀。客死於淮。術者皆曰。葬地則然。嗚呼。悽矣。

吏部侍郎姜公墓表

公諱補。字崑麓。山西太原府保德州人。祖諱名武。明崇禎末。流賊寇開封。力戰死之。贈右都督。父諱宗呂。順治壬辰進士。公性沈毅。忼慨有大志。少孤貧。致勤于文學。而不欲以文士自名。既成進士。久之。授麻城令。年五十餘矣。自縣令六遷而至吏部侍郎。其令麻城也。未三年而入爲行人。踰年擢戶科給事。充己卯江南鄉試副主考。未返命。遷鴻臚寺少卿。提督浙江學政。既事赴闕。擢都察院右僉都御史。六日。遷左副都御史。踰年。遷工部右侍郎。兼攝刑部右侍郎事。尋改吏部右侍郎。時天子嚮公甚殷。天下士皆想望風采。而公遽以疾卒。公始之官。以車一乘。僕二人。麻城故壯縣。訟獄紛綸。盜賊數起。公至。逾月不出一令。邑人大驚。其老奸宿豪。皆曰。令如虎。方病。未可測也。平時訴縣庭者。日數十百人。公爲期五日。一收告。令訟者立堂下。次第傳訊。每就單辭。摘發其隱私。立責而遣之。自是訟期求直者。乃數人耳。功令。凡劫盜不時獲。守土者奪官。用此吏皆諱盜。而苛責被劫者。誣污拷掠。困辱于失財。由是被劫者例以竊報。雖捕獲。

終無死法。苟置之死。監司以上轉得持短長。由是盜益逞。民益蹙。公始至。盜發。即持卷詣大府曰。此劇盜也。雖以竊聞。獲必殲焉。大府許諾。獲九人。即日杖殺其七。餘斃獄中。自是終公任境內皆宴眠。公之按試兩浙也。舟行過北新關。關吏難之。公怒。使告曰。吾行裝具在。果有私財。速揭報。不者吾奉天子命。按試諸生。而若以賄要。商民困可知矣。吾止此。今拜疏入告。司關者大窘。躬至舟次。謝罪請行。自是所至有司貪縱者。畏公如大府。公自戊午舉于鄉。即以文名京師。至乙丑始成進士。待選又十餘年。學使者爭迎致。嘗偕山左劉公木齋至江南。刮除舊習。南士爭先學古。己卯榜揭。不遇者皆頌公之明。浙東西建督學祠。春秋時祀。至今不廢者。惟公及顏編修光燾耳。公平生雅不欲以文學知名。而所表擢。大抵皆文事。其給事戶科。未數月而有江南之命。返自浙。始列于九卿。而疾作矣。所欲自見於世者。概不得設施。此余所以深惜於公。而又不獨爲公惜也。余始見公于督學宛平。高公使院。高以國士遇余。公實啓之。及公主試。而余適爲選首。例執弟子之禮。以見公。三辭曰。此世俗之淺意也。子不見顧涇陽孫柏潭已事乎。余對曰。吾不敢爲世俗之所驚也。且始見時。公年長以倍矣。然公每接余。周旋談笑。必雜以朋友之禮。與辭。癸未仲夏。見余于廣陵。一夕酒半。自述中歲窶艱。血氣早衰。而憂後嗣之弱。余愴然心動。蓋自是不獲與公再見矣。余聞公喪。以老母衰疾。未克赴弔。無何而身及于難。忽忽至今。念此生終不獲哭公于墓道。乃述所親得于公者。以爲表而歸其孤。其行身處家。洩官之詳。無所考驗。故信以傳信。而不敢有溢美之言。然即余所

知之一二亦足想見公之爲人矣。公卒於康熙甲申十月。年五十有八。以丙戌十月朔後二日。葬于州西理賢陵。前夫人李氏。祔。後夫人呂氏。子宏焯。康熙己亥秋九月朔後四日。江東門人方苞表。

工科給事中暢公墓表

故工科給事中素菴暢公。與故戶部侍郎將樂廖公蓮山。同爲縣令江南。所治鄰接。志相得。康熙庚午。爲鄉試同考官。文皆互閱。廖公於公房見苞文。大異之。公亦稱善。交論力薦。雖卒無成。而一時以爲美談。廖公官江南及京師久。苞時得從游。而公終身僅再三接。雍正六年秋。公之孫俊。以父中掄命請表墓。距公之歿。十有七年矣。公始令祁門。詰豪蠹。卻水碓私餽。禁里下雜共。及補稷山。偪介關塞。會大師征噶爾丹。有司按地徵餉。及凱旋。議給散。少需緩。民大閔。前令惶急。公出諭。卽以充正賦。乃安堵。辨死獄。旣成者二。革積弊十六條。邑故荒殘。蔡村陽平東西衛。逃亡尤衆。公招徠給牛種。而緩其徵。歸者相踵。鄉鎮水道。及市集。爲鄰邑蒙奪者盡復之。稷人里爲祠。歲時聚拜。康熙四十二年。行取補禮部主事。尋擢工科給事中。方欲有所設張。忽中風痺。遂告休。公友弟聞于鄉。事繼母誠孝。奔喪慟絕。數日後始知。次子新喪。嗚呼。觀公之質行吏治。信可謂修飭之君子矣。然非俊求表。而以鄉人崇祀之籍來。雖久故如苞。亦未之前聞也。昔李翱曾鞏嘗歎魏晉以後。文字曖昧。雖有殊功偉德。非常之跡。亦闕鬱而不章。而余考韓歐諸誌銘。其親知故舊。或以小善見錄。而衆載其言。用此知沒世之稱。亦有垂有不垂焉。廖公治休甯。及居臺中。列九

卿皆有聲。惜余從遊時。未叩其詳。後各分散。道里遠遠。喪紀莫通。獨居私念。未嘗不以自咎也。以余恨于廖公之無述。則俊之請。又惡可得而辭。公諱泰兆。河南新鄉人。康熙乙卯舉人。己未進士。卒於康熙五十年三月十七日。年七十有五。祖諱四肢。庠生。父諱策。順治丙戌舉人。通經。喪祭一遵朱子家禮。母王氏。繼母王氏。妻某氏。子三人。中振。中擢附學生。早卒。中掄及俊。皆學生。次孫于熊。雍正甲辰進士。以某年月日。葬于某鄉某原。孺人某氏。祔。

刑部右侍郎王公墓表

雍正六年春。江西布政使涇陽王公。以左副都御史徵。秋八月。至京師。進見。首言巡撫某。治尙刻深。數語屬吏。方今時勢。譬諸醫藥。安調榮衛。古方無所用之。壹以猛毒攻。勿問何證。儻吏皆遵信。恐爲赤子憂。天子感焉。立檄某廷訊。而擢工部右侍郎。尋改刑部。某至。曰。臣在江西。事從嚴。律從重。欲恩出自上耳。天子震怒。曰。朕何自知爾用心若此。且如爾所不奏而施行者何。聞斯言。使我戰慄汗流。浹背。立落某職。而諭戒內外臣工。當是時。自公卿大夫。以至士庶。自畿甸達山海隅。莫不扞蹈相慶。誦天子聖明。公亦以此名聞天下。而自入臺府。卽病店。寢深寢劇。竟卒於逾歲之冬。公始爲庶常。貧不能舉火。閉戶誦經書。不習課試文字。用此散館。復畱教習三年。衆以爲哈。而余獨意其有以爲。及雍正元年。改御史。巡城。有大豪殺人巧脫。而以他人抵獄。成於九門。提督隆科多。諸法司相視。莫敢異同。公抗言以爭。卒免之。轉吏科都

給事。出爲湖北督糧道。遷江西布政使。所蒞必詰姦蠹。除弊政。其在江西。大府方以威嚴率下。百城蕩恐。公獨諤諤支柱其閒。吏庇而民依焉。公疾旣篤。嘗語余曰。吾自計莫如死宜。吾晚而通籍。碌碌翰林中。又十餘年。及出爲監司。動制於長官。齟齬掣曳。今驟叨恩遇。列九卿。而天扞我。不能旬月供職。舉生平所學。少自達於明天子。欲告歸。則非其時。賴寵懷祿。以負宿心。覩清議。吾身一日而生。則吾心一日而死。不若身死爲安。惟子知我。非貌言也。公嘗與王徵君爾緝講學澧川。自少至老。未嘗一日去書。癸卯以前。有日省錄。反自江西。詩說成。旣遭疾。夜不能寐。輒思尙書疑義。旦伏枕爲草。竟今文二十八篇。平生祿賜。必於官中盡之。以賑凶饑。修城垣。學舍。家無一椽一畝之殖。死無以歸其喪。先卒之三月。自爲挽歌。而以誌銘屬余。余爲文不可以期。恐不逮事。與其子穆。議更請於高安朱相國。旣成葬。乃表於其墓之阡。公諱承烈。字巽功。康熙乙酉鄉試。以五經爲舉首。己丑成進士。年六十有四。其葬地及先世名跡考妣妻子戚屬。誌具矣。

朱字綠墓表

余之交未有先於字綠者。康熙丙寅歸試于皖。先君子攜持以行。儕輩閒籍籍言宿松朱生。因從先君子訪字綠於逆旅。辭氣果不類世俗人。將返金陵。遂定交。字綠父事先君子。而余兄事字綠。是歲。字綠以選貢入太學。海內知名士。皆聚于京師。以風華相標置。獨字綠褐衣布履。行行稠人中。時語古文推宋潛虛。

語時文推劉無垢。字綠見所業。遂歸讀書杜溪。及壬午再至京師。聲譽一日赫然公卿間。二君若爲小屈焉。遂連舉甲乙科。入翰林館中。先達皆嚴憚之。歲丙子。余有事故鄉。而字綠適客于皖。丁丑戊寅歸休于家。而字綠適授經金陵。癸未丙戌再赴公車。而字綠皆在京師。故平生執友相聚之久且密。未有若字綠者。字綠強記文章雄健。尤熟于有明遺事。抵掌論述。不遺名地。其客金陵。先君子每不自適。輒曰。爲我召朱生。字綠體有臭。夏月尤甚。然每與先君子酣嬉終日。解衣盤薄。余兄弟左右其間。不覺其難近也。始字綠歸自京師。築室其邑之西山。名曰杜溪。將著書以終老焉。其再出也。以家貧多累。又自恃體素強。齒猶未也。雖遲之數年。未爲晚。而竟死於羈。既遘疾。半歲中四以書抵余。未嘗不自恨也。字綠諱書。以康熙某年月日。卒于京師。年五十有一。以某年月日。歸葬于某鄉某原。子二。長曉。淳樸能家事。次曙。志承其父學。辛卯八月朔日。方苞表。

汪武曹墓表

君姓汪氏。諱份。字武曹。長洲人也。康熙丁卯戊辰間。吳中以文學知名者。君與常熟陶元淳子師同邑。何焯。屺瞻。皆與余遊。當是時。崑山徐司寇常熟翁司成。方收召後進。其所善。名稱立起。舉甲乙科第。如持券然。三君皆吳人。素遊其門。而自矜持。不求親昵。子師成進士。名蓋其曹。不與館選。君及屺瞻。屢躓于舉場。天下士益以此重之。其後屺瞻交絕於二家。而徐尤甚。至辯訟於大府。子師與翁亦忤。惟君無違言。君容

氣靜以和而性實忼直。遊太學時。嘗與益都趙贊善執信會。廣坐中。趙年少志得。負名稱。傲視一世。自公卿以下。皆畏其口。坐人或爲所陵。不能堪。君忽憤發。面斥數罵。趙雖交誼。而氣實爲之奪。平生遇要人常避遠。而時出正議。以繩公卿負民譽者。用此薦紳士類。頗隱憚之。余初至京師。見時輩言古文。多稱虞山。錢受之。嘗私語君。其文穢惡。藏於骨髓。一如其人。有或效之。終不可滌濯。子師聞而規余。屺瞻爭之強辯之數。惟君亦弗心愜也。既老。乃曰。吾今而知子非過言。君與余相知爲深。而合聚亦最久。疾既困。執余手而言曰。吾夙與子期。孰後死。爲誌其墓。吾今先子矣。君喪既歸。其子未以葬告。余衰疾多事。忽忽踰十年。會故人子宋華金。請表其父墓。甚力。顧義不得先於君。乃述君行身之大略。而志前言。以授其弟之子連芳。而歸其子。君所訂四書大全。及唐宋八家古文。明以來時文。行於世。晚歲辨春秋書爵。非褒。書人非貶。爲書三卷。義多儒先所未發。又爲河防考十卷。歿時子不在側。以付弟子鉉。而士鉉尋卒。叩其家無聞焉。他年二書若出。學者宜知爲君作。君己卯舉于鄉。癸未成進士館選。以繼母憂歸。築室城東隅。家居近十年。癸巳散館。授編修。甲午主廣東鄉試。辛丑冬。奉命提督雲南學政。未之官。竟卒。享年六十有七。父諱元綱。陝西鞏昌府同知。母申氏。繼母湯氏。弟侃。壬午舉人。士鉉。丁丑會試第一。皆以君故知名。妻嵇氏。子坤。早卒。培國學生。以某年月日葬鄧尉山某原。雍正十年三月。桐城方苞表。

君姓黃氏。諱越。字際飛。江甯府上元人也。未入庠序。卽爲督學使者所知。名稱壓其長老。或相詆媿曰。吾姻也。是窶人子。父母皆嚴急。小失意。榜笞數十。其授徒。客游所獲。一錢不得隨身。妻子凍餒。虛名何益。余因是心賤詆之者。而甚重際飛。始際飛所與游。或非人。余嘗於二三君子前面詰之曰。君何所爲。而與夫人交。如白沙之在泥矣。忌者緣此益增飾。交構其間。而際飛遇余益敬以和。遂閉特室。潛心宋五子書。而以餘力評選制舉之文。盛行於時。自入國朝。排纂四書義疏。紬繹先儒之緒論。爲世所稱者。僅三數家。而際飛其一焉。余與際飛中歲各奔走四方。會聚日稀。及余遭難。出刑部獄。里中舊好官京師者。惟際飛一人。無幾何。際飛告歸。余惘惘然也。際飛諸弟。皆不事詩書。少時或有違言。際飛一待以誠。其歸也。出裝齋。并微薄舊產。推予弟妹。而獨行郊野。求上祖邱隴。悉得其徵。而封樹焉。雅好地理書。嘗過先兄墓下曰。陰流已盈壑矣。探之果然。雍正二年。余得請歸葬。際飛爲余行營風雪中。并日夜而不爲疲。閒語余曰。吾與子皆老矣。念此生。委不爲海內士君子所遺棄。而無恨於吾身。惟子直諒之功。茲所以報也。際飛之歿也。已勒誌銘。歷其實行。文學。科名。職事。世繫。戚屬。生卒。葬地。詳矣。而子白麟。復固以表請。感念平生離合之迹。始終之義。乃著其所獨知于際飛者。而繫其後。曰。墓之有誌。以納于壙。義主于識。其人之實。其道宜一而已。唐柳宗元以哀其姊而貳之。非古也。外碑之表。依表之者。以重緣孝子之心。所以光揚其親者。不一而足。則受其請者。各以其意爲之可也。余旣爲表。以歸白麟。因發斯義。使後之人有則焉。

李世得墓表

君諱鍾倫。字世得。安溪人。相國文貞公之冢子也。公巡撫直隸。余過保定。留院中兼旬。君朝夕就余。言簡而禮恭。河閒王振聲曰。公子性孤特。視世士蔑如。此曲體公心以下子耳。君幼異敏。甫十歲。卽知孝敬。親視藥物。公宦於朝。太夫人春秋高。留闈。君侍母以養。大母生養死藏。君常在側。公守制京邸。服闋。視學京畿。乃相從於使院。公篤志經學。以官中事劇。自治易詩書。而以三禮屬君。君所治皆有端緒。不數年。五官之說成。故君之卒也。文貞公水漿不入於口者幾三日。蓋不惟子之痛。痛其足以承學繼志。而爲人世惜此材也。君旣歿。二十有二年。子清藻。以文貞公所爲誌銘。及祭告之文。求表墓。且曰。某困公車久。將遂歸。卒先人業。嗚呼。古之學。父子相繼。而後成者多矣。君其端有得於後邪。君以康熙癸酉舉於鄉。丙戌三月。卒於保定官署。年四十有四。妻黃氏。繼室何氏。清藻。丁酉舉人。清馥。質厚安雅。余嘗謂其氣度。於文貞爲近。承蔭由郎官出守大名。以廉正著聲。清泰。邑庠生。以某年月日葬君於本里成道院前。桐城方苞撰。

朱山言墓表

君諱至。字山言。河南商邱人。吏部尙書諱犛之子也。尙書負詩名。所交皆一時名輩。君五六歲。客至。輒摳衣趨坐側。聽長者言論。成童後。所游從皆父行。遂繼以詩名。而困於舉場。餘二十年。自長洲韓公。以文學爲海內宗。羣士壇坫。莫盛于吳中。而尙書開府江蘇。尤禮貌文士。方是時。吳中知名士汪份。武曹。張大受。

日容。吳士玉荆山數輩。皆家居。生徒各數十百人。天下士以文術自命者。過吳中。必進謁尙書。而退從諸君子游。會君覲省。則吳中文士之會。君必與焉。而韓公長子祖語亦家居。凡衆會二公子所在。鄉之者如環。康熙己卯。余與武曹祖語舉于鄉。而祖語之弟祖昭與君舉京兆。余赴禮部試。始見君子。韓公所。韓公賓燕。數與君與焉。君接朋齒皆肅以和。而於余及武曹尤若所嚴憚者。自尙書內召。吳中諸君子。宦學各分散。而韓公尋卒。尙書亦告歸。天下士之過吳中。至京師者。皆漠然無所向。及余難後。則曩時游好。甌京師及家居而尙存者。十不二三矣。君既歿八年。其子華金持狀及緯蕭堂詩。請表碣。按其狀。首載君遺命。毋求誌銘。發其詩。余與武曹無見焉。而卽境卽事。雖碌碌者必目其人。用此見君與人之厚。出言之誠。而與世士之務爲聲華者異矣。君守官事親。勳合禮度。狀所載甚具。而皆人事之常也。其詩久行于世。故概弗敘論。而備述數十年中朋游盛衰離合之迹。以志余悲。而君之爲人。卽是可想見矣。君癸未成進士。改庶吉士。入武英殿纂修佩文韻府。散館授編修。辛卯主貴州鄉試。壬辰督學浙江。丁尙書憂。服闋。遂家居。日與親故酣嬉泉石閒。卒於雍正三年十月。享年七十。安人劉氏有賢行。善治家。後君四年卒。君以雍正五年三月葬尙書兆域。劉安人以七年十二月祔。華金辛丑進士。候選主事。女一。適士人。

潮州知府張君墓表

三晉士大夫。語其鄉人立名義而多文者。必曰張潮州拗齋。絳人楊黃在。並稱其子亦堪。亦堪嘗至京師。

會余疾。遂觀滄海。息足於天津。再逾時。以俟余瘳。既相見。僦屋閉門。手錄余經說。及論定子史。將行。請以小妹妻余少子。時雍正九年季秋也。又十有一年。其妹來婦。生二子矣。始進一冊曰。吾兄客死江介。病中書此。遺命俟順於舅姑。而後出之。發之。則拗齋行略也。道與之親迎也。沃絳問父老。多稱拗齋質行經學。而亦堪所述。惟當官數事。其自庶常改刑部員外郎。有獄連執政族人。諸司莫敢任。君請獨任之。內務府以其人出使爲辭。君鉤提益急。牒問奉使何地。歸何期。至再三不答。力請於長官。宜入告。事雖格。聞者爲肅然。尋出守廣西平樂府。獠獍雜居。盜不可詰。君至。浹月。以信義服苗酋。獲巨盜二人。斃其一。宥其一。責以偵緝。終君之任。盜不敢窺。改知潮州。屬縣賊蜂起。或稱明裔。聚衆千餘人。君聞。卽日馳至其地。命吏士速據白葉。祔山。設疑嚴守。而揚軍聲。賊不敢逼。會夜半大風起。簡卒二百。斫其營。呼曰。大軍至。城中鼓譟。出兵以助之。賊奔祔山。要擊。斬其渠魁三人。衆散降。巡撫將奏功。君曰。此盜耳。而稱明裔。與大獄株連多。恐轉生變。乃以盜案結。潮有大豪。戕親迎者於路。而奪其妻。拒捕經年。君微迹而得之。獄成。當大辟。監司銜大府命爲之請。且曰。稍遼緩之。當以黃金四百鎰。潛致君家。君曰。吾官可罷。獄辭不可更也。卒行法。或假親王命以開礦。大府不敢詰。君命縛執。出龍牌。衆色然駭。君命繫獄。以牌申大府。情旣得。立杖殺之。丁父憂。遂不出。曰。吾性拗。委而歸。畏途可復卽乎。亦堪朝夕近余。凡踰年。而不自言求表其父。其所述皆當官實事。不可詰託者。蓋知余慎於文。而難以情假也。其別余也。曰。堪少不樂爲時人之學。無明師友。勤而

無所。年今五十有四矣。兄弟三人。惟堪也存。而皆無子。將南浮江湖。就二三同好謀挈家累。以從先生游。以北以南。庶所學粗有所成。俟先生之閒。一訂先人遺書。死不恨矣。亦堪以仲冬歸。次年四月。適江西。至楊黃在所。遂死建昌。而其家失火。累世藏書。暨平生集古金石刻。近世名賢手蹟。古器奇石皆燼焉。而君及亦堪所述。遂無一存者。君諱克嶷。字偉公。先世直隸真定人。元末徙居山西聞喜縣之夏莊。祖諱忻。父諱根樸。並邑諸生。君戊午舉於鄉。己未成進士。妻楊氏。子三人。長亦良。季亦常。女七人。皆適士族。粵東許日熾。君在潮州所得士也。時知絳州。閔師門剝喪。爲亦堪取其親同姓木忠爲嗣。閔君側室范氏。少寡守貞。據爲庶母。立後之禮。取君族弟之子亦安以嗣。君卒於康熙辛丑六月。年七十有六。葬於夏莊先兆之次。江東方苞表。

兵部尙書法公墓表

康熙癸巳。詔修樂律。厯算書。特開蒙養齋。命皇子董事。余與徐公蝶園承修樂律。閒叩同官及勳戚中。志在君國。而氣足以舉之。學足以濟之者。首推法公淵若。且曰。上爲諸王擇傅。吾對法某。雖以侍皇子得過。而臣愚心竊謂舍某無堪此者。乙未夏。公復侍皇子。始見余。卽曰。吾與子未面。而心傾久矣。然子頗知並世有法某否。時中貴人有氣燄者。朝夕傳旨。非命事專及於余。不敢交一言。而公則視之蔑如。辭色閒無。幾微假借。乃與公爲友。逾歲。公巡撫廣東。旋奉命巡察海疆。歷粵閩兩浙江南。以使事歸報。懇請削職。赴

西邊敵愾。越八年。雍正甲辰。余請假歸葬。而公督學江南。時叩吾廬。出所爲詩。以心腑相示。始知公忠孝發於至誠。體國愛民。常恨未得同志。合道人。相與輔成治教。而深患時人。惟知以虛僞比周。自便其身圖。公自爲庶常。卽荷聖祖仁皇帝特達之知。以檢討擢侍講學士。及中廢。復起。驟越班行。開府廣東。及聖祖登遐。公自西邊入臨。世宗憲皇帝。旋命校士江南。移撫浙江。入爲大司馬。天下士皆想望風采。而公益以國事爲己任。然居津要者。多畏公伉直。深心嫉之。世宗憲皇帝。亦微見其然。以公爲勳戚故舊。聽公閒居。衆謂實相保全。以待異日之大用也。公時寓居古寺。終歲不還私室。余數過從。見公疏布羊裘。從者老僕一人。翛然若有以自得者。今皇帝嗣位。大司空來公學圃。掌教咸安宮官學生。引公與故大司空赫公自助。時余以先帝之喪。入宿武英殿直房。踰再期。公與赫公時冒風雪。扶杖過余。講問移時。余陰喜二公雖老。天或畱之。而尙有以爲。而赫公旋以疾乞休。公臥疾不起。病旣深。余往問。俯仰平生。毅然也已。而相視泫然。公之歿也。命家人毋作狀誌。故出秉節鉞。入爲九卿。訐謨美政。胥無傳焉。惟在廣東特參大吏。更鹽政。粵人至今思之。而蝶園言公爲近臣。上時巡齊魯秦晉吳越。朝夕扈從。侍皇子講誦十年。直辭正色。聖祖嘉與。謂獨能不欺。又自西邊歸者。言公偃臥土室。枯寂如老僧。而見王公大帥。時以大義相責。皆人所不敢言。嗚呼。公之誠心義氣。動於君。信於友朋者。豈偶然哉。公諱海。元舅忠勇公諱國綱之次子也。癸酉舉京兆。甲戌成進士。母他他拉氏。誥封一品夫人。生母徐氏。妻崔氏。封贈如公階。卒年六十有七。無子。以

兄子介祿嗣。後九年，兄子介福督學江南安徽諸郡，以叔父慶上公選刻公詩請表。嗚呼！根於忠孝剛正之氣，不可屈撓者，公之學也。詩豈足以傳公之學哉！然讀其詩，足以發人忠孝之心，則亦其學之誠而形者，乃流涕而爲之書。乾隆十年春正月，江東同學方苞表。

吳宥函墓表

吳啓昆，字宥函，江甯人。先兄及余始入庠序，與劉古塘張彝歎數君子，以義相然信，而宥函近亞之，自爲諸生，歷科第，選庶常，課試文出，同列爭傳誦，而未嘗以此自多。惟閉門勤經訓，其與人交，不可得而親疏。旣通籍，常徒步賃從者一人，守舍炊者一人，兼旬不肉食，而勤營近郊高敞地，葬鄉人客死者，倡建金陵會館於京城西南隅，罄其數十年授徒資聚，始太守長沙陳公鵬年，謂君才可立事，及改官御史，巡視北城，所部肅然。會先世墓界爲土人所侵，告歸訟之，遂卒於家。諸子因吾子弟以請銘，歲時無虛。至今九年而未克就，以宥函之學行，已再見於余文也。冬十有一月，聞寶應王懋竑予中之喪，其子姓及淮南故舊，皆謂銘幽之文，余義不容辭，追思自辛亥以前，交疏善微，而假以誌表哀辭者有之矣。其後公事日殷，雖故舊親知多闕焉，感念平生游好，乖隔凋殘，欲總而籍之，略舉行能，兼存名字州里，而自揣年力，恐終無其期。乃表宥函之墓，得附論江介士友，與余兄弟齒相後先者，繫于篇終。庶幾九原有知，衆鑒余事與心遠，而非于友道之厚薄淺深，失其倫序云。宥函癸巳舉于鄉，辛丑成進士，卒于雍正癸丑某月，年七十有

四。所著春秋周易臆說行於世。妻某氏。子三人。長鏡源。雍正丙午舉人。次雲堞。雍正甲辰舉人。太倉州學正。次某。太學生。以某年月日葬于某鄉某原。乾隆六年季冬。桐城方苞表。

系曰。余先世家皖桐。曾大父遷金陵。百有餘年矣。自成童隨先兄與朋齒遊樂。其風尚坦夷。多修飭之君子。劉張二子外。交近焉者。曰龔纓孝水。季咸若宏紆。而比於宥函者。曰程士馨若韓。郭長春蔚瞻。十年以長者。曰蔡擎念詒。徐佩子遂。黃瑞輯五。長以倍者。曰杜揆亮生。朱圻次郊。往來江介。信余尤篤者。故鄉則吳御柳寬楊周監二。懷甯則潘介幼石。歙縣則吳瞻泰東巖。祁門則汪鴻瑞獻其。盱眙則李沛霖岱雲。余爲羈終世。而諸君子各凋喪於舊鄉。雖喪紀亦不能通。每念諸君子質行文學。雖未能並述古賢。而已行著於鄉國。聲聞於四方。徒以居下處幽泯焉。將與草木同腐。故凡數而次列之。俾海內篤古而達於辭者。略知其名字。或經過州部。叩其行跡於子孫鄉人。而論述焉。其登甲科。致顯仕。及交疎而知之未審。生而存歿而已見余文者。不在列。蓋茲以志余心之內疚。而非敢謂見於余文。遂足爲諸君子輕重也。

陳西臺墓表

嘗考明史。自流賊橫發於秦隴。毒痛冀北河南荆益庸蜀滇黔兩粵之間。凡破州屠邑。必有諸生數輩。號召族姻。奮死守戰。以衛鄉里。而甘以身殉。蓋由太祖立國之初。每下一路。必延聘耆儒講論治體。終明之世。所以愛養庠序學校之士。而厲之以禮教者。實非兩漢唐宋所能幾。故逮其亡而義勇忠誠之氣。激發

於士類者尤衆且烈也。武宣陳世珮。生於明末。國初諸生也。康熙甲寅。吳三桂反。據廣西。役充斂重。有田者執契以畀人。而莫之敢承。君以諸生爲里長。竭家財。代應徭賦。及平定。悉反其田。有廖姓。世以豪暴。患邑中當明之亡。嶺表盜賊蜂起。廖姓奪人土田婦女。邑令莫能制。避逃境外。君之父糾合溫黎二族。三路掩襲。殲其渠魁。反所侵掠。而一無私焉。大府遂委署縣事。及吳逆之變。廖姓亂心復萌。君密聞於當事。以計擒其豪。官杖殺之。再世爲邑人。除大慙。衆皆倚焉。而吏之貪冒者。或欲取所求。君弱冠時。遠姻范姓。以事逃。吏誣君父隱匿。置之獄。君號泣求代。不可。標資產以賂。始得脫。叔父某。又爲仇家扳連。將以金木訊君。請代受刑。由是仁孝信於邦人。君有才略。家屢落復起。兄弟兄弟之子。蕩棄先業。數分子之。置祭田。歲入千石。聚教族姻子弟。之不能從師者。束脩食飲膏火。皆取足焉。歲饑。空困倉減糶。稱貸者度不能償。卽還以券。或得吉地。私以效於君。君曰。子客於楊氏。爲營兆域。吾安得而奪之。楊不能購。代爲成之可也。君旣歿三十餘年。其孫仁。始以狀求表。仁及吾門十年。自翰林改官臺中。頗知慕古賢節概。余因君父子義勇。歎有明士氣之盛。沿及昭代。而其流不衰。又因仁也。行身之不苟。而知子孫之性質。多類其祖宗。乃不辭而爲之表。君先世廣東連平州人。遷廣西。至君始三世。父諱明廉。母蘇氏。胡氏。君卒於康熙四十八年。年七十有九。有子九人。並諸生。四爲儒官。女七人。孫三十人。成進士者二。舉於鄉者一。曾孫二十二人。鄉人多以爲積善之慶。君以仁勅贈文林郎。翰林院庶吉士。妻王氏。繼室周氏。張氏。並贈孺人。以乾隆元年。

某月某日合葬於茲山之陽。仁君次子先容出也。乾隆七年孟夏桐城方苞表。

贈通奉大夫刑部侍郎黃公墓表

贈通奉大夫刑部侍郎黃公。江南徽州歙縣程氏子也。父諱伯起。以妻柳氏女弟歸。大興黃中丞國初。黃巡撫甯夏。往依焉。署鄆縣令。柳氏歿。黃以妹繼室。罷官。與中丞同歸京師。復有事於陝。歸至潼關。舟人利其齋。夜半戕而沈諸河。時公九歲。黃氏尋卒。中丞之弟殿中宿衛。諱爾悟。無子。因撫焉。教育不異所生。公少爲名諸生。不遇。就教職。垂三十年。告歸。又十餘年。卒於康熙四十四年十月。年六十有一。有子五人。皆舉甲乙科。其告歸也。今吏部侍郎叔琳已登上甲。諸子繩繩露鋒穎。朝夕講誦。雍容如也。而公常蒿目兀坐呻吟。諸子髮疑。私問於母。乃知其故。春秋佳日。每獨身出。家人莫知所之。旣而迹之。始知常徘徊城東鐵山寺。及魚藻池。荒墟蔓草間。歎歎掩涕。蓋相傳母柳氏厝於池旁。而迷其兆域也。殿中君病革。嘗顧諸孫稱公之孝。公悚息有頃。而言曰。兒一身孫今五人矣。程宗宜有續者。殿中君無言。及公將卒。諸子請命。公亦無言。蓋古未有以異姓而相繼者。神不歆非祀。民不祀非族。故傳稱鄒立異姓。春秋書滅禮。以義起。當盡歸其宗。而以異姓之禮。世祀所繼。以比於因國而無主後者。公之請於殿中君也。以一子續程宗。蓋恐傷垂死者之心。而非禮之經式也。至諸子則可繼父志。而一斷以義矣。此公不言之意與。公工制義。屢躓於舉場。無蹙容。至老常誦經書。爲人講說。而無著述。蓋自顧無足以釋其隱痛也。嗚呼。是遭變

而得其時義者。宜有述焉。以示後之人。公諱華蕃。字澗采。號芳洲。配吳氏。浙江仁和人。誥封夫人。長子叔琳。辛未進士。吏部右侍郎。次叔琬。己丑進士。太僕寺少卿。叔琪。乙酉舉人。知江南甯國府事。叔璫。己丑進士。監察御史。巡視臺灣內陸。叔瑄。癸巳舉人。行唐縣教諭。女三人。並適宦族。孫男十有四人。以康熙五十六年十月葬於郭西新阡。雍正元年十有二月。桐城方苞表。

詹事府少詹事兼翰林院侍講學士查公墓表

余嘗感於夢。以沈生廷芳言。爲海甯查夏重銘幽之文。生因請表其外祖聲山墓。曰。吾母謂芳。能爲母之從祖言。曷不爲母之父言。余謝以無暇。又十年。生巡漕山東。以書來言。吾母老矣。外祖先生故舊也。非有言無以慰吾母之心。始余在京師。海甯諸查皆索交。丙子。館於汪氏。與聲山寓同巷。數過從。時聲山始爲翰林。甚貧窶。而盤殮潔以旨。叩之。皆其內子所手治也。余再至京師。則聲山入南書房。爲時所崇。居內城。或寓海淀。扈從塞上。屢言欲就余。而終未得一見。及余難後。則其歿久矣。時論皆曰。南書房。爭地也。未有共事此閒。而不生猜嫌懷媚嫉者。當長洲韓公既歿。長南書房。爲聖心所注者。無如聲山。而聲山推挽後。進無嫉心。然終爲爭者所困。聲山以詩詞書法四六名。然古之人弗重也。故爲揭時論。嗚呼。其可表也已。聲山諱昇。字仲章。康熙丁卯舉人。戊辰進士。選庶吉士。除編修。己卯。主江西鄉試。充日講官。由諭德庶子。至少詹事。祖繼序。父嗣琪。俱諸生。贈通奉大夫。大母某氏。母某氏。妻陳氏。並贈夫人。子二。廣。貢生。早卒。昌。

洵承蔭知廣東長甯縣女一適仁和沈元滄知廣東文昌縣卽廷芳父也乾隆十一年正月桐城方苞撰

高仲芝墓表

君姓高氏諱廷芳諸城韓村人也自身以上至高祖五世爲諸生年十一遭亂離被掠去鄉千餘里獨身脫歸鋒鏑中父兄族姻鄉人皆奇其智能而君更務學敦實行旣長家人皆恃賴焉康熙戊申地震棟宇將傾君號呼入負母出戶室盡頽母老而喪明常自悲悶替不知身所在君負而行憩羣室庭階則告焉如是者十年君兄弟七人父授田各三十畝及卒幼者一人無分乃以所受田給之而躬授經客遊以自活君善治生久之家大饒喪父母及同產之孤嫠皆獨任焉有餘則以潤其鄉人近村小戶有以田售者受其奇零而使畱園廬曰他日易復也甲申歲大祲以子女求鬻者收養近百口逾年麥熟悉召其父母而歸之退而曰曩吾卻之則填溝壑或陷豪家爲人奴終世矣國初重逃人之罰或匿君族兄村舍會君入城吏倉卒指君名對簿謁費得解免竟事無一語及兄人尤以爲難君旣沒十有餘年其子璿成進士官庶常始就余求表墓而以膠州張謙宜舊所表爲徵謙宜故齊魯閒立名義者其表君也徧刺薦紳學士操行之多僞而歸重於君余懼其溢美也詢諸鄉人知君有詳略而要之無瑕疵焉嗚呼君之能自砥飭卽是可知矣璿之請也余與要必所聞無悖而後敢序列焉垂鄉人無後言故刪取舊表而易其言之序以歸之君卒於康熙某年月日年八十有五父諱曉歲貢生某學教諭以長子封奉政大夫母楊氏封

安人妻李氏子璿側室楊氏出也。

王處士墓表

苞踰壯歲所得之友以禮義堅然相信者莫如金壇王澍嘗叩所由曰自吾大父篤學當陽明氏氣燄方張而堅持程朱之說以擯之先子承焉守道固窮非其義絲粟不取性木訥與人無畛域而事涉名義則爭之侃侃然澍自十歲先子授徒游學卽攜持以行及澍長而先子常家居未嘗去左右耳目濡染幾三十年雖欲自菲薄而無以安於心澍少羸家無僕婢先妣出入操作必腹之而呵禁甚嚴嘗苦索餅餌痛予杖曰汝幼而貪食長更何如自先考妣卽世澍之檢身日怠以疎矣又曰澍孤貧考妣葬故未備子爲我表於阡先是澍以其大父所輯學案視苞苞旣受而序之故於所屬墓碣日延月滯而未暇以爲雍正三年冬苞以先父母墓表屬澍書澍責諾於苞益切踰年春澍告歸必得余文以行乃譜以授之君諱式金字度疑少承父學誦古書不治時文以澍贈奉直大夫卒於康熙戊子七月年七十有四妻潘氏贈宜人卒於康熙庚辰二月年六十有五生兩子兩女惟澍存墓在某岡某原。

余處士墓表

處士諱鉦字震挺其先江西臨川人也元末遷宜黃明初再世以軍功顯爵第二品佐郡爲縣令丞者以十數至處士之祖若父爲諸生處士十歲能爲詩旣長益博覽好山水父縱使遊學嘗登羅浮東抵武夷。

求朱子遺蹟。再至匡廬。淹留濂溪鹿洞。過柴桑。輒低回久之。所交南昌彭達生。朱用霖。甯都魏和公。臨川傅平叔。黃元胎。李剩水。皆恢奇士也。晚而篤信宋儒之書。每日。士不知聲律文章之外。有學。是忘其身也。所著對洲集四十二卷。庸行編三卷。藏於家。其侍母疾。連年不入私室。屢急人難。益有斗儲。衣有代。乞假者。應之無緩辭。其鄉人既遠。猶哀悼之。子濺。亦務質行。至孫棟。始舉甲科。官翰林。有子曰熨。年十七。俾專誦諸經。而請業於余。曰。將使繼吾祖之志。學於聲律文章外也。棟以父命。請表其祖墓。再歲矣。將歸省。語益迫。乃就所稱而序列之。且使熨也。無忘父命。處士卒於康熙己巳六月。年四十有七。大父諱嘉績。父諱嬀。子六人。處士其仲也。妻劉氏。子一人。女二人。孫男三人。長棟。次松。次楛。曾孫男五人。

武商平墓表

先兄百川。所與爲朋友。凡三數人。而商平武君其一焉。君文學無絕殊者。貌茆而言讜。雖二三君子與久故者。時用爲嘲諠。而先兄獨重之。自先兄歿。余不敢爲四方之行。始與君習。每風雨之夕。愁思無聊。輒相呼共語。或春秋佳日。與徘徊川巖墟莽間。君與物無町畦。然內行潔修。授徒多人。歲入不過三十金。冬常寒衣冠。敝履穿。而力孝養親。無違志。其父老矣。不事詩書。非博塞。終日焦然。每失負。從親交丐貸。君隨而私償之。率以爲常。父大安。以爲於家無累也。君性耿介。非其義。一毫不取。坐困甚。有子將娶。而天。其婦誓死歸夫家。衆皆曰。毋重自困也。君獨毅然整衣冠。至女家。叩其父母。知志決。命出拜。越日以禮迎而歸。少

爲諸生攻舉業。及交先兄。始發憤篤專於經史。近六十。益刻苦。晝夜危坐。鑽礪不自休。余謂君非親學時矣。君曰。吾乃今知學之意。豈可以老棄哉。始君以貧不能養。欲客遊四方。余戒以養未必遂。徒爲父母憂。君用此忍凍餒。未嘗一日離其親。君父年九十餘。君之歿。後其父七閱月。君歿而家散。後妻二。媵婦各就食母家。一子幼。瑩無依。自衆人觀之。天之於君。可謂酷矣。而自君言之。則於親無愧心。于身無恨事。抑豈爲不得于天者哉。余難後隔舊鄉。力不克振其孤。乃揮涕爲文以歸之。俾他年碣於邱壟。用表君之行。雖不顯于時。而足以取貴于後世。又以志先兄取友之不苟也。君諱文衡。溧水縣歲貢生。以康熙五十四年十一月某日卒。子某。以某月某日葬於某鄉某原。

朱履安墓表

君姓朱氏。諱文鏞。字履安。江甯人也。余始入庠序。數相見廣衆中。及北遊數歲歸。而吾友劉君古塘與履安交甚洽。余因習焉。又數年而海內士流。語金陵有聞望者。必及履安。履安慎威儀。語默坐起。皆有法度。性遲鈍。而務學。能自刻苦。其行身亦然。家素豐。至其父毀之。而父母皆衰老。于其時。尤自力于子道。辛卯冬。余被逮繫江甯縣獄。履安日與古塘諸君子。左右其閒。時制府飭獄吏。與余往來者。具籍之。而諸君子不爲止事。平履安嘗語余曰。爾時吾出入縣門。或值縣令及南北捕呼聲過吾門巷。未嘗不股栗也。中歲以授經客遊。自活。學使者爭迎致。及自江西遭溼疾。坐臥痛苦。歷四五年。而講學教子不怠。饕殮乏絕。屢

以書抵京師告余。其族姻富家。弗使聞也。余往者歸自遠方。二三昵好。必羣引相過談醺。或傳客譁樂連晨夕。自赴詔獄。及今蒙恩歸營葬。僅十有四年。而余所兄事。惟古塘獨存。履安之齒未也。乃用厲疾殞其生。是以余與古塘尤痛之。其葬也。古塘既銘諸幽。故表于其墓。而以余之歸告焉。

望溪先生文集卷十三

墓表

雷氏先墓表

雷生銍道。其上祖兄弟八人。葬同邱。請表墓。口述再四。而繼以書曰。先生非親懿久故。不爲表誌。蓋懼行迹之虛構而無徵也。而吾上祖之事。則不待有徵而信。雷氏自陝西遷豫章。一世祖甫。自豫章遷甯化。甫生詳。爲唐進士。而卒於昭宗之世。有子八人。生相愛。約葬同邱。塚以次平列。墓碑巋然。子孫世承祀。無所容其僞。僻在閩徼。少文獻。世久迹湮。故他行無聞焉。而生當五代干戈之際。無一出而仕者。又兄弟八人之卒。相去或數年。或一二十年。子孫共守遺命。而莫之違。則其修於身而型於家者。可見矣。在昔先兄百川。有言。人之生也。受於天。而有五性。附於身。而有五倫。人於五性。或蔽於一。則四者必皆有虧焉。人於五倫。能篤於一。則其他必皆不遠於禮。銍所云不獨可徵其上祖之行。而所以推原祖德者。又可與先兄之言相發也。余兄弟三人。弟椒塗早夭。而兄復中道棄余。臨終命三人必同邱。不得以婦附。族姻士友嘖嘖焉。雖子姓不能無疑也。其後聞甯都魏禕兄弟嘗行此。而今復得雷氏上祖事。用此知是乃篤於兄弟者之恆情。雖異於俗。而非有過於義也。昔唐陽城兄弟。懼友衰於妻子。而終身不娶。此於禮爲非。而先儒皆

存而不論。蓋以行必稽其所敝。俗之衰。能爲城兄弟之行者亦罕矣。無慮其或滋之敝也。況自周以前。本無婦必附夫之禮。而易以兄弟同邱爲怪詫哉。乃約鉉言而具詳其義類。爲表以歸之。俾雷氏後裔。務敦睦以率祖。而亦以解吾子姓之疑焉。八人。長伯泰。次立。次馴。次強。次郡。次御。次均。皆以名繫伯。其墓在甯化縣之下沙村。雍正十年冬。江東方苞撰。

兵部尙書范公墓表

公諱承勳。字蘇公。瀋陽人。大學士太傅文肅公第三子也。文肅公旣爲國宗臣。而公伯兄爲都統。仲兄忠貞公。總督浙閩。並以賢能早歲秉節鉞。上益材范氏子弟。公年二十四。以蔭補工部都水司員外郎。凡再轉五遷。而至兵部尙書。吳三桂反。公以吏部郎中督譚宏進征軍。兼轉楚餉。宏死。監鎮安將軍噶爾漢軍。及滇平。常在軍閒。還補文選司郎中。擢內閣學士。尋以都察院右副都御史。巡撫廣西。踰年。遷兵部左侍郎。總督雲南貴州。三藩播亂。吳三桂勢尤猖獗。王師入討。常與賊相持黔粵間。首尾八年。公私凋敝。而賊窟穴南中。歲久。雖撲滅。脅從反側。多蠹居山澤。故上於方面之任。尤重且難之。先是忠貞公在閩。旣死。耿精忠之難。都統開復襄樊。復以疾卒于軍。而兩江總督于成龍之卒也。上諭九卿。更有如成龍者。具以聞。僉舉陸隴其等七人。而公與焉。故公至粵西。未朞月。而有滇黔之命。以爲非公莫屬也。公至。首裁六衛五所。併歸州縣。逃亡漸復。時起發賊標。下親軍入旗。衆多偶語。公請就本地安插。拜疏卽官。其一二著姓。餘

編籍補伍。命下數千人環泣。曰：吾子孫世保故土，皆公賜也。湖北裁兵，夏逢龍叛，聲連六詔。時滇以鼓鑄壅積錢，給兵餉之三，衆不便。會左協移鎮尋甸之兵，鼓譟縱焚剽，省兵欲乘釁而起。公偵知其謀，夜捕百餘人，晨出奉天子賜節，斬十三人。越日尋甸縛始禍者以獻，鞫斬八人。事遂定。疏入，天子詔諭褒嘉。公因請罷鼓鑄，魯魁山賊二百年爲環境害，至是就撫。官斥藩莊核其價，省民間溢費二十餘萬金。在滇九年，所祛蠹弊甚多，而清鹽筴不得按戶抑派，酌道里遠近，定支撥軍餉條例，吏不得巧法扼民。至今賴之。康熙三十三年，遷都察院左都御史，行至貴陽，改命總督江、南、江、西，公治滇黔，興利除弊。若日不暇給，發姦糾暴，法立誅必及。移兩江，則專務清靜，以與民休息。其爲政識大體，不爲小廉曲謹，以釣聲譽，而設心措意，一以厚下恤民爲本。歷三鎮，奏免民賦者五，豁陷賊州縣所失資儲，無算。駁正漕督誤題入額徵者一歲，稔奏發米穀九十三萬石有奇，賑餉有先發後聞，議有格，而復奏至再三。天子鑒公之誠，無不特允所請者。其鎮滇黔，入覲密陳六事，其一：土苗不宜縱逞，時黔撫衛旣齊，以捕黎平苗謫戍，上悟，尋赦還。衛素廉直，士論尤以此。遯公三十九年秋九月，以母憂回籍，旣葬，奉命督修華家口運河，未幾授兵部尚書，固辭不獲，乃就職。私居持服如常。又七年，以疾乞骸骨。又十年，終於家。公年譜載公行身洩官迹甚詳，然余嘗客遊淮揚，士大夫多稱鹽城令某貪橫，以與要人有連，大府不敢呵，公下車，寡婦某訟之，隨斥罷。然則公之善政，雖其家人有不盡知者矣。茲故不具，而獨著其措施見於章奏，利澤顯播于軍民者，公卒于康

熙五十三年二月朔。年七十有四。始娶穆奇覺羅氏。贈夫人。再娶沈氏。封淑人。皆早亡。再娶趙氏。封夫人。子時繹。承襲本旗佐領。以公卒之次年秋八月二十二日。葬於密雲縣之青甸。桐城方苞撰。

趙處士墓表

處士姓趙氏。諱瑗。字臨若。其先江南山陽人也。明洪武時。以軍功顯。高祖清。始遷浙江之瀝海所。地介會稽上虞二縣。家世儒書。處士生萬歷末年。弱冠騰文譽。崇禎之季。山賊海寇疊起。田宅蕩然。鼎革後。聚教蒙童於墟里閒。及老。獨身行遊。有子廢學。以醫方流寓泰安州。處士倦游。乃就養焉。學佛者古翁。淮安通州人也。開圃泰山之麓。名曰石堂。與其儕二人。及州之老生四人遊。聞處士至。願相與爲友。暇則聚石堂。課灌溉。蒔瓜蔬。終日危坐。講誦經史。野人樵牧過者。望見皆肅恭。四方耆舊。多傾嚮焉。而處士居常忽忽。念墳墓懼松楸毀傷。其子方促促治饗殮。終不得返先人居。年七十有八。竟死岱下。葬州西南三十里天平山。妻徐氏。久祔祖塋。不敢遷葬。禮也。處士學識過人。能辨賢姦。知事勢數變。以後之利害。久皆徵驗。而未嘗爲書。先卒之二年。疾篤。作遺訓以示子孫。皆家人語也。聞爲詩歌。不以示人。惟手錄春秋內外傳史記漢書及唐宋八家文。各數百篇。授其孫國麟。曰。北方艱購書。守此文義。可粗明。慎行其身。毋忘瀝海而已。其後國麟舉於鄉。及將仕。再歸瀝海展墓。以甯其祖妣。雍正六年。擢福建布政使。至京師。與余造次相遇於鄭御史宅。述祖德。請撰外碑。國麟與余會試同榜。至是始覲面。而其學行治法。在聞見中。爲可計數。

人遂不辭而爲之表。且系以辭曰。

國麟與余相見。年近五十矣。起縣令。至監司。而言語氣象。尙似講學於深山野外者。叩其師友淵源所漸。泫然曰。吾祖至俗之歲。麟始生。家窘空。保抱攜持。數歲卽隨臥起。授章句。未嘗有師也。苞少從先君子後。見三楚吳越耆儒。多抱獨以銷其聲。又其次。乃好議論。著氣節。爲文章。尙矣哉。其風教之所積乎。

翰林院檢討竇君墓表

自容城孫徵君遷河南中州士大夫。多興於學。及其門者。潛菴湯公。逸菴耿公爲最。而聞二公之風而興起者。復四三人。柘城竇遜齋其一也。幼異敏。讀書每過夜中。父懼其確也。禁之。乃以衣蔽戶牖。篝燈默誦。少長。徧治諸經。時徵君旣歿。耿公講學於嵩陽。往就之。六年五至。非父召不歸。旣舉於鄉。見湯公於京師。學益進。湯公悼師道廢日久。勸就教職。得泌陽。及主朱陽書院。從學者皆勸興。故河南北夏峯嵩陽而外。惟朱陽之學者爲多。戊辰成進士。館選。丁母憂。服除。授翰林院檢討。尋告歸。父趣之入。踰歲竟歸。蓋痛母之深。不忍久離其父。且與朱陽之學者離逝也。聖祖仁皇帝嘗命諸翰林作楷書。君書治法堯舜。學遵孔孟。其要在主敬謹獨。以進。上深器之。其家居。大府監司守令。多重其行。衆所苦病。每賴以更除。枉撓者得直。故其歿也。士友深痛。知與不知。莫不惻傷。邑之頑人。或匍匐赴弔。哭盡哀而去。君素無疾。方侍父食。痰氣上有頃。端坐而逝。時康熙戊子閏三月二十五日也。孺人王氏。執舅之喪。年六十有四矣。終祥禫。不飲。

酒茹葷。君諱克勤，字敏修。卒年五十有六。大父諱如珠，縣學生。父諱大任，勅封徵仕郎翰林院庶吉士。子三人，長容端，增廣生。前卒。次容莊，癸巳舉人。次容邃，乙酉舉人。候選知縣。志承其父學，以狀誌求表。余既熟聞君之學行，且與容邃一見而志相得，乃譜焉。俾鐫諸外碑。雍正十一年正月，江左方苞撰。

刁贈君墓表

君諱再濂，字靜之，直隸祁州人也。余少聞燕南耆舊，一爲博野顏習齋，一爲君之父蒙吉。平生皆尙質行，稽經道古，習齋無子，其論性論學論治之說，賴其徒李塉、王源發揚，震動於時。而刁氏之書，惟用六集及斯文正統，始行於北方。贈君自入庠序，卽弛置舉子業，日從父之友五公山人王某及習齋游，訂父遺書，手錄藏於家。又貳之以質四方之學者。年逾六十，復手錄付諸子，且告曰：昔蔚州魏公持節巡京畿，余以故人子，獨被澀洽，鄰邑人或籛金而請事，余掩耳而走。藋然若穢污之及吾體也。汝曹他日若登仕籍，以官富家，吾生不受其養，死不享其祭，惟先人遺書未刻者，尙百餘萬言，必約身而次第布之。其後仲子承祖果宦達，使其弟顯祖持所刻易酌潛室劄記及君狀誌，乞余文以列外碑。距君之歿二十有二年矣。夫名非君子之所務也，而沒世之稱，則聖人亦重之。習齋遭人倫之變，其艱苦卓絕之行，實衆人所難能。而李王二君子，力足以張其師，惜其本指，欲外程朱而自立一宗，故知道者病焉。君之父則隱迹衡巷，推闡先儒之緒言，故當其時名聞四方，轉未若習齋之盛，而卒得良子以傳其書，身名完好，無可瑕疵。故余因

表贈君之墓而并著之。以示志古而有所祈嚮者。亦君恪守父書之志也。夫君卒於康熙乙未九月。年七十有二。父諱包。天啓丁卯舉人。母某氏。君及妻杜氏。並以承祖貴。誥贈如其官階。子四人。長繼祖。州學生。次承祖。乙未進士。由縣令累官監司。所至著聲績。今爲江西布政使司。次顯祖。己酉舉人。樸直尙名義。次興祖。早世。以某年月日葬於某鄉某原。乾隆元年十月。江南方苞表。

東昌鄧鏗亭墓表

雍正十三年夏。東昌鄧鍾岳將告歸。以曩所述贈君及田安人行略示余曰。吾故知子於誌表之文。雖親故無假。非敢以私請也。將以入宗譜。惟子討論焉。發而觀之。皆庸行所宜。然有難焉者。贈君十歲喪母。嗣喪繼母。至再。父歿承重。喪大父母。衰麻不絕於身者。近二十年。皆能稱情以赴於禮。其爲國子監學錄。年未及三十。丁內艱。念大父官閩南。父官代北。代父服勤。侍大父。遂不復補官。余嘗過東昌。無老少皆稱鍾岳孝悌修飭。具言其家法。雖未指目君之爲人。而鍾岳所述之無虛溢可知矣。昔余大父爲學官於蕪湖。君之大父參議公。適司蕪關。降爵列而爲友。余於鍾岳未見而相知。既訂交。果不悖於所聞。其家法之善。又親得之於其鄉人。故特表而出之。使天下知爲人祖父者。宜慎行其身。以開其子孫。而子孫能賢。亦以徵信其祖。若父之善行。又鍾岳不以誌表屬余。乃所以重其親信於友。而余之不能已於言。端由於是焉。田安人與君比意。同力以事親長。歲庚午。君侍大父母於家。聞父疾。赴山右。而參議忽遘疾甚危。邢宜人

篤老安人承凶臨於別室。易衣奉姑。而侍舅疾。比參議之終。邢宜人未知有子之喪也。嗚呼。是可則也已。君諱基哲。字騫之。號嶧亭。以太學生授鄒縣教諭。遷國子監學錄。生於順治乙未年二月。卒於康熙辛巳年十月。享年四十有一。以雍正元年覃恩勅贈承德郎。翰林院修撰。田氏爲同郡名族。安人歲貢生諱官芳次女。生於順治丙申年三月。卒於雍正癸卯年三月。享年六十有八。勅封安人。子男四人。鍾岳。康熙辛丑進士。一甲第一名。授翰林院修撰。歷官禮部侍郎。雍正十一年。以奏對失辭。降一級調用。次鍾音。雍正丙午舉人。揀選知縣。鍾紱。鍾一。雍正己酉同榜舉人。女五人。並適士族。孫男六人。雍正乙巳十一月。合葬參議公墓右第一穴。桐城方苞表。

內閣中書劉君墓表

襄城劉青蓮。狀其先人之行。不介而以書通曰。吾父之歿七年矣。而銘幽之文。闕焉。以至於今。蓋難其人也。吾惡夫爲人子孫者。以所未有之善。隆其親而實誣之也。故所舉無溢言。願子察其情也。余故聞中州之賢者數人。而劉氏恭叔其一焉。恭叔之兄子青藜。爲余同年友。而青蓮之請銘也。有辭。余無以卻焉。謹按君諱宗泗。字讓一。先世多潛德。明季流賊之亂。父漢臣。以諸生佐督師。汪公喬年。城守署贊畫。君兄弟三人。皆好義。伯仲任俠。而君獨爲儒。其學無所不涉。而卒歸於洛閩。其游皆畸人節士。而其學之久者。則關中李顥中孚。余觀自明之衰。東林復社諸君子。摧剝無遺。而天下幾不知有學矣。其後燕南河北關西。

之學者。往往振起於一鄉。以收召其徒。而中州爲最盛。就其傑出者。其指意雖不能盡合於古聖賢人。而皆能以力行爲宗。故其處者常矜名義。飭內行。而出者亦確然不失其官守。蓋學雖粗涉其樊。其爲說不能無弊。而巳有輔于世教如此。君之實行。既足以錯於其鄉之賢者。而又能知道術之所宗。雖與中孚李氏共學之久。而自守其徑塗。終其身不易也。嗚呼。君可謂篤於自信者矣。君中歲學古文辭。晚所著中州道學錄。恕齋語錄。尤著士友間。其行之式於家。而化及鄉人者。青蓮述之甚備。而茲獨揭其所學之大指。蓋以自修者言之。必纖悉於庸行。而後爲完人。而立言者舉之以示於後。則義無取也。青蓮於虛美其親者。既前知其非義矣。則於茲所以云者。何惑焉。君以康熙庚午舉於鄉。例授內閣中書。未仕。以庚寅六月二十四日卒於家。年七十有四。冬十有二月某日。葬於邑西東岡先兆之次。孺人周氏。子二人。長青蓮。縣學生。次青芝。乙酉舉人。女二。皆適士人。康熙丁酉三月朔後二日。江東方苞撰。

秦仲高墓表

高氏仲女適秦。故曰秦仲高。仿春秋紀伯姬。紀季姜。鄒季姬。蕩伯姬之例也。先刻誤改高貞女。今正之。壬子十月鈞衡識。

貞女。吾師大理卿宛平高公同產弟章侯次女也。少余見之。心異其德容。謂福澤必過人。許嫁秦氏。子文照。雍正五年。文照死。貞女請代夫承重奉祖姑。父母隘之。不可。遂歸秦氏。大理兄弟三人。惟季有子。而畱滯遠方。章侯歿。貞女族姻中一無依。余往視之。時仲冬。短布單衣。乃與諸公釀金爲舉本以給之。乾隆元年。余居直廬。五月中旬。家人告貞女遭疾日篤。秋七月朔後三日死。問故。曰積勞成瘵。卒之日。命衣衾完。

者勿以殮。迫冬進之。祖姑在昔明季。李自成陷北京。宛陵沈壽民時山居。或告曰。某罵賊不屈死。壽民立起自責曰。夫人而載此大福以終。噫咄哉。既而前聞非真。復問焉。曰。子何以知之。曰。是吾故人也。娶之日。吾客遊適至其家。若俯首巡步階除不已。叩之曰。吾屬有所思。甫冠。登上甲而婚。生人之榮。有逾此者乎。吾何修而得此。此以知其所受之薄也。嗟乎。如貞女之閔凶天札。乃壽民之所謂福也。夫貞女年三十有二。卒後十日。與文照合葬。秦氏先兆之側。其買棺也。匠師誤其徒曰。子良材。價從其抵。聞者多爲流涕。桐城方苞表。

完顏保及妻官爾佳氏墓表

君姓完顏氏。諱保。字岳申。余供事蒙養齋。君爲皇子警御數。就余問學。君貌甚文。苦羸。氣不能任其聲。自恨時過而學。雖疾。矻矻不自休。余始開以學。久之。惟戒束書不觀。以息心神。而不能從。疾遂不振。君既歿。且踰年。余啓篋。見其病中所擬秋風辭。音旨悽愴。其諸衰氣之先見者。與君疾亟。妻官爾佳氏誓死。及期。母與姑號泣而止之。曰。汝有子。義不當然。答曰。吾非不知此。顧吾年少。儻異日中有不自得者。不若早自決於吾心爲安。其藥物久置粉幌中。命取水至。則一飲而絕。母與姑亦不之禁也。嗚呼。君之嗜學。與其妻之取義。皆過於中。然以人情之習於偷苟。不可謂非有志者矣。而造物者必使至於斯。其又可詰邪。君卒於康熙丁酉四月十九日酉時。年三十。官爾佳氏與君同庚生。而月日先於君。卒同時。以某月某日合葬。

北郭先人之兆。桐城方苞表。

羅烈婦李氏墓表

烈婦姓李氏。浙江龍游人。江都羅經甫妻也。幼通詩書。繼室於羅。前子曰都。六歲。女曰宦姑。年十有二。烈婦生女。始期。揚州圍急。烈婦謂經甫曰。君上有母。下有稚子。都妾生而存。則慮有所牽。吾自擇死所矣。乃積薪樓下。未幾城破。市人驚呼曰。兵入矣。烈婦上堂泣且拜曰。吾不能復事姑。乃別其姁劉氏。及經甫妾梅氏李氏。時烈婦有身八月矣。抱幼女持宦姑而語衆曰。吾多見古書中婦人。遭亂而求生者。忍以身試乎。衆皆哭。從而登樓者凡十人。命一婢下舉火。火發。亦奮身躍入。兵定後。衆骨藉藉。惟婢一足尙存。始經甫計猶豫未有所決。俄而烟塵蔽天。樓中聲如亂鼓。乃搏膺而呼。負母挈子以奔。卒皆免。家復起。子孫盛昌。都之弟國桓。有子曰慄。行四方。遇文儒。輒流涕述烈婦事而求籍焉。同命者凡十有一人。劉氏梅氏李氏外。惟婢得其名曰鞠華。其六人者無聞焉。焚宅在新城廣儲門內樊家園。合冢在隋西華門故城址。康熙六十一年冬十一月。望溪方苞表。

劉烈婦唐氏墓表

烈婦唐氏。襄城劉庶常青藜繼室也。先世浙江會稽人。遷河南新鄉。其家單微。轉徙。少失父母。有兄窶艱。而婦好書史。陳義甚高。庶常失偶。聞其賢。以禮聘焉。年二十有九矣。旣成婚。三旬有八日。而庶常疾作。遂

不起。烈婦將死之。叔媿請曰。聞嫂有身。今死非其所也。居無何。謂其媿曰。無望矣。越翼日晨起。辭於殯。入寢室。閉戶自經死。時康熙戊子。十有二月晦前四日也。去庶常之死。蓋四旬有七日。烈婦少時嘗割股療其父。及庶常疾。復齧臂以羹。血淋漓衣袖。閉面色似非人。而神氣自如。庶常之歿也。其母年八十有五。臥病經年矣。烈婦祕不以聞。戒寢門內無哭聲。自經之晨。猶親盥饋。然後退。烈婦家故貧。其兄以醫自活。流轉四方。儼居多窮巷。短垣。烈婦時時佩利刃以備非常。鄰富人嘗假館。且貲給之甚殷。烈婦曰。此傳所謂無故之利也。會富人從其兄飲。媿焉曰。是可久與處邪。立促其兄他徙。庶常每言烈婦能文。工詩歌。既死。篋笥閒無遺蹟。庶常夙以文學知名。二十年閒。河北爲首稱。唐氏賢而愆期。卒歸庶常。聞者皆以爲宜。而月未四終。夫婦各費志以歿。鄉人莫不嗚咽。道路皆載其言。越十年戊戌。余始得其實於庶常之從弟青蓮。而表於其墓之阡。桐城方苞撰。

謝孺人葉氏墓表

孺人諱球。姓葉氏。父諱汝棟。閩縣人。庚午鄉試副貢士。謝君諱宣之妻。編修道承之母也。謝氏故儒家。而鄉貢以俠重於鄉。信義著於師友。孺人實左右之。孝於親。友於兄弟。惟孺人曲當其心。鄉貢未中壽而歿。兄公壹以家政屬孺人。大事必諏焉。幼隨母依舅氏。授論語孝經毛詩。及長。博觀經史。諸孤就傅。夜歸。則爲辨句讀。考音義。兼授樂府古辭及詩。既成立。督教不衰。母也而秉父道焉。孺人生二歲而孤。母家四世。

生養死藏廟祭皆身任之。女也而承男事焉。及篤老道承歸養。會修省志。中丞趙公以相屬。百年中大吏所設施。鄉先生長老之質行。儒人能備詳之道。承用以徵信於志。傳牒記而辨其譌。嫠也而有裨於文獻焉。始余與同年鄭任鑰。魚門善。儒人之長女壻也。道承繼因魚門以索交於余。儒人七十求文以壽。余曰。非古也。子少安。吾當別志以達子之情。又有四年。儒人歿。道承使來告終。以狀請銘。汎詢其鄉人。皆曰。信然。乃爲表以歸之。而釋諾責焉。其生卒子姓。宜具於誌銘。故弗著。乾隆元年八月晦前二日。江左方苞表。

劉中翰儒人周氏墓表

康熙五十五年。襄城劉青蓮及弟青芝。不介而通書。請表其父中翰君墓。余旣夙聞劉氏家法。及中翰之賢。又重青蓮有辭表而歸之。越三年。庚子。復以母之狀請銘。余惟古者婦人祔葬無特銘。又儒人處境順。雖有婦行。而無以過禮之中制。久而未報也。雍正五年。青芝計偕至京師。請益堅。且曰。自庚寅先君子歿。吾母老。朝夕不忍違。不赴禮部之試者。十有七年矣。今來適與子值。而獲見。願終有述焉。余因念丙戌計偕。自余出。吾母內熱語不休。雖隆寒。中夜啓牕牖。或挾老婢立中庭。北向而望。凡百有三日。至余抵家之夕。而後寢成寐。凡欲其子遊學。取名致官。父或有之。而母必無是也。無貴賤貧富賢愚。惟願求之。卽在側耳。余兄弟喪亡。乃違禮遠遊。以憂吾母。青芝有兄以承養。而不忍一日離。其請不可虛也。儒人處境雖順。

無以過禮之中制。然以劉氏之家法。而孺人順焉。恭叔之賢。而孺人儀焉。以宜其家。以式其子。姓而化於族姻。其可風也已。孺人姓周氏。父諱卜歷。襄城縣學生。母王氏。年十六。歸於劉。卒年八十有六。與中翰合葬。縣西先兆之次。雍正五年夏五月。江東方苞表。

贈淑人尤氏墓表

皇帝嗣位之始年。搜揚遺賢。命大臣各舉所知。於時今吏部侍郎沈近思。以郡承就其家。起吏部文選司郎中。既任官。特命兼太僕寺卿。逾年四月。拜疏。歷其曾祖母尤氏。守節撫嗣子。教孤孫。艱而有成。暨其父將終。自傷家世田農。不能爲大母請旌。而有望於後。願以元年覃恩。身及妻。應得之封。移贈尤氏。天子既賢近思。感其意。詔以侍郎階資。贈其曾祖父母。又二年二月。介吾友王君虛舟。乞表墓之文。余考禮經。爲人後者。服如所生。傳曰。受重者。必以尊服服之。蓋恩以義隆。而不敢忘其祖也。然恆婦人之情。視爲後之子。多異於所出。是謂不有其夫也。而爲之後者。自視亦或異于所生。是謂不有其祖也。今尤氏重其夫。及其嗣子。可以教天下之爲人妻者矣。近思念其父。及其祖所嗣之大母。可以教天下之爲子孫者矣。天子優賢厲節。推恩于功令之外。而褒崇踰所應得。可以教天下之爲臣者矣。禮達義昭。不可以勿籍也。謹按沈氏自遷仁和。七世至贈公諱學顏。於近思爲曾祖。卒年二十。淑人時年二十有二。距其歿三十年。四年。與贈公合葬西涇口百浪塢先塋之次。嗣子時吉。娶俞氏。甚有婦道。遺孤大震。生五子。近思其季也。

淑人高行。載郡縣志。沈氏三世生卒爵列。墓各有誌。家有譜。故弗著。著其維繫於風教者。

曾孺人楊氏墓表

孺人姓楊氏。江甯人。邑諸生曾榮之妻。余姊夫沂之母也。姊性鈍直。嫁之日。吾父母戒行。常以宮事不逮爲憂。久之。薰然成和。及孺人歿。乃時與姊夫不相中。然後知孺人之德。能甄陶子婦。而諭其志也。姊夫少孤。季父遠遊。委以家事。二十年内。外帖帖。及孺人歿。姊夫始見惡於季父。違言日彰。然後知孺人之才能。調劑叔姒。而使之無閒也。始曾君爲諸生。甚有名。館富室。常屏滋味。甘蔬食。而平生不聞信奉佛法。沂既長。有舉以叩者。歸問母孺人曰。爾父歲時伏臘。御食於先姑。未嘗厭甘毳。而居外則然。窺其意。以母老艱苦。食淡。不忍自饜。旣耳。用此。又知孺人之賢。能探其夫之微志。而爆之於身後也。姊夫及姊。屬余表孺人墓。已踰再紀。雍正三年春。余假滿北人。姊夫走送於河干。復出其父狀求合表。且曰。更遲之。吾不及見矣。又二年。余益病衰。恐終負前諾。乃敍而錄之。曾君早世。行未著。按其狀。皆瑣語。故獨取孺人所稱而附見焉。孺人卒於康熙某年。年六十有七。距曾君之卒。三十有四年。以某年月日。祔葬於某鄉某原。曾氏族故不繁。沂無子。再從無可嗣者。有女適林氏子元。

吳處士妻傅氏墓表

孺人姓傅氏。江西南昌人。余叔舅之妻也。先君子出贅寄寓外家。凡十年。時惟叔舅也存。而叔舅恆客遊。

余生六年。先君子歸金陵。計此生與舅凡五會耳。惟辛未壬申閒。同客京師。聚獨久。寒苦相依。丙子冬。自京師南歸。水宿淮關。夢舅立河壩。瞪目無聲。心詫之。至真江。急捨船陸行。至舅家。則葬已數月矣。問故。果死於此。余噉然而哭。孺人微泣於房。哭止。闔門而語。送不下堂塔。時孺人尙少。動作有儀。語皆中節。余黯然而傷。又肅然敬也。孺人幼喪母。無兄弟。獨身隨父客淮南。吾舅亦客焉。遂約婚。歸十年。而吾舅死。舅生常遠遊。相見日稀。有子曰誠。冠後亦授徒遠方。或歲歸。或閒歲三歲一歸。孺人之卒也。遽誠在山東。奔喪報葬。至京師。每見余。必吞聲掩涕。以求表墓之文。而孺人苦節清行。實宜有傳于後。乃爲之書。孺人卒於雍正六年七月。年六十有五。舅諱敬儀。字平一。從先兆葬六合劉家營棗樹墩。孺人耐焉。誠幼時無資。就外傅。及次子以訥。小學皆孺人口授。孺人之喪。誠雖客在外。泣血三年。喪食一如禮經。

中憲大夫鄂公夫人撒克達氏墓表

夫人姓撒克達氏。故慎刑司郎中鄂素之妻。今通政司通政使兼詹事府詹事攝翰林院掌院學士畱保之母也。保之言曰。保三歲而喪吾母。踰年喪吾父。庶母郭氏。舍己所出而乳焉。每語人曰。無若女君之德。何保不及見吾母之事。大父母而大父母之安吾母。衆載其言。保不能知。吾母之相吾父。而吾父權稅時。舅氏或爲保謀。宜少治生產。吾母抑以大義。衆載其言。吾母既歿。且十年。諸母諸姑。及族姻老婢。及見吾母者。見保莫不垂涕追思不已。嗚呼。信斯言也。古陰禮所謂婦德。幾盡之矣。家之乖恆。由婦人。而嫡妾則

有甚焉。故二南之風。皆始於不妒。蓋婦德莫難於斯。此之能然。而餘行可無徧述矣。春秋傳曰。娣姪者。不孤子之意也。一人有子。三人緩帶。在禮妾爲女君。君之長子三年。所以重其恩義。同其憂喜。而潛消其妒嫉也。然人之恆情。亦惟君及女君之存。不敢不勉耳。夫人既歿。而郭氏舍所出以字其孤。守信砥節。沒齒爲期。則夫人之德之在郭氏。必有過越於恆情者矣。而況奉舅姑。成內治。宜家人之疏節。與夫人父某。某官。年十□歸郎中。卒年二十有□女二。皆保姊也。郭氏年今五十有九。所生子早殤。雍正六年冬十有一月。桐城方苞撰。

陳太夫人王氏墓表

夫人姓王氏。陳贈公諱健之繼室。廣東右翼漢軍副都統昂之母。浙江通省提督倫炯之大母也。陳氏世爲閩人。自長樂遷泉州之高浦。明末海寇滋蔓。遷濱海。居民徙灌口。贈公時年六十餘矣。生計壹倚長子光。光死。贈公大慟。尋卒。昂年始十有一。含斂皆夫人手之。虛室中惟雞一柵。母子號泣。與雞鳴之聲相應。哀動鄰里。凶饑寇亂相乘。米至石八千。夫人拮据日作糜半釜。澆厚者飼子。次及女。自啜水漿。饑不可忍。則更急束要帶。昂旣貴。每念兒時備見太夫人之艱辛。而不獲一日致鼎養。恨不欲生。方流離轉徙。夫人常抱木主以行。雖遇寇迫險不釋。用此數世前生卒葬地。子孫猶得籍記。閩人相傳咸繼光禦倭寇。駐軍高浦。與僚屬遍閱山川形勢。指贈公舊居曰。是家必有興者。以爲此再世節鉞之兆也。然陳氏之遷高浦。

亦近耳。前此廬其所居之地者衆矣。而陳氏熾昌。又在徙灌口之後。則非宅地之所爲決也。豈其先世故有潛德隱行。及贈公之身。而胚胎已兆。故光潤先見於門閭與。嗚呼。此可卽太夫人之節行以徵之矣。倫炯始通籍。備宿衛。階甚卑。余一見卽決其必拔起爲大將。未數年。果建節歷七鎮。軍民威懷。粵閩江浙咸載其言。乾隆八年。以太夫人遺事請表墓。故並著閩人所傳語。使衆知家之興。必由其人。而謂宅地能有助者。妄也。太夫人父諱公榮。母某氏。女適太學生蕭涓。太夫人卒於康熙辛未年。享年七十有八。後贈公之卒。凡三十一年。前夫人許氏。父諱浦。母某氏。卒年二十有七。葬於高浦之杏林社。界禁限隔。亂後坵隴不可復辨。昂及倫炯。每以爲恨。贈公葬於某鄉某原。太夫人以癸酉年四月二十八日。葬於苧溪山之原。江左方苞表。

林母鄭孺人墓表

孺人姓鄭氏。福州侯官人。三山林贈君諱邦楨之妻。編修枝春之母也。生鄭氏熾昌。後其卒也。林氏方興。而伶俜艱辛。視眈庶貧女有甚焉。母黃氏。鄭贈君繼室也。生孺人踰歲而殂。鄭翁付外家鞠育。及疾革。始命以歸。父黨內外宗尙未識面。時十齡。悲號雀踊。見者莫不心惻。及歸林氏家。甚貧。而贈君羸疾。授經在外。孺人餽糜。日或不繼。歲戊子。贈君卒。遺一女二小男。老姑在堂。而盎無儲。桁無完衣。仲兄鄭諭德。幾庭計口致米。薪蔬百物。皆自孺人及女手指中出。身甘糠粃。而遇時物。必多方購易以進。或母家以餉孺子。

必奉姑。姑心知之而不忍卻也。孺人自居父喪，卽依諭德之妻王宜人，佐治家事，因教以閨訓。女史及贈君卒，孺人命枝春就殯，帷躬教督，誦讀聲洋洋比鄰。及親交到門者，莫不歎息。大母衰疾中，亦用以自慰焉。及姑終，女有歸，二子受室。枝春舉於鄉，爲內閣中書，而孺人嘔血遂不起。孺人疾作於雍正辛亥之春，戒勿使枝春得聞。其秋枝春感噩夢，請急航海而歸。孺人驚喜，疾少閒。卒於冬十二月晦前六日。年五十有八。子二：枝春，翰林院侍講，督學河南，夢彩。戊午科舉人。女適庠生葉球。以癸丑十月，附贈君之墓。在郭北五鳳山。乾隆七年春，枝春以狀求爲傳。余考孺人雖艱辛而未遭變故，所述皆婦順之常。於文律不宜立傳。旣而思孺人處境，略與吾母同。吾母之遭遇，視孺人尤順。而艱辛苦恨，則有甚焉。惟不肖子知之，宜乎枝春之不能自克也。抑又思朱子之母，安常履順，其貧約亦未甚也。二程子之母，則顯榮福祥以終世矣。而百世以下，無不知二母之賢，則惟其子之故耳。以苞之無似，不足以顯吾母，故因林母發此義，以勸枝春，以志吾疚，兼告天下後世爲人子者。乾隆八年十一月，江左方苞表。

方曰崑妻李氏墓表

孺人姓李氏，揚州府興化縣人。吾宗知孝豐縣事，諱將之子婦。邑諸生曰崑，繼室也。於苞爲共五世祖。斷事公之諸母行，比俗之人，謂劓股肱可療疾。雖子女行之於父母，亦爲過禮。而以吾所聞，廣昌何某妻魏氏，刲肱求療其姑，一時名輩爭爲傳記詩歌以紀之。又二十餘年，而有孺人之事。乾隆壬戌，余蒙恩歸里。

孺人之柩。適至自閩中。長子杭。以狀求誌銘。始聞其詳。孝豐府君病。膈噎。長子曰岱。割股以進。少閒。數日疾反。曰崑欲踵行之。孺人曰。子疾初愈。甚羸。如重傷。大人病必臻。夜半侍婢皆臥。登樓禱於宗祏。引刃自劓。昏仆久而蘇。強自纏縛。味爽作羹。府君食之。病又小愈者。閱月。及將終。乃知孺人事。呼而至曰。死生命也。然汝必育賢子孫。曰崑兄弟十三人。惟伯兄及四弟曰岳爲適出。而曰崑曰岳生同胎。曰岱宦遊。曰崑欲與曰岳同爨。謂孺人曰。爾能自必終世無生異同否。孺人曰。子能自必。何問婦人。孺人處宛若閒如弟妹之事。兄姊門以內。少壯男女皆相親。曰岱初任閩之沙縣。改調泰甯。曰岳卒於沙。曰崑從至泰甯。孺人以俗言。生同者死期亦近。時杭館於閩之榕城。孺人挈子女。及杭之妻女。閒關赴泰甯。未一年。曰崑果卒。孺人親視含斂。杭述孺人淑德甚詳。然舉是三者。則仁孝明知之見於他行者。視此矣。銘之藏幽。孺人之事宜使觀者感興。故爲表於外碑。孺人享年五十有五。父漳。浙江湖州府衛守備。與孝豐君善。故爲昏媾。祖嗣京。明河南道御史。曾祖春芳。大學士。子三人。女四人。系曰。

茲事之義類。余於廣昌魏氏論之詳矣。孺人求療其舅。其事尤希。而持之則有故。蓋大懼夫或重傷。以駭慟垂盡之親。故不得已而自劓。以塞其意也。往者亡妻蔡氏。亦嘗刲肱求療其姊。及來歸。余告以三從不二天之義。乃自知無謂。故備列之。俾慕爲仁孝者。得自鏡而審所處焉。

禮部尙書陳公神道碑

公諱誥。字叔大。號寶齋。系出渤海。爲宋大尉高瓊裔。明永樂初。上祖東園公。自臨安出贅海甯陳氏。遂著籍蒙其氏。高祖諱中漸。隱居好德。有子二人。並登萬歷丁丑會試榜。成進士。累官貴州參政。諱與相者。公之曾祖也。參政之子五人。其季曰元成。早世。有子三人。長之問。公本生父也。季之問。所承嗣也。明季陳氏衣冠日盛。子弟皆治舉業。務進取。而公之本生父。獨承學於念臺劉公。劉公沒。黃宗羲梨洲傳師說。以教浙東西。而公復從梨洲游。自入國朝。公伯叔兄弟兄弟之子。登上甲。宅政府。長六官。出秉節鉞者林立。惟公第舉乙科。然自補中書。三遷而副長御史。開府貴州湖南。入爲尙書。皆特擢。不由階資。其給事吏科。轉刑科。都給事。言多施用。而以稽貴州土司承襲。劾罷大吏。請復天妃閘。以奠黃淮。其語尤著薦紳聞。自鴻臚寺卿。倅大理領臺中。屢決疑獄。及巡撫貴州。民艱於食。行視山坂。皆可耕。諮於介衆。僉曰。收穫不可期。入稅籍。終難脫矣。遂奏免升科。踰年。斗米錢三十。因教以蠶桑。蒔果樹。卽王文成謫戍講學處。建書院。聚教羣士。延及苗童。黔民久而慕思。移鎮湖南。尋晉司空。轉宗伯。官中事無不釐飭。當聖祖中年。直省大吏員缺。必咨臺垣九卿。舉者多陰奉要人指意。或自援親故。而公所舉惟三人。高安朱相國始令潛江。以讞疑獄。公記其名。前後凡四薦。沈公近思未遇。資給誘進。旣通籍。揚於朝。淮黃決溢。舉陳公鵬年爲河督。公性沈靜。其治事。勾稽文簿。終日不倦。事畢。卽閉閣下簾。手一編。未嘗一日去書。謂四子之書。諸經膏液。

也。近體諸身。然後知須臾不可離。作四書述。嘗慨酷吏深文擊斷。曰。律者。聖人以不忍人之心。而著之爲精義之學者也。作讀律述。謂孔子學易。期於寡過。人事萬變。包於六位。隨時隨事。必有合焉。作玩辭述。手披司馬氏通鑑。朱子綱目。以朱墨雜色識之。凡五周。多獨見。作通鑑述一卷。晚年將次第排纂。而業未終。公既沒十有四年。其子世倌。自山東以遺書及行狀抵苞。請列外碑。且曰。倌自始仕。以至於今。戰戰慄慄。惟懼或蹈於非義。以不敢忘先人之志事耳。苞以衰疲久。而底滯又數年。世倌爲御史大夫。其規模略與念臺劉公相類。乃竊歎公之教型於家。而劉公之風。能使異世聞而興起也。夫比俗之人。以講學爲詬病久矣。故爲譜其世家。並傳再世師友淵源之漸。俾學者無惑於俗言。而識所祈嚮。是亦公之志也。夫公卒於康熙六十一年。享年八十。壬子科舉人。曾祖累贈光祿大夫。文淵閣大學士。祖考以公。贈光祿大夫。禮部尚書。祖妣妣。並贈一品夫人。本生考妣。賙贈亦如之。夫人查氏。初封淑人。晉封一品夫人。子六人。長世儁。丙戌進士。知江西建昌府。次世儼。辛卯舉人。揀選知縣。次世仁。乙未進士。翰林院檢討。次世倌。癸未進士。工部尚書。次世侃。癸巳進士。翰林院檢討。次潮。幼殤。女七人。孫男二十四人。銘曰。經有明訓。不學面牆。冥行無嚮。爲惑爲狂。翼翼陳公。學優而仕。寅亮中外。官常有紀。善政善教。奠又遐荒。氓獠歌思。愈久不忘。入長二官。禮寅事覈。如握尋常。引以繩墨。譜公之行。按公之書。所言多應。終始不渝。遠尊師聞。近守父學。有子能承。風規尤卓。豐碑義表。用表功施。不說學者。視此銘辭。

理藩院員外郎贈資政大夫席公神道碑

公諱席爾泰。系出舒穆祿氏。世居盛京東之渾渚。大父郎住。力能出車馬於淖陷。父吳巴泰。十六從軍。破隊徇城。常推鋒。抑於上官。功不得御。終不自列。非臨陣未嘗妄殺一人。公初試惜薪司筆帖式。轉倅刑科。麻勒吉總督江南江西。檄自隨。歸補吏部主事。遷理藩院員外郎。奉檄行塞。墜馬傷肩臂。遂引疾。卒年六十有八。公在江南制府。以事詢。必竭情無隱。江西巡撫。以法中某郡守。制府叩公。公曰。吏獲罪。多由不善。事上官耳。卽遣公廉其實。守得免。而衆莫知其由。江蘇布政使被劾。命公勾稽簿書。使恐懼。道謁公。曰。歸理案牘。無他求也。麻公嘗被逮。院中佐吏皆號嗷。慢易。惟公不失禮。代任者益重公。固畱以自佐。而公篤念父母。竟告歸。其在吏部。有武弁爲尙書所厚。軍功不及格而絀。公力爭曰。三藩蕩平。論功者衆。成法一亂。則冒進者人人得引爲辭。會理藩院增置員外郎。上命部院各舉所屬賢能。首以公應。蓋不欲公在吏曹也。公內行飭修。事繼母誠孝。母素嚴。久而感悟。母沒。撫季弟勤於己子。凡衣食必先取足焉。公階奉直大夫。以子元夢貴。贈資政大夫。娶同系別屬女。仁厚識大義。公所以感繼母。及與麻公始終。夫人之助爲多。夫人以公封宜人。以元夢進封夫人。其卒也。距公之卒二十有二年。始公退休。家甚貧。而元夢以事譴。季子入翰林。尋亦罷。居常鬱鬱。及公卒。逾年而元夢復收用。漸被顧遇。開府兩浙。入爲司空。夫人屢覲皇太后於甯壽宮。天子親書堂額壁聯。以嘉母德。是以元夢每荷恩榮。爲太夫人慶。卽隱痛公之不及見。然

元夢能推太公之德業。慎行其身。而有令聞。俾國人稱願。以爲君子之子。則公亦可以無恨矣。公及夫人生卒年月日。子姓男女。既詳於幽堂之誌。葬事畢。外碑宜刻文。以屬余。乃敍而銘之。銘曰。維國之興。材必世生。維家之隆。德必世崇。公先再世。淳德未漓。暨公稍達。仍鬱不施。以昌厥嗣。爲帝股肱。恪居官次。令聞有融。衆人所矜。錫命之顯。君子所感。嗣德無覩。我列茲銘。信而有徵。

贈右副都御史趙公神道碑

贈公諱良。字維林。浙江紹興府瀝海所人。吾友趙國麟之父。處士臨若公之子也。生有明崇禎丁丑。時寇賊交闕。未成童。陷賊。匿舟底三日。勺飲不入。既脫歸。廬舍已空。國初東南未靖。人民流離。多餬口於北方。遂棄儒學醫。至幽燕。東遊齊魯。遇族父於泰安州。以醫自活。因廬旅焉。時淮陰江翁亦寓岱下。以女妻之。而臨若公倦遊無所合。困而歸。聞其子既立室家。附舟北上。至則國麟之生已數月矣。時康熙癸丑年也。臨若公入抱孫。出則與石堂諸散人遊。贈公既左右無違。而江夫人力致魚菽瓜蔬。以忠養。久而安焉。雖居窮巷。遠方畸人老宿多造門。豫章吳慎庵嘗嘆曰。臨若之室。僅容膝。可旋身。而入其中。則曠如也。臨若公以康熙二十三年卒於泰安。贈公及江夫人相繼沒。國麟貧不能葬。豫章戴君知地理。得吉兆以告。且探囊篋助營窆。又二十餘年。國麟巡撫安徽。入謁世宗憲皇帝山陵。請假歸里祭告。因葬故有缺。以書抵余。求補碑銘。以列祠堂。觀國麟所述。贈公自定家於岱。父歸就養。一室之中。父父子子。夫夫婦婦者。凡

二十年富貴不足道。國麟之得列於君子之林也。豈偶然哉。臨若公二弟。卒於南中。老不能奔喪。命贈公歸葬。獨身冒風雪往還。其治疾者。如疾在身。無貧富貴賤。必竭心力。享年五十有八。以乾隆元年。覃恩誥贈。如國麟官。江氏爲夫人。夫人之生。後贈公二十年。而卒。以康熙辛未。先公一年。次子國經。女四人。以某年月日合葬於州西天平山。銘曰。

族以亂而散。家以旅而成。行以艱而篤。志以沒而亨。昏昧有碑。瀝海有田。恩綸孔赫。世祀其縣。有開自天。其兆必先。

杜茶村先生墓碣

先生姓杜氏。諱濬。字于皇。號茶村。湖廣黃岡人。明季爲諸生。避流賊張獻忠之亂。流轉至金陵。遂久客焉。少倜儻。常欲赫然著奇節。旣不得有所試。遂一意於詩。以此聞天下。然雅不欲以詩人自名也。於並世人。獨重宣城沈眉生。吳中徐昭發。自愧不如。其在金陵。與先君子善。客維揚。則主蔣前民。金陵爲四方冠蓋往來之衝。諸公貴人。求詩名者。湊至。先生謝不與通。惟故舊或守土吏。迫欲見。徒步到門。亦偶接焉。門內爲竹關。先生午睡。或治事。則外鍵之。關外設坐。約客至。視鍵閉。則坐而待。不得叩關。雖大府至亦然。及功令有排門之役。有司注籍優免。先生曰。是吾所服也。躬雜廝輿。夜巡綽。衆莫能止。先生居北山。去先君子居五里而近。以詩相得。旦晚過從。非甚雨疾風無閒。先君子構特室。從橫不及尋丈。置牀衽几。硯。先生至。

則嘯咏其中。苞與兄百川奉壺觴。常提攜開以問學。先生偶致雞豚魚菽。必召先君子率苞兄弟往會食。其接如家人。丙寅春。先生年七十有七。攜襆被叩門。語先君子曰。吾老矣。將一視前民。歸而窟室蔣山之陽。死卽葬焉。是日渡江。數月竟死。維揚喪歸。寄長干僧舍。一二故人謀卜兆。子世濟曰。吾有親而以葬事辱二三君子。是謂我非人也。無何世濟亦卒。先生故三子。一子幼迷失。一爲僧遠方。衆莫敢主。又數年。長沙陳公滄州來守金陵。謂先生其鄉人之能立名義者。哀其志。爲買小邱蔣山北梅花村。召先生從孫揚文。及故人會葬。先君子執紼視窆。時苞客燕南。歸而命之曰。先生吾所尊事。汝兄弟親炙。可無誌乎。苞重其事。將俟學之有成。而措意焉。自先君子歿。患難流離。今衰且老矣。自恨學之無成。猶昔。而舊鄉限隔。恐終墮先人之命。乃姑述其大略。使人往碣於墓之阡。先生詩。世所傳不及十一。平生著述。手定凡四十七冊。世濟歿。勢家購得之。弗善。仍歸其從孫某。先生生於明萬曆辛亥年正月十六日。卒於康熙丁卯年六月某日。葬以康熙丙戌年二月十六日。銘曰。

大理卿高公墓碣

吾師宛平高公之歿也。以康熙庚辰仲春。余在京師。衆議以誌銘屬余。視喪畢。東歸爲銘。歸公二弟。丙戌再至。拜公墓。石已磨未勒也。而余以事遄歸。又六年冬十二月。以鄉人戴名世文集牽連被逮發。歲使僕

某祭掃還訊之。墓垣盡頽。而磨石尙仆於道。公仁孝聞天下。然世所稱者。太公以吏事謫遼左。公發憤成進士。伏闕上書求代。已而逢恩例贖歸。余竊謂父兄在難。凡力所逮。中人以下。猶將勉焉。不足爲公異也。自公視學江南。余從遊近十年。公家事細大畢聞。太公少豪宕。不可羈束。而太夫人謹禮法。不相中。太公之歸也。公以爲難。後天屬復完。又二親皆篤老。當更歡洽。而居常漠然。遇事仍嗃嗃。公用此。雖富貴恆蹙蹙。如窮人無所歸。終公身。公退食恆居於內。余怪焉。叩之御者。則常在太夫人側。嬉戲如嬰兒。其侍太公。所以承意觀色。或古禮經所未嘗云。而自公出之。乃知其當然而不可易也。公疾篤。余入視。公曰。子毋憂。某雖無祿。尙當終事吾母。乃竟先太夫人卒。嗚呼。酷矣。余所犯尙未決。雖天子明聖。而吏議余罪至重。死生未敢自卜。恐公之仁孝。余獨聞知者。遂就湮滅。而心氣瘀傷。不能營度爲文。前銘又不復記憶。乃質言其大略。俾公故人曾君啟。起磨石而碣焉。時康熙壬辰八月也。公諱裔。字素侯。卒於康熙庚辰二月十有二日。年五十有四。由翰林官至大理卿。仕績應列於史氏。銘曰。

兵部主事龔君墓碣

君姓龔氏。諱健陽。號惕齋。湖廣天門縣人也。初因其弟巽陽。索交於余。余時衰疾。趨走內廷。終歲僅一再

見君每以不能親近從問經書爲言。厥後聞君以陳漕弊爲重人所訖。部議降調。乃考其行於所習者。始知君自司工部。卽勇任公事。及入臺。奏砌馳道。核門禁。糶倉粟以平市價。並愜衆心。而尤爲時所稱者。巡視南城。有主母殺婢。勢家也。君奏請自治。不送刑部。屬託百方。卒持法不移。雍正九年旱。詔諭科道。聯名直陳時政。君首議在任守制。當急停。同僚相視。不敢署名。君遂具疏獨奏。付通政司。會掛部議。不得上。調行人司。方需次。特旨授兵部主事。以在臺中數言事。其名猶簡在聖心也。君益自奮勵。將有所設張。而未數月。遽以疾卒。始巽陽及吾門。試春官不第。將盡棄所學。而專心於三禮。及歸。亦遽卒。龔氏世居福建。至南唐越國公之子順。爲江西節度使。遂畱江西。旣而遷於竟陵。近千年無顯者。至君之祖。始舉乙科。及君兄弟五人。而登甲科者二。乙科者一。衆皆謂龔氏其昌矣。而仕者學者。皆不遂而無年。理數有不可詰者。獨其志行。猶不沒於士大夫之口。君於諸經四書。皆有編纂。尤好春秋。作胡傳辨十餘篇。惜乎君生時。余未得與而講也。君之祖仲鄂。順治甲午舉人。父諱松。廩貢生。以長子廷鸞。勅封文林郎。妻程氏。封孺人。君以子學海。遇乾隆三年覃恩。贈奉政大夫。妻譚氏。贈宜人。子三。長光海。嗣世父。次學海。次文海。女二。君以甲寅十二月合葬譚宜人之墓。在本縣利涉鋪先兆。未有銘幽之文。君卒後四年。學海以庶吉士。屬余教習。請銘。余多事未暇。及歸里。檢篋筒。失君行狀。乾隆九年秋九月。復以狀來。乃敍而銘之。以列外碑。銘曰。職方張而柄移。志甚盛而身萎。惟天造之難測。蚤素履之無虧。

王彥孝妻金氏墓碣

徽郡在羣山中。土利不足以贍其人。故好賈而輕去其鄉。自通都大邑。以及山陬海聚。凡便賈之地。卽家焉。其俗男子受室後。尊者卽督令行賈。無贏折皆不得速歸。久者數十年。近亦踰紀。用此居必聚族。而嚴閨門之禮。故婦人以節著者。比戶多有之。蓋禮俗之所漸然也。金氏爲休甯王彥孝妻。生子宜民。六月而寡。會國初天下猶未靖。而休歛閒。士賊假以攻剽。金氏集兄公彥忠。叔彥節。謀曰。吾三門惟孺子存。聞淮揚已定。先人舊業在焉。伯居守。叔衛我。抵江都。一綫可延也。從之。宜民少長。卽教以賈。曰。汝毋慕爲儒。彥節死。命宜民歸葬。彥忠死亦然。兩人終以無子。而其鄉鄰居者。多爲賊所殘。皆曰。徽節婦王氏。不祀矣。夫擇地權時。以定其身家。男子所不易也。而金氏以婦人任之。且決計於干戈擾攘之間。動乎險中。而得亨貞。豈獨其志節足爲女子之準的哉。節婦自始寡。卽不茹葷。飯蔬羹菜。凡五十年。卒年七十有二。以某年月日。祔於彥孝之兆。某鄉某原。後二十年。其孫宗華。儒而治方。客京師。請銘於余。始碣其墓之阡。銘曰。兒呱呱。莽伏戎。嫠也。恸。走檉檉。旣定遷。延宗祊。終首邱。辟兆從。

族子根穎壙銘

明善先生之後。能世其學者。惟中丞之子孫。諸父行皆先君子所善。而十五弟弢采。尤與先兄相得。先兄旣歿。且數年。余遇弢采丹陽道中。相持而哭失聲。自是聚則相歡。離居則相念也。雍正三年季春。余至京。

師其秋。弢采亦至。心疾累月不瘳。踰年而其三子根穎至自桐。左右就養。藥物無違。弢采稍自寬。疾漸愈。根穎年雖少。好古書。日輯左傳義疏。弢采暇則爲講畫。余方喜其旅中得良子。以忘其憂。而根穎尋抱疾。其冬。弢采館通州。根穎從。踰年春夏益羸。余再使往問。未得報。而弢采至自通。根穎以五月晦前一日死矣。叩所由。則始至時。父疾方劇。憂思咯血。隱而不言。至垂死。乃得其狀。昔先兄及余避事吳中。弟林偕。咯血不言。循至大疾。用此見父兄於子弟。仁孝者。察其形神。以求其疾痛。尤不可以不悉也。嗚呼。民之壽夭。皆曰命於天。然仁孝者。每以戕其生。則何以勸哉。弢采旣自爲哀辭。屬余銘其壙。乃垂涕而爲之書。根穎生於康熙壬午。卒年二十有六。未娶。銘曰。爾父疾無滋。以爾歸。耐食於爾宗。靈其億而。

鮑氏女球壙銘

康熙庚寅夏五月。余妹適鮑氏者。臥疾甚憊。而余有故鄉之行。往視之。其長女球侍。戒以在視。食飲寢興之節。球淚應聲落。踰月。余在皖。家僕至。叩之。則妹疾少蘇。而球遭癘疾死矣。金陵俗浮惰。而女教尤不修。甘食美服。嬉遊而外。爲女爲婦之道。胥無聞焉。其富女以此相高。貧者不得。則以懟其父母。賤其夫。而外其舅姑。余每侍老母。側見內外宗女。爲陳古女婦儀法。羣女往往心病。余言稍稍自引去。獨球承聽。久而益恭。鮑氏故富饒。至球父甚窶。又多子女。而家無僕婢。球自十歲。卽佐其母汲爨縫紉浣濯。攜持弟妹。凡成人之艱辛。實備嘗焉。而自有生。以至於歿。其饔飧未嘗一節適也。被服未嘗一完善也。故余與其父母。

用此尤不能爲懷。然世之福祥壽考而缺於人道以愧負其所受於天者多矣。而球無愧也。然則余與其父母亦可以無恨也。球以康熙庚寅七月二十三日殤。年十有六。未字。葬於某鄉某原。銘曰。而已反其初。生人之患。而今其免夫。而母疾其蘇。而安而居。

望溪先生文集卷十四

記

別建曾子祠記

雍正三年春。苞赴京師。道濟甯諸暨。楊三炯以兗郡丞督漕駐此。云始到官。寓署之西偏。蓋曾子故居也。聽事處卽正廟。前吏者遷主於西城樓而宅之。又於隙地治燕私之齋。余將就其址構數楹。迎主歸定祀。且延師召諸生講誦於此。俾衆著於先賢之遺蹟。而不敢廢焉。舍故廟而別祠。恐後之人狃於前事。而不能保也。秋九月。以書來請記。曰。工訖矣。余嘗謂道一而已。而聖賢代興。其操行之要。與所示學者入德之方。則必有爲前聖所未發者。詩書易禮。深微奧博。非積學者不能徧觀。而驟入也。至孔子則所言皆平近顯易。夫人可知。而六經之旨備焉。至曾子傳大學。揭慎獨之義。俾學者隨事觸物。而不容自欺。所以直指人心。道心之分。而開孟子所謂幾希之端緒。乃前之聖人所未發也。其自稱曰。吾日三省吾身。卽慎獨之見於操行之實者耳。夫見廟而思敬。過墓而知哀。苟有人心者莫不然。況入先賢之宮。而有漠然無所興起者乎。諸生誠切究夫省身慎獨之義。則知功利之溺心。詞章之蠹學。而慨然有志於遠且大者。而後之吏者。自惟燕私之居。則務廣而無窮。而先賢祀享。諸生講誦之地。盡取而不畱一區。其必有不得於心者。

矣。此三爛之志也。江南後學方苞記。

絃歌臺記

代

陳州城外西南隅。相傳孔子絕糧處。舊有祠曰阨臺。明嘉靖中。巡按御史某。更名絃歌祠。屢修屢廢。客以告余。因遣人鳩工。飭材營葺。俾復其舊。經始於康熙五十一年某月某日。告訖於次年某月某日。州之士。備述其川原林麓之勝。因董役者以請記於余。余思之。經旬而未得所以爲言之義焉。將陳夫子之德與道與。則乾坤之容。日月之光。不可繪畫。且語之至者。已備於前賢矣。將謂茲臺爲邑人所瞻仰與。則今天下郡州縣學。皆有夫子廟堂。過者不戒而肅恭。亦不係乎茲臺之存毀。至於川原林麓之觀。又不足道也。是役也。特以至聖遺蹟所留。有以告者。則不得任其終圯。故第書所緣起。以及畢工之月日云。

重建陽明祠堂記

自余有聞見。百數十年間。北方真儒。死而不朽者三人。曰定興鹿太常。容城孫徵君。睢州湯文正。其學皆以陽明王氏爲宗。鄙儒膚學。或勦程朱之緒言。漫詆陽明。以釣聲名而逐勢利。故余於平生共學之友。窮在下者。則要以默識躬行。達而有特操者。則勛以睢州之志事。而毋標講學宗指。金陵西華門外。舊有陽明書院。不知廢自何年。講堂學舍。周垣盡毀。其餘屋。圃者居之。繚以廁屢。欲聲其罪。則其人已亡。欲復其舊。則費無所出。乾隆十一年。貴州布政使安州陳公。調移安徽。過余北山。偶言及此。遂議興復。逾歲五月。

告成。屬記之。蓋公乃余素以睢州志事相勸者。其尊人鳴九先生。承忠節徵君之學。爲教於鄉國。故公於茲祠成之如此其速也。嗟乎。質儒耳食。亦知陽明氏揭良知以爲教之本指乎。有明開國以來。淳朴之士風。至天順之初而一變。蓋由三楊忠衰於爵祿。以致天子之操柄。閣部之事權。陰爲王振汪直輩所奪。而王文萬安首附中官。竊據政府。忠良斥。廷杖開。士大夫之務進取者。漸失其羞惡是非之本心。而輕自陷於不仁不義。陽明氏目擊而心傷。以爲人苟失其本心。則聰明入於機變。學問助其文深。不若固守其良知。尙不至梏亡。而不遠於禽獸。至天啟中。魏黨肆毒。欲盡善人之類。太常徵君目擊而心傷。且身急楊左之難。故於陽明之說。直指人心者。重有感發。而欲與學者共明之。然則此邦人士。升斯堂者。宜思陽明之節義勸猷。忠節徵君文正之志事爲何如。而已之日。有孜孜者爲何事。則有內愧而寢食無以自安者矣。又思陽明之門。如龍溪心齋。有過言畸行。而未聞其變詐以趨權勢也。再傳以後。或流於禪寂。而未聞其貪鄙以毀廉隅也。若口誦程朱。而私取所求。乃孟子所謂失其本心。與穿窬爲類者。陽明氏之徒。且羞與爲伍。是則陳公重建茲祠之本志也。夫郡志載前輩焦弱侯重修書院記。略云。創建者海門周公。時攝京兆。厥後與參黃公嗣事乃成之。今茲重建。費大於作始。公惟不詰屋與地私相授受之由。而官贖之價。從其抵鳩工庀材。並出祿賜。邑侯海甯許君助之。屬役於紳士。不由胥吏。故不日而事集。經始於乾隆十一年季冬。訖工於十二年仲夏。方苞記。

鹿忠節公祠堂記

定興鹿忠節公。致命於城西北隅。邑人就其地爲祠。曾孫某葺之。列樹增舍。俾子孫暨鄉人志公之學者。得就而講習焉。余嘗謂自陽明氏作。程朱相傳之統緒。幾爲所奪。然竊怪親及其門者。多猖狂無忌。而自明之季。以至於今。燕南河北。關西之學者。能自豎立。而以志節事功。振拔於一時。大抵聞陽明氏之風。而興起者也。昔孔子以學之不講爲憂。蓋匪是。則無以自治其身心。而遷奪於外物。陽明氏所自別於程朱者。特從入之徑塗耳。至忠孝之大原。與自持其身心。而不敢苟者。則豈有二哉。方其志節事功。赫然震動乎宇宙。一時急名譽者。多依託焉。以自炫。故末流之失。重累所師承。迨其身旣歿。世旣遠。則依託以爲名者。無所取之矣。凡讀其書。慕其志節。事功而興起者。乃病俗學之陋。而誠以治其身心者也。故其所成就。皆卓然不類於恆人。吾聞忠節公之少也。卽以聖賢爲必可企。而所從入。則自陽明氏。觀其佐孫高陽。及急楊左諸公之難。其於陽明氏之志節事功。信可無愧矣。終則致命遂志。成孝與忠。雖程朱處此。亦無以易公之義也。用此知學者。果以學之講。爲自事其身心。卽由陽明氏以入。不害爲聖賢之徒。若夫用程朱之緒言。以取名致科。而行則背之。其大敗程朱之學。視相詆訾者。而有甚也。公之生平。耿著於天壤。蓋無俟於余言。故獨著其所以爲學之指意。使學者知所事。而用自循省焉。是則公之志也夫。

容城孫徵君。明季嘗避難於易州之西山。學者就其故宅爲雙峰書院。其後徵君遷河南。生徒散去。爲土人侵據。其曾孫用楨。訟之累年。始克修復。而請余記之。余觀明至熹宗時。國將亡。而政教之仆也久矣。而士氣之盛昌。則自東漢以來。未之有也。方逆奄魏忠賢之熾也。楊左諸賢。首罹其鋒。前者糜爛。而後者踵至焉。楊左之難。先生與其友出萬死以赴之。及先生避亂山谷間。生徒朋遊。棄家而相保者比比也。嗚呼。諸君子之所爲。雖不能無過於中。而當是時。禮義之結於人心者。可不謂深且固與。其上之教。下之學。所以蘊蒸而致此者。豈一朝一夕之故與。夫晚明之事。猶不足異也。當靖難兵起。國乃新造耳。而一時朝士。及閭閻之布衣。舍生取義。與日月爭光者。不可勝數也。嘗歎五季縉紳之士。視亡國易君。若鄰之喪其雞犬。漠然無動於中。及觀其上之所以遇下。而後知無怪其然也。彼於將相大臣。所以毀其廉恥者。或甚於臧獲。則賢者不出於其閒。而苟妄之徒。回面汗行。而不知愧。固其理矣。明之興也。高皇帝之馭吏也嚴。而待士也忠。其養之也厚。其禮之也重。其任之也專。有不用命而自背所學者。雖以峻法加焉。而不害於士氣之伸也。故能以數年之閒。肇修人紀。而使之勃興於禮義如此。由是觀之。教化之張弛。其於人國輕重何如也。余因論先生之遺事。而并及於有明一代之風教。使學者升先生之堂。思其人。論其世。而慨然於士之所當自厲者。至其山川之形勢。堂舍之規。興作之程。則概略而不道云。

將園記

由正街之西。有廢墟焉。先君子嘗指以示余曰。此吾家故園也。汝曾大父自桐遷金陵。實始居此。其後定居土街。宅出質園無主。長廊曲檻。軒亭花石。遂盡於居民之毀竊。而荒穢至此。先君子好爲山澤之遊。既老不能數出。居常鬱鬱。乃謀復是宅。宅已六易主。久之議始成。以甲申七月入居。因步園之舊址。繚以百堵。隔居民之漱浣者。然後出池之淤。以實下地。而清流匯焉。堰之使方。圃其四周。池東有獨樹。蔭三丈餘。登其下可列坐。風謏謏。雖盛夏不畱蚊蠅。先君子日召故人。歡飲其間。將俟其成。而名之曰將園。取詩人將父將母之義也。越三歲。而先君子歿。始克於池之東北隅構四室。奉老母居其北。而余讀書其南。又數年。復於池東南隅爲堂。敞其中。櫺其左右。而翼其西偏。以臨於池廡。堂之東。上屬於四室。編籬穿徑。列植竹樹。每飯後。扶老母循廡至南堂。觀僕婢蒔花灌畦。或立池上。視月之始生。清光瑩然。不知其在城市中。也。南堂成於庚寅之春。其西翼尙未畢工。辛卯十有一月。余以南山集牽連被逮。又二年出獄。蒙聖恩召入內廷編纂。老母北上依余。每夏日輒語內御者曰。池中荷新出。柳條密蒙。桐陰如蓋矣。余出獄之次年。宅仍他屬。又三年。園亦出質。乃記所由始。示兄子道希。使知此大父母精神所憑依。而余之心力嘗竭焉。毋淹久於他姓也。

泉井鄉祭田記

兄百川暨弟椒塗。卜葬於泉井之西原。墓側有田主八畝。買爲祭田。壬辰。使馮氏甥榮收其入。兼以契付

之使築室而定居焉。以守薪木。俾吾子姓祭者有所休止。而記之曰。余同產凡八人。而女兄弟五。姊適鮑氏。曾氏者。前母姚孺人出也。適馮氏者。妹適鮑氏。謝氏者。並余兄弟。吳孺人出也。自余毀齒及成童。先君子尤窮空。冬無繇。日不再食者。旬月中必再三遘。時鮑氏姊已出室。而先兄侍王父於蕪湖。兩妹尚幼。同之者實兩姊及弟椒塗。而先君子課余及弟誦讀甚嚴。馮氏姊獨勤力定省。供子職。烹爨縫紉灑掃。執僕婢之役。門以內皆賴焉。余家貧。而馮氏尤甚。姊年二十有六。姊夫綏萬始入贅。其後余遊四方。綏萬助兄治余家事。近十年。兄歿。余又共事焉。姊在室時。余兄弟三人。更疾不瘳。凡四三年。雞初鳴。余每寤。望見燈光熒然。則姊已起治藥物矣。余年二十有三。始能備饗殮。而弟卒。又九年己卯。舉於鄉。歸自京師。踰年而兄卒。又七年丙戌。中禮部試。歸踰月而姊卒。姊先卒之數日。余往視。榮及兩女甥皆在旁。姊顧之慘然。余曰。吾生而存。若輩無飢且寒。又五年辛卯冬十有一月。余以南山集牽連被逮。將至京。守隸防夫伺甚嚴。或曰。入則不可以生矣。余懼與姊言之終棄也。乃於逆旅夜篝火作書。寄兄子道希。使以茲田歸馮氏。會逢天子仁聖。不遽用吏議。而不肖之軀。延於獄中者。又踰年。聞戚友多咎余曰。田以祭名。而使異姓主之。可乎。余亦惑焉。雖然是舉也。先兄及弟之魂魄。必嘉與之。且人事無常。使子孫守之。遂能永保不失乎。今以方氏祭田。而使馮氏子孫食其入。執其契。雖不肖者。莫敢相授受。安知非茲田之所以久存也。與。若他年道希克昌其世。以他畝易而歸之。義無不可。遂書之。俾刻石於墓左。時康熙壬辰十一月望後六日。在

獄思愆齋。

赫氏祭田記

古者治教禮俗莫重於宗法。周官以九兩繫邦國之民。五日宗以族得民。其爲天子繫屬斯民。權亞於牧長。義並於師儒。降至春秋。去國者多以族行。并兼者欲誘其遺民。則爲之致邑立宗。故先儒謂宗法之廢興與國勢爲表裏。此之故也。三楚吳越閩廣山谿之間。聚族而居者常數千百家。而宗法無一能行。蓋古者公卿大夫。祿皆足以仁其族。而四民各有職業。其待大宗之收恤。不過鰥寡孤獨廢疾。無大功之親者而已。後世家無恆產。人無常業。盡無儲。枷無衣者。比肩而立。而欲大宗之收族。不亦難乎。飢寒之不恤。而執法以繩不類。孰聽之乎。惟吳郡范氏有義田以養其族人。故宗法常行。無或敢犯。余嘗以風並世士大夫。閒有慕效者。不再世而子孫族人瓜分其義田。而標棄之。然後知范氏宗法久行。非以其義田之多。乃文正忠宣之德行功業。足以覆露其子孫。以陰爲之保定。故食其福者七八百年。而未有艾也。康熙癸巳冬。余自南書房移蒙養齋。時與顧用方論喪祭之禮。及古宗法。赫君赫若有意於余。言其母李孺人卒。期年內飲食寢處。不肯於禮經。其始仕。祿入甚薄。卽大治兆域。建棗側饗堂。每語余曰。范氏義田。吾有志焉。而未逮也。後二十餘年。乾隆戊辰。余已告歸。而君爲山東布政使。以書來告曰。先王父入關。隸正黃旗。受寶坻田五百八十畝。以授吾父暨叔父。吾父以公事出典二頃。餘八十畝。歲時具牲醪。常苦不充。及將終。

以授某曰。小子勸哉。奉先合族。無忘吾志。某兄弟四人。伯兄早世。季弟永泰。後叔父。而叔父亦卽世。某豎寶泉局。始克歸先父出典之田。以大半給三弟永甯。餘入祭田。及永泰得官。喟然曰。巨嫂衣食於兄。我爲叔父後。而喪葬兄力任之。乃坐享遺田。心不能安。請以歸於公。時某續置龍虎莊五百五十畝。乃以分給甯泰。而祖遺五百八十畝。盡爲祭田。以其餘周族姓。此永泰之義。某終未益尺土也。今以非材承乏東藩。將謹身節用。歲有增益。如范氏義田。以繼先人之志。望先生作記。俾時自砥淬。嗚呼。人性皆善。用此知謂古禮必不能行於今。皆自暴棄之誣言也。赫君不忘父命。遂足以發其弟之義心。而又能曲成其義。使公卿大夫之設心。皆若此。而宗法不能行。仁讓不能興。吾不信也。使三楚吳越閩廣聚族而居者。其巨室富人。皆能踵其事。則居常飢寒足以相恤。遇變鄉邑可以共保。禮俗成而民氣固。其有輔於國家之治教。豈淺小哉。赫居東。值歲大祲。未數月。以太僕寺卿內召。其增益義田。終能滿志。吾不敢知。然就其已事。固足爲爲人子孫與兄弟居之楷法矣。赫嘗言自服官以後。凡余所云。無一不拳拳於心。若果能然。則豈惟義田。文正忠宣之軌跡具在。庸詎爲吾儕所不可幾及哉。

仁和湯氏義田記

仁和湯少宰西涯。置義田如千畝。以贍其族人。法式一取之吳郡范氏。少宰卒於京師。其子學基。將御匱以歸。請余記之。傳曰。尊祖故敬宗。敬宗故收族。先儒嘗歎宗法不行。則民俗無由淳。國勢無由固。然其所

以不行者有說焉。古之時大功同財。而有祿者必仁其族。其平時飢寒相恤。死病相救。故有事則聚族而謀。犯難去國。以其族行。而莫之敢貳也。自秦人子壯出分。後世沿以爲俗。期之兄弟。能不異居與財者鮮矣。故士大夫家累鉅萬。其親屬或不蒙其潤澤。況族人乎。是以平居相視如途人。甚則號呶詬誶。而莫之能禦。吳楚閩越山澤鄉邑之間。族聚者常千百人。而宗法無一能行。此之故也。余嘗至吳郡。聞范氏之家法。宗子正位於廟。則祖父行俛首而聽命。過愆辯訟。皆於家廟治之。故范氏之子孫。越數百年無受罰於公庭者。蓋以文正置義田。貧者皆賴以養。故教法可得而行也。嗟乎。世之厚自封殖者。徒以私其子孫耳。然易世以後。貨以悖出。而子孫無一壠之植者多矣。文正置義田。以贍其族也。而子孫享之者垂七百年。天道人事之類。應而不忒如此。不可爲愚者之炯鑒哉。少宰家無贏餘。所遺於子若孫者。尙不及義田之半。可謂能厚其本根者矣。學基請記其事。豈惟揚父之美。亦欲其族人羣相助於范氏之家法也。

遊豐臺記

豐臺去京城十里而近。居民以蒔花爲業。芍藥尤盛。花時都人士羣往遊焉。余六至京師。未得一造觀。戊戌夏四月。將赴塞門。而寓安之上黨。過其寓爲別。曰。盍爲豐臺之遊。遂告嘉定張樸村。金壇王翊林。余宗弟文翰。門生劉師向。共載以行。其地最盛者稱王氏園。扃閉不得入。周覽旁舍。於籬落閒見蓓蕾數畦。從者曰。止此矣。問之土人。初植時平原如掌。千畝相連。五色閒厠。所以爲異觀也。其後居人漸多。各爲垣牆。

離落以限隔之。樹木叢生。花雖繁。隱而不見。遊者特豔其昔之所聞。而紛然來集耳。因就道旁老樹。席地坐久之。始得圃者宅。後小亭而憩休焉。少長不序。臥起坐立。惟所便。人暢所欲言。舉酒相屬。向夕猶不能歸。蓋余數年中。未有醺遊若此之適者。念平生鈍直寡諧。相知深者。二十年來。凋零過半。其存者。諸君子居其半矣。諸君子仕隱遊學各異趨。而次第來會於此。多者數年。少亦歷歲移時。豈非事之難期。而可委者乎。然寓安之行也。以旬日爲期矣。其官罷而將歸者。則文翰也。事畢而欲歸者。樸村也。守選而將出者。劉生也。惟翦林當官而行。且告歸。計明年花時。滯留於此者。惟余獨耳。豈惟余之衰疾羈孤。此樂難再。卽諸君子蹤迹乖分。栖託異向。雖山川景物之勝。什百於斯。而耆艾故人。天涯羣聚。歡然握手。如茲遊者。恐亦未可多遘也。因各述以詩。而余爲之記云。

遊潭柘記

康熙戊戌夏四月望後七日。余將赴塞上。寓安偕劉生師向過余。會公程可寬信宿。乃謀爲潭柘之遊。而從者難之。曰。道局窄。不利行車。窮日未可達也。少閒。雲陰合。厲風起。衆皆以爲疑。寓安曰。車倍僦。雨淋漓。詰旦必行。既就途。果回遠。經硯磧。數頓撼。薄暮抵山口。而四望皆荒邱。雖余亦幾悔茲行之勞。而無得也。入山一二里。徑陡仄。下車步至寺門。而山之面勢始出。林泉清淑之氣。曠然與人心相得。時日已向暝。乃宿寺西堂。質明起。二子披衣攀躡。窮寺之幽。與高。降而左。出寺循山徑東上。求潭柘舊址。泉聲隨逕轉。隱

巖密蒙。如行吳越溪山中。遇好石。輒列坐淹留。不能進。日將中。從者曰。更遲之。事不逮矣。余拂衣起。二子相視悵然。計所歷於山得三之二。去潭側二里。竟不能至也。昔莊周自述所學。謂與天地精神往來。余困於塵勞。忽睹茲山之與吾神者善也。殆恍然於周所云者。余生山水之鄉。昔之日。誰爲羈縶者。乃自牽於俗。以桎梏其身心。而負此時物。悔豈可追邪。夫古之達人。巖居川觀。陸沉而不悔者。彼誠有見於功在天壤。名施罔極。終不以易吾性命之情也。況敵精神於蹇淺。而蹙蹙以終世乎。余老矣。自顧數奇。豈敢復妄意於此。而劉生志方盛。出而當官。得自有其身者。惟寓安耳。然則繼自今。寓安尙可不覺寤哉。

再至浮山記

昔吾友未生北固在京師。數言白雲浮渡之勝。相期築室課耕於此。康熙己丑。余至浮山。二君子猶未歸。獨與宗六上人遊。每天氣澄清。步山下。巖影倒入方池。及月初出。坐華嚴寺門廡。望最高峰之出木末者。心融神釋。莫可名狀。將行。宗六謂余曰。茲山之勝。吾身所歷殆未有也。然有患焉。方春時。士女雜至。吾常閉特室。外鍵以避之。夫山而名。尙爲遊者所敗壞。若此。辛卯冬。南山集禍作。余牽連被逮。竊自恨曰。是宗六所謂也。又十有二年。雍正甲辰。始荷聖恩。給假歸葬。八月上旬。至樞陽。卜日奉大父柩改葬江甯。因展先墓在桐者。時未生已死。其子移居東鄉。將往哭。而取道白雲。以返於樞。至浮山。計日已迫。乃爲一昔之期。招未生子秀起。會於宗六之居。而遂行。白雲去浮山三十里。道曲躋。遇陰雨。輒不達。又無僧舍旅廬可

託宿。故余再欲往觀而未能。既與宗六別。忽憶其前者之言。爲不必然。蓋路遠處幽而遊者無所取資。則其跡自希。不係乎山之名不名也。既而思楚蜀百粵間。與永柳之山比勝。而人莫知者衆矣。惟子厚所經。則遊者亦浮慕焉。今白雲之遊者。特不若浮渡之雜然耳。既爲衆所指目。徒以路遠處幽。無所取資。而垂至者之希。則曷若一無聞焉者。爲能常保其清淑之氣。而無遊者猝至之患哉。然則宗六之言。蓋終無以易也。余之再至浮山。非遊也。無可記者。而斯言之義。則不可沒。故總前後情事而並識之。

蒼溪鎮重修三元觀記

高淳張彝歎嘗持所爲募修三元觀疏示余曰。俟其成。子必記之。余詫焉。彝歎曰。古者射鄉酺蜡讀法憲禁。計耦興鋤。各有地。春秋祈報。各有典祀。而後世並無之。此地爲宣歙羣流入吳之要會。自開永豐太平諸圩。民懼水敗。愨而聽於神。凡歲時修築。分植屬役。早潦啓閉水門。皆合衆成言於此。則過而存之。不亦可乎。又曰。吾鎮俗近古。無商賈奇羨。遊觀伎巧之誑耀。民安拙業。而士者亦通於農。若因農祀之節會。寓以古法。則禮俗可興。惜乎吾衰而志力有不逮也。余聞而慕之。因屬彝歎爲購旁舍。將移家而相資以待。老康熙辛卯。余構禍北徙。又七年戊戌。而彝歎赴詔。道卒於山東。又六年雍正甲辰。余蒙恩除旗籍。給假歸葬。而觀適成。蒼溪士人錄前後疏記以來。曰。此彝歎之志也。按疏記漢末吳將周瑜駐屯於此。瑜歿。權立觀以褒其功。及北宋以永豐田賜蔡京。乃重建。加崇侈焉。茲圻正殿棟陰署赤烏二年重建。其始修在

明成化三年。越萬歷三十二年。越崇禎十四年。凡再修。夫自明中葉至今。僅百餘年。修而復圯者三。而自漢至明。千餘年無廢興。事理有不當然者。蓋重建於京。修者醜之。故原其蹟之自瑜。而署以赤烏也。此雖類不學者爲之。然卽是可徵其俗之近古矣。惜乎彝歎旣歿。余復拘綴。無緣一至其地。究觀其學者耕者之禮俗也。乃約略而爲之記。其川流之支湊。及觀名神號所元。則彝歎之疏具矣。

記尋大龍湫瀑布

八月望前一日。入鴈蕩。按圖記以求名蹟。則蕪沒者十之七矣。訪於衆僧。咸曰。其始闢者皆畸人也。庸者繼之。或標田宅。以便其私。不則苦幽寂。去而之他。故蹊徑可尋者希。過華嚴。鮑甥率衆登。探石龍鼻流處。余止山下。或曰。龍湫尙可至也。遂宿能仁寺。詰旦。輿者同聲以險遠辭。余曰。姑往矣。俟不可卽而去之。何傷。沿澗行三里而近。絕無險艱。至龍湫。菴僧他出。樵者指道所由。又前半里許。蔓草被徑。輿者曰。此中皆毒蛇狸蟲。遭之重則死。輕則傷。悵然而返。則老僧在門。問故。笑曰。安有行二千里。相距咫尺。至崖而反者。吾爲子先路。持小竿。僕李吉隨之。經蒙茸。則手披足踏。輿者坦步里許。徑少窄。委輿於地。曰。過此則山勢陡仄。決不能前矣。僧曰。子毋惑。惟余足跡是瞻。鮑甥牽引。越數十步。則蔓草漸稀。道坦平。望見瀑布。又前列坐巖下。移時乃歸。輿者安坐於草間。並作鄉語。怨詈老僧曰。彼自耀其明。而徵吾輩之誑。必衆辱之。嗟乎。先王之道之榛蕪久矣。衆皆以遠迹爲難。而不知苟有識道者爲之先。實近且易也。孔孟程朱。皆困於

衆斷輿而時君不寤。豈不惜哉。夫輿者之誑。卽暴於過客。不能譴呵而創懲之也。而懷怒蓄怨至此。況小人毒正側目於君子之道。以爲不利於其私者哉。此嚴光管甯之儔。所以匿跡銷聲。而不敢以身試也。

題天姥寺壁

癸亥仲秋。余尋醫浙東。鮑甥孔巡從行。抵嵛縣。登陸問天姥山。肩輿者曰。小邱耳。無可觀者。但山下有古樹。介寺基與園圃之間。園者將薪之。僧以質於官。不能辨也。雷破而中分之。木身煨燼者十之七。自上科至下根。斬然離絕近三尺。其旁之依皮而存者僅矣。而枝葉蔚然。於今數百年。至山下。果如所云。卽而視其樹。則中焦者可爪而驗也。鮑甥曰。嘻。咄哉。李白之詩。乃不若輿夫之言之信乎。余曰。詩所云。乃夢中所見。非妄也。然卽此知觀物之要矣。天下事必見之而後知。行之而後難。凡以意度想像。而自謂有得者。如趙括之言兵。殷浩之志恢復。近世浮慕陸王者之談性命。皆夢中語也。而昧者多信爲誠然。若目擊而心通。或實有師承。則人雖微。其言不可忽。如臨清老人之分河流。蜀木工之解未濟是也。物之生也。若驟若馳。吉凶倚伏。顛倒大化中。當其時不自覺也。惟達者乃能見微而審所處。假而茲樹非殘於雷火。必終歸於薪爨。是震而焚之。乃天所以善全其生。而使之愈遠而彌存也。鮑甥曰。斯言也。不可棄。遂書於壁。使覽者觸類而得其所求思焉。

遊雁蕩記

癸亥仲秋望前一日入雁山。越二日而反。古蹟多榛蕪。不可登探。而山容壁色。則前此目見者所未有也。鮑甥孔巡曰。盍記之。余曰。茲山不可記也。永柳諸山。乃荒陬中一邱一壑。子厚謫居。幽尋以送日月。故曲盡其形容。若茲山則浙東西山海所蟠結。幽奇險峭。殊形詭狀者。實大且多。欲雕繪而求其肖似。則山容壁色。乃號爲名山者之所同。無以別其爲茲山之巖壑也。而余之獨得於茲山者。則有二焉。前此所見。如皖桐之浮山。金陵之攝山。臨安之飛來峯。其崖洞非不秀美也。而愚僧多鑿爲仙佛之貌相。俗士自鐫名字。及其詩辭。如瘡痍。鑿然而入人目。而茲山獨完其太古之容色。以至於今。蓋壁立千仞。不可攀援。又所處僻遠。富貴有力者。無因而至。卽至亦不能久留。構架鳩工。以自標揭。所以終不辱於愚僧俗士之剝鑿也。又凡山川之明媚者。能使遊者欣然而樂。而茲山巖深壁削。仰而觀。俯而視者。嚴恭靜正之心。不覺其自動。蓋至此則萬感絕。百慮冥。而吾之本心。乃與天地之精神一相接焉。察於此二者。則修士守身涉世之學。聖賢成己成物之道。俱可得而見矣。

封氏園觀古松記

封氏園。盤松偃臥如蓋。南北隳隤可半畝。爲京師古蹟。而余獨未嘗見。康熙壬寅秋。寓安將南歸。邀余及若霖同往。時餘暑未退。遊者雜至。壺觴交譁。余三人就陰坐井欄。移時然後去。雍正元年癸卯冬。寓安復至京師。踰年二月將歸。曰。吾十至京師。蹉跎竟世。曩吾之歸。不謂其復來也。今吾之來。不謂其復歸也。獨

垂與古松得再見耳。時新知又得舒君子展。而若霖改官吏部。無餘閒。期以二月既望。先後集松下。余與寓安子展前至。林空無人。布席列几案。坐臥及飲酒。踈數惟所便。拾誦九歌樂府古辭。日入星見。而若霖不至。翼日相期再往。則薄暮矣。甫至。厲風起。遽登車歸。飲於子展氏。坐方定而風止。莊周云。物之生也。若驟若馳。無動而不變。無時而不移。以一日之遊。而天時人事。不可期必如此。況人之生。遭遇萬變。能各得其意之所祈嚮邪。余始見茲松。惟南枝色微黃。餘皆鬱然。及再過而瘵傷者幾半。雖生意未盡。非完松矣。茲松之植也。五百餘年。其榮枯乃在閒歲中。而余適見之。豈其蹟之將湮。而神者俾借吾輩之遊。以傳於後邪。見於文。所以志茲松之遭遇。以爲不垂中之垂也。

金陵會館記

京師之有會館。乃鄉先生建立。以便後進之貢成均。試京兆禮部。守選於吏部者。自明以來。雖小郡邑。選與者稍衆。必爭爲之。而金陵無有。康熙二十二年。羅大理集衆力。建館於正陽門之東。以爲仕者商者。歲時聚會之所。門堂外羣室。不過數區。赴公車者。暫止而不可久留。吾友宥函。旣成進士。欲別建焉。而力不逮也。雍正五年春。告余曰。鄉人某。有故宅在城西南。捐以爲館。雖修治不易。然其基立矣。因勤以爲己任。逾年。宥函自翰林簡臺中。尋以老疾告歸。而館之工役粗畢。又市宅後棄地。垣而合諸館。以待繼事者之恢拓焉。夫金陵爲東南大都會。數百年以來。鄉先生之貴盛者不少矣。宥函起寒素。官文學清要。爲日甚。

近而能就此。以斯知事之集。惟其志之確。不惟其力之強。又以見任事者果能設誠以爲之倡。自有以感人心之同。而成所務也。宥函以作始之艱。慮其久而墮。乃集衆議。凡應舉及守選者入居。皆量資完葺。其貴盛者。則無問入居與否。必重有所出。以待修治恢拓之大用。公定條例。以屬館人。而出入則士大夫共稽之。夫凡物之情。方其作始。多畏難惜力。而曰非吾一人任也。及安受其成。則又以謂吾直寄焉。而不復爲之計久長。此凡事所以難成而易敗也。凡會於斯者。皆吾儕之將出任國事。以爲民依者也。果能以宥函之心爲心。則豈獨茲館之不廢哉。其當官守道。必有以異於比俗之人矣。

築子嬰隄記

自三楚吳越之漕。皆由江湖淮以入於河。而兗豫諸水之下流。復會於河淮。淮南諸州。數困於水。而秦郵與寶應最劇。寶應之田。汙下近湖者。爲積水所陷。十有六七。惟漕河之東。附隄地稍高。邑仰食焉。而緣隄故有含洞。時蓄洩以便漕。河水暴上。則隄下之民。被災尤劇。有將穫刈而沉沒無遺者焉。於是邑民於隄外更築隄。束內隄洩流以歸湖。而界首之東。有隄曰子嬰。爲大歲丙子。淮南諸州大水。邑人已重困。其明年七月。禾將登。而甚雨驟至。子嬰隄潰。潰之夕。邑士大夫之醺者罷。商旅之行者止。鄉邑之民。往來號呼者。聲填於道也。於時張侯以夜半冒風雨至隄上。相度形勢。爲書告治河長官。請閉含洞數日。使民得修隄。而淫雨連月不止。隄數築數潰。而隄下之禾盡沒。其冬。邑大饑。下郡粟猶不足以振焉。又明年。爲今戊

寅隄下之民。以禾沒築費無所。更不敢復言修隄事。張侯召之曰。方秋時水潦降。含洞開。工費而築不堅。今築以春。勞費不及半。而計其功當倍蓰。乃官市隄下田數頃。益拓其故址。爲籍屬隄下占田者。徵役千二百身。身行築者。經始於二月朔。後六日。歷三旬。隄成。邑人烹如。既有年。余聞鄭宋之間。連數百里。往往爲廢墟。古者用彈丸之地。兵車玉帛。四出而不匱。蓋人私其土。而無遺利也。自郡縣法行。吏視其官如傳舍。川澮田疇不治。災患不謀。則士利多廢。而民生蹙。有治民事。甚於民之急。其私如張侯者。不可沒也已。時余客淮南。邑人請書其事。遂記之。

重建潤州鶴林寺記

余少遊名山。入古寺。見佛相。肅拜之禮。亦不敢施。而羈窮遠遊。及難後。多與學佛者往還。乃悟退之之親大顛。永叔求天下奇士不得。而有取於祕演。惟儼輩。良有以也。亡友劉古塘云。佛之理。吾不信。而竊喜其教。絕婚宦。公貨財。布衣疏食。隨地可安。士之蕭散孤介。而不欲違其本心者。往往匿跡於其中。故朱子亦嘗謂彼家有人。歙州程生峯。少從余遊。生生長素封之家。而偶儻少俗情。早歲成進士。歷官兵部郎中。會世宗憲皇帝。董正吏治。胤立會考。府擢領司事。時生年方壯。兄弟衆多。母夫人壽始及耆。而告歸。色養二十餘年不出。以至母夫入之終。而生老矣。生家淮陰。侍母不敢旬月違離。時遊金焦北固。尋蘇子瞻米南宮遺蹟。得微機。上人於黃鶴寺故址。荒原破屋中。蓋寺焚於康熙五十八年。殿宇蕩然。僅存傾圮小樓三。

閒。微機自幽燕南遊。支柱而栖之。志在興復。程生感焉。次第修築。數年殿宇門廡。寮房齋廚。略具。乾隆丁卯。余年八十。首夏。生趣余爲金焦之遊。畱禩被寺中。蓋知余少壯遠遊。不得在二親側。三十年來。恆宿外寢。生辰令節。必避居郊原野寺。不受子孫觴酌也。將歸。生言必得余爲之記。始鑿微機之志。蓋以佛之徒。有見於前賢之記序者。其名常不沒於學士大夫之耳也。次年五月。余與生送故人於瓜渚。微機帥其徒涉江就余。窺其意。欲得余文甚迫。而口不言。余動於其誠。又回憶平生悲憂危蹙。未有從容山水閒。身心中一無繫累。如往歲之遊者。不可以不識也。寺在潤州南門外黃鶴山下。本東晉時竹林寺。相傳宋武帝微時經過。有黃鶴翼蔽之祥。土人遂以名其寺。與其山。唐初。馬元素禪師。發名於此。一燬於唐末。薛朗劉浩之亂。再燬於明。永樂中。今茲三燬。而重建。工畢於乾隆十有二年季春。其東偏子瞻竹院。生猶將嗣事焉。六月朔日方苞記。

重修清涼寺記

先兄嘗言。自明中葉。儒者多潛遁於釋。而釋者又爲和通之說以就之。於是儒釋之道混然。儒而遁於釋者。多倡狂妄行。釋而慕乎儒者。多溫雅可近。余行天下。每以是陰辨儒釋。而擇其可交者。雍正二年。請假歸葬。卜兆未定。不敢卽私室。寓北山僧舍。會黃山老僧中州。率其徒來居清涼寺。數與往還。中州之來。踰月而寺火。惟存西北隅小屋三四間。嘗謂余曰。造物者蓋以新之責老僧也。俟其成。公必記之。及乾隆七

年。余歸里。更往觀焉。則盡復其故。而煥然新。中州博學工詩賦。所至薦紳富商爭湊之。故興之如此。其易也。其徒燭淵緯林嗣守之。亦以文學爲學佛者倡。每相見。必舉前語索記。又五年丙寅夏六月望後五日。余疾作。夜不能寐。偶憶先兄語。晨起而記之。以釋諾責。且以示學儒者。慎毋陰遁於釋。獨宜念其能篤信師說。以興作艱重爲己任。而卒以有成。吾儕對之。宜有愧色也。其肇工落成之日。用材之凡數。樂輸者之姓名。二僧自記之。以列碑陰可矣。

良鄉縣岡窪村新建通濟橋碑記

沛上人初至京師。居禁城西華門外道旁小巷。遂與其地爲禪林。勅賜靜默寺。一時王公貴人多與之遊。康熙六十一年。余充武英殿修書總裁。託宿寺中。與之語。窺其志趨。乃遊方之外而不忘用世者。遂淹留旬月。自是爲昵好。上人本師在安肅。又嘗與壽因寺於良鄉。每經岡窪村。閱行旅涉河之艱。偶見車僮馬傷。遂竭資聚建石橋。石工別耗之功不就。久之。郡丞經過。汜詢而得其情。將詰治。乃獲訖工。時雍正三年三月也。越十年而請余爲碑記。余嘗見上人。居母與兄之喪。沉痛幽默。雖吾黨務質行者。無以過也。營田之興。庸吏建閘。障水於安肅之瀑河。每歲伏秋流漂數十里。村落阻饑。上人見往來寺中者。輒指畫形勢。及土人蕩析離居狀。語聞於河督顧公。奏復其舊。內府有疑獄。大小司寇奉命讞決。衆會於寺。以待事。中有以深刻爲能者。上人危言以忱之。聞者莫不變色易容。噫。使夫人而有官守。其急民病。直言抗節。當如

何。朱子嘗病吾道之衰。而歎佛之徒爲有人。其有以也夫。茲橋去京城四十里而近。乃冠蓋往來之衝。故志上人成此之艱。并及其志行。俾儒之徒。過此而寓目者。有以觀省而自矜奮焉。乾隆二年八月方苞記。

望溪先生文集卷十五

頌銘

聖主親征漠北頌

康熙三十五年

皇帝撫臨天下三十有五年。悉治方內冠帶之民。興教慕德。百嘉鬯遂。萬物皞皞。四海外國。蠻夷族部之君長。槎浮索引。候風潮。踰嶺隘。稽顙疊跡而來獻見者。馳驛相望。惟乙亥之秋。西北虜酋噶爾丹。恃所處僻遠。倔強稱兵。齟齬北徼。諸部臣屬內附者。經冬涉春。駐兵田牧。諸部震恐。蕩析離居。奔訴闕下。皇帝哀矜。不忍棄之覆轡之外。又慮黠寇猖狂。毀我藩衛。邊郵日駭。漸爲百姓勞費。將總六師。親征之。於時內外文武小大之臣。鮮不惶疑震恐。謂虜居絕塞。道路所次。山谷曠莽。阻深宜且。命將出師。不宜勤乘輿。又其俗遷徙無常居。恐大軍深入。逐捕無所得。萬口一聲。交章懇請。皇帝內斷於心。丙子春二月。以費揚古爲撫遠大將軍。率師由西道。刻日進勦。詔陝西將軍孫思克出師。據土刺河。斷虜歸路。三月初吉。皇帝總六師。由中道出次古北口。詔曰。朕念士大夫卒校勞苦。自今以始。朕日御一餐。與六師共之。初。羣臣慮塞外道遠。少水泉。蜚輓阻艱。及車駕出塞。雨雪間作。而芻糧次第達師中。所至疏礮鑿井。甘泉湧溢。士馬饒給。如內地。始知上神略廣運。諸事經畫豫備。纖悉無遺也。五月丙辰。師次拖林。越數日。進逼黑盧倫河。虜

聞王師天降。震慄喪氣。日夜引遁。癸亥。皇帝親部署諸軍。倍道追逐。丙寅。車駕過河朔。至拖諾山。虜棄氈裘甲兵。老弱宵遁。訊之俘人云。當過巴顏而西矣。上曰。虜遁而西。適與西師遇。朕親經畫。兩路兵食毋乏。虜可草薙而禽獮矣。戊辰。皇帝班師。命將軍馬思哈。率精兵逐北。是日虜至昭水。將軍揚古。將軍思克兵俱會。敦陣奮擊。虜軍大敗。自未達西。斬截無算。俘獲子女畜物以億計。餘黨潰散。庚午。西師奏捷行在。諸王大臣。表請降明詔。祭告天地宗廟百神。宣布中外。制曰。可。臣伏見聖謨深遠。爲海內元元計。萬世之安。屏斥羣議。創非常之原。躬洩行間。率先士卒。抗威萬里沙場之外。殲刈累歲。驕悍狡黠之虜。自出車餽糧。整屯按部。以暨設策制謀。厲兵燿寇。事無小大。悉出神策廟算。論效收功。如指諸掌。遂使普天之下。窮荒不毛之域。尺地寸土。皆歸版輿。上及飛鳥。下及淵魚。惴栗宵翹之物。莫不若其性。自漢唐以來。未有躋登茲盛者也。臣苞方遊太學。未獲瞻塞上旛旄之光。聽軍前凱歌之聲。伏讀明詔。懼忤蹈舞。謹拜手稽首。而作頌曰。巍巍我皇。至仁天覆。陰陽蒸陶。萬物在宥。綱紀昭明。德施磅礴。海隅蒼生。飲食宴樂。四海外國。莫不懷柔。齋籩奉贄。以後爲羞。蠢茲醜虜。自懟其生。背義作慝。以干大刑。擅興戈鋌。陵我北徼。自秋徂春。猖狂襲盜。謂居窮荒。天威不及。故集蠶虺。逞其毒螫。皇帝曰。咨虜爲不道。凡茲屬國。惟予怙冒。蛇豕不除。善良曷育。朕親行師。是絕是忽。惟時在廷。小大惶悸。交章請畱。至於再四。聖志不疑。神明默運。三方布師。以制虜命。乃命揚古。汝行自西。批其肘腋。使賊不支。乃詔思克。斷其歸道。拊背扼吭。使虜噎媚。乃撰吉日。乃

詰兵戎。六師張皇。我皇在中。分部授律。縣縣翼翼。發如川流。屯如山立。陰山沍寒。土結不毛。我皇戾止。豐草如茗。龍沙曠莽。潢污潦濁。我皇戾止。靈泉噴躍。芻糧雲屯。車徒接武。馬騰若驕。士勇可賈。遂次拖林。遂逼盧倫。如鼓洪爐。以鑠鉤金。虜衆愕眙。道無水泉。士馬百萬。豈來自天。始梟而張。卒鼠而竄。倉皇西奔。雜蹂紛亂。皇麾六軍。倍道逐角。雷動風行。直窮拖諾。虜遁益西。遇我西師。禽驚挂絡。獸駭觸機。三帥同心。祇遵天策。短甲步戰。蹕厲凌越。飛葦霧散。火戟星馳。從橫擊刺。所向皆靡。羣醜敗績。禽獮草薶。自未達西。俘獲千億。凡茲方略。我皇自設。功成萬里。若合符節。萬衆凱歌。一人有慶。日月照爛。山川霽潤。黃耆頌白。兒童稚齒。式瞻皇容。載笑載語。升中吉土。薦馨清廟。飲至論功。垂恩渙號。乾端坤倪。寸毛尺土。皆歸版圖。我皇之武。銷鋒灌燧。育我黎蒸。蕃祉壽善。我皇之仁。

萬年寶麻頌

康熙六十年

臣聞尚書之言君道也。曰作之君。作之師。自二帝三王以後。雖有賢君。能兼盡作師之道者鮮矣。惟我皇上。徇齊敦敏。既夙具於聖性。體道務學。又時切於聖心。故自御極以來。至今六十年。凡四海內外。無一民一物不安其性命。而共樂乎聖德之高深。朝廷草野。無一官一士不仰荷甄陶。而終不能窺聖學之萬一。兼盡乎作君作師之道。而建其有極。未有如我皇上者也。臣又竊觀聖德聖學。既與往聖同符。而因時立事。功德之隆。更有特出於千古者。自古人君開創者多武功。守成者多文德。惟我皇上。以守成而兼開創。

由正街之西。有廢墟焉。先君子嘗指以示余曰。此吾家故園也。汝曾大父自桐遷金陵。實始居此。其後定居土街。宅出質園無主。長廊曲檻。軒亭花石。遂盡於居民之毀竊。而荒穢至此。先君子好爲山澤之遊。既老不能數出。居常鬱鬱。乃謀復是宅。宅已六易主。久之議始成。以甲申七月入居。因步園之舊址。繚以百堵。隔居民之漱浣者。然後出池之淤。以實下地。而清流匯焉。堰之使方。圃其四周。池東有獨樹。蔭三丈餘。登其下可列坐。風謾謾。雖盛夏不畱蚊蠅。先君子日召故人。歡飲其間。將俟其成而名之曰將園。取詩人將父將母之義也。越三歲而先君子歿。始克於池之東北隅構四室。奉老母居其北。而余讀書其南。又數年。復於池東南隅爲堂。敞其中。櫺其左右。而翼其西偏。以臨於池。廡堂之東。上屬於四室。編籬穿徑。列植竹樹。每飯後。扶老母循廡至南堂。觀僕婢蒔花灌畦。或立池上。視月之始生。清光瑩然。不知其在城市中也。南堂成於庚寅之春。其西翼尙未畢工。辛卯十有一月。余以南山集牽連被逮。又二年出獄。蒙聖恩召入內廷編纂。老母北上依余。每夏日輒語內御者曰。池中荷新出。柳條密蒙。桐陰如蓋矣。余出獄之次年。宅仍他屬。又三年。園亦出質。乃記所由始。示兄子道希。使知此大父母精神所憑依。而余之心力嘗竭焉。毋淹久於他姓也。

泉井鄉祭田記

兄百川暨弟椒塗。卜葬於泉井之西原。墓側有田主八畝。買爲祭田。壬辰。使馮氏甥榮收其入。兼以契付

之。使築室而定居焉。以守薪木。俾吾子姓祭者有所休止。而記之曰。余同產凡八人。而女兄弟五。姊適鮑氏。曾氏者。前母姚孺人出也。適馮氏者。妹適鮑氏。謝氏者。並余兄弟。吳孺人出也。自余毀齒及成童。先君子尤窮空。冬無繇。日不再食者。旬月中必再三遘。時鮑氏姊已出室。而先兄侍王父於蕪湖。兩妹尙幼。同之者。實兩姊及弟椒塗。而先君子課余及弟誦讀甚嚴。馮氏姊獨勤力定省。供子職。烹爨縫紉灑掃。執僕婢之役。門以內皆賴焉。余家貧。而馮氏尤甚。姊年二十有六。姊夫綏萬始入贅。其後余遊四方。綏萬助兄治余家事近十年。兄歿。余又共事焉。姊在室時。余兄弟三人。更疾不瘳。凡四三年。雞初鳴。余每寤。望見燈光。熒然。則姊已起治藥物矣。余年二十有三。始能備饗殮。而弟卒。又九年己卯。舉於鄉。歸自京師。踰年而兄卒。又七年丙戌。中禮部試。歸踰月而姊卒。姊先卒之數日。余往視。榮及兩女甥皆在旁。姊顧之慘然。余曰。吾生而存。若輩無飢且寒。又五年辛卯。冬十有一月。余以南山集牽連被逮。將至京。守隸防夫伺甚嚴。或曰。入則不可以生矣。余懼與姊言之。終棄也。乃於逆旅夜篝火作書。寄兄子道希。使以茲田歸馮氏。會逢天子仁聖。不遽用吏議。而不肖之軀。延於獄中者。又踰年。聞戚友多咎余曰。田以祭名。而使異姓主之。可乎。余亦惑焉。雖然是舉也。先兄及弟之魂魄。必嘉與之。且人事無常。使子孫守之。遂能永保不失乎。今以方氏祭田。而使馮氏子孫食其入。執其契。雖不肖者。莫敢相授受。安知非茲田之所以久存也與。若他年道希克昌其世。以他畝易而歸之。義無不可。遂書之。俾刻石於墓左。時康熙壬辰十一月望後六日。在

獄思愆齋

赫氏祭田記

古者治教禮俗莫重於宗法。周官以九兩繫邦國之民。五曰宗。以族得民。其爲天子繫屬斯民。權亞於牧長。義並於師儒。降至春秋。去國者多以族行。并兼者欲誘其遺民。則爲之致邑立宗。故先儒謂宗法之廢興。與國勢爲表裏。此之故也。三楚吳越閩廣山谿之間。聚族而居者常數千百家。而宗法無一能行。蓋古者公卿大夫。祿皆足以仁其族。而四民各有職業。其待大宗之收恤。不過鰥寡孤獨廢疾。無大功之親者而已。後世家無恆產。人無常業。盎無儲。枷無衣者。比肩而立。而欲大宗之收族。不亦難乎。飢寒之不恤。而執法以繩不類。孰聽之乎。惟吳郡范氏。有義田以養其族人。故宗法常行。無或敢犯。余嘗以風並世士大夫。間有慕效者。不再世。而子孫族人。瓜分其義田。而標棄之。然後知范氏宗法久行。非以其義田之多。乃文在忠宣之德行功業。足以覆露其子孫。以陰爲之保定。故食其福者七八百年。而未有艾也。康熙癸巳冬。余自南書房移蒙養齋。時與顧用方論喪祭之禮。及古宗法。赫君赫若有意於余。言其母李孺人卒。期年內飲食寢處。不肯於禮經。其始仕。祿入甚薄。卽大治兆域。建墓側饗堂。每語余曰。范氏義田。吾有志焉。而未逮也。後二十餘年。乾隆戊辰。余已告歸。而君爲山東布政使。以書來告曰。先王父入關。隸正黃旗。受寶坻田五百八十畝。以授吾父暨叔父。吾父以公事出典二頃。餘八十畝。歲時具牲醪。常苦不充。及將終。

以授某曰。小子勸哉。奉先合族。無忘吾志。某兄弟四人。伯兄早世。季弟永泰。後叔父。而叔父亦卽世。某暨寶泉局。始克歸先父出典之田。以大半給三弟永甯。餘入祭田。及永泰得官。喟然曰。巨嫂衣食於兄。我爲叔父後。而喪葬兄力任之。乃坐享遺田。心不能安。請以歸於公。時某續置龍虎莊五百五十畝。乃以分給甯泰。而祖遺五百八十畝。盡爲祭田。以其餘周族姓。此永泰之義。某終未益尺土也。今以非材承乏東藩。將謹身節用。歲有增益。如范氏義田。以繼先人之志。望先生作記。俾時自砥淬。嗚呼。人性皆善。用此知謂古禮必不能行於今。皆自暴棄之誣言也。赫君不忘父命。遂足以發其弟之義心。而又能曲成其義。使公卿大夫之設心。皆若此。而宗法不能行。仁讓不能興。吾不信也。使三楚吳越閩廣聚族而居者。其巨室富人。皆能踵其事。則居常飢寒足以相恤。遇變鄉邑可以共保。禮俗成而民氣固。其有輔於國家之治教。豈淺小哉。赫居東。值歲大禊。未數月。以太僕寺卿內召。其增益義田。終能滿志。吾不敢知。然就其已事。固足爲爲人子孫與兄弟居之楷法矣。赫嘗言自服官以後。凡余所云。無一不拳拳於心。若果能然。則豈惟義田。文正忠宣之軌跡具在。庸詎爲吾儕所不可幾及哉。

仁和湯氏義田記

仁和湯少宰西涯。置義田如千畝。以贍其族人。式法一取之吳郡范氏。少宰卒於京師。其子學基。將御匱以歸。請余記之。傳曰。尊祖故敬宗。敬宗故收族。先儒嘗歎宗法不行。則民俗無由淳。國勢無由固。然其所

以不行者有說焉。古之時大功同財。而有祿者必仁其族。其平時飢寒相恤。死病相救。故有事則聚族而謀。犯難去國。以其族行。而莫之敢貳也。自秦人子壯出分。後世沿以爲俗。期之兄弟。能不異居與財者鮮矣。故士大夫家累鉅萬。其親屬或不蒙其潤澤。況族人乎。是以平居相視如途人。甚則號呶詬誶。而莫之能禦。吳楚閩越山澤鄉邑之閒。族聚者常千百人。而宗法無一能行。此之故也。余嘗至吳郡。聞范氏之家法。宗子正位於廟。則祖父行俛首而聽命。過愆辯訟。皆於家廟治之。故范氏之子孫。越數百年無受罰於公庭者。蓋以文正置義田。貧者皆賴以養。故教法可得而行也。嗟乎。世之厚自封殖者。徒以私其子孫耳。然易世以後。貨以悖出。而子孫無一壠之植者多矣。文正置義田。以贍其族也。而子孫享之者垂七百年。天道人事之類。應而不忒如此。不可爲愚者之炯鑒哉。少宰家無贏餘。所遺於子若孫者。尙不及義田之半。可謂能厚其本根者矣。學基請記其事。豈惟揚父之美。亦欲其族人羣相助於范氏之家法也。

遊豐臺記

豐臺去京城十里而近。居民以蒔花爲業。芍藥尤盛。花時都人士羣往遊焉。余六至京師。未得一造觀。戊戌夏四月。將赴塞門。而寓安之上黨。過其寓爲別。曰。盍爲豐臺之遊。遂告嘉定張樸村。金壇王翊林。余宗弟文翰。門生劉師向。共載以行。其地最盛者稱王氏園。扃閉不得入。周覽旁舍。於籬落閒見蓓蕾數畦。從者曰。止此矣。問之土人。初植時平原如掌。千畝相連。五色閒厠。所以爲異觀也。其後居人漸多。各爲垣牆。

籬落以限隔之。樹木叢生。花雖繁。隱而不見。遊者特豔其昔之所聞。而紛然來集耳。因就道旁老樹。席地坐久之。始得圃者宅。後小亭而憩。休焉。少長不序。臥起坐立。惟所便。人暢所欲言。舉酒相屬。向夕猶不能歸。蓋余數年中。未有醺遊若此之適者。念平生鈍直寡諧。相知深者。二十年來。凋零過半。其存者。諸君子居其半矣。諸君子仕隱遊學各異趨。而次第來會於此。多者數年。少亦歷歲移時。豈非事之難期。而可蚤者乎。然寓安之行也。以旬日爲期矣。其官罷而將歸者。則文翰也。事畢而欲歸者。樸村也。守選而將出者。劉生也。惟窮林當官而行。且告歸。計明年花時。滯留於此者。惟余獨耳。豈惟余之衰疾羈孤。此樂難再。卽諸君子蹤迹乖分。栖託異向。雖山川景物之勝。什百於斯。而耆艾故人。天涯羣聚。歡然握手。如茲遊者。恐亦未可多遘也。因各述以詩。而余爲之記云。

遊潭柘記

康熙戊戌夏四月望後七日。余將赴塞上。寓安偕劉生師向過余。會公程可寬信宿。乃謀爲潭柘之遊。而從者難之。曰。道局窄。不利行車。窮日未可達也。少閒。雲陰合。厲風起。衆皆以爲疑。寓安曰。車倍儼。雨淋漓。詰旦必行。旣就途。果回遠。經硯磧。數頓撼。薄暮抵山口。而四望皆荒邱。雖余亦幾悔茲行之勞。而無得也。入山一二里。徑陡仄。下車步至寺門。而山之面勢始出。林泉清淑之氣。曠然與人心相得。時日已向暝。乃宿寺西堂。質明起。二子披衣攀躡。窮寺之幽。與高降而左。出寺循山徑東上。求潭柘舊址。泉聲隨逕轉。聽

藪密蒙。如行吳越溪山中。遇好石。輒列坐淹留。不能進。日將中。從者曰。更遲之。事不逮矣。余拂衣起。二子相視悵然。計所歷於山得三之二。去潭側二里。竟不能至也。昔莊周自述所學。謂與天地精神往來。余困於塵勞。忽睹茲山之與吾神者善也。殆恍然於周所云者。余生山水之鄉。昔之日。誰爲羈縻者。乃自牽於俗。以桎梏其身心。而負此時物。悔豈可追邪。夫古之達人。巖居川觀。陸沉而不悔者。彼誠有見於功在天壤。名施罔極。終不以易吾性命之情也。況敵精神於蹇淺。而蹙蹙以終世乎。余老矣。自顧數奇。豈敢復妄意於此。而劉生志方盛。出而當官。得自有其身者。惟寓安耳。然則繼自今。寓安尙可不覺寤哉。

再至浮山記

昔吾友未生北固在京師。數言白雲浮渡之勝。相期築室課耕於此。康熙己丑。余至浮山。二君子猶未歸。獨與宗六上人遊。每天氣澄清。步山下。巖影倒入方池。及月初出。坐華嚴寺門廡。望最高峰之出木末者。心融神釋。莫可名狀。將行。宗六謂余曰。茲山之勝。吾身所歷殆未有也。然有患焉。方春時。士女雜至。吾常閉特室。外鍵以避之。夫山而名。尙爲遊者所敗壞。若此。辛卯冬。南山集禍作。余牽連被逮。竊自恨曰。是宗六所謂也。又十有二年。雍正甲辰。始荷聖恩。給假歸葬。八月上旬。至權陽。卜日奉大父柩改葬江甯。因展先墓在桐者。時未生已死。其子移居東鄉。將往哭。而取道白雲。以返於權。至浮山。計日已迫。乃爲一昔之期。招未生子秀起。會於宗六之居。而遂行。白雲去浮山三十里。道曲躑。遇陰雨。輒不達。又無僧舍旅廬可

託宿。故余再欲往觀而未能。既與宗六別。忽憶其前者之言。爲不必然。蓋路遠處幽而遊者無所取資。則其跡自希。不係乎山之名不名也。既而思楚蜀百粵間。與永柳之山比勝。而人莫知者衆矣。惟子厚所經。則遊者亦浮慕焉。今白雲之遊者。特不若浮渡之雜然耳。既爲衆所指目。徒以路遠處幽。無所取資。而豈至者之希。則曷若一無聞焉者。爲能常保其清淑之氣。而無遊者猝至之患哉。然則宗六之言。蓋終無以易也。余之再至浮山。非遊也。無可記者。而斯言之義。則不可沒。故總前後情事而並識之。

蒼溪鎮重修三元觀記

高淳張彝歎。嘗持所爲募修三元觀疏示余曰。俟其成。子必記之。余詫焉。彝歎曰。古者射鄉。酺蜡讀法。憲禁。計耦與鋤。各有地。春秋祈報。各有典祀。而後世並無之。此地爲宜。歛羣流入吳之要會。自開永豐太平諸圩。民懼水敗。愆而聽於神。凡歲時修築。分植屬役。旱潦啓閉水門。皆合衆成言於此。則過而存之。不亦可乎。又曰。吾鎮俗近古。無商賈奇羨。遊觀伎巧之誑耀。民安拙業。而士者亦通於農。若因農祀之節會。寓以古法。則禮俗可興。惜乎吾衰而志力有不逮也。余聞而慕之。因屬彝歎爲購旁舍。將移家而相資以待老。康熙辛卯。余構禍北徙。又七年戊戌。而彝歎赴詔。道卒於山東。又六年雍正甲辰。余蒙恩除旗籍。給假歸葬。而觀適成。蒼溪士人錄前後疏記以來。曰。此彝歎之志也。按疏記。漢末吳將周瑜駐屯於此。瑜歿。權立觀以褒其功。及北宋以永豐田賜蔡京。乃重建。加崇侈焉。茲圯正殿。棟陰署赤烏二年重建。其始修在

明成化三年。越萬歷三十二年。越崇禎十四年。凡再修。夫自明中葉至今。僅百餘年。修而復圯者三。而自漢至明。千餘年。無廢興。事理有不當然者。蓋重建於京。修者醜之。故原其蹟之自瑜。而署以赤烏也。此雖類不學者爲之。然卽是可徵其俗之近古矣。惜乎蘇歎旣歿。余復拘綴。無緣一至其地。究觀其學者耕者之禮俗也。乃約略而爲之記。其川流之支湊。及觀名神號所元。則蘇歎之疏具矣。

記尋大龍湫瀑布

八月望前一日。入鴈蕩。按圖記以求名蹟。則蕪沒者十之七矣。訪於衆僧。咸曰。其始闢者皆畸人也。庸者繼之。或標田宅。以便其私。不則苦幽寂。去而之他。故蹊徑可尋者希。過華嚴。鮑甥率衆登。探石龍鼻流處。余止山下。或曰。龍湫尙可至也。遂宿能仁寺。詰旦。輿者同聲以險遠辭。余曰。姑往矣。俟不可卽而去之。何傷。沿澗行三里而近。絕無險艱。至龍湫。菴僧他出。樵者指道所由。又前半里許。蔓草被徑。輿者曰。此中皆毒蛇狸蟲。遭之重則死。輕則傷。悵然而返。則老僧在門。問故。笑曰。安有行二千里。相距咫尺。至崖而反者。吾爲子先路。持小竿。僕李吉隨之。經蒙茸。則手披足踏。輿者坦步里許。徑少窄。委輿於地。曰。過此則山勢陡仄。決不能前矣。僧曰。子毋惑。惟余足跡是瞻。鮑甥牽引。越數十步。則蔓草漸稀。道坦平。望見瀑布。又前列坐巖下。移時乃歸。輿者安坐於草間。並作鄉語。怨詈老僧曰。彼自耀其明。而徵吾輩之誑。必衆辱之。嗟乎。先王之道之榛蕪久矣。衆皆以遠迹爲難。而不知苟有識道者爲之先。實近且易也。孔孟程朱。皆困於

衆斷輿而時君不寤。豈不惜哉。夫輿者之誑。卽暴於過客。不能譴呵而創懲之也。而懷怒蓄怨至此。況小人毒正側目於君子之道。以爲不利於其私者哉。此嚴光管甯之儔。所以匿跡銷聲。而不敢以身試也。

題天姥寺壁

癸亥仲秋。余尋醫浙東。鮑甥孔巡從行。抵嵯縣。登陸問天姥山。肩輿者曰。小邱耳。無可觀者。但山下有古樹。介寺基與園圃之間。園者將薪之。僧以質於官。不能辨也。雷破而中分之。木身煨燼者十之七。自上科至下根。斬然離絕近三尺。其旁之依皮而存者僅矣。而枝葉蔚然。於今數百年。至山下。果如所云。卽而視其樹。則中焦者可爪而驗也。鮑甥曰。嘻。咄哉。李白之詩。乃不若輿夫之言之信乎。余曰。詩所云。乃夢中所見。非妄也。然卽此知觀物之要矣。天下事必見之而後知。行之而後難。凡以意度想像。而自謂有得者。如趙括之言兵。殷浩之志恢復。近世浮慕陸王者之談性命。皆夢中語也。而昧者多信爲誠。然若目擊而心通。或實有師承。則人雖微。其言不可忽。如臨清老人之分河流。蜀木工之解未濟是也。物之生也。若驟若馳。吉凶倚伏。顛倒大化中。當其時不自覺也。惟達者乃能見微而審所處。假而茲樹非殘於雷火。必終歸於薪爨。是震而焚之。乃天所以善全其生。而使之愈遠而彌存也。鮑甥曰。斯言也。不可棄。遂書於壁。使覽者觸類而得其所求思焉。

遊雁蕩記

癸亥仲秋望前一日入雁山。越二日而反。古蹟多榛蕪。不可登探。而山容壁色。則前此目見者所未有也。鮑甥孔巡曰。盡記之。余曰。茲山不可記也。永柳諸山。乃荒陬中一邱一壑。子厚謫居。幽尋以送日月。故曲盡其形容。若茲山則浙東西山海所蟠結。幽奇險峭。殊形詭狀者。實大且多。欲雕繪而求其肖似。則山容壁色。乃號爲名山者之所同。無以別其爲茲山之巖壑也。而余之獨得於茲山者。則有二焉。前此所見。如皖桐之浮山。金陵之攝山。臨安之飛來峯。其崖洞非不秀美也。而愚僧多鑿爲仙佛之貌相。俗士自鐫名字。及其詩辭。如瘡疥。蹙然而入人目。而茲山獨完其太古之容色。以至於今。蓋壁立千仞。不可攀援。又所處僻遠。富貴有力者。無因而至。卽至亦不能久留。構架鳩工。以自標揭。所以終不辱於愚僧俗士之剝鑿也。又凡山川之明媚者。能使遊者欣然而樂。而茲山巖深壁削。仰而觀。俯而視者。嚴恭靜正之心。不覺其自動。蓋至此則萬感絕。百慮冥。而吾之本心。乃與天地之精神一相接焉。察於此二者。則修士守身涉世之學。聖賢成己成物之道。俱可得而見矣。

封氏園觀古松記

封氏園盤松偃臥如蓋。南北墜隱可半畝。爲京師古蹟。而余獨未嘗見。康熙壬寅秋。寓安將南歸。邀余及若霖同往。時餘暑未退。遊者雜至。壺觴交譁。余三人就陰坐井欄。移時然後去。雍正元年癸卯冬。寓安復至京師。踰年二月將歸。曰。吾十至京師。蹉跎竟世。曩吾之歸。不謂其復來也。今吾之來。不謂其復歸也。獨

秀與古松得再見耳。時新知又得舒君子展。而若霖改官吏部。無餘閒。期以二月既望。先後集松下。余與寓安子展前至。林空無人。布席列几案。坐臥及飲酒。疎數惟所便。拾誦九歌樂府古辭。日入星見。而若霖不至。翼日相期再往。則薄暮矣。甫至。厲風起。遽登車歸。飲於子展氏。坐方定。而風止。莊周云。物之生也。若騾若駝。無動而不變。無時而不移。以一日之遊。而天時人事。不可期必如此。況人之生。遭遇萬變。能各得其意之所祈嚮邪。余始見茲松。惟南枝色微黃。餘皆鬱然。及再過。而瘵傷者幾半。雖生意未盡。非完松矣。茲松之植也。五百餘年。其榮枯乃在閒歲中。而余適見之。豈其蹟之將湮。而神者俾借吾輩之遊。以傳於後邪。見於文。所以志茲松之遭遇。以爲不秀中之秀也。

金陵會館記

京師之有會館。乃鄉先生建立。以便後進之貢成均。試京兆禮部。守選於吏部者。自明以來。雖小郡邑。選與者稍衆。必爭爲之。而金陵無有。康熙二十二年。羅大理集衆力。建館於正陽門之東。以爲仕者商者。歲時聚會之所。門堂外羣室。不過數區。赴公車者。暫止而不可久留。吾友宥函。旣成進士。欲別建焉。而力不逮也。雍正五年春。告余曰。鄉人某。有故宅在城西南。捐以爲館。雖修治不易。然其基立矣。因勤以爲己任。逾年。宥函自翰林簡臺中。尋以老疾告歸。而館之工役粗畢。又市宅後棄地。垣而合諸館。以待繼事者之恢拓焉。夫金陵爲東南大都會。數百年以來。鄉先生之貴盛者不少矣。宥函起寒素。官文學清要。爲日甚。

近而能就此。以斯知事之集。惟其志之確。不惟其力之強。又以見任事者果能設誠以爲之倡。自有以感人心之同。而成所務也。宥函以作始之艱。慮其久而墜。乃集衆議。凡應舉及守選者入居。皆量資完葺。其貴盛者。則無問入居與否。必重有所出。以待修治恢拓之大用。公定條例。以屬館人。而出入則士大夫共稽之。夫凡物之情。方其作始。多畏難惜力。而曰非吾一人任也。及安受其成。則又以謂吾直寄焉。而不復爲之計久長。此凡事所以難成而易敗也。凡會於斯者。皆吾儕之將出任國事。以爲民依者也。果能以宥函之心爲心。則豈獨茲館之不廢哉。其當官守道。必有以異於比俗之人矣。

築子嬰隄記

自三楚吳越之漕。皆由江湖淮以入於河。而兗豫諸水之下流。復會於河淮。淮南諸州。數困於水。而秦郵與寶應最劇。寶應之田。汙下近湖者。爲積水所陷。十有六七。惟漕河之東。附隄地稍高。邑仰食焉。而緣隄故有含洞。時蓄洩以便漕。河水暴上。則隄下之民。被災尤劇。有將穫刈而沉沒無遺者焉。於是邑民於隄外更築隄。束內隄洩流以歸湖。而界首之東。有隄曰子嬰。爲大歲丙子。淮南諸州大水。邑人已重困。其明年七月。禾將登而甚雨驟至。子嬰隄潰。潰之夕。邑士大夫之醺者罷。商旅之行者止。鄉邑之民。往來號呼者。聲填於道也。於時張侯以夜半冒風雨至隄上。相度形勢。爲書告治河長官。請閉含洞數日。使民得修隄。而淫雨連月不止。隄數築數潰。而隄下之禾盡沒。其冬。邑大饑。下郡粟猶不足以振焉。又明年。爲今戊

寅隄下之民。以禾沒。築費無所。更不敢復言修隄事。張侯召之曰。方秋時水潦降。含洞開。工費而築不堅。今築以春。勞費不及半。而計其功當倍蓰。乃官市隄下田數頃。益拓其故址。爲籍屬隄下占田者。徵役千二百。身行築者。經始於二月朔。後六日。歷三旬。隄成。邑人烹如。旣有年。余聞鄭宋之間。連數百里。往往爲廢墟。古者用彈丸之地。兵車玉帛。四出而不置。蓋人私其土。而無遺利也。自郡縣法行。吏視其官如傳舍。川澮田疇不治。災患不謀。則土利多廢。而民生蹙。有治民事。甚於民之急。其私如張侯者。不可沒也已。時余客淮南。邑人請書其事。遂記之。

重建潤州鶴林寺記

余少遊名山。入古寺。見佛相。肅拜之禮。亦不敢施。而羈窮遠遊。及難後。多與學佛者往還。乃悟退之之親大顛。永叔求天下奇士不得。而有取於祕演。惟儼輩。良有以也。亡友劉古塘云。佛之理。吾不信。而竊喜其教。絕婚宦。公貨財。布衣疏食。隨地可安。士之蕭散孤介。而不欲違其本心者。往往匿跡於其中。故朱子亦嘗謂彼家有人。歙州程生峯。少從余遊。生生長素封之家。而倜儻少俗情。早歲成進士。歷官兵部郎中。會世宗憲皇帝。董正吏治。勅立會考府。擢領司事。時生年方壯。兄弟衆多。母夫人壽始及耆。而告歸。色養二十餘年。不出。以至母夫八之終。而生老矣。生家淮陰。侍母不敢旬月違離。時遊金焦北固。尋蘇子瞻米南宮遺蹟。得徹機上人於黃鶴寺故址。荒原破屋中。蓋寺焚於康熙五十八年。殿宇蕩然。僅存傾圮小樓三。

閒。微機自幽燕南遊。支拄而栖之。志在興復。程生感焉。次第修築。數年殿宇門廡。寮房齋廚略具。乾隆丁卯。余年八十。首夏。生趣余爲金焦之遊。畱樸被寺中。蓋知余少壯遠遊。不得在二親側。三十年來。恆宿外寢。生辰令節。必避居郊原野寺。不受子孫觴酌也。將歸。生言必得余爲之記。始饜微機之志。蓋以佛之徒。有見於前賢之記序者。其名常不沒於學士大夫之耳也。次年五月。余與生送故人於瓜渚。微機帥其徒涉江就余。窺其意。欲得余文甚迫。而口不言。余動於其誠。又回憶平生悲憂危蹙。未有從容山水閒。身心一無繫累。如往歲之遊者。不可以不識也。寺在潤州南門外黃鶴山下。本東晉時竹林寺。相傳宋武帝微時經過。有黃鶴翼蔽之祥。土人遂以名其寺。與其山。唐初。馬元素禪師發名於此。一燬於唐末。薛朗劉浩之亂。再燬於明。永樂中。今茲三燬。而重建。工畢於乾隆十有二年季春。其東偏子瞻竹院。生猶將嗣事焉。六月朔日方苞記。

重修清涼寺記

先兄嘗言。自明中葉。儒者多潛遁於釋。而釋者又爲和通之說。以就之。於是儒釋之道混然。儒而遁於釋者。多倡狂妄行。釋而慕乎儒者。多溫雅可近。余行天下。每以是陰辨儒釋。而擇其可交者。雍正二年。請假歸葬。卜兆未定。不敢卽私室。寓北山僧舍。會黃山老僧中州。率其徒來居清涼寺。數與往還。中州之來。踰月而寺火。惟存西北隅小屋三四間。嘗謂余曰。造物者蓋以新之責老僧也。俟其成。公必記之。及乾隆七

年。余歸里。更往觀焉。則盡復其故。而煥然新。中州博學工詩賦。所至薦紳富商爭湊之。故輿之如此。其易也。其徒燭淵緯林嗣守之。亦以文學爲學佛者倡。每相見。必舉前語索記。又五年丙寅夏六月望後五日。余疾作。夜不能寐。偶憶先兄語。晨起而記之。以釋諾責。且以示學儒者。慎毋陰遁於釋。獨宜念其能篤信師說。以興作艱重爲己任。而卒以有成。吾儕對之。宜有愧色也。其肇工落成之日。月用材之凡數。樂輸者之姓名。二僧自記之。以列碑陰可矣。

良鄉縣岡窪村新建通濟橋碑記

沛上人初至京師。居禁城西華門外道旁小菴。遂興其地爲禪林。勅賜靜默寺。一時王公貴人多與之遊。康熙六十一年。余充武英殿修書總裁。託宿寺中。與之語。窺其志趨。乃遊方之外而不忘用世者。遂淹留旬月。自是爲昵好。上人本師在安肅。又嘗興壽因寺於良鄉。每經岡窪村。閱行旅涉河之艱。偶見車債馬傷。遂竭資聚建石橋。石工別耗之功不就。久之。郡丞經過。汜詢而得其情。將詰治。乃獲訖工。時雍正三年三月也。越十年而請余爲碑記。余嘗見上人。居母與兄之喪。沉痛幽默。雖吾黨務質行者。無以過也。營田之興。庸吏建閘。障水於安肅之瀑河。每歲伏秋流漂數十里。村落阻饑。上人見往來寺中者。輒指畫形勢。及土人蕩析離居狀。語聞於河督顧公。奏復其舊。內府有疑獄。大小司寇奉命讞決。衆會於寺。以待事。中有以深刻爲能者。上人危言以忱之。聞者莫不變色易容。噫。使夫人而有官守。其急民病。直言抗節。當如

何。朱子嘗病吾道之衰。而歎佛之徒爲有人。其有以也夫。茲橋去京城四十里而近。乃冠蓋往來之衝。故志上人成此之艱。并及其志行。俾儒之徒。過此而寓目者。有以觀省而自矜奮焉。乾隆二年八月方苞記。

望溪先生文集卷十五

頌銘

聖主親征漠北頌 康熙三十五年

皇帝撫臨天下三十有五年。悉治方內冠帶之民。興教慕德。百嘉鬯遂。萬物皞皞。四海外國。蠻夷族部之君長。槎浮索引。候風潮。踰嶺隘。稽顙疊跡而來獻見者。馳驛相望。惟乙亥之秋。西北虜酋噶爾丹。恃所處僻遠。倔強稱兵。齟齬北徼諸部。臣屬內附者。經冬涉春。駐兵田牧。諸部震恐。蕩析離居。奔訴闕下。皇帝哀矜。不忍棄之覆轡之外。又慮黠寇猖狂。毀我藩衛。邊郵日駭。漸爲百姓勞費。將總六師。親征之。於時內外文武小大之臣。鮮不惶疑震恐。謂虜居絕塞。道路所次。山谷曠莽。阻深宜且。命將出師。不宜勤乘輿。又其俗遷徙無常居。恐大軍深入。逐捕無所得。萬口一聲。交章懇請。皇帝內斷於心。丙子春二月。以費揚古爲撫遠大將軍。率師由西道。刻日進勦。詔陝西將軍孫思克出師。據土刺河。斷虜歸路。三月初吉。皇帝總六師。由中道出次古北口。詔曰。朕念士大夫卒校勞苦。自今以始。朕日御一餐。與六師共之。初。羣臣慮塞外道遠。少水泉。蜚輓阻艱。及車駕出塞。雨雪閒作。而芻糧次第達師中。所至疏礪鑿井。甘泉湧溢。士馬饒給。如內地。始知上神略廣運。諸事經畫豫備。纖悉無遺也。五月丙辰。師次拖林。越數日。進逼黑盧倫河。虜

聞王師天降。震慄喪氣。日夜引遁。癸亥。皇帝親部署諸軍。倍道迫逐。丙寅。車駕過河朔。至拖諾山。虜棄氈裘甲兵。老弱宵遁。訊之俘人云。當過巴顏而西矣。上曰。虜遁而西。適與西師遇。朕親經畫。兩路兵食毋乏。虜可草薶而禽獮矣。戊辰。皇帝班師。命將軍馬思哈。率精兵逐北。是日虜至昭水。將軍揚古。將軍思克兵俱會。敦陣奮擊。虜軍大敗。自未達西。斬截無算。俘獲子女畜物以億計。餘黨潰散。庚午。西師奏捷行在。諸王大臣。表請降明詔。祭告天地宗廟百神。宣布中外。制曰。可。臣伏見聖謨深遠。爲海內元元計。萬世之安。屏斥羣議。創非常之原。躬洩行閒。率先士卒。抗威萬里沙場之外。殲刈累歲。驕悍狡黠之虜。自出車餽糧。整屯按部。以暨設策制謀。厲兵燿寇。事無小大。悉出神策廟算。論效收功。如指諸掌。遂使普天之下。窮荒不毛之域。尺地寸土。皆歸版輿。上及飛鳥。下及淵魚。惴栗宵翹之物。莫不若其性。自漢唐以來。未有躋登茲盛者也。臣苞方遊太學。未獲瞻塞上旛旐之光。聽軍前凱歌之聲。伏讀明詔。懼忤蹈舞。謹拜手稽首而作頌曰。巍巍我皇。至仁天覆。陰陽蒸陶。萬物在宥。綱紀昭明。德施磅礴。海隅蒼生。飲食宴樂。四海外國。莫不懷柔。齋籩奉贄。以後爲羞。蠢茲醜虜。自懟其生。背義作慝。以干大刑。擅興戈鋌。陵我北徼。自秋徂春。猖狂襲盜。謂居窮荒。天威不及。故集蠱虺。逞其毒螫。皇帝曰。咨虜爲不道。凡茲屬國。惟予怙冒。蛇豕不除。善良曷育。朕親行師。是絕是忽。惟時在廷。小大惶悸。交章請畱。至於再四。聖志不疑。神明默運。三方布師。以制虜命。乃命揚古。汝行自西。批其肘腋。使賊不支。乃詔思克。斷其歸道。拊背扼吭。使虜噎媚。乃撰吉日。乃

詰兵戎。六師張皇。我皇在中。分部授律。縣縣翼翼。發如川流。屯如山立。陰山互寒。土結不毛。我皇戾止。豐草如茗。龍沙曠莽。潢污潦濁。我皇戾止。靈泉噴躍。芻糧雲屯。車徒接武。馬騰若驕。士勇可賈。遂次拖林。遂逼盧倫。如鼓洪爐。以鑠鉤金。虜衆愕眙。道無水泉。士馬百萬。豈來自天。始梟而張。卒鼠而竄。倉皇西奔。雜蹂紛亂。皇麾六軍。倍道逐角。雷動風行。直窮拖諾。虜遁益西。遇我西師。禽驚挂絡。獸駭觸機。三帥同心。祇遵天策。短甲步戰。蹕厲凌越。飛茸霧散。火戟星馳。從橫擊刺。所向皆靡。羣醜敗績。禽獮草薶。自未達西。俘獲千億。凡茲方略。我皇自設。功成萬里。若合符節。萬衆凱歌。一人有慶。日月照爛。山川霽潤。黃者頰白。兒童稚齒。式瞻皇容。載笑載語。升中吉士。薦馨清廟。飲至論功。垂恩渙號。乾端坤倪。寸毛尺土。皆歸版圖。我皇之武。銷鋒灌燧。育我黎蒸。蕃祉壽善。我皇之仁。

萬年寶麻頌

康熙六十年

臣聞尚書之言君道也。曰作之君。作之師。自二帝三王以後。雖有賢君。能兼盡作師之道者。鮮矣。惟我皇上。徇齊敦敏。既夙具於聖性。體道務學。又時切於聖心。故自御極以來。至今六十年。凡四海內外。無一民一物不安其性命。而共樂乎聖德之高深。朝廷草野。無一官一士不仰荷甄陶。而終不能窺聖學之萬一。兼盡乎作君作師之道。而建其有極。未有如我皇上者也。臣又竊觀聖德聖學。既與往聖同符。而因時立事。功德之隆。更有特出於千古者。自古人君。開創者多武功。守成者多文德。惟我皇上。以守成而兼開創。

武功則威震於八荒。文德則光被於四表。蓋前世所未有也。自古人君寬仁者。或過於優柔。聰察者。或近於刻核。惟我皇上。以大知而行至仁。如天地之無不容。如日月之無不照。又前世所未有也。用此疆宇之廣博。民物之阜安。政教之洽浹。河海之清晏。無若今日者。臣草鄙賤士。昧學少文。蒙覆載之宏恩。趨走內廷。歷有年歲。近光服教。最爲深切。竊惟我皇上。盛德崇功。嘉言善政。雖積簡充棟。未能殫盡。謹綜其大要。拜手稽首而獻頌曰。

在宥天下。惟我聖皇。應時首出。萬物皆昌。如天之運。健行有常。如地之載。容保無疆。章一皇殷於民。以勤以殖。惟六十年。心如一日。大綱旣舉。細目咸飭。連之方寸。周於八極。章二我皇之武。知勇天錫。首芟三孽。察罕繼別。遂郡臺灣。海氛永息。戎臣受成。所向無敵。章三親犁大漠。六師如貫。巨寇立殲。獨由聖斷。西戎襲盜。帝命遏亂。決勝萬里。如持左券。章我皇之文。聰明天竄。溯源洙泗。義文是繼。經史百家。無幽不闡。象數聲律。無微不顯。章五大哉王言。如綉如綸。詩諧雅頌。文繼典墳。奕奕天章。出類離倫。雲輝日耀。鳳舞鸞蹩。章六我皇之仁。徧覆蒸黎。登之衽席。育以繁滋。議蠲議賑。小祿不遺。豐年賜復。屢徧天涯。章七矜疑緩獄。德命時行。猶頻肆赦。體天好生。河流衝激。淮甸靡甯。三巡相度。昏墊以平。章八我皇之智。包羅宇宙。一日萬幾。雲行川溜。求民之莫幽隱。必究察吏之疵。每如發覆。章九遴選必親。其難其慎。守令監司。每勤清問。發科興賢。嚴抑倖進。激濁揚清。莫不竦震。章十郊壇親饗。前世所難。我皇昭事。歷久彌虔。冬至大報。春始祈年。先期宿戒。終日

乾乾十一。肅雍在廟。孝享惟誠。元聲既得。用薦德馨。備物盡志。慈闈是承。年躋艾耆。孺慕猶形。十二。至誠

不息。無逸作所。宵旰勤政。罔閒寒暑。帳殿旌門。奏對日舉。亦有清暇。攷文稽古。十三。躬行儉樸。萬方之儀。

衣無纂組。椽不雕幾。素食一御。爲民禱祈。常畱有餘。以惠嘉師。十四。光天之下。至於海壖。四民熙熙。以養

以恬。兒童稚齒。壽考蒼顏。齊心同祝。天子萬年。十五。曰仁者壽。聖德日滋。惟恭則壽。聖敬日躋。于萬斯年。

我皇之禧。我皇之禧。萬民其喜。十六

聖主躬耕藉田頌 雍正元年

惟皇帝御極之元年。聖德廣運。庶政聿修。敷天之下。萬官億醜。成就法度。乃以仲春元辰。躬臨藉田。展事先農。秉耒三推。登臺以觀。終畝於時。風日布和。隰原增潤。羣工師師。旬徒濟濟。近光者仰德。迷聽者嚮風。臣竊惟我皇上。應天以誠。故志氣之動。足以格穹蒼。勤民有本。故典禮之行。足以通衆志。伏見聖德懋勤。凡郊廟典祀。必躬必親。至治馨香。感於神明。茲復躬耕帝藉。以供粢盛。乃書所謂明德惟馨。非徒薦以黍稷也。我皇上夙寤晨興。憂勞萬民。江南積逋。賜免者數百萬。江西額徵。豁免者百餘萬。河北五路。間有水旱。發帑振廩。冠蓋相望。惟恐事有中阻。澤不下究。凡此愛民重穀。肫懇無已之聖心。久淪浹於臣民之隔臆。故茲耕藉禮成。自朝有著位。以及城市郊野。兒童耆老。莫不式歌且舞。思見德化之成。粵稽自古好禮之君。莫不稽古典文。以爲民紀。然未有如我皇上實心實政。足以和通天之際。而與古典禮相應者。臣

垂際千載難邁之昌期。又夙荷天地生成之大德。銜恩撫躬。欲報靡由。顧惟譾陋。不足以罄盛德之形容。而踴躍懼忭之實情。則有不能自祕者。謹稽首頓首而獻頌曰。天佑衆萬。篤生聖皇。基命宥密。以勤萬邦。百神其享。惟德之常。下民其依。惟政之臧。風行雷動。奠此垓埏。邦經既正。百度無愆。乃舉舊典。命我田官。農祥正中。陳修藉壇。哻哻吉土。兆彼南郊。潔粢豐盛。明禋用昭。升中燔燎。薦以蕭茅。神所憑依。是先是勞。土穀之修。六府所亟。萬事本原。蒸民粒食。康功田功。皇躬是飭。兆民之倡。四方維則。春陽載舒。土膏脈發。保介既諮。協風應律。皇耕一墾。班三以訖。凡百有位。敬共無斃。音官相告。樂動惟宮。太史有占。雲物其豐。蒸蒸甸徒。檉襍就功。載笑載言。皇儀有顯。惟天監德。應感無私。皇情所注。神動天隨。谷風習習。與雨祁祁。近自畿甸。周於海隅。自南自北。自東自西。三時不害。我稼如茨。我稼如茨。兆民其熙。兆民其熙。我皇之禧。

聖主親詣太學頌 雍正元年

臣聞二帝三王。所以陰隲下民。而使各得其恆性者。以能兼立乎君師之極也。有虞教冑。直溫寬粟。帝親命之。在周文武之興。辟雍鐘鼓。並見於雅歌。詩人推原以爲東西南北。無思不服。實由於此。古者天子視學。大昕鼓徵。興秩節以事先師。而春秋簡不帥教者。亦親蒞焉。蓋以至尊而盡禮於先師。所以見尊德樂道之誠。以一士之不帥教。而天子乃親聽之。所以使震動恪恭。而不苟以自棄也。我皇上蒞政之初。卽詔

崇至聖先師。祖考五世。並加王爵。以三月朔日。躬臨太學。特諭大小諸司。凡公牒祝辭。並稱詣學。不得言
垂。釋菜禮成。乃御經筵。宣恩旨。越日復頒聖訓。誨誘諄諄。庶官庶士。靡不感勵。臣竊惟天有四時。春秋冬
夏。風雨霜露。無非教也。我皇上至敬至誠。凡郊廟典祀。必躬親薦饗。終日乾乾。皆所以教羣士。使知持身
守道之則也。秉決庶政。日昃不遑。宵旰餘閒。猶披文史。皆所以教羣士。使知治業赴功之準也。激濁揚清。
閉邪褻正。使有司絕苞苴之徑。諸生杜干謁之私。又所以教羣士。使出入於太學者。必思無愧於孔子之
門牆也。蓋皇上常以身教。而董之以實政。誠兼盡乎作君作師之道。而揆之虞廷之教胄。周室之作人。有
若合符契者。豈特躬親釋奠。合樂稽經。爲臨雍盛典與。臣昧學少文。不足以敷揚闕休。然葵藿之微。不能
不向太陽而傾心者。物性之自然也。敬撰頌言。用附於巷舞衢歌之末云爾。其辭曰。

惟天牖民。建極有常。作君與師。人紀是張。煌煌壁雍。四方之綱。天子照臨。人文其昌。五帝建德。成均是
崇。三王之化。於論鼓鐘。我皇敬學。表正自躬。先聖後聖。其揆則同。九有乂安。萬官承則。政教既行。典文
可式。率民以耕。南郊之藉。範士以禮。澤宮是卽。優崇先聖。王及高曾。視學曰詣。義以正名。乃親釋奠。典
禮攸行。乃布經筵。大義是宏。明新共貫。治平馴致。聖有微言。皇成至治。精一執中。心傳無二。皇實操此。
以制萬事。禮樂政刑。罔非至教。況睹天顏。近光有耀。褻嘉儒先。是崇是報。廣開賢路。是來是勞。宮縣
具奏。雅聲洋洋。我皇在中。顒顒叩叩。三階肅肅。圓橋跼跼。被此休烈。羣思奮揚。干羽之舞。苗頑效誠。在

泮獻賦。淮夷是懲。文德誕敷。武威益行。開我明堂。四荒畢庭。

聖主躬耕藉田頌 乾隆三年

粵稽成周之禮。天子藉於南郊。冕而朱紘。躬秉耒。陽官司事。旬人終畝。以共天地宗廟百神之祀。以先衆庶兆民。使皆震動恪恭於農。方是時。典禮明肅。有不耕者。史必書之。秦漢以後。卽事用希。有其舉之。亦著於史冊。然臣聞惟仁人爲能饗帝。惟孝子爲能饗親。蓋殫心而奉之以禮。然後可以交於神明也。又聞應天以實。感人以誠。使無仁孝。愍敬之實。則潔粢秉鬯。不足以薦馨香。無恤民重穡之誠。則修禮設儀。不足以通衆志。我皇上躬履至道。三年縞素。仁孝愍乎黎蒸。每遇郊廟社稷之事。儼恪嚴恭。有孚顒若。自御極以後。豁海內逋賦。有司虧帑。凡數百千萬。濱江沿海。沙壅水徙。及下地久荒。壅於上聞者。勞諏廣詢。悉除其額征。每遇歲祲。振廩截漕。發帑移粟。蠲除租賦。多者至二百餘萬。是以山陬海聚。父子弟。幽閨之女婦。咸知聖天子恤已之誠也。允矣休哉。卽此爲承祖敬天之實事矣。三年仲春。擇吉躬藉。時久不雨。及期雲陰合。時雨降。京都士庶。靡不欣躍。臣備員禮官。叨直禁近。雖以頽齡弱足。未能扈從齋宮。瞻穆穆之容。中心勤企。謹拜手稽首而爲頌曰。

惟天迪保。右序我皇。統承列聖。道繼三王。克仁克孝。學與性成。比終三節。一如禮經。對越郊壇。有孚殷薦。春露秋霜。愾聞優見。雨暘風雪。時廬皇情。祈年望歲。迫於耕甿。農祥正中。除壇於藉。乃擇元辰。命我司稽。

土膏脈發。陽氣其蒸。法宮淳濯。玉輅斯行。一墾親耕。班三以徧。百禮具成。德輝顯見。音官省土。律應惟宮。太史占物。雲光兆豐。協氣潛滋。隰原霽潤。庶官庶士。舉手相慶。父老扶杖。衢歌巷舞。兒童婦女。爭相告語。我皇敬天。天自不違。我皇勤民。民長有依。厚德載物。奠茲九宇。解澤旁流。化爲甘雨。至仁普覆。如天斯穹。以鼓以盪。達爲和風。天視天聽。自我黎蒸。民志丕應。天休可徵。川嶽降神。陰膏應候。神倉充溢。陳因相覆。玉齋鬱鬯。明禋以升。上帝其饗。列祖時馨。近自郊圻。遠彌薄海。百穀順成。讌飮樂愷。自今伊始。耕九餘三。食時用禮。婦子其耽。百室皆盈。戶真可外。賜復賜醕。無勞賑貸。含哺鼓腹。樂我太平。無吝無呻。皇心載甯。

聖主臨雍禮成頌

乾隆三年

蓋聞孔子爲萬世帝王師。以能開萬世之屯蒙。而道濟天下也。自秦以後。一姓代興。規模草創。必先尊禮至聖。以繫天下之人心。繼世賢君。莫不臨雍講學。憲老乞言。蓋天下之民。知孔子之道。伸則萬事皆得其理。而太平之澤。將目見而身被之也。臣竊惟尊禮至聖之實。在信其言而行其道。孔子所以告君者。具在中庸問政之篇。我皇上御極以來。修德體道。於九經之宏綱。要指無一不實踐焉。故能以浹歲之間。使四海蒸黎。慕義懷仁之心。勃然而興起。蓋由聖資敦敏。好古典學。幾二十年。於孔子之道。求之切而信之深。故本於皇躬。達於政教者。如是其誠且篤也。用此質諸先師。實在天之靈。所深嘉而厚望者。豈特大昕鼓徵。爲園橋所觀聽哉。乾隆三年春朔後一日。皇帝躬詣太學。釋奠禮成。親講中庸之首章。堯典之首節。

蓋自遂古以來。盡性命之理。建中和之極。行於當時。而位天地育萬物者。功莫盛於堯。垂於萬世。而明大道彰至教者。德莫盛於孔子。是乃我皇上夙心所祈嚮。自志學之初。以及御天之日。戒慎奉持。惟恐有須臾之離。用以上格天心。而下通民志者。故嘉與天下臣民。會歸於有極也。茲與孔子所傳體達德。致達道。以行九經。而一本於誠者。實相表裏。臣伏念臨雍之禮。舊史所書。典文具備。辭人所述。體製各殊。炳炳乎無以尚矣。臣學蕪年耄。語不能文。謹據所見。數陳質言。特著其信而有徵者。頌曰。

昔在孔子。賢於堯舜。匪德能優。惟功之盛。堯仁如天。一世之垂。尼山木鐸。千秋金鏡。章一天祐下民。我皇篤生。夫子之道。逮我皇而大亨。至仁肫肫。學與性成。秉持六經。踐以躬行。章二智以成仁。善繼善述。大孝之光。

治殊道一。仁以生勇。心純事實。以道成身。久而不失。章三敬禮師傅。收恤耆儒。一言片善。采納無虛。若逢顏

孟。次或程朱。尊德樂道。當更何如。章四敦敍懿親。德心普被。盪滌宿愆。坦然無忌。羣公三事。凡百有位。推誠

備禮。豈惟祿賜。章五惠保蒸黎。予寒予饑。憂民如疾。愛之如私。德以撫順。信以招攜。窮荒僻徼。覆幬無遺。章六

九經三德。先師所傳。我皇得之。時乘御天。先師有志。皇實成焉。以考以質。宜無閒然。章七月吉辰良。皇親釋

奠。惟秉德馨。肅將嘉薦。先聖之揆。後聖時憲。精意所通。羹牆如見。章八聖言深閱。教思孔誠。四表上下。格以

欽明。中和之致。位育之徵。原於性命。戒懼所成。章九庶官庶士。敬而聽之。惟皇之極。卽自得師。是訓是行。先

師鑒茲。勉爲貞臣。毋負昌期。章十

喜雨說

雍正八年春三月時雨不降。僉曰：天胡不雨？我皇上施大德，諭有司。凡官吏負贓虧公帑，事在三年以前，發於八年二月，恩諭未頒之日者，具以聞。有說者與豁免，繼自今。官吏脫罔，反鄉里，與父母妻子相保聚者，無慮數千人。免徵比，恬然安其生業者，萬千家。承追之吏，不至愁居惕處，爲他人受罰。又詔近畿五百里內，旗丁私質所受官田於鄉民，而不能歸其故價者，官爲之償。懼罪者免於法，無田者復其業。歸田者懷其資，連鄉比戶，婦子懽呼。若沈疴之去其體，天胡不雨？夏四月，皇帝親卽齋宮祈請，未明而起。日一膳，士大夫相見，必色憂。余曰：無憂也。吾君憂民若此，天必順焉。旣而小雨時霑塗，望後十日，陰雲隆施，入夜密雨，連朝及暮，四野具足。旬未終，復大雨，浹旬又雨，衆相慶。余告之曰：一方之旱，憂之小者耳。一時之雨，喜之暫者耳。吾君閱雨，至日不再食。旣雨，會令節，吾儕小人，莫不招朋儔，爲一日之樂，而吾君不自暇逸。罷水嬉，日警庶官，釐百度，所以基命宥密，而爲四海臣民之慶者，視時雨之降，恩澤之施，尤大且遠矣。聞者皆心慚，則又告之曰：不雨而憂，雨而樂者，細民之情也。非士大夫之志事也。念吾君之閱雨，至於日不再食，則承事而牧民者，所以致其忠利當何如？念吾君治政勤民，不肯一日自暇逸，則人臣之夙夜匪懈，忘身忘家，而無懷安無賴寵也，當何如？此之謂事君之禮，志學之誠也。吾病且衰，無力之可輸，爲悚爲愧而已耳。惟衆君子交勉之，旣以語於人，因退而書之，以自警焉。

多福硯銘

我皇嗣服。治如砥平。皇有敷言。衆心載甯。訓迪有位。惟吁惟咨。勤思民隱。其寒其飢。一日二日。萬幾心營。手勅惟爾。必在側。皇斂多福。用敷錫於億兆羣生。而錫爾嘉名。天章奕奕。於萬斯年。爾終以無泐。

望溪先生文集卷十六

哀辭

徐詒孫哀辭

康熙辛未。余始至京師。卽與詒孫善。嘗怪其才足以立事。而於仕進泊如也。學足以立言。而於論述頽如也。聞與同舍夢中數悲嘯。或摽辟而呼。余驚起問故。則垂涕而不言。叩其鄉人。乃知其父惑於所嬖。母得心疾。每欲以義理廣之。語相近。輒以他說格余。癸酉冬。自京師歸其家。余始寓書。告以君子之遭變也。在審其身之所處。鯨之殞也。禹未嘗身殉於羽淵。而匡章之行。不見絕於孟子。況未至此極者乎。使徒若焦若熬。以喪其精爽。而於身之所處。或未盡焉。非君子之所尙也。戊寅冬十有一月。余客澄江。舍側有方池。夜夢詒孫赫然起自池中。面泥淖。瞪目無言。覺而心惡之。次年秋七月。歸金陵。得詒孫凶問。果以余見夢時死。詒孫之歸也。母癩益甚。父閉之。加束縛焉。詒孫日夜號泣而從。數歲亦得心疾。昏昏不辨人事。一夕自投門外小溪中。始詒孫去京師。余送之歧路。既與儕輩登車。復返下車。執余手而號慟曰。惟子知我。何當歸。吾與子得更相見足矣。其後詒孫一至金陵。余適在外。竟不得再見。余一子新殤。意殊不自得。及聞詒孫死。出門西鄉。號而哭之。不復覺子死之痛矣。詒孫姓徐氏。諱念祖。池州青陽人。年四十有四。內行

潔修文章冠郡邑。聞其死者。知與不知。皆爲流涕。其辭曰。
生常自懟兮。吾知子艱。死非其所兮。人終汝憐。仁孝之鬱兮。爲惑爲癡。孰使至此兮。彼蒼者天。

駙馬孫公哀辭

駙馬孫公諱承運。遼東人也。其先將軍思克。爲國扞城。顯功名於秦隴。康熙三十有五年。上親征厄魯特。噶爾丹三路並發。將軍以西師絕漠扼之。殲其魁。其部由是遂亡。駙馬爲童子時。召見卽許以尙主。駙馬生貴甚。而性樸厚。出於自然。瀋陽范恆庵。白山祁學圃。每道其爲人。曰。以不學爲恨。聞過而能改。未有如斯人者也。己亥孟夏。吾友左未生。自江東來。省余。會余將祇役塞上。恆庵言於駙馬。使延未生偕行。以便余。駙馬先就見。擇日以騎迎。使者曲跪將命。及門。主人先俟於門外。歷門階必揖。三讓升堂。使子某出拜。曰。孺子非能師先生也。吾少失學。欲先生講以所聞耳。駙馬以扈從先至上營。五月朔。未生繼至。越八日。忽輶車裝載過余。曰。駙馬遭厲疾。一夕死矣。因太息曰。吾固知斯人之不長也。臥一室。甯謐如儒生。每薄暮下直。雖甚憊。必手一卷。問難移時。室無聲色。狗馬珍異之觀。門無獻技請事之客。世胄中幾見此乎。駙馬年始三十。有一形貌偉然。其折節務學。蓋不甘以勳戚終。而將益振前人之功緒。故其卒也。未生恆庵。學圃。哀慟皆逾常。雖余亦不能自克也。其辭曰。

嗟蔓草之叢生兮。朝繩芟而夕滋。何芝蘭之旖旎兮。日數漑而猶萎。彼受氣之有厭兮。此剝喪其焉。懟軫。

予懷而不釋兮。予不自知其所爲。

劉北固哀辭

康熙四十七年秋七月。吾友北固歸自廣東。余與其弟古塘。溯江候於桐。過期不至。而得凶問。嗚呼。昔吾先人與劉氏世好。以行輩。北固尊於余。而與余爲兄弟交。北固生於桐。余生六合。繼而遷江甯。未相面也。而所學之趣同。稍長。朋試於有司。名必相次也。及遊四方。與士大夫往還。善於北固者。多余昵好。而嫉余者。間波及於北固。與北固居。或此唱而彼和。或辨論相持。雜以諂讓。而胸中所懷。無毫髮間隔。未嘗覺其爲兩人。北固終世爲羈於京師。而余往來流滯者亦十年。每愁思無聊。或中有所得。輒思見北固。計旬日中。必再三宿其寓齋。余疲疴困憊。恆先就寢。而使北固誦詩歌古文。臥而聽之。靜夜聲郎然。率以爲常。他時客異地。歸休於家。獨居私處。未嘗不念此樂也。北固體素強。邇年頓衰。余旣東歸。再書責之。恐其負夙志而羈死於遠方。北固感焉。其遊廣東。蓋將次第爲歸計。而謀所以終老者。乃不倏竟道卒。其喪之還。子選适與古塘往迎。余以故未得偕。欲哭於其殯之次。亦未得也。因爲文以據余悲。俾其子薦告以妥靈焉。其辭曰。

謂子之歸兮。終吾生以後先。痛一言之未接兮。遂閉影於重泉。宦與學其交悔兮。命奄忽而不延。吾語子非不早兮。胡因循而致然。

宣左人哀辭

左人與余生同郡。長而客遊同方。往還離合。踰二十年。而爲汎交。己丑庚寅閒。余頻至淮上。左人授徒邗江。道邗數與語。始異之。其家在龍山。吾邑山水奇勝處也。每語余居此之樂。而自恨近六十。猶栖栖於四方。余久寓金陵。亦倦遊思還故里。遂以辛卯正月至其家。左山右湖。泉壤如沐。畱連信宿。相期匝歲。定居於此。而是冬十月。以南山集牽連被逮。時左人適在金陵。急余難。與二三骨肉兄弟之友相後先。在諸君子不爲異。而余固未敢以望於左人也。壬辰夏。余繫刑部。左人忽入視。問何以來。則他無所爲。將歸。謂余曰。吾附人舟車不自由。以天之道。子無恙。尋當歸。吾終待子龍山之陽矣。及余邀寬法出獄。隸漢軍。欲附書報左人。而鄉人來言左人死矣。時康熙五十二年也。龍山地偏而俗淳。居者多壽考。左人父及伯叔父。皆八九十。左人貌魁然。其神凝然。人皆曰。當得大年。雖左人亦自謂然。而竟止於此。余與左人相識幾三十年。而不相知。相知踰年。而余及於難。又踰年。而左人死。雖欲與之異地相望。而久困窮。亦不可得。此恨有終極邪。辭曰。

嗟子精爽之炯然兮。今已陰爲野土。閉兩心之所期兮。永相望於終古。川原信美而可樂兮。生如避而死歸。解人世之糾纏兮。得甘寢其何悲。

武季子哀辭

康熙丙申夏。聞武君商平之喪。哭而爲墓表。將以歸其孤。冬十月。孤洙至京師。曰。家散矣。父母大父母諸兄七喪。蔑以葬。爲是以來。叩所學。則經書能背誦矣。授徒某家。冬春閒數至。假唐宋諸家古文自繕寫。首夏。余出塞。返役而洙死。已浹日矣。始商平有子三人。余皆見其孩提。以及成人。長子洛。爲邑諸生。卒年二十有四。次子某。年二十有一。將受室而卒。洙其季也。憶洙五六歲時。余過商平。常偕羣兒喧聒左右。少長抱書。從其父往來余家。及至京師。則幹軀偉然。余方欲迪之學行。以嗣其宗。而遽以羈死。有子始二歲。商平生故家。而窶艱迫阨。視細民有甚焉。又父母皆篤老。煩急。家事凌雜。米鹽無幾微。輒生瑕釁。然卒能約身隱情。以盡其恩。而不愆於義。余每歎其行之難也。而旣羸其躬。復札其後嗣。嗚呼。世將絕而後乃繁昌者。於古有之矣。其果能然也邪。洙卒於丁酉十月十日。年二十有一。藁葬京師郭東江甯義塚。余志歸其喪。事有待。先以鳴余哀。其辭曰。

嗟爾生兮。震愆。罹百憂兮。連延。蹇孤遊兮。局窄。命支離兮。爲鬼客。天屬盡兮。熒熒。羌地下兮。相從。江之干兮。淮之汭。繫先靈兮。日延企。魂朝發兮。暮可投。異生還兮。路阻修。孺子號兮。在室。永護呵兮。無失。

阮以南哀辭

始余兄弟應童子試。卽聞阮君以南名於閩巷間。及入庠序。與君後先。時相見稠人中。而未狎也。其後余遊燕齊。倦而歸。則先君子故交。零落幾盡。而新知中。惟阮先生汝咸。經過最密。叩之。則君之父也。君所居

近市曲巷小橋。逶迤而入。四面環陂塘。老屋數間。蔽翳於叢篁高柳中。入其門。如在山林之隩。方盛暑。風謾謾穿戶牖。坐有頃。必加衣。自仲夏入秋。日未旦。先君子卽披衣就阮先生。夜定然後歸。率以爲常。君率妻子力作。殺雞屠狗。具肴蔬。未嘗乏絕。阮先生旣歿。君於門側市藥。而授生徒於堂上。先君子旬月猶三數過君。余兄弟隨行。每至。君必散生徒。輟其所事。置酒酣嬉。終日而罷。由前之爲。君以樂其親也。由後之爲。則以便余兄弟之情。而不肯逆也。嗚呼。君可謂順於親而篤於友者矣。君旣免喪。時謂余。子知交在四方。朋儕多資子以餽其口。而獨遺余何也。時余私計先君子栖遲寡權。惟君居近而意愜。故獨難之。以滯君之行。及先君子歿。而余及於難。又踰年而君死。追念平生遊好。傾心向余。而余無纖毫之報者。莫如君。乃哭而爲文。以志余哀。君諱夢鯨。江甯人。卒於康熙某年。年五十有一。余聞其喪。次年之某月日也。其辭曰。

忠養不匱。心之競也。蹇以無年。亦其命也。重施而蔑以稱。獨余之病也。

李伯子哀辭

李習仁。字長人。吾友恕谷長子也。戊戌春。余命子道章就學於恕谷。歸言習仁耕且學。孝友信於其家。今年春。恕谷歸自江南。率習仁過余。俾受業。其承親事師交友。跬步皆在於禮。而行之甚安。白門翁止園見而嘆曰。子弟中未見如斯人者也。恕谷少游浙東西。樂江介土風。南中士人亦聞其風而慕之。故率習仁

往相宅。其乘車。習仁御騎。則執鞭以從。恕谷與諸公論學。左右其閒。南士皆傾心焉。恕谷以母老未能定遷。會其友內人南行。使習仁與妻附舟先之。至天津疾作。將暫反。比登車。曰。吾父志此久矣。疾當愈。何反爲。還舟。又數日。疾革。其妻出視。命之曰。勿泣。此外艙。汝不可久留。夜將半。氣絕。惟小童在側。時康熙辛丑八月望前一日也。昔明道程子誌其子邵公。謂賦生之類。雜糅者多。而精一者聞或值焉。則其數或不能長。夫自古聖賢之生。鮮不爲帝王公侯卿相澤流世嗣者。而程子之言若是。豈如衆人之激於所遇邪。蓋深觀遠化之消息。而有以窮其變也。余杪秋自塞上歸。聞吾友劉古塘長子。將冠而殤。南中子弟。無與比並者。慘慟未平。而習仁之訃繼至。嗚呼。以恕谷古塘之躬行。日暮途窮。而天奪其良子。以二子之資材閒值。而不能延其一日之生。此余所以易哀爲憂。而終之以懼也。習仁自成童有巨人之志。旣冠。立課程自檢。晝所爲。夕必籍之。卒年二十有四。妻宋氏。始有身。其辭曰。

嗟爾幼志。離羣匹兮。善承親心。嗣道術兮。晝耕夜誦。六藝畢兮。性栗而溫。儀有壹兮。檠檠南行。志決壯兮。知命不惑。死無恨兮。任道有徵。識祈嚮兮。斯人則亡。予復何望兮。

張彝歎哀辭

吾友張彝歎。名自超。高淳縣人。康熙五十七年。天子命公卿舉積學篤行之士。司空徐公以自超對。詔下江南守土吏。齎送赴闕。余私獨喜。計日以待其至。南中故人爭趣之。曰。子抑心自強。此行也。尙其慰方子。

之思。俄而傳遽至。則道卒矣。始自超以母老。高祖以下惟一。身而久無子。不敢仕進。癸未成進士。長洲韓公將以館職薦。踵門辭。需次當得縣令。不就。嘗遊金陵關中。白玫玉適至。介余請見。而彛歎難之。卽日駕而行。曰。吾鄉人也。而世有相慕用者。吾無死所矣。及余遭難。徐公出撫浙。而彛歎往爲義學師。余心詫焉。而未暇詰其所以然。其被徵也。天下士皆以多徐公。及道卒。又以咎公。而意其言之出於余。金陵翁止園聞而嘆曰。噫。咄哉。使彛歎爲浙行者我也。彛歎踰六十無子。而前卒之三月。妾楊氏有身。衆皆曰。是必生男。彛歎之生也。余旣譜其行。與崑繩言潔。古塘爲四君子傳。茲故不具。而獨最其死生離合之迹。以志余哀。其辭曰。

名之不可耀兮。惟子杜其幾。義之各有時兮。惟子識其宜。惟大專之繫物兮。數少全而多奇。守邱園以竟世兮。而卒死於爲羈。曰德人其必祀兮。亦豈余之所敢知。

王瑤峯哀辭

君諱宗華。字瑤峯。歙縣人。學儒。試輒擯。通醫方。恥以自名。年四十餘。以親老無養。授徒京師。康熙癸巳。余出刑部獄。供事內廷。吾母衰疾。而京師無良醫。當塗吳穎長曰。吾友王君通醫。匿而不試。吾今與子過之。旣相見。再拜致辭。許諾。君館內城。去余居十里。余繼遷海淀。愈遼遠。君市馬與主人要。曰。吾友母老疾。旬日中必再三往視。若難之。當辭去。主人重君。曲聽焉。每過余。或驟雨及之。淋漓徧體。其隆冬晨至。冰霜結

鬚眉面色異常。余對之慘動。心忡忡。君言笑晏然。恐余不自克也。每歲孟夏。余役塞上。迫冬始歸。倚君如兄弟。吾母疾作。聞君至。卽自寬。及將終。衆醫皆曰。可療。君獨曰。疾不可爲也。去年冬。君持所爲文及詩十數篇示余曰。視世士何如。余讀竟。太息謂曰。如君之方。苟試之。必大行。有餘資。歸而市田宅。事親從兄。以竟所學。當與古之人絜高下。子何恥於爲醫。君感焉。將散生徒。僦屋市藥。事未就而死。先卒之旬日。余夜歸。家人曰。王先生來。自言胸中如有物。遲子不出。暮而歸。余家僅一僕。方臥病。將俟其閒。使問君。而黃君際飛以書來。言君死矣。叩之。君疾作。卽歸自余家之夕也。嗚呼。君視吾母之疾猶母。而君疾余不視。君死余不知。聞君之喪。竟不得一昔之期。撫君之棺而哭也。余之恨於君者。有終極邪。君鄉人袁某。與際飛紀其喪。權厝某邱。而報君之兄弟。使來迎。際飛亦因穎長。而得交於君者。君卒於丁酉三月望後二日。年五十有二。無子。妻某氏。早卒。親老而余不能爲之謀。雖恨於君。莫可如何。其辭曰。子之旅兮。吾與子依。子之歸兮。吾爲子期。養則不遂兮。死而爲羈。絕天隔地兮。此志長費。懷文服義兮。蔽遇而不施。混俗自閉兮。行與心遠。靈魂營營兮。何去而之。意氣焄蒿兮。結我涕洟。乾坤莽蕩兮。惟余汝思。千秋萬歲兮。人當汝知。

和風翔哀辭

乾隆元年六月。天子命修三禮。以閣部之長董其成。而余亦濫廁焉。各舉所知。余言十有二人於鄂張二

相國翰林四人而外。固請而得之者。惟和生。生單門也。家世農田。生六七歲。父母求之不在側。迹之常疑。立村塾外。曰。吾甚慕諸童子。誦書者。以爲誑。試於塾師。則論孟已耳熟矣。少長。或聚徒古寺中。因請爲諸生。洒掃。衆食飲之。以受書。法公淵若。余故人也。雍正二年。余得假歸葬。公督學按部至江甯。叩吾廬。謀分校者。遂就見吾友古塘而請焉。試事畢。古塘謂余。吾得和風翔。此役不虛矣。越日來見。因勸生棄時文。篤志於諸經。而屬雲臺山人翁止園。以淬礪之。會山西梁君裕厚。欲重訂朱子儀禮經傳通解。挾其書至江南。與止園討論。借力於生者蓋半焉。生幼學書不能躬耕。而志在通經。業科舉者無所取之。親老家窶空。居常戚戚。及部檄至。聞之色喜。卷書裝歸。告其親曰。兒茲行。館餐於方氏。歲秩百金。半給家用。半市近宅之田。三年歸。可不耕而食。終吾生於聖籍矣。越日而疾作。逮余聞之。已踰月矣。急致參苓。道希將命至其家。生披衣而起曰。吾固知公之不能忘吾疾也。吾學當成。二親免寒饑。疾當愈。止園繼以醫至。和齊煮之。未熟而生死。余與生惟南歸時一相見。未嘗從余遊也。余年已逝。病日滋。諸經未竟之緒。將以屬焉。而今已矣。生諱風翔。字宇清。上元縣人。世居蔣山之陽。卒年三十有四。妻某氏。無子。辭曰。

嗟爾童年。趨獨異兮。勞辱苦辛。惟學之嗜兮。業將就而聞彰。儵賈志兮。衆萬叢生。惟天所眞兮。窮泉有知。毋悔毋憤兮。假而隸農。二親亦中棄兮。

康熙丙申六月十八日。余在熱河。夢僕王興至自京師。視其貌。聽其聲。皆不類。詰之。則自謂我某人也。再三云。覺而心動。又數日。家書至。興以是日死。興爲嫂張氏家僮。歲丁卯。從至余家。性愚蒙少慮。余嘗以事督責。退而大聲向其曹。訟言余過。將扶之。旣而舍之。因語家人。是與處困約。履顛沛。當無他腸。從余館某家。天久雨。以私錢市製履。甚自惜。俄而失之。數月。主人家僮某。著以出。余識之。命索取。復曰。彼不告而持去。若索之。彼何所施。面目甯已也。自余遭禍。奴僕皆散去。黠者盜財物。其尤無能者。雖勉相依。多桀驚。惟興執事如平時。今年春二月。余晨起。怪其面目異常。疑有疾。曰。無有也。越三日。其女音暴死。又兼旬。遂遇疾。興邇歲益昏憤。咫尺閒不辨人言語。作事多愼。余時忿。詈河閒王振聲。見而止。余曰。子毋然。彼受詈意。色循循。純實人也。余少戒而未能盡止。自其女之死。始決意不詈。而疾遽作。念興在余家三十年。衣食未嘗適口體。患難相依。其得免余詈者。僅四月餘耳。因爲哀辭。以志吾悔。其辭曰。

婢音哀辭

婢音。僕王興所生也。九歲人侍吾母。洒掃浣濯。如成人。稍長。於女事無不能。奉事八年。未嘗以微失致呵詰。其羣居。未嘗笑嬉。妄出一語。余蒙難。家人御吾母北上。音隨吾妹。日夕相扶持。或以事暫離。吾母輒問音兒安在。吾母臥疾踰年。危篤。且兩月。親者不敢去左右。爲糜粥。供水漿。治藥物。皆音任之。不失晷刻。余

家貧。冬無炭薪。音獨身居西偏空室中。夜四鼓臥。雞鳴而起。率以爲常。性剛明。容止儼恪。雖故家女子中寡有。余每心詫焉。乃竟以厲疾夭。年十有七。先數日。音晨入。短衣不蔽髀。爲市布以更之。未及試而歿。舉室惻傷。人如有所失焉。乃爲文以哀之。其辭曰。

惟茅葦之漫漫兮。芝孤生而易殘兮。石礦堅以磊磊兮。玉精融而多毀兮。非造物之無章兮。乃汝性之不祥兮。

祭文

祭顧書宣先生文

嗚呼。大雅蕪塞。不絕如線。公復云亡。來者何見。古惟哲人。以道相持。降而文學。猶其流支。陸相登韓。道光於唐。程張蘇曾。顯以歐陽。假無二公。二代曷述。羣賢繼武。茲塗無闕。余試禮部。實出公門。公嘉余文。或有違言。公謂斯文。惟某能然。所舉不遂。甘棄一官。旣發其覆。果匪異人。滿堂動容。僕隸同喧。與公朋齒。宿號知音。得以至公。兩無愧心。老親趣余。歸裝在途。公使來追。斬鞅道隅。余不反顧。懼公見督。公以書來。詞溫意渥。公尋使楚。命余速西。余時腹悲。冬以爲期。忽承凶問。帶經長號。絳轡帷荒。尋駐江皋。余入太學。公實朋試。公旣日顯。余每自避。辱公交余。惟恐不親。鈍直可貴。公知獨真。十年三接。違離日遠。誼重心勤。結懽則淺。公之詩篇。已足自壽。在公無悲。獨爲世疚。古稱善人。天地之紀。余所師友。蓋可屈指。大理質行。宛平高公

奇秩宗經術。長洲韓侃侃少宰。太原姜公輔守官不屈窮在下者。劉徐二生。言潔經明行修。吾道之楨。後先一紀。壯脰老終。匪余恩私。懼世替毀。楚山崩熒。邗水嗚咽。涕泣陳詞。肝腸斷絕。

祭張文端公文

嗚呼我公。爲國宗臣。終始一節。帝用忱恂。公如元氣。運物無迹。審機正軸。功無與匹。其志其事。異世可知。寸心耿耿。獨承恩私。余幼泥古。孤行自尙。病俗流從。誤矯以亢。伊余先世。與公有連。衆附恐後。余避不前。北試京兆。牒過禮部。公比羣士。謂宜獨步。凡在列者。湊公稱師。余獨自外。接以常儀。謂公余棄。公心以傾。始脫文貌。喻以平生。歲在協洽。蒼龍南御。公來長干。獲侍旅寓。謂國得賢。如室有木。子果能駕。吾推子轂。余謂公已。小人有母。衰疾相依。獨身無輔。公鑒其誠。悄然不怡。謂子固爾。我心則違。感公拳拳。中如有物。余豈能賢。公知恐辱。余籍春官。山顛與陳。陳成進士。實出公門。余旣南還。謁公里第。北面升堂。始正大義。公在林泉。聲聲翼翼。至忠體國。心懷宸極。私爲世喜。公志未衰。孰期踰歲。遂乘東維。公自禁密。經體贊元。明農待老人。無閒言於人。無愧在天。曲全先儒所稱。公實應焉。在公何悲。邦國之疢。況於知故。能無心劇。嗚呼哀哉。

祭王崑繩文

嗚呼。子生於天。余謂非偶。嗟同衆萬。視猶芻狗。子之心胸。函山振海。子之議論。風驚雷駭。豈惟在今。志亦

無古。英光浩氣。今歸何所。世士虛憍。外張中餒。古所云狂。子差可擬。少隨父兄。陸沈自喜。匿跡淮墳。行歌燕市。志以貧移。傾身菽水。外取所求。中以自鄙。顧視儕輩。如塵如稊。可者數士。謬及於余。未見而親。久益不疑。行身務學。以謀以咨。天與屯蹇。異徑同歸。夙心並負。次且路歧。丙戌之春。揖我長辭。二親邱首。惟吾所之。窮山絕壑。形駐影隨。雖子知我。跡亦難窺。解手三歲。別語依依。念子孤直。諒不余欺。乾坤浪莽。會面何時。忽叩吾廬。驚喜相顧。曰余迴車。將農將圃。聞子之鄉。巖深川互。我行我遊。子先我路。我耕我耘。子偕我作。我文我史。子訂我誤。高酣連旬。忘晨與暮。越歲爲期。並從所務。始春過余。杪秋復至。申固前期。志氣益厲。孰期分背。遂歸虛無。委衾旅舍。妻子莫扶。款款友生。視衿與襦。傲然乘化。其色于子。子少自則。管葛與衡。晚希顏孟。其志亦誠。行與心違。蹉跎竟老。遺書在篋。其半惟草。臨風灑泣。氣盡心孤。子止於此。況於吾徒。嗚呼哀哉尙饗。

祭滄洲陳公文

嘻乎陳公。履道方夷。命忽隕墜。斯人之悲。公材天植。遭遇亦奇。屢困而亨。終鬱不施。始令西安。繼調山陽。端緒已兆。所部稱良。及再作守。皆由特舉。義聲先路。戶歌衢舞。旬時風動。期月政成。嘉師怙恃。姦豪易行。公治一方。譽流千里。游談奮袂。心矜色喜。再忤大府。必擠之死。先皇鑒照。獄詞無浼。公之在理。士民洵洵。輟耕廢業。號泣而從。或奉壺殮。或持股脯。謂公良食。公無我苦。罷歸內殿。稽編文史。四海望公。如痿思起。

觀察霜昌。聖心復倚。天語親承。古賢是擬。河決武陟。害延近畿。千村流漂。漕轉不時。皇帝曰咨。汝子肱股。往巡往宣。遂攝大府。公入大府。百政皆清。蠹祛工實。賦役有憑。三舉監司。罔非民譽。父老泣言。自今保聚。惟嗣天子。大孝親賢。乃實授節。以肅政權。歲漕既畢。躬臨決河。相基命植。程工別科。告功有期。民勞其惕。孰謂公身。先與世棄。公之屢試。久者踰年。晚而大任。俾公獨肩。謂宜永年。以宏開濟。而功未成。歿猶賈志。邦國之瘁。黎蒸之窮。其在于公。高朗令終。衆心難壓。直節易虧。惟公炯炯。終始無疵。完公令名。闕世實用。彼蒼有知。能無悔慟。有心有耳。莫不惻傷。況於知舊。慙裂中腸。嗚呼哀哉。尙饗。

祭左未生文

余於故里。兄事者三。宋劉賈志。今君亦燿。始聞君行。矯亢異俗。及余得交。但見可欲。臭味之同。如流斯匯。憂思苦病。見君卽解。余出余歸。行蹤每合。惟宋與劉。未若君習。余之在難。君未及唁。誓言拳拳。生必再見。果踐前期。崎嶇自致。黃髮素髭。其容則悴。余出塞門。君亦繼至。積色灘聲。朝昏相慰。始秋南轅。迢迢燕市。經涉冬春。余行復啟。謂君趣駕。秋以爲期。孰知背而遂。至於斯。君計之至。君喪已歸。號痛窮天。膈臆敗摧。計數吾儕。動屯行蹇。惟君怡愉。履道坦坦。學同志同。命豈能懸。老而羈死。理亦宜然。死者之恨。生者之憂。泯矣終古。欲訴何由。嗚呼哀哉。尙饗。

祭白侯文

余聞君計往歲之秋。時在塞垣。心填百憂。盡室北徙。遭迴在途。沈疴疊嬰。顧影心孤。燕秦懸隔。莫通喪紀。欲寄一言。寸心難理。公私薄遽。以夕以晨。昏昏莫辨。經涉冬春。傳車祇役。夜宿遽廬。君來見夢。執手踟蹰。告余將歸。余不能止。相持驚寤。心怛不已。與君爲友。歲逾星紀。以古爲要。善終如始。君令於桐。余爲部人。義相然信。若弟與昆。吏疵民瘼。有言不違。行危語盡。君亦余規。余之在難。君未得面。傳君踰年。寢食惓惓。孰云交契。遂止於斯。絕天隔地。永無見期。聞君喪歸。已閉埏門。魂旣安宅。來存故人。君有悌弟。子姓皆良。成然首邱。順彼大常。我心之悲。惟君則喻。幽明殊路。終古誰訴。昧旦聯辭。晨告於野。明水瓣香。有淚如瀉。

與黃玉圃同祭尹少宰文

嗚呼。高山大原。聚日星河。嶽之氣以生良才。根株已中乎繩墨。棟梁可任。而雷火爲之災。是乃陰陽之錯行。實爲天地之大紆。嗚呼元孚。慨余暮年所得士友。信道篤而務仔肩名教者。子最淳誠。而交期則未久。子自中州入副臺長。始得相見。而踰年卽分手。余旣南還。子歸養母。歲時通書。惟禮經是叩。往歲仲秋。子持使節。盡屏儀從。徒步以相從。問何以然。則賢母遺命。必躬親杖履。若睢州之於夏峰。余愧非其人。辭未得致。已稽首而扶筇。再過吾廬。上下千載。始知古人之志事。已蟠結於子之心胸。茲孟秋望後。吾友玉圃。將以監司入覲。約汎舟於北湖。前期二日。薄暮來告。茲遊宜罷。博野遽殂。行者爲之心惻。而況於吾徒。降中庭而東面。三踊號而淚枯。亟相過以問故。則遭瘡寒之疾。以望前四日。按臨松泖。越翼日而含珠。玉圃

再起治在祥符。子爲大府。班隨旅見。栗階以趨。子獨加禮。釋辭自下。若後進之接師儒。二司心詫。動色睚盱。玉圃南移。子適視學三吳。會其以疾在告。就視臥榻。握手踟躕。感念往事。蒿目相對。竟夕而長吁。嗚呼元孚。子之當官。實心實政。所至而愛遺。子之在戚。居處飲食。一應於喪期。子之造士。閉邪養正。引洛闔之綱維。而常自慙碌碌。無一事能踐高賢烈士之迹。使尙論者千載而有餘思。余謂世有斯人。天或將降以大任。但恐歲不吾與。不獲親見其功施。孰知乃先得子之凶問。臨風而涕洟。余困衰疾。玉圃事羈。弔唁弗躬。嗚咽馳辭。豈惟吾儕之私義。實爲斯民斯道重此憂悲。子宜知之。嗚呼哀哉尙饗。

祭張母吳夫人文

嗚呼。夫人之年七十有一。又得良子以養生送死。抑又何悲。而余聞夫人之凶問。不覺彙欷而嗚咽者。蓋爲其子自超痛也。今年春。自超成進士。或欲薦以館職。自超曰。某之舉於鄉也。吾母愀然曰。汝無所用此。吾第欲汝得妾以子。而常在吾側耳。自超歸而從命焉。而妾入室之夕。夫人以卒。嗚呼。世俗之人。願其子舉甲乙。歷科第。而死不恨者衆矣。而天漫以畀自超。有子以繼世。匹夫匹婦之常也。而於自超難之。自超終當有子。而獨不得早歲月。以傷其垂死之母之心。嗚呼。禹之仁孝也。而痛之以羽淵。周公之弟也。而阨之以管蔡。以至君臣夫婦朋友之間。其賢者不必相遇。而不賢者巧作之合。以生惡故。先兄有言。乾坤之闢。始於屯。而終於未濟。蓋天地之氣有盈竭。數有純奇。物生所值。雖造物者亦不可如何也。嗚呼。爲父母

而得見其子之成立者寡矣。見其成立。而子於兄弟夫婦子姓之間。苟有恨焉。則無物足以解其憂。而致孝與敬。適足爲親心之累。故余不獨爲自超痛。又以爲凡爲父母與爲子者痛也。因書之以馳奠焉。

望溪先生文集卷十七

家訓

己亥四月示道希兄弟

禮有百世不遷之宗。以收族也。有五世則遷之宗。親者屬也。遭家震愆。今在金陵者。獨先君逸巢公後耳。詩人之述古公者曰。緜緜瓜瓞。民之初生。言將絕而復屬也。故繼逸巢公者。於桐爲小宗。而在金陵則世爲大宗。宗子非有大過不廢。廢則以子承。無子。支子以序承。雖有貴者。別爲小宗。不得主祭。自逸巢公以上。祖之宜世祀者五。始遷於桐者曰德益公。建文朝死節配享正學先生祠者曰斷事公。德重於鄉者曰東谷公。起家爲大夫者曰太僕公。始遷金陵者曰副使公。餘親盡則祧。

古者大功同財異宮。不異宮。不能各致養於其親。不同財。則戚屬而飢寒之不恤矣。桐俗。子壯則出分。先君始命余兄弟循禮經。憶亡妻與嫂有違言。先兄命之曰。汝輩日十反脣。披髮搏膺無害。但欲吾兄弟分居異財。終不可得耳。兄子道希幼羸。每疾亡弟椒塗。中夜抱持。圈豚行。弟早夭。兄常曰。吾更生子。當以道希嗣。是弟所嘗抱持也。今道希爲宗子。以其弟道永嗣。余兄弟三人。兄子二人。一嗣椒塗。余一子道章。亦相與爲三人。道章之生也。後先兄之卒。凡五月。先兄猶及知其孕也。每曰。異日汝子與吾子。相視如同生。

道章生年十一。以余罪繫旗籍。與道希道永不能生相養。其服之相爲宜。從期退之不云乎。受命於元兄。此可以義起也。

大功以上同財同居則共祀祖禰。異居皆祭於繼祖適子之家。適子雖貧。宅左右必別爲三室。中室爲龕。四級奠高曾祖禰木主。歲二禴。卽從俗用清明孟秋之望。先期散齋二日。致齋一日。主祭者齋於西翼室。兄弟子姓各齋於外寢。生辰忌日奉主特祀於東翼室。考妣之忌。齋期如二禴。生辰散齋。致齋各一日。祖考妣之忌如之。生辰齋一日。高曾祖妣伯叔兄弟之忌如之。妻兄弟子婦各祭於其寢。妻長子忌日齋。冬至祭於宗室。上及不祧之祖。宗子散齋三日。致齋二日。羣子姓如二禴。共大宗者歲一合食。共高祖者再。共曾祖者三。凡合食必於宗祠。副使公始至金陵。居由正街。後遷土街。舊宅轉六姓。逾五十年。康熙乙酉。余始復先人居。而治其西偏舊圃爲將園。先君時燕息焉。辛卯遭難。宅仍他屬。園亦出賃。道希兄弟異日必復之爲宗祠。今於土街宅後。暫治三室如前法。

小功異財。勢不能同也。家之乖恆起於婦人。米鹽凌雜。子女僕婢。往來讒訴。易至勃谿。雖期之兄弟不可保。況小功以下乎。聖人制法以民。非賢者所宜自處也。往時清澗白玫玉過余。其兄子仲傑侍。近五十成進士矣。斂約如成童。叩之高曾以下同居者五世。子婦無異衣食。雖蓄私財。無所用之。玫玉之兄。吾邑宰也。而治家司財幣者。則玫玉之妻。其妾與子婦。弗之詫也。蓋禮教之能移人若此。此非並世之人乎。小子

識之。

古之祭者。前期必齋。喪必異居。食祭不齋。無以交於神明。喪不異居。食則衰麻哭泣。皆作僞於其親。先王制喪。食於老者疾者。既葬而後。猶有寬假焉。而復寢之期。則斷不可易。蓋人之情。食梁肉而悽然念所親者有之矣。御內而不忘哀。未之有也。在禮。期終喪不御於內者。祖父母之外。惟妻而餘。皆止於三月。非厚於妻而薄伯叔兄弟也。先王立中制節。故法必計其所窮。妻一而已。假而本支繁衍。死喪相繼。皆終期不御於內。則人道爲之曠絕矣。故稍寬之。使中人可守。非謂寡兄弟者。必不可節欲以伸其恩也。記曰。齊衰期者。大功布衰九月者。皆三月不御於內。用此推之。則正服大功。以浹月爲期。小功緦麻。終月可也。其始婚。則小功以卒哭之後爲期。禮文具矣。余過時不娶。妻之父母趣之。時弟椒塗卒。始七閱月。余入室而異寢者旬餘。族姻大駭。物議紛然。遂廢禮而成婚。至今恨之。茲爲家則。食飲衰服。或因事而權其宜。惟御內之期。自緦麻以上。必以所推爲斷。夫舅與甥。恩之最輕者也。然女兄弟方痛不欲生。苟有人心者。能卽安于燕寢乎。大功以上。則視骨肉之衆寡而加降焉。記曰。小功皆在他邦。加一等。不及知父母與兄弟居。加一等。此先王稱物之情。而使之自厚於人道者也。齋期已前。具民無恆產。財匱而事劇。不能壹稟古制也。凡恩之賊。多由婦人。志不相得。禮之敗。多由與私親。男子時相見。聞之長老。桐俗淳厚。時家僕終世給事。未嘗見主母。近則稍有連者。皆以相見爲渥洽。金陵亦然。吾母疾篤。天子加恩賜醫。醫者曰。定法必視面。

按脈乃復命。余白之母曰：我雖老婦人也，可使醫者面乎？余曰：君命也。母閉目命奪帷，顏變者久之。既而曰：雖聖恩高厚，然繼自今，勿更使吾疾上聞矣。今與子姓約，凡來婦者，父母歿不得歸甯，非遠道還母家，毋過信宿。其親伯叔父同父兄弟，兄弟之子，至吾家相見於堂，食飲於外。從兄弟，母之兄弟，相見於外。嫂叔禮見，惟吉凶大節同室相糾察，有失則者，男婦不得與於祭。

兄弟宗族之相疾，近起於各私其妻子，遠則貧富貴賤之相耀也。吾幼時聞之父祖，上祖有官御史者，巡按江西道桐歸祭於宗祠，自監司以下皆來賓。主祭者侍御之從兄也，爲庶人不得服輿馬。侍御以驥從，僕隸擇駿者乘侍御，軼而先急下，拱立道左。及祭畢，從兄西向立，命取杖，衆皆進曰：吉禮成，執事者有不共，願以異日治之。曰：過由執事者，則舍之矣。侍御遂自弛冠服，伏地受杖。杖已，曰：吾不予杖，是使汝負詬於鄉鄰也。且汝惟心懈故至此，汝持使節，一路數千里待命馬，而心常外馳，能無誤人身家事乎？侍御怡色受教，冠服禮賓，兄弟各盡懽，嗚呼！此吾宗所以勃興也。近世骨肉恩薄，其賢者乃以文貌相屬，而汎汎然如途人，盛衰之本爲子孫者，可以鑒矣。

楊樹灣高莊，東谷公遺田，太僕公所受分也。五傳至余兄弟，以遠家金陵，艱輸運，棄其十之六。惟主莊尚存，余丁亥歸故鄉，見其基勢爽塏，繞宅喬木，尙七十餘株。老僕曰：此東谷太僕所嘗棲止也。因復其半，今並以爲祭田，未復者當次第復之，以歲入十之二供祀事，餘給子孫，之不能嫁娶葬埋，及孤嫠老疾者，其

法一取之吳郡范氏。不謂之義田者。徒爲吾兄弟之子孫計耳。非能如古人之收族也。每見士大夫家累巨萬。不聞置義田。卽祭田亦僅有而少豐焉。俄而其子孫已無一壠之植矣。范文正公父子置義田三千畝。以贍族人。而子孫享其利者六七百年。以至於今。昔太僕公分田之籍。手記曰。吾增置田三百五十畝。囊中白金千有七百。此非吾官中物也。乃朋友餽遺。汝母勤儉而致之。太僕公仕宦四十年。當明神宗朝。巡按者三。掌河南道時。兼攝七道御史事。所積僅如此。嗚呼。父有田宅以遺其子。乃汲汲然自明。惟恐子之意其得於官而心鄙之也。上之教。下之俗。所以相摩而致此者。豈一朝一夕之故哉。茲田之在吾家。亦近二百年矣。然則欲子孫長保其田宅。亦非德與禮莫能持也。

副使公葬繁昌縣西門外楓樹嶺。去桐與金陵各三百里。而近。余鄉欲與其地士大夫聯婚媾。以便祭掃。而不得也。墓旁有祭田。未籍分產。四叔父楓麓收其人。播遷之後。諸弟貧乏。必將斥賣。道希兄弟當勉力以原價歸諸從父。而勒石永爲祭田。先君受分。多取瘠產。庶祖母王孺人膳田。本議身後均分。後獨以歸四叔父楓嶺。祭田不問其歲入。汝輩當體祖父之志。勿謂此公產。不肯以價取。而致屬他姓也。

陳莊胡莊及高淳租。每歲終通計而三分之。以其一給道章於北。非敢棄先兄之命也。分隔異地。慮子孫或有不肖。而大爲之防也。昔聖人之制男女之禮也。皆以禽獸爲防。而兄弟同財異財。亦以中人爲準。蓋計其所窮。使不肖者可守耳。弟椒塗之歿也。未娶。兄泣曰。吾弟兄三人。當共一邱。不得以妻耐。兄疾革。嫂

與道希環而泣之。兄屢斥去。正命之夕。惟余在側。未嘗以道希道永屬。吾兄弟篤愛如此。子孫其式之。

甲辰示道希兄弟

己亥歲。議以道永嗣弟林。林嗣伯父履開公。先兄之爲宗子也。先祖命之矣。道希之爲宗子也。先君知之矣。若以林嗣履開公。則林及道永當相承爲宗子。先祖之所未命。先君之所不知。非後之人所敢議也。今第以道永嗣林。履開公則置墓田。三支子孫。世祀勿替。而耐食於祖。

吳郡范氏義田。計口授糧。俾愚者怠於作業。非義也。五材百物。民皆用之。必各有職業。交能易作。然後其享之也安。無故而坐收其利者。天所禍也。且勢不能周。吾家祭田。營宅兆。供歲祀。有餘。量給不能喪葬者。有餘。以振鰥寡孤獨廢疾。不能自存者。有餘。以助貧不能受學者。有餘。春糶而秋糴之。累其貲以廣祭田。其怠於作業而貧窶者。不得告貸。己亥四月。諭以高莊爲祭田。因司諭公久葬故鄉。雖以陰流入墓起攢。仍當卜兆於桐耳。今奉柩至金陵。則高曾祖考。無一葬故鄉者矣。高淳二百畝。乃我二十年傭筆墨。執友張彝歎爲購置者。惟用爲祭田。於義爲安。一水可通。子孫歲收穫。可近就繁昌。展副使公墓。將爲記。勒石台拱岡。兼注縣冊。俾世守之。不得私標棄。

自副使公以下。道希爲宗子。凡出自副使公者。宜宗之。而從祖父查林府君。從父楓麓府君。返故鄉。吉凶赴告。不得以時通。今定居金陵者。惟先君之子。姓耳。道希之世嗣。當爲百世不遷之宗。雖有異爵者。祇事

焉。自先兄與余無私財。道希道永。道章亦式焉。雖五世十世可也。然先兄早世。吾質行不若古人。安能必子孫常守家則乎。先兄命道希道永與道章兄弟相視如同生。今道希道永有子皆早殤。惟道章一子始孩。異時與羣從相視。如大功之兄弟。不得析居異財。後此則仍禮經聽其大功同財。而以親者相屬。

金陵上田十畝。一夫率家衆力耕。豐年穫稻不過三十餘石。主人得半。乾暴減十二。米之得六石餘。以給下隸之食與衣。不贍也。程子曰。吾輩暨妻子僮僕。皆不耕而食。不織而衣。更不治經謀道。則爲世大蠹。可不畏哉。計中人之家。主人一身調度。必殫上農夫五家之力。妻子一人所費。役三家。僕婢半之。吾家親屬及僕婢。近四十人。常役上農夫百家。終歲勤動。以相奉給。果何德以堪之。今與汝輩約。僕婢惟老而無歸者勿遣。傭者散之。少壯各任以事。能則畱。不則縱舍。俾自食其力。

古無奴婢。事父兄者。子弟也。事舅姑者。子婦也。事長官者。屬吏也。惟盜賊之子女。乃爲罪隸。而役於官。九職臣妾聚斂。疏財質人。掌人民之質劑。蓋士大夫之家。始有之。如後世官賜奴婢。亦以罪沒耳。戰國秦漢以後。平民始得相買爲奴。然寒素儒生。必父母篤老。子婦多事。然後傭僕賃嫗。以助奉養。金陵之俗。中家以上。婦不主中饋。事舅姑。而飲食必鑿。燕遊惟便。縫紉補綴。皆取辦於工。仍坐役僕婦及婢女數人。少者亦一二人。婦安焉。子順焉。蓋以母之道奉其妻。而有過矣。余每見農家婦耕耘樵蘇。佐男子力作。時雨降。

脫履就功。形骸若鳥獸然。遭亂離焚剽。則常泰然無虞。蓋其色不足貪也。家無積貨可羨也。雖盜賊奸兇。不能不畱農夫野婦。耕織以供戰士。而劫辱繫虜。斬刈無遺者。則皆通都大邑。縉紳富室之子女也。人事之感召。天道之乘除。蓋有確然而不可易者矣。吾家寒素。敝衣粗食。頗能外內共之。而婦人必求婢女。猶染金陵積習。吾甚懼焉。道希兄弟。其與二三婦共勉之。恐余不垂而言之也。

憶昔姻家有婦惰姑嚴。而不相中者。其子頗是其婦。母患之。語余曰。吾兒所憚者子也。子爲我訓之。翼日。余至其家。子婦敬聽。告之曰。凡爲人子。曠其妻而不責。以事父母。是以娼女待其妻也。世有與娼女交。而望其孝於吾父母者乎。凡爲人婦。睚其夫而不順於舅姑。是以估客待其夫也。世有與娼女交。而致孝於估客之父母者乎。歸至家。姑姊妹皆責余曰。不畏其深怨乎。余曰。彼深怨。則心已爲之動矣。編於家訓。子將娶。則審以喻之。

古者自王后以及列士之妻。皆躬織紵。而庶人以下。則衣其夫。王后之禮職。女史糾之。而監以王之師傅。民家之女功。鄴長稽之。而達於鄉塗之長。一日廢其職。怠其事。則過愆集之。如是。則貴者安得恣睢。以適己。賤者尙敢勃谿於舅姑之側乎。今之士。古之庶人也。繼自今。凡來婦者。縱不能衣其夫。衣裳必自製。以屬工人者。值勿給。

先兄之命曰。弟林。旣冠未娶。而夭。吾與汝生常違離。異日三人必共一邱。康熙辛巳。葬兄於泉井。以弟從。

自余遭禍北徙。道希危疾。連年累歲。術者曰。此陰流入墓之效也。余始不信。忽夢兄臨大淵。躍入自沈。通書南中。命道希啓墓。鑿土三尺見水。乃起柩權厝。以待卜兆。古者邦墓有定所。民以族葬有定位。自形家之說興。而其術頗有奇中者。何也。管子地員篇。凡泉之淺深。可按視所見之土以測之。豈中原土厚水深。司空之法未亡。相民宅者。皆能脈土以定兆域。而未可以例山澤沮洳之地與。吾友李君岱雲。黃君退谷。劉君梧岡。儒者也。而篤信形家之術。謂穴有暈。下三棺。則暈破而水入。余迫於公程。行有日矣。道希兄弟。若懲前事而畏形家言。則兄與弟共塚。而余他日別葬於義亦可。但毋與婦人合。以墮先兄之命。

古者命士以上。祿皆足以仁其族。故晏子相齊。三黨及國之賢士。皆取給焉。後世祿薄。仕者無義取之財。吾先人雖宦族。而故鄉遺田。皆上祖力耕而致之。金陵之俗。婦人多外夫家。內父母家。耗貲產於私親。而子孫無一椽之庇者。踵相接也。子欲順於母而不恤母族。非義所安。然必身所自致。然後得專。以上祖之所遺。兄弟子姓之所賴。而偏厚焉。家之睽必自此始。其有喪葬不舉。急難無告者。竭妻子之私財以佐之。無有則與兄弟審度而助之。妻之族亦如之。

婦人之性。鮮知大義。兄弟同財。則怠於家事。委積蓋藏。坐視耗蠹。甚者爭爲侈靡。吾子孫之以大功同財者。苟不能同爨。則均其歲入。而各私爲奉養。豐年存十之二。儉歲十一。公貯之以備喪葬婚嫁。猶愈於離居析產。不肖者甘蕩棄。而兄弟不得問也。吁。薄矣。清澗白氏。四世同爨。婦人服用有經。雖母家送嫁服物。

亦貯公所。繁昌徐季子同產五人。兄弟有子二十餘。季子年二十二。喪妻及子。遂鰥居治家事。兄弟之子。耕者賈者。授徒客遊者。絲粟不入私室。男女少長近百人。無違言。余杪秋遇其兄之子於魯港。具言如此。然則子弟有不可教者。父兄其省諸。婦人有不可化者。男子其省諸。

己酉四月又示道希

示道希。旬月以來。我胸氣結塞。如有物。食飲日衰。左股蹙縮。蓋痛受命於兄。垂老而棄之也。痛道永不能以義懸衡。汝惑焉。我爲大親而不能正也。三叔父之沒也。汝泣曰。吾三人生常違離。弟中道夭。吾與若送死皆有恨。弟未娶。無子女以寄吾愛。異日吾兄弟當同邱。不得以妻祔。遂以告於大父大母及汝母叔母蔡氏。以爲成命。是約也。豈惟億叔父之靈。亦陰以釋大父大母之隱痛也。汝父及叔父合葬。二十餘年矣。非以陰流入墓而起厝。汝兄弟能發掘而以母祔乎。大父大母之終。第知叔父與汝父之魂魄相依。而不知其終判也。百歲之後。歸于其室。尤婦人所切心。而卜兆泉井時。汝母無幾微見於顏面。是心知汝父之義。而欲成其美也。汝母之終也。汝父起厝復數年矣。亦嘗教汝兄弟。備父之命而以己祔乎。今而違焉。豈惟戕父之心。抑亦毀母之義矣。昔朱子斷漢議。以爲試坐仁宗及濮王於此。則決知其不可。緣衆人以死後爲無知。故惑亂耳。試立汝父於此。見汝兄弟違命。而遂非痛疾將何如。孔子曰。汝安則爲之。我衰疾隔遠。生世幾何。不復贅語矣。

道希得札。依古族葬。而少變。以從宜。卜兆蔣甸。司諱公居中。先兄亡。弟同穴居右。先嫂亡。妻同穴居左。故存此札。以志其不違父命。由篤信予言。且以解。

戚友之感
也。自記。

壬子七月示道希

來札稱鮑甥孔學及汝女壻吳生元定。光生大椿。學誦益專。以愨。乞言以進之。夫學非專且愨之難。貴先定所祈嚮耳。己卯之冬。余信宿河閒。令孫岷山署中。值迎春。部民效伎於庭。植雙竿。繫索而橫之。有女子年可十四五。緣竿而升。徐步索上。舞且歌。不側不墜。俄設重案。臥而仰其足。衆舁五鈞之甕。以足承轉。而運之如丸。良久然後衆擊而下。觀者皆色然駭。而雜以譁笑。余獨閔且懼焉。夫索橫於空。猿狙之所不能履也。五鈞之甕。壯夫所難負戴。而弱女以足盤之。蓋利重精而竭其心。與力以馴致焉耳。不重可閔乎。君子之學。所以復其性也。三才萬物之理。生而備之。而古聖賢人所以致知力行。以盡其性者。具在遺經。循而達之。其知與力可以無所不極。然其事不越人倫日用之常。非若橫索而履之。與以足運甕於高空之危且艱也。而有志於斯者。則鮮焉。蓋謂是非有利於己之私。而無可歆羨焉耳。故學誦之專且愨。有以爲名與利之階者矣。有思以文采表見於後世者矣。又其上則欲粗有所立。資以稍檢其身。而備世之用焉。又其上則務復其性者是也。三生者。吾何以進之哉。達吾言而使自審處焉可矣。

家傳誌表哀辭

大父馬溪府君墓誌銘

苞先世家桐城。明季曾大父副使公。以避寇亂之秣陵。遂定居焉。吾父出贅。畱滯棠邑。凡十年。苞生六年。大父司訓於蕪湖。吾父始歸秣陵舊居。計此生惟大父承公事。至秣陵。苞應試皖桐道蕪湖。得暫相依。其時可稽日可數也。江南土薄。葬非其地。水蟻必宅焉。故高祖太僕公家桐城。越十餘年而葬秣陵。曾大父家秣陵。越數十年而葬繁昌。大父之終也。吾父及叔父御柩歸桐城。以大母權厝秣陵。數十年而未得葬也。及遭宗禍。近支皆北徙。諸弟倉卒葬大父及叔父母於所居之梁莊。已十年。而術者曰。陰流入壙矣。禍猶未已。啓之信然。復出而攢焉。今天子嗣位。布大德。赦吾宗還鄉里。苞蒙恩給假歸葬父母。復奉大父柩自桐城來秣陵。痛少時以家貧迫生計。未得時依大父。及冠後。從錢飲光杜于皇蒼。略諸先輩遊。始知大父文學爲同時。江介諸公所重。大父官蕪湖。兄舟實從。凡七年。每語余曰。大父之仁也。曾王父未葬。一飯不忘。春秋時享。及令節良辰。未嘗不嘯晞終日。嗚呼。大父之葬。未卜何期。而苞自忖。則生世無幾時矣。乃略敘改葬之由。以付兄子道希。而待事焉。大父處境順。無由爲卓絕之行。而官甚微。士皆務科舉之學。教之所及亦淺。故不敢漫述。惟自痛咎愆之積而已。大父諱幟。字漢樹。號馬溪。年十一入安慶府學。以歲貢生爲蕪湖縣學訓導。遷興化縣學教諭。告歸。卒於蕪湖。時康熙丁卯七月也。年七十有三。大母吳孺人。早世。葬江甯縣南周村。穴甚狹。不容合葬。子三人。長伯父諱綏遠。次吾父諱仲舒。次叔父諱珠鱗。庶祖母王氏出也。女七人。皆適士族。以某年某月某日葬於某鄉某原。銘曰。

營之艱。宅之甯。以庇我後生。

台拱岡墓碣

先考妣既卜葬於台拱岡之七年。不肖子苞始得請假歸視窆。雍正二年五月望前二日。至自京師。郊宿越翼日丙辰。展墓卜日。得六月丁酉。穿穴視燥溼。始反土而定封焉。嗚呼。昔我先妣姚孺人早亡。吾父更出贅。時外祖官罷客死。家貧。內御者一人。老不任事。吾母縫紉浣濯。洒掃烹爨。日不暇給。吾兄弟疾病啼號。則吾父保抱攜持焉。五歲課章句。稍長。治經書古文。吾父口授指畫焉。其後自棠邑遷金陵。益窶艱。己巳庚午閒。日食始能再。而弟林死。苞與兄舟客燕齊。歷歲移時。不得一歸省。歸則計日以行。至庚辰。誓不更違二親遠遊。而逾年兄又死。每當弟與兄忌日生辰。及春秋伏臘令節。吾母先期意色慘沮。背人掩涕。過旬猶不能平。吾父則召親賓。劇飲號呶以自混。或遊郊野。沈暝然後歸。自苞省人事。未嘗見吾父母有一日之安也。吾父之歿也。宅兆未營。而不肖子以南山集牽連赴詔獄。會宗禍。有司奏宜族誅。聖祖仁皇帝哀矜。並免罪隸旗伍。而命苞給事內廷。戚友御吾母以北。衰病纏連。不肖子服公事。晨入夜歸。又自首夏至杪秋。必祇役塞上。不得在視起居寒燠。吾母之歿也。會返役得視含斂。而喪南還。附漕船。不獲躬扶柩至潞河。以人事之常計。此生不得復見先人之塋墓矣。故據戴記境外不俟之禮。使兄子道希道永奉大父母柩。以戊戌二月壬寅。葬於南鄙石嘴之台拱岡。如天之福。今皇帝嗣位。推廣先帝遺德。恩詔特

原牽連入旗者。赦歸鄉里。吾祖宗塋墓有主。而不肖子得視窀穸。負土以終事。且承聖制。謂以苞故而宥及全宗。吾父母而有知也。其戴聖主無涯之德。而爲不肖子悲喜當何如。故敬告以妥靈。且碣於原。俾世子孫。知謹身寡過。爲匹夫而常守塋墓之難也。吾父生平。宋潛虛既論次爲家傳。吾母之喪。故江甯太守長沙陳公鵬年。適在京師。豫爲銘幽之文。其言視不肖子苞爲可徵信於後世。故弗更著焉。先考字南董。號逸巢。生於明崇禎十一年十一月十六日寅時。卒於大清康熙四十六年十月初四日亥時。先妣姓吳氏。知同光二州。同知紹興府事。諱勉長女。生於崇禎十五年正月十五日子時。卒於康熙五十四年十二月初九日午時。子三人。女五人。伯氏仲氏。姚孺人出。姚孺人從葬祖姑趙恭人墓側。距今七十有五年矣。不敢遷祔新阡。懼魄體之動也。七月朔後五日。男苞述。

先母行略

吾母姓吳氏。先世莆田人。後遷京師。外祖諱勉。爲名諸生。貢成均。知同光二州。同知紹興府事。以直節忤其地權貴人罷官。流轉江淮間。於吾宗老塗山所。見先君子詩。因女焉。吾母生而靜正。誠意盎然。終身無疾言遽色。五六歲時。外祖每曰。吾宗衰。此女乃不爲男兒。遇經史中女事。必爲講說。及歸先君子。不及事姑。或語及先王母。輒哽咽欲淚。前母姚孺人遺女二。次姊少桀傲。母响濡久而悔悟。勉爲孝敬。先君子中歲尤窮空。母生苞兄弟。及女兄弟凡六人。一婢老不任事。縫紉浣濯。洒掃炊汲。皆身執之。方冬時。僅敝絮

一食有覆而無薦。旬月中不再食者屢焉。而先君子喜交游。江介耆舊。過從無虛日。必具肴蔬。淹留竟日。母嘗疽發於背。猶勉強供事。十餘年無晷刻休暇。而先君子性嚴毅。絲粟不治。客退必詰責。不少寬假。母益篤謹。無幾微見於顏面。及先君子將終。惻然曰。與若共事五十年。若於我毫髮無愧也。母性孝慈。而外祖父母及舅氏皆客死。繼而吾弟早夭。兄及姊適馮氏者。復中道夭。默默銜悲憂。遂成心疾。六十後患此。幾二十年。每作晝夜語不休。然皆幼所聞古嘉言懿行。及侍父母時事。無涉鄙倍者。臥疾逾年。轉側痛苦。見者心惻。而母恬然。時微呻。未嘗呼天及父母。既彌留。苞及小妹在側。無戚容悲言。恐傷不肖子之心也。生平未嘗一語詈僕婢。而能使愛畏。不敢設欺誑。卒之後。內御者老幼悲啼。過於子姓。不可曲止焉。男苞泣血述。

沈氏姑生壙銘

姑次居六。繼室於沈氏。嫁愆期。年二十有六矣。夫故失愛於父。常孤行遠遊。姑年三十有一而夫死。無何。舅亦死。羣叔離異。獨挈幼女及前姊之子以居。子將冠又死。而女贅陶氏子良。遂依焉。先君子於諸姑。貧者月有餼。而姑未嘗言貧。被服必潔以完。苞客遊。家居日稀。曾不知姑之艱也。姑老矣。偶祖內襦。補綴無閒。咫攝者。因泫然曰。此未足言也。吾始寡。沈氏以爲贅疣。居荒園。日夕搨野蔬。聚落葉而炊之。每陰雨則持二孤以泣。時汝祖老。汝父貧多累。故不敢告。以重父兄憂。至於今。於吾爲寬矣。苞自僊遊歸。喪葬婚嫁。

無虛歲。又女兄弟五人，皆貧不能自存。雖知姑之艱，未暇爲謀。常私自付，以爲生養死藏。吾終當任之，而今無望矣。苞難後，姑見家人必號痛。今年春以書來曰：「吾居世幾何，將寤於夫之兆。姪銘之及吾之見也，先君子女兄弟凡十人，今其存者惟姑與小姑耳。姑年七十餘，苞淹恤無期，而今乃誌姑之生壙，尙何以舉其辭邪？」姑之夫諱某，武舉人，其卒也。距今康熙己亥，四十有一年。墓在江甯縣某鄉某原。銘曰：「罄終世婦事，畢百歲之後歸其室。」

兄百川墓誌銘

兄諱舟，字百川，性倜儻，好讀書，而不樂爲章句文字之業。八九歲，誦左氏太史公書。遇兵事，輒集錄置衿衣中，避人呼苞語，以所由勝敗。時吾父寓居棠邑畱稼村，兄暇則之大澤中，召羣兒，布勒左右爲陣。年十四，侍王父于蕪湖，踰歲歸，曰：「吾鄉所學，無所施用。家貧，二大人冬無絮衣，當求爲邑諸生，課蒙童以贍朝夕耳。」踰歲入邑庠，遂以制舉之文名天下。慕廬韓公見之，嘆曰：「二百年無此也。」自以時文設科，用此名家者，僅十數人，皆舉甲乙科者，以諸生之文，而橫被六合，自兄始。一時名輩，皆願從兄遊，而兄遇之落落然。江西梁質人，宿松朱字綠，以經世之學自負，其議論證疊經史，橫從穿貫，聞者莫不屈服。而兄常默默退，而發其覆，鮮不窒礙者。苞謂兄盍嘗曉之曰：「諸君子口談最賢，非以憂天下也。兄長余二歲，兒時家無僕婢，五六歲，卽依兄臥起。兄赴蕪湖之歲，將行，伏余背而流涕，其後少長，卽各奔走四方。余歸，兄常在外，兄

歸。余常在外。計日月得與兄相依。較之友朋之昵好者。有不及焉。兄常曰。吾與汝得常家居。俾二大人無離憂。春秋佳日。與二三同好。步北山。徘徊墟莽間。候暝色而歸。吾願足矣。及庚辰四月。余歸自京師。七月。兄歸自皖江。而疾遂篤。未得一試斯言也。弟林。先兄十歲卒。兄欲於近郊平疇。買小邱。自爲生壙。而葬弟於其側。辛巳四月。余爲弟卜地於泉井。夢土人云。伯夷今葬是。余不忍廢兄之命。遂以次年三月十六日。遷弟柩與兄并葬其村之北原。兄歿於康熙辛巳年十月二十一日。年三十有七。娶張氏。子道希。道永。銘曰。不若于道者天絕之。胡體其所受。而至于斯。矧材與志古固有不遂而又何悽。

弟椒塗墓誌銘

吾弟旣歿且十年。吾與兄奔走四方。尙不能爲得一邱之土。而兄亦以憂勞致疾。卒於辛巳之冬。踰年春。始卜葬於泉井之西原。而以弟附焉。自乙卯以前。吾父寓居棠村。弟始孩。依母及羣姊。而余依兄。戊午後。兄侍王父于蕪湖。而弟復依余。自遷金陵。弟與兄并女兄弟數人。皆瘡痍數歲不瘳。而貧無衣。有壞木委西階下。每冬月候曦光過檐下。輒大喜相呼。列坐木上。漸移就暄。至東牆下。日西夕。牽連入室。意常慘然。兄赴蕪湖之後。家益困。旬月中屢不再食。或得果餌。弟託言不嗜。必使余啖之。時家無僮僕。特室在竹圃西偏。遠於內。余與弟讀書其中。每薄暮。風聲蕭然。則顧影自恐。按時弟必來視余。或弟坐此。余治他事。閒

忘之矣。弟性警敏。雞鳴入市購米薪。日中治家事。客至。佐吾母供酒漿。日入誦書。夜參半不寐。體素羸。吾與兄數戒之不得。竊恨焉。果用此致疾。方弟之存。家雖貧。父母起居寢食。毫髮以上。弟皆在視。得其節。弟歿。吾與兄勤志之。輒復遺忘。吾父喜交遊。與諸公夜飲。或漏盡乃歸。旬月中。閒者僅三數日耳。弟恆令家人就寢。而已獨候門。及余繼之。則困不支矣。弟疾起於丁卯之冬。時余與兄避難吳中。弟偕行。咯血。隱而不言。血氣遂大耗。其卒也。以齒牙之疾。蓋體羸不能服藥也。先卒之數日。余心氣悸動。父命避居野寺。弟彌留。及夢中呼余不已。嗚呼。昔之人常致死以勤禮。余未有大疾而廢焉。悔與痛有終極邪。弟初名棠。君後更名林。字椒塗。卒於康熙庚午三月初四日。年二十有一。銘曰。天之於吾弟。吾兄酷矣。使弟與兄死。而余獨生。於余更酷矣。死而無知則已。其有知。弟與兄痛余之無依。毋視余之自痛而更酷邪。

鮑氏姊哀辭

鮑氏姊。幼名且。前母姚孺人出也。吾母繼室。姊七歲。苞之生。姊年十有二矣。時吾父寓棠村。家無僕婢。獨以苞屬姊。絕乳食。必啼。姊抱持。且行且食之。食竟乃止。遂以爲常。姊夫鮑氏。庶長也。君母嚴。姊敬事焉。因以庇所生之姑。有娣恣睢。負嫡勢相陵。兩家僕婢嘖嘖。姊於弟妹。未嘗一語及之。父母有問。則稱嫡姑均愛。姊歸三歲喪夫。逾年一子殤。撫娣所生女。久之。又撫其子。皆深愛如己出。既老。相視泛泛。姊嚶然也。一

日蹶而不能興。苞赴詔獄。姊適送女越境。無由語訣。又十有四年。蒙聖恩許假歸葬。而姊臥疾已經年矣。每見苞則嗚咽不可止。用此過旬。乃敢一往視。比北上。登程五旬有五日。而姊卒。時雍正三年三月二十九日也。苞性劣而遇屯。於父母兄弟。尠不遺恨者。而未若姊之深。苦不能悉。生不能依。疾不能養。又無子女以寄其愛。嗚呼。苞其若此心何哉。姊夫卒以療。既葬。仲復羸疾。其家用俗忌。發而焚焉。未知兆安在。聞姊喪。命兄子道希相視。諷度。然後以姊柩。歲將除。問未至。無以據。吾哀。乃涕泣而爲楚言。其辭曰。幼而苦辛。乃義之服些。天命早寡。亦未云酷些。崎嶇隱憫。遭是則獨些。既息以死。猶淹衾褥些。胡爲大年。俾暨此毒些。

鮑氏妹哀辭

雍正六年秋八月朔後三日。始聞鮑氏妹之喪。距其卒百二十有七日矣。兄子道希懼余盛夏病不勝哀。故緩告。妹爲先君第四女。渾厚靜默。於先母爲近。幼共饑寒。諸姊嫁後。佐母治家事。歸鮑氏子季昭。其伯兄孟虎。卽伯姊夫也。早夭無後。家以漸落。仲尙能少蓄藏。及季受室。則掃地無遺。與仲分日供二親。及巨嫂食。姑夙愛仲婦。及晚歲。每語人曰。季婦良苦。值主饋。吾食飲常得節。適伯姊之終。困牀席累歲。妹侍尤勤。嗚呼。自吾弟吾兄早世。女兄弟五人各窶艱。惟馮氏姊及妹有子。而馮氏姊中道亡。伯姊次之。今妹又次之。其存者謝氏妹。羸疾經年弗瘳。仲姊歸曾氏者。蹶而弱足。顧念死者生者。尙安用久留此衰疾羈孤。

之身於人世邪。余竟世爲羈。屬有天垂。父母兄弟及馮氏姊之喪。皆會余歸期。得親含斂。惟伯姊及妹。過時然後聞。抑自伯姊以前。每有凶咎。無在側與否。必先見其魄兆。而妹獨無。豈余混混塵事中。不復能自存其清明之氣邪。抑心之精爽。至是而消亡邪。乃爲文以摠余哀。俾道希薦告於殯宮。其辭曰。

嗟子同氣。性和壹兮。命則坎屯。鮮安吉兮。汝雖貧約。家室甯兮。惟是戚屬。涕淚盈兮。二昆瘥札。兩姊燿兮。存者三人。疾厄兼兮。鄉予在難。慘未別兮。老母北轅。痛永訣兮。昔歲生還。相慰撫兮。送我階庭。遂終古兮。生叢百憂。如藤繼兮。死果無知。解此縣結兮。

謝季方傳

此先生妹適謝氏者。標題與秦仲高一例。先刻誤改謝氏妹。今正之。壬子十月鈞衡識。

先君子五女。妹生最後。適謝氏。子師錫。其祖國初督學山西。饒於財。子姓習侈縱偷苟。妹始嫁。家中落。而未盡。妹夫尙多紈袴之好。妹性簡默貞靜。不相中。時被陵暴。戒女從者。勿聞於二親。余聞訊之。含淚終不言。數年中。舊業盡標。薪米半吾家。嘗給妹夫嘗遭厲疾。危在旦夕。余往視。妹私謂余曰。死生命也。恨無子。本生姑在堂。而兄公小叔。皆貧不能自存。將若之何。蓋懼身無依。歸母家而不能顧其姑也。余難後供奉。蒙養齋。妹送母至都門。每孟夏。余出塞。追冬始還。老母起居。惟妹是依。閒語苞曰。汝妹名甯壽。今果送吾老。古云。初生所命。多爲終身徵兆。理果有是哉。母終。遺衣物付妹。妹南歸。盡棄以買妾。生一子。自是以後。每隆冬常質繭衣複襦。忍寒凍而不忍妾與孺子饑。余命道希兄弟。計口計日。致米蔬薪膏。供億其家。而

奉妹於吾家。妹忽忽不適。問故曰。吾不與家人共寒饑。心不能安。一歲中必數歸視。未旬日。衣裳鮮在笥者矣。先人家則肉食有常期。妹每言不喜茹腥。而取其錢市果餌以食孺子。嗚呼。女子處饒樂而家室和平。易爲賢耳。昔先君子不治生產。而好交游。家無僕婢。吾母踰五十。猶日夜從竈上掃除。執苦身之役。然先君子所交皆楚越遺老。鄉邦俊人。古義尙可以自慰也。若妹之艱貞。則幾於易所謂明不可息者矣。其事雖族媼妹不欲使聞知。而余乃筆之書。蓋天下後世欲明婦順者。不可不更備此規軸也。

嫂張氏墓誌銘

嫂姓張氏。江甯人。年二十歸吾兄。先君喜交游。四方耆舊。及里中執友相過。日數輩。自嫂歸。兄督就中饋。老母始少得休息。余受室妻蔡氏。從嫂供事。多不逮。用此志不相得。及蔡氏亡。二女依嫂以居。少者痘。先母語余。女證危。氣息觸人不可耐。世母保抱。攜持。意色不厭。亦人情所難也。自先君歿。冢婦持家。余以老母盥饋及家事。數責讓。嫂常含怒。及余遭難。盡室北遷。幼女復依嫂以居。撫之不異於所生。吁。此雖嫂之明。抑吾母淳德。及吾兄身教之所漸漬也。余兄弟三人。弟林未娶而夭。余與兄奔走衣食。生常違離。兄將終。遺命三人必同邱。婦皆別葬。康熙壬午。兄及弟卜宅泉井之西原。近二十年。以陰流積壙起厝。復數年而地不可得。雍正六年正月。余在京師。兄子道希計母喪。且請誌以文。律按之。婦從夫宜附誌。而兄有成命。嫂當別葬。則特誌無妨也。兄既有前誌。而嫂葬無期。余衰羸恐不逮事。乃豫爲誌以慰道希兄弟之思。

嫂年六十卒。以雍正五年十二月十二日。子二。長道希。次道永。女一。適喬氏子。嫂素無疾。邇歲諸孫盡殤。又爲姻家所累。家益落。隱憂自懟。馴至大疾。嗚呼。是重可哀也。銘曰。從夫教。義克明。有子而良。終延世以蕃昌。

亡妻蔡氏哀辭

妻蔡氏。名琬。字德孚。江甯隆都鎮人。以康熙丙戌秋七月朔後二日卒。在余室。凡十有六年。自己卯以前。余客京師。河北淮南。歸休於家。久者。乃三數月耳。自庚辰至今。赴公車者三。待先兄疾。踰年。持喪。踰年。而吾父自春徂秋。必出居特室。余嘗從焉。又閒爲近地之遊。其入居私寢。久者。乃旬月耳。余家貧多事。吾父時拂鬱。旦晝嗟吁。吾母疲疴。閒作。吾與妻必異衾。竟夕無言。妻常從容語余曰。自吾歸於君。吾兩人生辰及伏臘令節。春秋佳日。君常在外。其相聚必以事故。不得入室。或蒿目相對。無歡然握手一笑而爲樂者。豈吾與君之結歡至淺邪。余先世家皖桐。世宦達。自遷江甯。業盡落。賓祭而外。累月踰時。家人無肉食者。蔬食或不充。至今年。余會試。注籍春官。歸踰月。而妻卒。妻性木強。然稍知大義。先兄之疾也。雞初鳴。余起治藥物。妻欲代余。不可。必相佐。又止之。則輾轉達曙。數月如一日也。壬午夏。吾母肝疾驟劇。正晝煩贖。不可過。命妻誦稗官小說以遣之。時妻方娠。往往氣促。不能任其詞。余戒以少休。妻曰。苟可移大人之意。吾敢惜力邪。余性鈍直。而妻亦慧。生之日。未嘗以爲賢也。旣其歿。觸事感物。然後知其艱。余少讀中庸。見

聖人反求者四。而妻不與焉。謂其義無貴於過暱也。乃余竟以執義之過。而致悔焉。甚矣。治性與情之難也。蔡氏在江甯爲儒家。妻生男二人。皆早殤。女二人。其卒也。產未彌月。蓋自懟以致疾也。年三十有七。于是流涕爲辭以哀之曰。惟在生而常捐。乃旣死而彌憐。羌靈魂其有知。併悲喜於余言。

兄子道希墓誌銘

道希。吾兄百川長子也。性淳一。兒時果珍在前。不予不求索。多病苦藥物。予視之。則斂容而飲。大父母愛之。每以忘其憂。年十七。入縣學。課試必高等。以家禍遂棄舉業。力持門戶。余初被逮。偕縣令蘇君以特召。白吾母。及邀寬法。老母北上。終不知余之在難。以道希能巧變以安大母也。時弟妹皆幼。內憂外患。獨身當之。遂得危疾。連年累歲。吾母卒後。入省。余者再。疾皆動。每切戒毋更至。及終母喪。迫欲依余。余發家書。必申前諭。乾隆元年。詔舉孝廉方正。四年冬。旅見。上有褒語。命仍應制科。會弟道永通判京兆。僕隸設詐。得財事發。朋謀誣污主人。以自脫。道希氣噎。及聞其弟受刑。自日未中。以至於昏。大慟。遂沉篤。厥後大小司寇親訊。半得昭雪。而道希疾不可振矣。自先兄與余依古禮。經定齋期喪次。余雖在外。遇期功。道希必率諸弟出次。始成童。喪余妻。啼號如失怙恃。大母及余設辭多方。不能曲解也。余子女五人。愛道希。或過於同生。其卒也。年五十有四。在余側不異爲孺子時。余視之。亦如孺子。平生無一言一動。使余心隱然不

適者。茲來盡室以行。蓋將送余之終。而余乃視其棺斂。其妻子又以道永之禍。窘急遽歸。余惡能無恨哉。然於道希繾綣依余之心。則可以無恨矣。道希卒於乾隆六年正月十八日。妻岳氏。工部主事岳康女。有賢行。生子仁。聰明和順。十歲而殤。女二人。繼室以其妹。無子。以道永之長子惟敬嗣。某年某月某日。葬於某鄉某原。銘曰。

雖離慙以終世。實無忝於所生。我憑當心。兩弟在旁。安歸泉塗。汝毋惻傷。

兄子道希婦岳氏墓誌銘

雍正九年九月望後二日。日既夕。余歸自海淀。渴且饑。會兄子道希婦岳氏訃至。家人進糜粥。甫入口。氣上逆而止。夜不能寐。蓋悲余在難。顛危困迫。惟道希首當之。而婦實共之。又念道希貞疾垂老。既喪其良子。而又亡其妻。益無以安其身也。岳氏來婦。先兄之歿久矣。事余極恭順。而事姑之禮。或未詳。余時督教。及余難後。越十有三年。得假歸葬。則姑姊妹翕然稱冢婦之良。岳氏有子曰仁。生十年而殤。其生及殤。余皆未之見也。而聞其聰明淳篤。秀出於衆。其天也。家人咸爲感傷。而忍心者。或用以相詬訐。冢婦常示之以默。衆尤以爲難。余自有知識。見族姻里閭。以及四方所傳聞。凡婦人之邪惡。而作慝於夫家者。動數十年無止息。甚者名辱家毀。而其身乃康強而考終。其賢者非貧病無子。則不得於夫。其當於夫。必早寡。或中道而隕其生。嗚呼。咄哉。余生世幾何。自先祖賢先兄亡弟。皆以陰流入壙。出而攢。已逾十年。若亡妻。若

兄孫仁。若嫂氏。先後權厝近郊者。壘壘焉。岳氏之葬。未卜其何年也。憫其賢而無子。又不得與夫偕老。故豫爲誌銘。以畀道希。且以紓其哀。岳氏。四川涪州人。工部主事康之女。卒於八月望前一日。年四十有六。女二人。銘曰。

生無逆於倫。死有思於人。亦何恨乎無身。

兄孫仁壙銘

兄子道希。有子曰仁。余北徙後。始生於金陵。昏昏塵事中。未暇詰其性質何等也。雍正元年。吾宗邀恩赦。除旗籍。秋八月。將遣妻子南歸。祭告於考妣。旣餽餘。南書至。則仁死矣。余感而疾。逾月弗瘳。蓋先兄之子。二而在孫。惟仁。曾祖副使公以後之宗子也。其父之書曰。兒弱植。自四五歲得氣疾。旬月必作痛。苦不可忍。少閒。則不待督課而盡志於書。生十年。通四書毛詩。每叩疑義。輒困其師。夕返內舍。數舉經說。以開姑姊妹。死之日。自恨曰。仁不孝之子也。自今吾父母大母。弗得甯矣。嗚呼。仁之生。適當吾宗禍氣之興。其父母震動播越。則受氣之不完。固其理也。然造物者旣不欲假以生。而特賦以清明醇懿之性質。何爲其然哉。仁生於康熙五十三年三月。以雍正元年八月殤。葬於江甯南門外。銘曰。

家禍甯爾命傾。繫神者之不弔。而昇以毒余之中情。

七思

兄百川先生

憶生小兮棠之鄙。兄束髮兮余毀齒。招羣兒兮布行陣。據岡陵兮畫營壘。比受書兮心開。莘野傅巖兮神
往來。聞四鄉兮捐瘠。憂旱蝗兮忘寢食。既移家兮白門。兄侍祖兮蕪江墳。念二親兮背膺。語含悽兮夜
達旦。既浹歲兮來歸。歎愚迷兮不自知。親長艱兮子職失。顧外此兮安所恤。勤俗學兮召生徒。盜無儲兮
朽無襦。各掉臂兮分馳。心搖搖兮天一涯。咨祁寒兮暑雨。溫清常違兮後難補。誓飲水兮啜菽。依庭帷兮
勿再出。兄返棹兮秋清。喜相持兮心暗驚。上高堂兮強笑語。疾已纏身兮瘵心腑。困藥石兮經年。志氣清
明兮命不延。謂正終兮毋黷。將絰纊兮猶齊慤。誘二老兮安眠。喻妻兒兮勿前。瞑移時兮忽張目。申余戒
兮情尤蹙。嗟童稚兮相隨。動止因依兮不暫離。視燠寒兮戒走趨。恩勤如母兮義兼師。長飢驅兮僕僕。痛
乖分兮苦相助。存夜氣兮懼枯亡。警畏途兮虞莽伏。恨余頑兮弗醒。終穢殖兮冥行。疎周防兮罹罪罟。憂
病母兮離鄉土。負親恩兮悖兄訓。撫寸心兮難自問。永思騫兮百感集。腸繚轉兮嗟何及。

弟椒塗

兄始赴兮鳩茲。余心孤兮類狂癡。母挈弟兮界余。寢食相依兮漸坦夷。弟垂髫兮能內事。左右無方兮達
親意。吾翁夜遊兮星斗闌。弟唵誦兮待更殘。迓親賓兮拂几席。竈下煎和兮助母力。嗟余繼兄兮數行遊。
弟居守兮愴無憂。歲己巳兮秋雲黓。宵濟澄江兮幽夢感。荆榛四塞兮塗冥冥。連山赤黑兮延火烝。余呼

弟兮母前行。弟赴火兮如絃驚。叫天觸地兮悲填膺。忽寐覺兮心忤忤。竭來歸兮歲將畢。弟果遘兮齒牙疾。厲熏心兮苦自匿。懼骨肉兮憂思逼。涉季春兮月生魄。命遐終兮阨鬼伯。哀吾生兮負人紀。恨於弟兮無倫比。饑缺食兮寒思繇。縈苦辛兮夜不眠。惜寸晷兮釋經書。每發問兮心開余。余卞急兮多馮怒。弟愉婉兮徐相喻。謂行修兮德可成。嗟中道兮隔幽明。當沈疴兮正暝眩。余懷憂兮體忽變。重愛身兮輕失義。既彌留兮忍相避。弟卒前六日。余外腎忽蹙縮入腹內。爲醫者所嚇。避居野寺。痛入天兮悔莫釋。死自罰兮終何益。余庚戌立秋前二日。疾病作。遺令敕時袒右臂。

伯姊

余鬢角兮未生齒。持負噓呵兮屬伯姊。姊年先兮一紀。動息無違兮宮事理。幼學步兮奔騰。重強負兮危能升。姊俄瞬兮心經。食爲吐兮櫛爲停。逮纁袖兮辭姆。承兩姑兮心獨苦。介恃嫡兮競橫。冢婦攜謙兮不敢並。時歸甯兮母有問。稱姑慈兮奴無愠。年過二十兮卽爲嫠。侍食重闈兮逮事祖姑苦抑悲。姑旋亡兮子并天。昏夢悲啼兮寤辟標。中歲長齋兮祝嫡姑。宵旦依依兮臥起扶。垂有妹兮四妹亦歸鮑季子爲宛若。謂餘生兮將有託。夫之弟子兮弟之女。嗣爲婚媾兮力機杼。門內團樂兮聚親屬。菽水能供兮得安處。大命至兮天時對。晝立清庭兮忽顛躓。枕席吟嚶兮累年歲。初言謔兮既魂悸。嗟余告歸兮姊在牀。語不辨兮淚盈眶。每一見兮增悲痒。不經旬兮不敢視。迫公程兮作死別。及半途兮姊萎絕。痛在世兮常生離。永負心兮更

何說。

仲姊

姊墮地兮前母亡。母鞠育兮懷閔傷。恩雖勤兮教未執。女事煩勞兮多不習。既有家兮不相中。賴姑慈兮尚無閔。中歲姑亡兮家益落。竟世飢寒兮常嗃嗃。姊夫既耄兮病沈堙。五易春秋兮伏枕茵。謁蹶宵晨兮併百憂。年過七十兮影無儔。天難呼兮惟自慙。力敵心灰兮命亦盡。嗟姊疲痿兮復踰年。地闊天長兮心目懸。念先妣兮歿賣志。惟姊存兮愛可寄。伯姊殞兮姊繼之。痛骨脈兮更無遺。有女新孳兮生事窒。吾身後兮宜勤恤。

三姊

昔吾父兮不憂貧。拚掃炊烹兮母實親。兩姊出嫁兮家無人。姊孩稚兮備艱辛。弟妹啼號兮強飭力。夜倒衣兮晝忘食。剝啄聲喧兮庭有客。趣殺蔬兮理盤櫛。嗟余兄弟兮常危疾。姊在視兮時銜恤。勤藥物兮籲神靈。每竟夕兮燈熒熒。年逾二紀兮復愆期。入贅某周兮始授綏。姊夫歲出兮守閨窻。養公姥兮尤勤劬。米薪強半兮母家索。潔饋食兮甘糠覈。苦遭長叔兮性隘儂。養不顧兮偏工讒。稚子寒衣兮不蔽膝。謂兄嫂兮餘私積。朝進食兮暮加衣。姑含怒兮滋乖違。膈噎經年兮隱自悲。命在須臾兮畏母知。弟早婚兮兄繼萎。余天涯兮身係羈。念姊仁恩兮常惻惻。心欲報兮無終極。余盛夏兮始來歸。姊初秋兮與世辭。志長

費兮更誰訴。情冤見兮惟泉路。

妻蔡氏

之子歸予兮歲將暮。獻歲燕南兮就知故。吾父吾兄兮書問傳。定省溫恭兮介婦賢。暑霑襦兮寒栗膚。隨冢婦兮饋中厨。日月相疎兮歸路遠。十載崎嶇兮轡三返。誓言息足兮守故邱。兄櫻危疾兮母沈憂。子茫洋兮若無歸。妻左右兮事無違。晝娛姑兮誦古記。夜助我兮斂荆燧。時方娠兮苦無力。氣弱心孤兮強自飭。哀吾生兮長卒。逐公車兮復再出。丙戌首夏兮經邗溝。生徒請業兮爲淹留。願假園林兮奉老親。四序皆宜兮景物新。歸告高堂兮欣有託。入室申言兮理行囊。秋期近兮一葦杭。自今與女兮同安樂。審將言兮容忽覩。吾與君兮結懽淺。別常淹久兮見常稀。會當行兮事或舛。嗟斯言兮竟成讖。閱月身亡兮若弦翦。二親含感兮顏不開。稚女求哺兮淚常泫。踰歲旻天兮降鞠凶。吾父康強兮命亦終。衰麻釋兮刑禍延。關木索兮復連年。寬刑書兮編禁伍。母依子兮來江滸。望關河兮阻深。衰疾熒熒兮遡風雨。念吾妻兮若未死。寢食扶將兮尙可倚。妻早逝兮免憂煎。獨予身兮積疚愆。

兄子道希

春陽兮載歎。白日兮昭昭。而杳杳兮卽長夜。患吾心兮若焦。而出腹兮呱呱。吾二親兮色愉。比齒生兮含枚。盡室歡忻兮相告語。時風咳兮寒瘡。嗟余弟兮重煩勞。安汝眠兮畏汝驚。保抱終宵兮圈豚行。歎門祚

兮衰殘。失所怙兮常樂樂。及受室兮歲三遷。祖重承兮泣血漣。既脫衰兮余遘難。宗禍延兮天屬散。內機
辟兮外置學。狐晝鳴兮鬼夜闕。顧四海兮一身多。母妻呻吟兮弟妹哦。望何門兮投止。竄窮山兮伏戎起。
陰霾靖兮皇穹開。精已銷亡兮憂未弭。愛子溢兮朝露。痛春暉兮不再駐。特孝婦兮同心。子隨姑兮卽
長暮。挈家累兮依所親。冀桑榆兮志少伸。駭驚風兮折雁翮。氣噎塞兮橫胸臆。兄心摧兮弟叢棘。弟未死
兮兄幽隔。而父而母兮兆南岡。妻對姪兮子在旁。魂營營兮識路。望江天兮隱雲樹。先君子同產八人。乾
歿。惟叔父小姑尙存。叔母早世。叔父感傷。欲做楚辭。作七思。含意聯辭。輒氣結而中止。今年正月。兄卒於
京邸。叔父哭之。慟兼旬。夜不能寐。始爲兄成一章。浹月中。次第屬草。命永編錄。問序次之義。曰。男女異長。
諸姑出室。不可以齒序也。叔母亞諸姑。何也。曰。不以服之重輕。先天屬也。置季姑適鮑氏者。何也。曰。有子
年近六十。處境順。哀辭已前具矣。大父大母無述焉。何也。曰。自古無子別父母之詩。陸帖作於中途。但言
父母思已。而不言已思父母。唐人作觀別者。不自言離其親。不忍言也。親亡而自痛自責。則義盡於蓼莪
矣。騷之義。隱深其辭。愉悅而彬蔚。茲則易之以直樸。何也。曰。至親不文。修辭之體。要則然。乾隆六年四月
望前二日。
道永識。

望溪先生文集卷十八

雜文

兩朝聖恩恭紀

康熙癸巳年二月。臣苞出刑部隸漢軍。三月二十三日。聖祖仁皇帝硃書。戴名世案内方苞。學問天下莫不聞。下武英殿總管和素翼。日偕臣苞至暢春園。召入南書房。命撰湖南洞苗歸化碑文。稱旨。越日。命著黃鐘爲萬事根本論。越日。命作時和年豐慶祝賦。上告諸翰林。此賦卽翰林中老輩兼句就之。不能過也。嗣是每以御製詩文御書。宣示南書房諸臣。將命者入復。輒叩曰。苞見否。閒與大臣侍從論本朝文學。及內閣九卿所薦士。必曰。視苞何如。是歲八月。移蒙養齋校對御製樂律厯算書。書奏。數問曰。苞承校否。壬寅夏。臣苞隨蹕熱河。六月中旬。命回京充武英殿總裁。浹日發御製分類字錦序。命校勘。衆皆曰。上文字皆命諸臣公閱。獨閱者惟故大學士孝感熊公賜履。桐城張公英耳。冬十有一月十三日。聖祖登假。我皇上嗣位。廷議恩詔。皇帝手書數條。下內閣。其一以族人罪犯。牽連入旗者。赦歸原籍。時八旗合詔條者。惟戴名世案。而獄辭例不得援赦。刑官特請下九卿更議。卒蒙恩赦。雍正元年三月二十五日。臣苞拜劄謝恩。莊親王傳上命語苞。朕以苞故。具知此事。其合族及案内肆赦皆由此。其功德不細。臣苞驚怖感動。不

知涕泗之何從也。始戴名世本案。牽連人罪有未減。而方族附尤從重。獄辭具於辛卯之冬。五上五折本。逾二年癸巳春。章始下。蒙恩悉免罪。隸漢軍。苞伏念獄辭奏當甚嚴。而聖祖矜疑。免誅殛。又免放流。臣身叨恩待。趨走內廷。近十年。教誨獎掖。雖無過親。臣蔑以加也。此聖祖之仁。所以如天。而皇上肆赦臣族。揆之聖祖。遲疑矜恤之心。實相繼承。顧臣何人。任此大德。自惟愚陋衰疾。欲効涓埃之報。其道靡由。謹詳紀顛末。俾天下萬世。知兩朝聖人之用心。蓋不欲一夫或枉其性云。

聖訓恭紀

雍正元年。臣苞蒙特恩。赦許歸籍。二年。請假歸葬。蒙恩給假一年。既事。以三年三月望後九日。抵京師。詰旦。具劄恭謝聖恩。莊親王果郡王入奏。上憐臣苞弱足。特命內侍二人。扶翼至養心殿。入戶再進。跪御坐旁。垂問臣苞疾所由及近狀。臣苞喘喙。氣不能任其聲。上曰。汝心飢朕德。復何言。聽朕告汝。汝昔得罪。中有隱情。朕得汝之情。故寬貸汝。然朕所原者情也。先帝所持者法也。先帝未悉汝情。而免汝大刑。置諸內廷。而善視汝。是汝受恩於先帝。視朕有加焉。如汝感朕德。而微覺先帝未察汝情。不惟虧汝忠。亦妨朕之孝。汝思朕德。卽倍思先帝遺德。則汝之忠誠見。而朕之孝道亦成。於時臣苞心折神竦。追思前事。感念聖恩。有懷哽咽。不能置一辭。中間聖訓洋洋。不能悉記。未敢敘述。最後聞天語甚明。朕惟以太公之心。循道而行。無非繼述先帝志事。汝老學當知此義。故明告汝。俾汝知朕心。於時臣苞氣少定。

始克仰而言曰。欽承訓辭。雖古聖人之言。無以過也。上顧內侍。命取供御茶芽二器。賜臣。臣苞三拜稽首。聖容若矜。曰。朕觀汝行步良難。雖供事亦稱汝力。毋自強。時復自將息。臣苞愴動。伏地不能聲。上徐命內侍翼以出。臣伏念自我皇上御極以來。凡所以敬天勤民。涖官修政。以推廣先帝遺意。而播諸制詔。發於訓誨者。皆實與典誥同揆。卽茲所以訓臣苞。使天下萬世爲臣子者聞之。皆將凜然於君父之大義。而興於忠孝。所以矜恤臣苞者。使天下萬世孤微阨窮之士聞之。莫不愾然於聖主之德意。而發其中誠。豈非中庸所稱。言而世爲天下則者乎。越數日。有旨。凡特召見。及督撫提鎮入朝。親聆訓諭者。必敘述繕寫進呈。恐有舛誤。臣苞以白衣領事。未敢自比諸臣。大學士張廷玉曰。聖恩深渥。不得以無位自嫌。乃宿齋敬識。以俟彙進。而附諸臣之末云。

通蔽

譽乎已則以爲喜。毀乎已則以爲怒。心術之公患也。同乎已則以爲是。異乎已則以爲非。學術之公患也。君子則不然。譽乎已則懼焉。懼無其實而掠美也。毀乎已則委焉。委吾得知而改之也。同乎已則疑焉。疑有所蔽而因是以自堅也。異乎已則思焉。去其所私以觀異術。然後與道大適也。蓋稱吾之善者。或諛佞之虛言也。非然則彼未嘗知吾之深也。吾行之所由。吾心之所安。吾自知之而已。若攻吾之惡。則不當者鮮矣。雖與吾有憎怨。吾無其十。或實有四三焉。與吾言如響。必中無定識者也。非然則所見之偶同。

也。若辨吾之惑。則不當者鮮矣。理之至者。必合於人心之不言而同然。好獨而不厭乎人心。則其爲偏惑也審矣。吾友劉君古塘。行直而清。其爲學常自信而不疑。心所不可。雖古人之說。不苟爲同也。而好人之同乎己。夫古人之說。不能強吾以苟同。而欲人之同乎己。非心術之蔽乎。知君者。猶以爲自信之過也。不知者。將以爲有爭氣也。君與吾離羣而索居久矣。會有所聞。書以質之。

表微

顧侍御用方。窮時喪耦。十有一年弗娶。旣得仕。納徵於李氏。會先帝之喪。踰歲弗親迎。或詫焉。其官適罷。曰。吾貧未能也。旣而起家爲戶部郎中。擢御史。掌長蘆鹽政。歲賜數千金。詫者滋多。曰。吾迫公事未暇也。其娶以雍正三年冬。十有一月望後一日。推其心。蓋謂三年中不宜有空月也。問焉。而不自懌。不以人之所不能者愧人。又其厚也。先帝始崩。守官者各次其守。余次於佛舍。將歸。語二三君子曰。在禮公等居倚廬。宜再期。今旬未三終。歸至家。止於外。不入室焉。其可也。聞者皆變色易容。蓋俗之偷。以禮爲徒觀衆人之耳目也久矣。古之人事君猶事父也。謂制以義而不敢違。是薄於德。於禮虛者也。若用方者。其明於禮意乎。傳其事與言。俾事君者有省焉。

釋言

余在江南。卽聞北方之賢者曰李君剛主。及與久故。益信其爲人。而其鄉人雜然議之。嘗叩其親故。所病

於剛主有徵乎。曰：是家貧以適四方，造請于州郡而取饒焉。妻無子，乃別居。倉廩充溢，而食必粢糲。子婦執苦身之役，親之喪，赴弔者渴飢皆之逆旅，而求宿焉。賢者固若是乎。余告之曰：吾聞剛主躬耕善稼穡，雖儉歲必有收，未聞以干請也。士友所共聞知者，明索二勢家延教其子，不就，直撫安溪李公，稱其學行於天子，不往見。諸王交聘，每避而之他，乃以干請釣錙銖之利乎。至於食必粢糲，妻妾操作，而子婦從之，則李氏之家法也。親賓能遠赴其喪，何惜旅宿。剛主居湫隘，家無僮婢，創鉅痛甚，而責以供具，不亦難乎。其與妻別居，則余嘗叩之矣。曰：是多言不順，吾常隱焉。有女早寡，而主張更嫁，吾不忍見，故使別居。既乃合併而陰絕焉，絕之者何？生異寢，死異穴也。合併者何？生同宮而衣食之，死則葬埋之也。此古應出而不行之禮，未可以病剛主。聞者語塞，而色猶疑焉。他日以語剛主，剛主曰：人心不可謂，子安以辨爲哉。韓子云：動而得謗，名亦隨之。謗而無名者，衆人也。名而無謗者，鄉愿也。雖然，美炙不如惡石，謗言彰，吾滋懼矣。名則諸君子之過爾，因并識前語，作釋言。

明史無任邱李少師傳

康熙辛未，余始至京師，華亭王司農承修明史，四明萬季野館焉。每質余以所疑，初定列傳目錄，余詫焉。曰：史者，宇宙公器也。子於吳會間，三江五湖之所環，凡行身循謹，名實無甚異人者，多列傳，而他省遠方，灼灼在人耳目者，反闕焉。毋乃資後世以口實乎。季野瞿然曰：吾非敢然也。吳會之人，尙文藻，重聲氣，士

大夫之終鮮不具狀誌家傳自開史館牽引傳致旬月無虛重人多爲之言他省遠方百不一二致惟見列朝實錄人不過一二事事不過一二語郡州縣志皆略舉大凡首尾不具雖知其名其行誼事迹不可鑿空而構欲特立一傳無由摭拾成章故凡事之相連相類者以附諸大傳之後無可附則惟據實錄所載散見於諸志此所謂不可如何者也乾隆六年余將告歸任邱李法孟以其高祖少師公神道碑墓表乞爲傳余已諾而未暇爲及歸檢篋篋惟法孟手書尙存中言少師邊功著明史韃靼傳生平大節則同邑孫文正公贈公子恆麓序可徵余考明世邊患與國始終而韃靼部最劇韃靼之患正嘉開最劇惟萬歷初俺答歸順苟安者二十年及奢力克有貳心而套部海部松部並起雜番數十種皆乘閒猖狂出沒塞下西甯以東甘涼洮岷歲無甯居關中人心搖搖自二十三年少師總制三邊諸部入寇者必挫傷大失所欲再出師分道襲擊復松山故地山陝恃以無恐者近十年其規爲方略必有可爲後法者文正稱公功成身退以出處係天下安危則立身之本末進退之時義必可與古賢爲伍又曰奉身如奉玉則又謹於小物而百行具完今見於韃靼傳者不過命某將禦某寇出某道擊某部其克敵制勝之謀猷無一見焉是乃季野當日所僅得於實錄雖欲摭拾莫由成章而歎爲不可如何者也觀文正序公子恆麓視事北司鋤豪蠹扶忠直若置身度外與少師同符是恆麓事亦宜附公得書而公乃無傳嗚呼惜哉余感公事追思季野所云故並著之以見爲人子孫者於先祖之德善功烈鮮不欲發揚張大以爲光耀或居

下處幽而無以自通。國家宜著爲功令。凡讜言聞於國。實德施於民。以及庶士庶民。仁孝節義。過越於尋常者。子孫鄉人。得實陳行跡於郡守。郡守考核書二冊。一下學官。一升翰林典籍。俾作史者得兼陳詳較。而中懸衡焉。庶幾輕重不失其倫。公名改號次溪。他日若得其碑銘及表。終當爲傳以詳之。

記夢

康熙甲午立秋日。余在熱河。夢偕先兄隨先君過尙默陳先生故居。同集者攝山汪丈。清傳楊君。將飲酒。他客朋至。忽覺已歸土街草堂。先君指畫。將營西偏爲燕息之齋。俄而寤。先君性豪曠。不可一日無友朋。常以寅及巳讀書。午及申爲山澤之遊。歸而飲酒。憶自六合遷金陵。同好者前輩則杜濬于皇。杜芥蒼略。執友則王裕成公及陳先生。招呼遊談。雖風雨之夕無閒。時余九齡。先兄年十一。常奉盤匱侍酒。自兄年十四。侍王父於蕪湖。其後與余皆餬口四方。涉歲移時。乃得歸省。兄歸。余常在外。余歸。兄常在外。又計日爲行期。故每侍先君與諸先生。醺集歡樂之餘。私心愴動。雖先君亦然。而不忍言也。自先兄夭枉。余始不敢遠遊。而二杜及王皆前歿。獨陳先生尙存。而先君少所知。汪丈自南郊遷北里。楊君託末契。遊從最密。時余以窮空。復數爲近地之遊。又計偕者三。其家居凌雜米鹽。不可解脫。追念平生。侍先君與諸公醺集。時甚少。而與先兄偕。則尤加少焉。計惟童子時爲然。爾時已知其樂。而不知其後思此之悲也。自先君下世。汪丈亦歿。楊君老而窮。走四方。而余禍發於不虞。以辛卯冬十月赴詔獄。將行。陳先生謁蹶嘔血。縣門

外。今寒暑復四易。先生近八十。計此生不得再相見矣。余既編籍旗下。上哀矜。使以白衣。廟館閣校勘。自痛邱墓無主。故雖病且衰。而黽勉從事。蓋以天子仁聖。猶萬一冀垂焉。記曰。霜露既降。君子履之。必有悽愴之心。非其寒之謂也。今茲以秋之始。感於夢寐。而得依父兄之側。從先人之居。豈其幾之先見者與。抑積思所結。而未必其有應也。因書以徵於後焉。陳先生名書。汪丈名泳思。楊君名修。與王先生皆金陵人。杜公兄弟爲黃岡人。康熙五十三年六月二十九日記。

記百川先生遺言

先兄百川先生曰。處士則有虛聲。鄉鄰親戚則有私毀譽。若民之於上。利害切身。不謀而同。故吏自一命以上。名不虛作。人不可以好名相疑。己不可怙過。而謂民言不當。有合葬其父母及前母者。以位次問先生。曰。神道尙右。而程朱所言皆尙左。朱子葬其妻。存東畔一位。則尙左明矣。若三柩同葬。依古禮則父當中。前母右。繼母左。如尊左則父當中。而左右易位。若父與前母既葬。父左則新祔者次於右。父右則新祔者次於左。又曰。周禮大司樂。有享先妣之樂。在享先祖之前。故鄭康成謂周以后稷爲祖。而姜姬無所配。是以特立廟祭之。謂之闕宮。斯干之詩曰。似續妣祖。箋曰。妣。先妣姜姬也。商頌亦溯源於有娥。皆諸侯不敢祖天子之義。以是推之。庶子於生母當別葬。韓魏公葬生母胡氏柩。退嫡母尺許。趙炳族葬圖說。引以爲據。非古也。

答問

兄子道永重修南郊漢前將軍關公廟。問曰：自書傳以來，至忠大勇，英略蓋世，且卓見聖人之道，而死於非命者，莫過於公與岳忠武。故浩然之氣，長震動乎萬世之人心。然公之廟無地無之，而忠武之祠，則連州比郡，或無一二。又公之神，常若充滿，徧布於宇宙，而時見其精爽，其大者示威於戰陣，其小者凡有禱問，其應如響，而忠武無是也。是有說與？余應之曰：自周衰，戰國諸君，糜爛其民，至暴秦而生民之類，幾盡矣。漢高祖出之於水火之中，治尙寬大，有天下者，垂四百年。自武帝而外，桓靈以前，雖有庸君，患不及民。民之思漢也深，則激於公之忠義者切。又東漢之末，士大夫多明於義理，而重名節，故諸葛武侯遺書，搜錄而表章之者，乃晉氏也。其書所謂賊，卽時君之祖宗，以是觀之，則公遇難時，魏吳之士民，羣聚而祠之。其君臣必見爲當然，故震動宇宙，而結聚於人心者，深固而光昭。忠武爲秦檜所戕，身死而檜之餘恨，猶未解。吏民畏檜之威，直至檜死，乃敢訟言忠武之冤。孝宗朝始得立祠於鄂，而屢世相臣，奸庸相繼，多主和議，偷安以保妻子，大率與檜同心。故忠武之義氣，雖不沒於人心，而祠祀則寥寥焉。此事勢之自然，於二公無加損也。夫神者依人而行，舉億兆人之精神，皆專嚮於公，則公之神自隨地而監照之。忠武卽間有祠祀，未有就而禱禳祈報者，則其神何由與之相應，而有所徵驗哉？昔孔子夢見周公，不聞堯舜文武，並見於夢，則神明之感通，由於生人精神之結聚明矣。故凡禱祈於公，行汙而所問之事非正者，簽辭多

不應以其精神不足以相感召也。既以告道永，因思此義亦宜存天壤間，乃筆之。

爲秦門高貞女糾舉本引

高貞女，吾師大理卿宛平公同產弟頤侯次女也。計嫁秦氏子文照，舅姑前歿。雍正五年春正月，文照死，貞女請衰經歸秦氏，代夫承重事祖姑。其父大駭，招余陳禮經以喻之，志不移。遂以二月朔歸秦氏。時年二十有二，其舅之側室李氏感焉，誓守節與貞女同臥起。於今六年矣。大理兄弟三人，惟季有子。大理卒，家散，季又卒，其子流滯新樂。及頤侯卒，繼室暨幼女貧不能自存，貞女父黨無一人可倚，而其夫之叔父子正，持手而食，養母畜妻子，旁及兄之側室子婦，力不能支。余歲時過秦氏，見貞女敝衣菜色，或冬無棉，而意色常和以安。嗚呼！天屬之情，秉彝之性，惟遘閔凶備危苦，而後庶一見之。如貞女之守志，李氏之慕義，子正之簞艱而不棄其親，皆人紀所賴以維繫也。恨余力不足以振之，乃告於友朋及大理之知舊姻親，各出其力爲舉本。付里中士大夫重然諾者，主子貸爲貞女衣裳綫纈之費。終則棺斂焉。傳曰：人之于天也，以道受命。若貞女其殆庶幾無負於所受者歟！敬而恤之，豈惟大理之親舊生徒，義不可以苟止哉。

檄濟甯諸生會課代

蓋聞風教之興，士能宿道而民胥效焉。文章者道藝之餘也，而卽末以窺其本，十可四三。某自陳力河壩，學殖荒落，而少所講肄，未能盡忘。茲承乏鄒魯之鄉，竊欲觀於國風，魯多君子，況近聖人之居，而漸其流。

澤者乎。今以某月某日。與諸生期於州學。合堂陳藝。各盡所長。俾得寓目焉。

移山東州縣徵羣士課藝文代

蓋聞齊魯之間。之於文學。自古以來。其天性也。文者。學之枝葉。制舉之文。又其近者爾。然以效聖人賢人之言。則心之精微。達於辭氣者。固可以得其崖略焉。某備官漕河。不與民治。而發徵期會政令所及。州邑凡三十。東夏文獻之區。計過半矣。竊欲觀於國風。以窺尋羣士之所藏。謹擇四書題二。五經疑義各一條。願切磋究之。毋以某懵學寡聞。而有遐心也。

